

مروى جوهر

رواية

يحدث ليلاً
في الغرفة المغلقة

"مستوحاة من أحداث حقيقية"



الأعمال الكاملة

t.me/kotbhm

يحدث ليلاً

في الغرفة المغلقة

مروى جوهر: يحدث ليلاً في الغرفة المغلقة، رواية

الطبعة العربية الأولى: يناير ٢٠١٨

رقم الإيداع: ٢٠١٧/٢٣٩٢٥ - الترقيم الدولي: 9 - 095 - 807 - 977 - 978

جميع حقوق الطبع والنشر محفوظة للناشر

لا يجوز استخدام أو إعادة طباعة أي جزء من هذا الكتاب بأي طريقة

بدون الحصول على الموافقة الخطية من الناشر.

© دار دَوْن

عضو اتحاد الناشرين المصريين.

عضو اتحاد الناشرين العرب.

القاهرة - مصر

Mob +2 - 01020220053

info@dardawen.com

www.Dardawen.com

مروى جوهر

يحدث ليلاً
في الغرفة المغلقة

رواية

دُون




للنشر والتوزيع

إلى زينب أبا يزيد...

«صاحبة البصمات الأولى لبدء رواية

أحداث خرجت عن إطار العقل والمنطق»

«إلى كل من سقى الأجنة جياً ليفرحوا بالحياة»



رجل في أواخر الثلاثينيات من عمره، يميل لونه إلى السُمرّة النادرة الرؤى، له عينان واسعتان، ثاقبتان، حالمتان، سوادهما مُتفحم ساحر يدعوك للإبحار بحرية داخلها، قلعتان تحميها أهداب كثيفة وطويلة، ذو أنف مستقيم، شفتاه متوسطة السُمك، أسنانه بيضاء متساوية مُتراصة، شعره بين أملس ومُجعد يُلامس كتفيه، يكسوه السواد الفاحم كما عينيه، مُرصع بخصال بيضاء تُضيف وقارًا وتُزيده جاذبية، كث اللحية والشارب، طويل القامة، ممشوق القد، أصابع يديه طويلة رشيقة كعازف موسيقى.

نهض من جلسته في تواضع وابتسم الشيخ «القنائي» ابتسامة هادئة، فلمحت على إحدى خديه فجوة زادت من جمال اشراقه، جعلتني أحلق في سمائه وأنا ما زلت واقفة مكاني أحرق فيه، ألقى تحيته في خجل وأدب.

- أهلا بكم جميعًا وسهلاً.

وقف بجانبنا شيخ جليل يتحدث إليه في توضيح.

- لقد حضر جعفر يا سيدي ومعهُ ضيفته كما أخبرتك.

- أشكرك يا شيخ «قرشي».

التفت الينا وأكمل.

- قد حدثني الشيخ القرشي عنك يا جعفر وعن ضيفتك

الكريمة وطلبكما رؤيتي.

ربما أحلم، فأنا من أشدّ محبيه ومُرِيدِهِ، ومع ذلك لم أجرؤ يوماً

على تمنى مقابله، تبسم جعفر وقال في فخر.

- لقد أسعدتني رؤيتك يا شيخنا العزيز، وإني أتشرف بحضور

درسك كل أربعاء بعد صلاة العصر كما تفعل دائماً، لكن ضيفتنا

مريم من أشدّ المعجبين بمدرستك وتريد أن تنهل من بعض علمك.

تبادل نظراته وابتسامته بيني وبين جعفر.

- أهلا بك يا جعفر وبضيفتك، قيل لي يا مريم أنك قد أتيت

من السودان، أليس كذلك؟

كنت أنظر إليه في إعجاب شديد، غير مُصدقة أنه هو بحق

الشيخ العالم العارف بالله «عبد الرحيم القنائي»، فقد تخيلته مثل

الشيخ القرشي، شيخ كبير أو على قدر قليل من الوسامة، ثم تنبهت

إلى ما قاله.. «السودان»، لم أستطع الكذب عليه، فكان الجواب أن

هزرت رأسي إلى الأمام محيية إياه فقط إلى أن يرحل الباقون، لكنني

رأيته ينتظر جوابي، فأجبت بما أشعر تجاهه بصدق إلى أن يجين وقت

اعترافي.

- في الحقيقة يا سيدي أنا لا أصدق أني آراك رؤي العين حقاً،

لابد أنه حلم، بل إنها رؤية تُبشرني بخير آتٍ إن شاء الله.

ضحك الجميع وخجل القنائي مبتسماً، ثم نظر إلى نظرة متقدمة
الذكاء، وكأنه قد فهم ما دار بذهني وقال بيقين.
- الخير قادم قادم لا محالة.

بعد برهة صغيرة استأذن جعفر بعد أن حياني مُشيرًا إلى أنه
ذاهب في قضاء حوائجه، وسوف يأتي لاصطحابي للبيت حين
أنتهى، أوصله الشيخ القرشي إلى خارج الساحة، ثم نظر إلى الشيخ
القنائي في أدب وأشار إلى وسادة على الأرض.
- تفضلي بالجلوس يا مريم.

جلست وملت برأسي إلى الأسفل في خجل، فقد كان في عيني
شديد الوسامة، جلس هو مستندًا على حائط وراءه في مقابلي،
وضحت ملامحه وازداد جاذبية، مرت لحظات سكون إلى أن لمحت
رأسه تنحني للأسفل وللأمام قليلا، ليرى عيني التي اختفت من
أمامه وقد أدرك خجلي منه، فنفذت رائحته وكأنها عُود مُعتق إلى
انفي ومنها إلى قلبي، ثم أردف مُبتسماً.

- أخبريني عن السودان يا مريم، كيف وجدتها؟

(١)

في شتاء ٢٠١٠ ميلادية وصلت لآخر سنة دراسية بكلية الحقوق بجامعة جنوب الوادي، وبدأت في البحث كما اعتدت كل سنة عن بيت للطالبات مع صديقتي ياسمين، فبعد خوض تجربة السكن الجامعي في الشهر الأول فقط من السنة الدراسية الأولى بالجامعة قررت عدم طرح الموضوع للنقاش مرة أخرى، كلفنا بعض سمسارة العقارات بالبحث عن شقة سكنية، بالطبع يوجد الكثير منها، ولكن الأهم أن تصلح لسكن فتيات مغتربات للدراسة في وجه قبلي، عندما تأخر ردهم قررنا أن نبحث بأنفسنا علنا نكون الأسرع.

في هذه المرحلة، تذكرت أبي وبكيته كثيرًا، فقد انتقل إلى رحمة الله حديثًا، كان أبي أحد أشهر الشخصيات النوبية، عمل بمجال السياحة لسنوات طويلة، وكان رائدًا بأفكاره، أريد أن أرسل إليه نجاحي في نهاية العام كهدية كان يتمناها، أعطاني وإخوتي قسطًا وفيرًا من الحنان والدلال، رُبما يكفيني ما تبقى من عمري، كُنت أفنقده بشدة، فأوجه عقلي إلى ما يجب على فعله كلما ضللت طريقي، يجب أن أنجح، يجب أن أستحق التقدير الذي كان يتمناه فيفرح بي، لا أدري هل تقبلت فُقدانه؟ أم أنني أعبت بمشاعري التي لا بد وأن أختبرها يومًا ما.

وفي إحدى المرات، وبعد أن بحثت وياسمين كثيرًا وأنهكنا التعب، مررنا على أحد المينى ماركت المنتشر في الطرقات (كما يطلقون عليه لكنه أقرب إلى دُكان)، وقفنا لنشترى فطورًا، كان الجوع والعطش قد سيطرا على ياسمين بقسوة فقالت.

- مريم تعالى نشوف أي حاجة ناكلها الأول، أنا هموت من الجوع، وبعدين ندور على الشقة أنا تعبت مش قادرة.

لكننا رأينا الدُكان خاليًا من أي بضاعة، فوقفنا أمامه لنرى أقرب مكان نبتاع منه طعامًا، فأجبتها في يأس.

- أنا تعبت فعلاً، بقالنا كثير قوى بندور على شقة، مش معقول مفيش واحدة مناسبة!

سمع بائع الدُكان حديثنا، رجل قصير القامة، نحيف حد الهزال، نظراته حادة، توسمت فيه الشهامة وقد كان، ابتسامته غير حاضرة وفي عجلة من أمره، جاء إلينا البائع مستفسرًا.

- أنتم بتدورو على سكن؟ أنا غصب عنى سامعكم، صوتكم عالي.

لم تهتم ياسمين بسؤاله وقد غلبها العطش.

- هو مفيش عندك حتى عصير؟

- أصلى كنت قافل فترة طويلة.

أحسست أنه يستطيع مساعدتنا فقصصت عليه بإيجاز، وعرفنا أنه على معرفة بمحام يمتلك شقة ويريد أن يؤجرها لمن يؤتمن، وانتهى حديثنا بعرضه توصيلنا إلى المحامي.

- تعالى معايا أوصلك للمحامي بس مش هقدر أسيب المحل وحده.

- أوصلنا يا حاج.

- الطريق قريب بس يتوه، ممكن صاحبك تقف هنا ١٠ دقائق بس على بال ما أوصلك وأجيبك؟ المكان قريب جدًا.

- استني هنا يا ياسمين وأنا مش هتاخر.

- ماشي خلي بالك من نفسك.

- وأنتي كمان.

اصطحبني البائع إلى مكتب المحامي دون أن يثرثر في طريقنا مثل باقي السماسرة، عرفته بنفسه وسألته عن اسمه فأجاب «أمين عامر»، يقع المكتب على بعد أمتار من دُكان الحج أمين، رأيت شابًا خارجًا من شقة بالدور الأرضي من البناية، كان واضحًا أنه مغادر فوقف البائع على الدرج وقدمني إليه.

- «يا أستاذ عماد.. آنسة مريم عايزة الشقة هي وصاحباتها».

يبدو أنني كنت من ضمن قائمة سبقتني، هز رأسه محيياً بابتسامة هادئة، ثم اصطحبنا بدوره إلى مكان الشقة المذكورة والذي كان على بُعد أمتار قليلة من مكتبه، أحسست بألفة تجاهه بمجرد رؤيته وكأنه أحد أقربائي، شاب وسيم يقترب من عمري على ما أظن، عيناه بها حزن أو يهيباً لي ذلك، يرتدي بدلة موديل قديم، من الواضح أنه لا يهتم كثيراً للموضة لكنه جذاب ووسيم، أحب هذا النوع من الرجال الواصل من نفسه بلا تكلف، تكفي نبرة صوته الهادئة لسماع ما يقول،

والتي تُعلن عن كاريزما خاصة، مشيت معها حتى أصبحنا في وسط البلد، حي من الأحياء التي لم أر مثيلها من قبل، حي نظيف رغم بساطته، أغلب سكانه من الطبقة المتوسطة التي أوشت على الانقراض، لابد وأن تمر على الشارع الرئيسي أولاً لتدخل شارع أصغر ثم حارة داخل حارة أخرى، كل شيء متاح حولنا من سلع وخدمات، توقف عماد وأشار إلى المبنى، كان العقار طابقيين فقط، متوسط العمر بلا حارس، البوابة حديدية طُليت باللون الأزرق، التفت إلى عماد وقال.

- هنا المكان، الشقة من جوه هتعجبك أنا واثق، للأسف مش معايا المفتاح دلوقتي، أكيد مع أمي، اطلعي خبطي وقوليلها أنك شفتي اليافطة اللي على أول الشارع بتاعة الشقة وهي هتفرجك، على فكرة الشقة أربع أوض عشان أنا فهمت أنك مش لوحدك.

- هو أنت مش طالع معايا؟

- للأسف أنا على خلاف بسيط مع أمي الأيام دي، أحسن قوليلها إنك شفتي اليافطة اللي على الشارع الرئيسي.

- طيب وأنت يا حاج أمين؟

- ساعيني علاقتي بها ضعيفة، أنا بساعد ابنها بس.

- مميم.

دخلت العقار وصعدت إلى الدور الثاني حيث تسكن سيدة على أعتاب العقد السابع من عمرها، مسح عليها الزمن بقليل من الحزن، وأعطاهما الكثير من القوة والصلابة، تطلان من عينيها في تحدٍ، نظرت

لي وكان عينيها ماسحة الكترونية، من رأسي لآخر قدمي، استأذنت لتحضر مُفتاح الشقة المذكورة بعد أن عرفتها بنفسني وطلبت منها ايجار الشقة، غابت لحظات ثم عادت لتنزل سويًا إلى الدور الأرضي، فتحت الباب ودعتني لأرى المكان.

غرفة الاستقبال طُليت باللون السيمون وتتكون من جزأين، الجزء الأول والأقرب إلى الباب به كنبه كبيرة وأخرى صغيرة، صالون قيم قديم جهة اليمين، تصحبهم مرآة طويلة وكبيرة، أما الجزء الثاني في العمق والقريب من الطرقة يتكون من منضدة حديدية متوسطة الحجم تحمل بشجاعة تليفزيونًا متوسط العمر، تصلح للمذاكرة أيضًا، على جانبي المنضدة كُرسيان من البلاستيك، يقع المطبخ في الجانب الأيسر من غرفة الاستقبال، به ثلاجة كبيرة على الجانب الأيمن وبجانبتها الحوض، في اليسار مطبخ خشبي كامل به جميع أجهزة المطبخ الحديث لا ينقصه سوى إحضار الطعام فقط، تقع الطرقة تقريبًا بجانبه بحيث يسهل علي من في الغرف أن يسمع من في المطبخ إذا تحدث بصوت عالٍ، الطرقة بها ثلاث غرف على اليمين متوسطة الحجم، أما الغرفة الرابعة والأخيرة مُغلقة، تقابلك في آخر الطرقة، يقع الحمام على يسارها، جميع الغرف مطلية باللون الأبيض، أرضية الشقة كلها موحدة بسيراميك سمى الذوق، أخضر اللون يتداخل فيه ألوان أخرى لا تتجانس بينها، الحمام والمطبخ أيضًا لا علاقة لهما بذوق الشقة العام، مع ذلك أحسست بشيء يجذبني إلى المكان، فصدقت إحساسي، وباليتمني ما فعلت، نظرت إلى السيدة في ثقة وقالت.

- عجبك الشقة؟

- حلوة، أربع أوض على قدنا.

- عفش البيت كله محدش استعمله قبل كده، يعنى شبه جديد، هو موضته قدمت بس، لكن زي ما أنتي شايفة نضيف، حتى المطبخ أدواته كلها بحالها مش محتاجين تيجيوا حاجة، بس حافظوا عليها بس.

- لا بصراحة البيت نضيف ومن ناحية نحافظ عليه متقلقيش خالص.

- أنتم كام واحدة؟

- دلوقتي اتنين وفي اتنين هيجوا بعدنا إن شاء الله.

- يبقى في اتنين لازم يشتركوا في أوضة لأنني مش بفتح الأوضة الرابعة، فيها كراكيب وحاجات غالية، عندكم ثلاث أوض وزعوها بمعرفتكم، في مشكلة؟

رأيت المكان نظيفًا وسعره مُناسب لنا جميعًا، لأنني أعرف جيدًا المستوى المادي لزميلاتي، ولا أعتقد أن ثلاث عُرف سوف تكون مُشكلة مع باقي البنات فتصرفت على هذا الأساس.

- طيب خلاص مفيش مشكلة، دي فلوس عربون لحد ما نيجي.

- تمام، أنا مسافرة عُمره وراجعة على قرايبي في الأقصر لما أرجع آخذ الباقي، وأمنتك أمانة بقى إنتي المسئولة قدامي عن الحاجات اللي في الشقة كلها والعفش والأجهزة الكهربائية.

- متخافيش يا طنط، كأنك موجودة معانا.

تم الاتفاق وودعت الحجة سعاد وغادرت، عند مدخل المبنى وجدت الحج أمين مازال ينتظرنى، أبلغني أن عماد اضطر إلى الذهاب لقضاء بعض أموره.

- متشكرة جدًا تعبتك معايا يا حج.

- الخير ما يضيعش يا بنتى.

أردت أن أعطيه نقودًا كما تعودت مع أي سمسار، لكنه رفض بشدة وقال إن ما يفعله معي لوجه الله تعالى، فقد رأني أبحث عن مكان مُلائم وتوسم خيرًا في، اصطحبنى لأقرب مكان من دُكانه حيث تنتظر ياسمين، لأنه تذكر شيئًا لا بد أن يتاعه، ما إن وصلت حتى بشرت صديقتي، اتفقنا على ميعاد الانتقال لقنا أخيرًا للمتابعة المحاضرات في بداية العام الدراسي.

انتقلنا ومرت الأشهر الأولى من دراسة السنة الأخيرة بالجامعة سريعة وهادئة، وها أنا في أواخر مدة إقامتي «ببيت الطالبات المغتربات» كما أطلقت عليه لاحقًا مالكته «الحجة سعاد»، لأننا أول من استأجر الشقة، فهو بيت عائلي لا يسكن به غرباء، وكنا أول من يكسر القاعدة على حد قولها، لكنها رأت أننا لن نتسبب بأية مشكلة على الإطلاق، فقد تعودت السفر لأقاربها والرجوع وهي مطمئنة على بيتها، فنحن فقط من يشاركها السكن.

رأيت «عماد» بعدئذ مرة أو مرتين على سُلم العمارة فحياني، بات واضحًا أن خلافه مع أمه قد انتهى، ذات مرة رأته مُسرعًا باتجاه مدخل العمارة فسألني عن أحوالي.

- إزيك يا مريم كله تمام؟ الشقة عجبتكم؟

- كله حلو الحمد لله.

- أحسن من باقي السكنات، كل واحدة في أوضة أكيد حلو.

- دلوقتي إحنا اتنين بس، كل واحدة في أوضة فعلا، لكن في اتنين

جايين وهيشتركوا في أوضة واحدة، بس مفيش مشكلة.

- لو الشقة ضيقة عليكم افتحوا الأوضة الرابعة، هي بس فيها

شوية كرايب حطوهن على جنب، وخلو بالكم عليها لأن ماما

بتخاف على حاجتها قوي.

- حاضر لو اضطررنا هنعمل كده.

- طيب أشوفك بخير.. سلام.

- سلام.

كانت الحجة سعاد قبل أن تُسافر لأداء العُمره من أطف الناس

معنا، نُحن علينا وترسل لنا الطعام عندما ترانا مُتعبين من المذاكرة

ليلاً ومن الدراسة في الجامعة صباحاً، أعطت لكل منا مفتاحاً لغلق

البوابة الحديدية ليلاً لمزيد من الأمان، ما إن يُغلق الباب الحديدي من

الداخل حتى تستطيع دخول شقتنا دون إذن، فقط بتحريك مقبض

باب الشقة من الخارج وكأنك تفتح باب غرفة داخل الشقة، لذلك

كان لابد أن نغلق ونفتح الباب بمفتاح ونحكم إغلاقه ليلاً بترباس.

أول غرفة على يمين الطرقة تسكنها ياسمين، فتاة أسوانية، تدرس

بالسنة الثالثة بكلية تجارة، قصيرة، ممتلئة القوام، مرحة، متفائلة، تمنح

الأمل والتفاؤل لكثير ممن حولها وتضيف البهجة في كثير من المواقف،

هذه الغرفة أوسع غرفة بالشقة، تتكون من سريرين بحجم كبير ودولاب متوسط الحجم موضوع بينهما بعناية ومقاييس محسوبة، بها شباك صغير يطل على الشارع.

الغرفة الثانية اخترتها لي لأنها ثاني أوسع غرفة، قررت منذ البداية أن أسكن في غرفة خاصة بي وحدي، أحب الاحتفاظ بأكبر قدر ممكن من الخصوصية، لا أحب أن يميز أحد شكل ولون ملابس الداخلي على سبيل المثال، مهما بلغت درجة تقاربنا، أو أن يسمع محادثاتي التليفونية مع أهلي وأقربائي، كثير من الأمور خاصة جداً وإن كنت أعلن عن بعضها كيفما أريد، لكنني أفضل أن أحتفظ بتفاصيل حياتي وكأنها سر كبير غامض، هكذا أكون في راحة، تتكون غرفتي من سريرين صغيرين، ما بينهما من مساحة لا يسمح بوضع أي خزانة صغيرة، يقع الدولاب الصغير الحجم في الجهة المقابلة من السرير، اخترت السرير الذي يوجد بظهره مكتبة صغيرة ورف للنوم، لأنني سوف أحتاج المكتبة بديلاً عن الخزانة الصغيرة، الغرفة بها شباك يطل مباشرة على الشارع، أن يطل شباك غرفتك على الشارع الرئيسي بالدور الأرضي فإنه يجعل معيشتك سهلة وصعبة في آن واحد، الأصوات الخارجية تجلب الونس والدفء، لكنها تُصعب الأمور عندما نريد القليل من الهدوء خاصة أثناء الامتحانات.

أتذكر أول يوم لي أنا وباسمين في السكن، ذهبنا إلى محل لوصلات الدش في أول الشارع لعمل وصلة لنا، لكنه عندما علم أين نسكن رفض بشدة.

- أنتو ساكنين عند الزعان ... صح؟ معلش مفيش وصلات!

- ليه بس كده؟ هو مين الزعانن ده؟ إحنا عند الحجة سعاد.

- أنتو مينين؟

أجابته ياسمين.

- من أسوان بس ساكنين هنا في بيت طالبات عشان الجامعة.

أخذ صاحب المحل ينظر إلى في حيرة وتمعن ثم قال وكأنه

يتفحصني.

- إزيك يا أبله.

- الحمد لله كويسة!

- سبحان الله شكلك كويسة فعلاً!

- مش فاهمة في حاجة ولا إيه؟

- سلامتك يا أبله، طيب عمومًا هعملكوا الوصلة بس مش

عاوز وجع دماغ في الفلوس الله يكرمكوا؟ أنا راجل على باب الله.

- لا من الناحية دي ما تقلقش خالص.

أحضرنا بعض الطعام وذهبنا إلى البيت وفي إغفاءة قصيرة من

تعب السفر، سمعنا صوتًا مدويًا لامرأة تهين زوجها بأقبح الألفاظ،

من هي؟ إنها زوجة شقيق «زعنان»، أكبر بلطجي وتاجر مخدرات في

قنا، القزم الذي لن تتخيل أنه المعلم الذي يفعل كل هذه الأفعال، إنه

حقاً حي محترم كما رشحه صاحب الدكان، لكنني تجاهلت هذا الاحترام

لسعادتي بما رأيته من حب ورعاية أصدقائي المشاركين سكنهن وحياتهن

معى، عندما تتقاسم الحياة في الغربة بعيداً عن بيتك وأهلك،

فلا بد أن تمنح نفسك شيئاً من الأمان وبعض الثقة فيمن حولك،

لا يأتي هذا الإحساس عبثاً وإنما من تجارب ومواقف مختلفة لتبث معدن الأشخاص كما كان يقول أبي رحمه الله.

استقبلنا الصديقتان قُرب فترة الامتحانات، فقد انضمنا إلينا «هند» و«ليلي» في الغرفة الثالثة الشاغرة متشاركين إياها، وهي الغرفة المجاورة لي، «هند» من الأقصر، طويلة، سمراء، ممشوقة القوام، وعلى قدر كبير من الجمال، مزدوجة الشخصية مع أمور لا تحتمل الازدواجية، مثل أمور الدين مثلاً، فهي تحرم وتحلل حسب أهوائها الشخصية، لهجتها الصعيدية الحادة جميلة، تتحدث بها معظم الوقت، إلا في وجود أي كائن مُذكر، يتلوى لسانها ناطقاً لهجة أخرى مصطنعة في ثوانٍ معدودة، تفضل ارتداء العبايات أغلب الوقت.

أما «ليلي» فهي من إدفو، سمراء، طويلة، عيناها واسعة تنظر إليك بحذر وغير متوارية، أحياناً صارخة، تدرس بكلية تجارة، تتميز بخفة الدم ورجاحة العقل، بعيدة كل البعد عن التهور في تصرفاتها، تظنها بخيلة ولكنها غالباً تقدر قيمة النقود وتحرص على صرفها في مكانها الصحيح.

ظلت الغرفة الرابعة مغلقة ولم نهتم للأمر، فلسنا في حاجة إليها، يسود أوقاتنا سلام وود ومرح ومحبة حقيقية كأخوات أشقاء، إلى أن بدأت ليلي في الشكوى المتكررة من هند في أيام متلاحقة متقاربة، وبات التوتر زائراً دائماً، تظل هند مستيقظة طوال الليل تقرأ أو تصلي، ومؤخراً غلبت مكالمات الحب في الليل على القراءة والصلاة، في حين تريد ليلي أن تنام، كانت تشكو فقدان السكينة والنوم العميق.

أرادت ليلى الانتقال إلى غرفة ياسمين في البداية، لكن الأخيرة اعتذرت بلطف، حيث إنها أيضًا تستقبل العديد من المكالمات الخاصة، وأنه من الصعب عليها أن تجيب خارج غرفتها خاصة في برد الشتاء القارس.

بعدها جاءت ليلى آملة أن أوافق على طلبها بالنقل إلى غرفتي، فاعتذرت أيضًا، وخطرت لي فكرة تتيح الفرصة لحل مشكلة ليلى وهند، بل أي مشكلة أخرى سببها مشاركة الغرف، وتذكرت ما قاله «عماد» عن الغرفة الرابعة.

جمعتهم على الغداء وكان حديثي أشبه بالخطاب.

- شوفوا يا جماعة، دلوقتي طبيعي تكون كل واحدة فينا ليها طقوسها الخاصة، وإحنا لازم نفرض أي خلاف مهما كان صغير في بدايته علشان الموقف ميكبرش حفاظًا على اللي بيننا، ليلى مضايقة من هند علشان المواضيع اللي كلنا عارفينها بما فيهم إنتي يا هند.

نظرت هند في عدم اكتراث.

- عارفة يا مريم بس أنا مش شايفها خلافاً جامدة قوي يعني، نقدر نحلها يا ليلى.

نظرت إليها ليلى وبدا أن رد هند قد استفزها، فأردفت بعصبية.

- لا يا هند أنا قتلتك عاوزة أنام في مواقف كتير قوي، إنتي مش بتقدري، أنا بشوف بصراحة إن ده عدم احترام ليا.

أرادت ياسمين أن تهدئ من ليلى فقاطعتها.

- بلاش نكبر المواضيع كده وكل حاجة ليها حل، قولي يا مريم
بقي كان عندك حل أو فكرة، إيه بقى؟

- هو إحنا ليه حابسين نفسنا في ثلاث أوض وهما أربعة؟

لمعت عين ليلى للحظات لكنها انطقت من جديد وقالت.

- تقصدي نفتح الأوضة الرابعة؟ هي فكرة، طب وافرضي
صاحبة البيت عرفت؟ وبعدين هقعد في أوضة لوحدي وأدفعها
نص أجرة إزاي؟

- لا، خلي الأوضة دي تحل المشكلة مؤقتا لحد ما نشوف بس،
يعني اللي عايزة تعمل تليفون أو أي حاجة بالليل تروح فيها علشان
التانية تنام، و«طنط سعاد» مش هاتقول حاجة يا بنات، حتى ابنها
اللي قابلني أول مرة قالي الشقة أربع أوض وقالي عادي ممكن نفتحها،
إحنا هننصفها ونستخدمها بدل قفلتها دي والتراب، بالعكس دي
هتنبسط، هي دي أول مرة نفتح فيها أوض مقفولة يا ياسمين؟ فاكرة
السنة اللي فاتت عملنا كده وأصحاب البيت انبسطوا قوي منا.

- أيوه صحيح دي مش أول مرة، ويمكن تكون الحجة سعاد
مكسوفة منا عشان الأوضة مش نضيفه ومكركبة، بس إحنا ننصفها
وبعد كده نبقي نقولها لما ترجع من عند قرايبها اللي في الأقصر.
قالت هند في رفض واضح.

- وافرضي الحاجات اللي بتقول عليها لقيتها ناقصة؟ تقول إحنا
اللي أخذناهم؟ الأحسن هي تفتحها.
دافعت عن فكرتي قائلة.

- إحنا هنبقى نقولها فتحناها، وبعدين يا هند هو إحنا حرامية يعني؟ هشيّلها الحاجات دي في كرتونة على جنب ونحافظ عليها، ولما تيجي نقولها أو نديهاها.

- خلاص يبقى إنتي تعاملي في الموضوع ده.

- تمام كده، في حد عنده مانع؟

بموافقة هند جاءت الموافقة بالإجماع من البنات.

- خلاص تمام، نفتحها بكرة إن شاء الله.

كانت ليلة هادئة، لم تشكو فيها ليل أو تتذمر من هند، فما هي إلا ليلة واحدة تتحملها ثم تُحل مُشكلاتها، مارست هند جميع طقوسها الليلية، مكالمات حب، صلاة، قراءة بصوت عالٍ دون مراعاة لليل كالعادة.

جاء الصباح مُحملاً بالأمل في إنهاء أي خلاف حتى وإن بدا صغيراً، تناولنا الفطور بنهم وسط جو مرح مُبهج، كنت على استعداد تام لحل مشكلة ليلي فُقمّت في حماس.

- ياللا يا بنات نفتح الأوضة، هاتي سكينه يا هند.

قامت هند إلى المطبخ وقد علا صوتها.

- أكبر سكينه من المطبخ عدل إلى الأوضة المقفولة.

استمرت محاولاتي العنيدة في فتح اللسان المعدني المعشق داخل الحائط دون فائدة، مرت أكثر من ساعة، لا بد. أنه مغلق منذ فترة كبيرة، بعد محاولات عدة استنفذت طاقتي، نظرت إليهن مُرهقة.

- أنا تعبت يا جماعة قوي، هُدنة كده وأحاول تاني.

نظرت ليلي في تحدٍ.

- هاتي كده السكينة دي أنا هاحاول.

لم أستطع إعادة المحاولة لضيق الوقت، يجب أن أستعد للذهاب إلى الجامعة، أما ليلي فقد رفعت راية العند، قررت تجاهلهن لأسرق الوقت، دخلت غرفتي لأتجمل كعادتي قبل اختيار ملابس، دائماً ما أهتم بالعيون وأحددها، العيون المكحلة جزء لا يتجزأ من موروثي الشعبي، أحب رسمة عين الجدات، اتقنها واتفنن فيها، كما أن الكحل الأسود يناسب لون عيناى العسلية، بل يعطيني الكثير من الجاذبية دون أن أطلبها، فتحت خزائتي لأرى ما سأرتديه وحدي، دون إبداء الآراء كطقس يومي مُعتاد، فجميعهم منشغلون بفتح الباب، دائماً ما أرى خزائتي فارغة وهي المملوءة عن آخرها بالملابس هوسي بالموضة، من يُجزم أن المُحجبة لا ترتدي آخر صيحات الموضة؟ أنا أفعل، حتى عندما يهمس شيطاني بأذني «لا ترتدي هذا فأنت ممتلئة القوام»، فإني أطرده على الفور قائلة «قد أكون ممتلئة لكنني طويلة وهذا يعطيني ثقة»، أو حينما يريد أن يتسلى بي «لا ترتدي هذا فأنت خمرية اللون ولست بيضاء» فيكون ردي الأمل «أحب لوني أكثر من أي شيء في دنيائي»، وهكذا أحب الموضة وأثق بنفسى.

أثناء استعدادي ودخولي الحمام وخروجي منه عشرات المرات كالمعتاد، رأيتهن يجاربون الباب في شراسة، سيطر العند عليهن جميعاً، حتى أنهن لم يشعرن بمغادرتي.

هذه هي حواء منذ أن خلقها الله، إذا أرادت شيئاً بشدة فسوف تناضل من أجل الحصول عليه مهما كانت العواقب.

وأخيراً ارتديت ما أحب وذهبت إلى الجامعة، ونسيت الغرفة
والباب إلى أن انتهيت من جميع المحاضرات وعُدت إلى المنزل.
وجدت البنات في استقبالي، واقفات أمامي في زهو مبتسمات،
تملاً أرواحهن نشوة غريبة، يمسح ملامحهن بعض الإجهاد.
- فتحنا الباب.

قلنها وكأنهن فتحن عكة، غلبنى الفضول لأرى الغرفة المغلقة.
سرت نحو الغرفة كي أستطلع ما بها؟ لا شيء يبدو مختلفاً بها،
الجدران بيضاء مثلها مثل باقي الشقة، شباك متوسط الحجم، كنية
مشابهة تماماً للكنبة التي في غرفة الاستقبال، كرتونة أحذية رجالي
قديمة متهالكة، غسالة ملابس تحتضر منذ سنوات، كرتونة قديمة
محكمة الإغلاق عليها بعض كتب القانون (يبدو أنها كانت ملكاً
لابنها المحامي أثناء دراسته الجامعية) وأخيراً صندوق خشبي
متوسط الحجم قديم، أشبه بقطعة آثار مهملة، يحكم إغلاقه قفل
كبير من الفضة، يحتاج مجهوداً ليُعاد إلى صيغته الأولى، نُقشت عليه
جُمل بخط قديم مُتداخل يصعب قراءته، من المؤكد أن هذا هو الشيء
الثمين الخاص بالحجة سعاد التي تخشى فقدانه، أردفت مُبتسمة.

- بجد... برافو عليكم، فتحتوها إزاي؟

- جنبنا شاكوش ومسبار كبير وفضلنا ندقق شوية، وبالسكينة
شويتين.

هكذا شرحت ياسمين وأكملت هند بعدها.

- تعبنا قوي مش هتخيلي، باب صعب قوي، تقولي حد مقري عليه!

- طب الحمد لله إنه اتفتح في الآخر، شكلكم كأنكم كتوا في حرب يا بنات وانتصرتن، نحتفل بقى.

شاركت البنات في نضافة الغرفة بمساحيق النظافة ذات الرائحة النفاذة، بعد أن أزلنا الكثير من الأتربة، نظفت الصندوق الخشبي قدر الاستطاعة، وأعطيته ركنًا يصعب المرور به، ثم نهت البنات إلى عدم التعرض له، فبالإضافة إلى أنه من ممتلكات الحجة سعاد إلا أنه يبدو أثرًا وأنا أعرف قيمة كل ما هو قديم كما كان يُعلمني أبي، بلا شك قطعة ثمينة جدًا، جلبنا الكنبه التوأم من غرفة الاستقبال حتى تأنس بأختها هنا، فهذه الغرفة أذفا كثيرًا من باقي البيت، عندما نخبر الحجة سعاد بما فعلنا تستطيع أن تستفيد منها مثل باقي الغرف، سوف تكون مفاجأة رائعة، وسوف تسعد بنا بلا أدنى شك، لكني أتمنى ألا تزيد الايجار على هند أو ليلي؟

مرت الأيام هادئة لطيفة وأطلقنا على الغرفة اسم «السنترال»، أصبحت هند وليلي وياسمين أيضا يستقبلون فيها جميع مكالمتهم على حده، ثم أصبحنا جميعا نستقبل فيها صديقاتنا من الجامعة للمذاكرة أو الثرثرة أحياناً، هذه الغرفة لها روح مختلفة عن باقي الغرف، تدخلها فتستريح نفسك وتستجم، أم أنها لذة الممنوع مرغوب!

اختفت المشاكل وصمتت ليلي عن الشكوى، وعاد الهدوء من جديد إلينا جميعاً مُستمتعين بأيام جميلة لن تُنسى.

(٢)

مرت ٢٠١٠ بسلام، وبدأت ٢٠١١، تمضي الأيام رتيبة في سلام، كصفحة ماء هادئة حمدت الله عليه، قد يكون الروتين مُملاً حد الكآبة أحياناً، لكنه بلا شك أكثر أماناً واستقراراً، لم تخل أوقاتنا من الضحك في أحلك الظروف، ضحكنا هي أقرب ردود أفعالنا حتى في المصائب، لا شيء يمر دون أن نسخر منه، شعارنا الأوحـد «محدث واخذ منها حاجة».

كنت أتحدث إلى شقيقتي «ريهام» عصر أحد الأيام في السنترال، وعندما انتهيت من المكالمة لاحظت أن الصندوق الأثري بالغرفة مفتوح، والقفل الأثري مفقود، اقتربت في وجل وفتحت الصندوق، بداخله سيف فضي، طمست معالمه أكوام تراب مُلتصقة به، عليه آيات قرآنية غير واضحة، قطعة قماش مُهترئة، شموع مُستخدمة، كتاب وأوراق قديمة بها رسوم هندسية، منديل من قماش ملفوف ومربوط بخيط سميك، لونه بني عتيق، آثرت ألا أفتحه، وحذاء حريمي أبيض اللون ذو كعب عالٍ، كأنه لُعرس، الحذاء قديم لكن أنيق، من الواضح أنه لم يُستعمل قط، انتعلت الحذاء، وتمشيت به كطاووس إلى أن ذهبت للمرأة في مدخل الشقة، رأيتها جميلاً فأحببته، سولت إلى نفسي اقتناه، لكنني تذكرت الأمانة فذهبت مرة أخرى

إلى الصندوق، سوف أقص على الحجة سعاد ما مررنا به بكل تأكيد،
لكن في كل الأحوال لن أجرؤ أن أقول لها فتحنا الغرفة، وبعثنا
ممتلكاتك الخاصة!

خلعت الحذاء وقد اشتهته نفسي رغم قدمه، لا أعرف لماذا،
وضعت مكانه في الصندوق وأغلقت، لكن يبقى السؤال، أين القفل
الأثري؟

من استطاع أن يفتح القفل العتيق، يستطيع أن يفعل أي شيء،
ورغم أن محتوياته لا تُحْت على السرقة لعدم نفعها، إلا أنني قررت أن
أنقل ما تبقى من الأمانة التي اضطررتني الظروف أن أحملها إلى غرفتي
كبي تكون بمأمن.

بعدها بأيام وأثناء مروري بأحد المحلات، أُعْزمت بحذاء وكان
الحب من طرف واحد من وراء فاترينة، أنا العاشقة للموضة أينما
كنت، عقدت العزم على الادخار حتى أستطيع شرائه، فقد كان باهظ
الثمن، بعدها بأيام اقتنيته، أحب حاجياتي وأحافظ عليها من التلف،
ادخرته لأقرب نزهة قادمة، بعد أن رأيت الغيرة المتعارف عليها في
عيني ليلي، والتي نتجأ لها جميعاً، فأنا أعلم الاختيار بين التفاوضي
عن عيوب الأصدقاء والتعايش معها، أو نبقي منعزلين.

وفي يوم من الأيام التي نوبنا تناول غدائنا بأحد المطاعم، تأنقت
كعادتي وبقي ارتداء الحذاء الجديد، انتظرت ارتدائه كما لو أنني ما
زلت طفلة تنتظر قدوم فجر العيد، انفردت به في شهوة أعرفها، ثم
ارتديته بتأن، لامست جلده الطبيعي الناعم بسعادة، وذهبت إلى

المرأة بغرفة الاستقبال، تنتقل البنات بين غرفة الاستقبال والمطبخ، إلى أن استقرارن في المطبخ يلتهمن ما فيه من بقايا طعام كمشهيات قبل الغداء، تأملت الحذاء مزهوة بنفسي وسألتهن.

- حلو يا بنات؟

ردت ياسمين بتلقائية.

- جميل يا مريم.

- طب حلو على المونتوه؟

في غيرة واضحة جاء رد ليلى.

- لا يا مريم مش لايق على اللبس ده، غيريه يا شيخه.

في سداجة غريبة خلعت الحذاء في مكاني بجانب المرأة، وذهبت إلى غرفتي أحضر حذاء آخر للمقارنة، عدت مرة أخرى بعد مدة لا تتجاوز الدقيقتين، ثم صرخت واضحة يدي على فمي من هول المفاجأة.

- إيه ده.... مين اللي عمل كده!

أسرعت البنات على صرختي مهرولين، بينما ألسنتهم مازالت تتلوى ببقايا طعام، ثم ارتسمت الدهشة على وجوههن محذقين في الحذاء، ساد الصمت بيننا، لا أحد يتكلم، يحدقون في بعضهن البعض في اندهاش، الحذاء الجديد مُقطع على هيئة دوائر، دوائر متساوية جدًا! نظرت هندلي في ذهول.

- إيه ده يا مريم؟ إيه اللي قطع البوت كده؟

- بتسألوني أنا؟

استدركت ياسمين وكأنها تنفي التهمة عنهن.

- والله ما نعرف، إحنا مش قدامك في المطبخ، ثم إنه كان لسه في

إيدك حالا يا مريم وكنتي لابسائه برضه حالا!

- أديكي قولتيها، كنتم في المطبخ، مين بقى اللي عمل كده فيكوا

بالمقص؟

- تقصدي إيه يا مريم، انتي اتجننتي؟ هنعمل كده ليه يعني؟

- على سبيل الهزار التقليل مثلا يا هند!

- إيه الكلام ده بس! ده انتي دخلتي جبتي البوت التاني من

أوضتك ورجعتي تاني مسافة دقيقتين، هنلحق نعمل كده فيه؟!!

- معرفش يا ليلي، عموما هو الموضوع مننا فينا وحسبي الله ونعم

الوكيل في اللي عملت كده.

أدرك تماما أن نفس ليلي تنطوي على كثير من الغيرة، لم أنس أنها

اشترت عدة مرات نفس الأشياء التي اشترتها أنا من قبل، الغيرة

تحركها، وهي من اعترضت على ارتدائي إياه، وجعلتني أذهب إلى

غرفتي مرة ثانية، ولكن بما أن هذا الحذاء باهظ الثمن، فلن تقدر على

شراء مثيله، فكان الحل في اللاوعي هو تقطيعه في غفلة من البنات،

لأنها ببساطة لا تريد رؤية أي منا في صورة أفضل منها، لقد قرأت في

علم النفس عن مثل حالتها، مسكينة، ولكن ما ذنبي أنا؟

في هذا اليوم الغريب خرجنا إلى المطعم في أجواء أغرب، نظرات

غير مريحة تنظرها كل منا للأخرى. لن أتمكن من العيش هكذا، يجب

أن أعفو وأسامح، مع توخي الحذر منهن جميعًا، إذ كيف ائتمنهن بعد ذلك على نفسي؟ لم نتحدث كثيرًا كعادتنا، خليط من الحزن والشك والحيرة يسبح بداخل كل منا، من فعلت هذا؟ كيف؟ ومتى؟ لاحظت نظرات الشك في عيون كل منهن للأخرى، ولكن الأهم من ذلك كله، لماذا؟ هل توجد بينهن من تكرهني إلى هذا الحد؟ لا.. لن أفكر كثيرًا، لقد أخذت حظي اليوم من الكآبة بوفرة، لا بد أن ارتاح كي لا أهلك نحي وأعصابي أكثر من هذا.

بعد أن أنهينا طعامنا، ذهبنا إلى البيت مباشرة على غير عادتنا، لم نعلق على شيء، لم أجرؤ على لمس الحذاء، تركته مكانه كي ترى من فعلت فعلتها مدى بشاعتها، أنهينا طقوسنا المسائية من استحمام وتبادل أخبار أحداث يومنا، ولكن في ميعاد مبكر استعدادًا للنوم، أو بمعنى أصح للخلوة، عندما أغلقت باب غرفتي جلست وحيدة أفكر، كاد عقلي ينفجر دون الوصول إلى معنى أو نتيجة شافية! لماذا يا ليل؟ أتكرهينني إلى هذا الحد؟ لم أدرك متى وكيف رُحت في ثبات عميق حتى ظهيرة اليوم التالي.

صرخت هند وبكت في غضب عارم، علا صوتها بكلمات غير مفهومة في تشنج لم أستطع أن أتبينها، ليس بحلم، استيقظت وهي تصرخ بالفعل فينا جميعًا، فتحت علينا أبواب الغرف وأضاءت الأنوار واستمرت في الصراخ.

- أنا لازم أعرف مين اللي عمل كده فيكوا بقى؟!

حاولت عيني أن تستوعب الإضاءة الآتية من فوقى مباشرة بعد ظلام دام لساعات.

- وطي صوتك يا هند مش فاهمة حاجة! حصل إيه؟

- مين اللي قطعلي المحفظة الجلد بتاعتي كده؟ دي مقصصة!

أقلت بالمحفظة المصنوعة من الجلد الطبيعي (باهظة الثمن) في وجهي، وسط ذهولي وذهول ليلي وياسمين المسرعتان وراءها من غرفتيهما، بعد أن فرعا من صراخ هند الذي لا يأخذ هدنة، المحفظة مقطعة بنفس الطريقة التي قُطع بها حذائي بالأمس! الغالب إنها مقصوفة أيضًا، لحظات الذهول الآتية من تجرد الأفكار تظهر مرة أخرى على أعيننا، ما الذي يحدث؟ من منا التي تجرؤ على فعل تلك الأفعال؟ هل يمكن لسخافات صغيرة تصدر بين الحين والآخر من إحدانا أن تكون مصدر انتقام بكل هذا الغل!

نظرت إلى ليلي أحمل علامة استفهام؟ ويقين أننا سوف نعرفها، وعندها لن ندعها تعيش معنا لحظة واحدة، لا شيء يدوم، سوف تنكشف قريبًا، إلا أن عيون هند ظلت تنتقل بيننا في شك.

- مبلمين يعني؟ مين فيكم اللي بتعمل كده؟

- دي متقطعة بنفس طريقة تقطيع البوت بتاعي! كأنها ترنشات صغيرة! إيه كل الغل ده؟

أسرعت ليلي في ردها.

- تقصدوا إيه بقى يعني؟ هقطع حاجتكو إيه؟

- أنا ما وجهتلكيش الكلام، بتردي إيه بقى؟

- إنتي از.....

- إيه يا بنات... أنا بجد مش مصدقاكوا إزاي بتفكروا كده؟ بس مين بس اللي يعمل كده؟ مش قادرة أصدق! أردفت ليلي.

- جرى إيه يا ياسمين إنتي هاتخبيي إنتي كمان ولا إيه؟
- بصوا بقى، أنا المحفظة دي كانت أكثر حاجة بحبها في حاجتي، وكانت من أغلى الحاجات عندي، بحافظ عليها ومش بهلكها، اللي عملت كده فيكوا أنا مش هاسيبيها.

خرجت هند من غرفتي، ووراءها ليلي وياسمين في تتابع على مهل وكأنهن يجرون أرجلهن من الصدمة، أغلقت الباب على نفسي للمرة الثانية ولم أدر ماذا أفعل؟ كيف أفكر هذه المرة؟ بالأمس كنت أتهمهن، واليوم أنا في عداد المتهمين؟

على الأقل أعرف الآن أنها ليلي أو ياسمين، وبالطبع أرشح ليلي بقوة، فهي الوحيدة التي تغار من أي شيء ليس بحوزتها، أو حتى لا تستطيع شراءه، الوقت سوف يثبت للجميع صحة تفكيري.

(٣)

في الأيام اللاحقة لهذه الأحداث، تغيرت أحوالنا، دخل الشك قلوبنا ولم يعد الأمان صديقا كما كنا من قبل، بل مجرد سُكّان نتشارك في الأجزاء المتبقية من الشقة كالمطبخ والحمام، وبعض الأماكن التي نتحاشى فيها التلاقي مثل مكان المرأة التي نترين أمامها قُبيل مُغادرة البيت، تزورنا صديقاتنا كُلّ منا على حدة، نستقبلهم في غرفة «السنترال» وقد أصبحت ملجأنا، نتحدث في أدق تفاصيل أسرارنا، حذرين أن نسمع أي واحدة من الأخريات تخوفاتنا وشكوكنا في بعضنا البعض.

من فعلت فعلتها لا تتوب ولا تخاف، نقودي تُسرق من المحفظة، الفئات الكبيرة فقط! المبالغ الصغيرة باقية، أخبئ دوما فئات النقود الكبيرة بجيب خفي داخل محفظتي ومع ذلك تختفي النقود، من يعلم بهذا الجيب الخفي في محفظتي؟ لا أحد يعلم! لا أحد على الإطلاق! لا بد وأنها تراقبني أو أفي نسيت. وفتحت المحفظة أمام إحداهن من قبل، ربما.. فقد كنت أستشعر كامل الأمان، ما كل هذا الخبث!

ذات يوم خرجت ليلي لتشتري حقيبة يد تشبه حقيبة ياسمين الجديدة، كانت قد ذكرت أنها أعجبتها عندما اشترتها ياسمين، عندما رجعت نظرت إليها ياسمين في ريبة، رأيتها من زاوية بعيدة دون أن أتدخل أو تراني ياسمين، استفزتها نظراتها فسألت.

- في إيه يا ياسمين؟ اجييلك صورة أحسن؟

- أنا مش هرد عليكى، بس عيب كده، عيب اللي بتعمليه، الأول تقطعى بووت مريم وبعدين تقطعى محفظة هند، عشان نتلخ فيهم وما نفكرش في حاجة تانية؟ دلوقتى بتسرقى فلوسنا! لا وإيه برافوا عليكى، الفكة مش مقامك، خشي على التقايل، حلوة الشنطة دى، مش غالية شويتين عليكى؟ ولا إيه؟ طب لما تسرقى مصر وفي الشهري أنا أعيش بإيه؟ ليه كده ياليلى؟ ومع ذلك أنا مش هقول لهم يمكن ترجعى لعقلك وربنا يتوب عليكى؟

تركتها ياسمين متجهة إلى غرفتها، أحست ليلى بدوار مفاجئ بعد أن كُشف سرها، استندت إلى الحائط في وهن إلى أن وصلت إلى غرفتها، تلاقى أعيننا فنظرت إليها بعتاب حقيقي ولم أنطق بكلمة واحدة، مع ذلك أسرعرت لأسندها إلى غرفتها، رفضت بقوة وأزاحت يدي بعيداً وهي تبكي! أعرف ظروفها المادية جيداً، وأعرف أنها مثل كل البنات، تريد أن ترتدي أحدث الملابس وأن تمتلك ما نمتلكه، لكن هذا لا يعطيها مبرراً لسرقتنا وخيانتنا.

وبدأت حُقة جديدة أعيشها في قلق وشك، لا أفارق حقيتي ليلاً أو نهاراً خشية السرقة المستمرة التي لا تتوقف، لكن رغم كل الظنون راودني إحساس أن ردة فعل ليلى لا تُنم على أنها الفاعلة، أعرف هذه النظرة العميقة في عينيها، نظرة مظلوم عز عليه تخوين الأصدقاء، فلم يستطع الدفاع ولم يقاوم إحساس المرارة، هل هذا ممكن؟ أم أني طيبة القلب أكثر مما ينبغي؟ أحسست بالشفقة عليها وأحسست بالخجل من نفسي، من الأكيد أنها تغار ولكن من غير

الممكن أن تسرق! ليست ليلي؟ كما أنها ليست بهذا الذكاء الذي يجعل
منها مُراقبة وسارقة محترفة، ليست ليلي ولا هند؟ هل من المعقول
أن تكون ياسمين؟ وهي التي تشوه الحقائق حتى تنوء بنفسها عن
الصورة الكبيرة؟ أم أن هند من فعلت بحدائي ما فعلت ثم قطعت
محفظة نقودها لتنتفي الشبهات عنها تمامًا؟

في صباح اليوم التالي غادرت المنزل مُتجهة إلى الكلية، تخطيت
بضعة حوارى وشوارع ضيقة حتى أصل إلى الشارع الرئيسي، مررت
على دكان الحج أمين فوجدته مُغلقًا، ثم رأيت «عماد» بالقرب منه،
لا أعرف لماذا أحس بشعور مختلف تجاهه، أرغب في التحدث معه،
ربما فضولي الذي أعاني منه يريد أن يعرف أكثر عن هذه الشخصية
المنطوية، أو ربما مجرد فراغ عاطفي.

تجاهلت إحساسي واستقلت تاكسي إلى الجامعة، أفكر كثيرًا دون
جدوى، تقرب المسافة من الجامعة، والذي تلزمني التركيز لبضع
ساعات يترتب عليها مستقبلي، وهديتي لأبى، يُعلن السائق عن
الوصول، أفتح حقيبتى التى لم تعد تفارقنى ليلا نهارا لأفتح المحفظة.
- معاك فكة ٢٠٠ لو سمحت؟

أقولها بثقة قبل أن أفتح «السوستة الخفية»، التى تأوى الفئان
الكبيرة من النقود، فما أملك من فكة لن يكفي أجره التاكسي.
- أشوفلك يا أبله.

لم أجد من النقود، فقط بعض الفكة المنثورة.

- يا نهار أسود؟

- في حاجة يا أبله ولا إيه؟

- مش لاقية الفلوس! إزاي بس يا ربي؟

لم يُعلق وأخذ ينظر نحوي في ريبة، وأنا أنفض المحفظة والحقيبة بلا أمل، لملت كل ما أملك من فكة حتى أكملت حقه، نزلت في شرود مع ما تبقى من أعصاب إلى مبنى الكلية، لا أستطيع التركيز، ذهبت النقود كما تذهب الأشياء! أين تذهب؟ لم تمس أيد غريبة هذه الحقيبة! أنا شديدة التأكد من هذا! منذ أن بدأت نقودي في الاختفاء، وأنا أضع حقيبتني بجانبني، حتى أثناء نومي المتقطع كي أشعر بأي أيد غريبة؟ تذكرت.. إحداهن كانت بغرفتي ليلا، نعم أنا متأكدة، لكنني لم أكن أقوى على فتح عيناي، فقد كنت في نُعاس جاهدت لأحصل عليه، ونسيت أن أسألهم عندما أفقت، أم تراني كنت أحلم؟ هل أصاب عقلي شيئًا؟ هل أصابنا جميعًا مرض عقلي؟

دخلت مبنى الجامعة لكنني لم أذهب لحضور أية محاضرات، ذهبت إلى مكان هادئ بالكلية يكاد لا يمر به طلبة إلا القليل، عند شجرة عجوز تنزوي بنفسها بعيدًا عن الزحام، أردت أن ألتقط أنفاسي مستندة برأسي إليها، حاولت أن أتذكر ما أنفقته فربما كنت مُحطئة، ووسط كل هذا رأيت «عماد» مارًا أمامي، وبدون أن أعي نادته رغبتني الداخلية التي لم أقاومها.

- عماد... عماد.

تنبه وأخذ ينظر حوله فصحت.

- عماد.. أنا مريم.. أنا هنا.. على شمالك.

قُمت وعبرت بضع خطوات لأكون بمقربة منه وابتسمت،
وكأنني نسيت ما بي من تشتت، لا أرى إلا عينيه، نظري في حياء،
وابتسامة خافتة ووقف.

- إزيك يا مريم.

- الحمد لله.. أنت عامل إيه؟

- الحمد لله.

ابتسم ونظر للأرض، وبدونا كحبيين لمن يرى، أو هكذا تمنيت،
عندها لمحت بعض زميلاتى في الكلية عن بعد يُمدقن بنا فلم أبال،
وأكملت حديثي.

- أنا شفتك النهارده على فكرة بس كنت ماشي بسرعة وباصص
في الأرض قلت بلاش أنه عليك كان شكلك مستعجل.

- لا أوعى تعملى كده، إنتي عارفة المجتمع هنا مقفول
وميفهموش البنات اللي زيك، خلى بالك تتفهى غلط.
- عندك حق.

- كان في حاجة عايزة تقوليها؟

- لا متشغلش بالك.

- تعالى يا مريم ممكن نقعد مكان ما كنت قاعدة، أنا مش هقعد
كثير، قوليلي مين مضايقتك؟

- إيه عرفك إني مضايقة؟

- شكلك باين عليه.

- بصراحة يا عماد بيحصل حاجات غريبة معايا، قصدي معانا كلنا.

- إزاي؟

- في واحدة من البنات حرامية، مش عارفة يعنى الحرامية دي بانة على آخر السنة ليه، بس مش كان المفروض تبان من زمان؟! - طيب أهدي واحدة واحدة احكيلى.

سردت له ما حدث، بدا عليه الاهتمام والقلق لكنه لم يعطني إجابة شافية.

- ها... إيه رأيك بقى؟

- مش من البنات يا مريم.

- يعنى عفريت؟

- أنا مش هقدر أقول ده من إيه بالضبط، بس كل اللي أقدر أقوله خلى بالك من نفسك كويس.

- حاضر.

لم أقتنع بما قال عماد، أحسست بشيء غامض لكنني اكتفيت بهذه الكلمة المريحة لجميع الأطراف «حاضر».

- صحيح انت هنا بتعمل إيه؟

- خطيبتى بتدرس هنا في آداب وساعات بعدى عليها.

- أنا آسفة جدًا عطلتك معلى.

- لا مفيش حاجة خالص، أنا مش متأخر عايبها أنا بجيلها بدري

عن ميعادها.

- يا بختها.

لا أعرف كيفية السيطرة على عقلي الباطن، كيف يحق لي قول شيء كهذا؟ ابتسم عماد في خجل كعادته وهم بالقيام.

- أنا همشي دلوقتي وهبقى اطمئن عليكى.

- صحيح أنا مش معايا رقم تليفونك.

- متقلقيش أنا هو صلك.

تفهمت خوفه على مشاعر خطيبته أو خوفه منها.

- طيب تمام.

- سلام وخلي بالك على نفسك وبلاش ثقة في حد، في أى حد.

- حاضر.

ودعته بابتسامة خافتة ترسم احباط لا أدري ماهيته، ولا كيف تجراً واقتحم الموقف؟ هل أحبيته؟ ليس حد الحب بالتأكيد، لكنى كنت أريد التقرب وحسب، على الأقل الآن، على الأرجح تمثيت مثيله أو أردته سنداً لي، ربما فقدان أبى أحد الأسباب، أو كيمياء القلوب اللعينة، الآن لم يعد لدى اختيارات، فقط المضي قدماً ونسيان هذا الشعور السخيف كلما قابلته، كانت رؤيته كفيلاً بإراحة عقلي مما يحدث في البيت، على الأقل لساعتين من الزمن أو أكثر قليلاً.

في أحد الأيام نهضت من نوم مشوش غير مستقر، وبعد أن اغتسلت ذهبت إلى المطبخ أصنع الشاي بالحليب الصباحي، هملت الشاي خارج المطبخ وخرجت لأجد ياسمين أمامي تضع يدها على رقبتها وتنظر إلى في ذهول.

- السلسلة الفضة بتاعتي اللي بحبها، اللي كان فيها مصحف،

فاكراها!

- مالها؟

- ضاعت!

- تلاقيها هنا ولا هناك، دورى عليها كويس.

- دورت.. قلبت الدنيا، افهمى يا مريم، السلسلة كانت في

علبتها لحد امبارح بالليل، وانتي عارفه أنا بحبها قد إيه، وأنا باتفرج

عليها امبارح وبشيل الخواتم الفضة رحح لبستها ونمت، أنا

متأكدة، لبستها ونمت، لما صحيت ملقيتهاش في رقبتى!

- دورى في هدومك يمكن القفل فلت ووقعت فيها.

- دورت يا مريم، نفضت نفسي! قلعت هدومي ولبستها تانى!

- طيب تعالى معايا ندور في الأوضة تانى يمكن وقعت

ومشفتيهاش.

دخلنا الغرفة على أمل أن نجدها فلم يكن لها أثر، تبخر أملى بعد

وقت لم أحسبه وارتسمت علامات الحيرة والتساؤل على وجوهنا،

كنا قد قطعنا أيامًا بغير كلام، فقط نحيات عابرة مقتضبة، في طريق

ذهابها إلى المطبخ رأتنا هند داخل غرفة ياسمين، فنظرت إلينا وقررت

أن تتحدث أخيرًا.

- صباح الخير.

- سلسلة ياسمين الفضة اللي بتحبها.. فاكراها؟

- انهى دى؟ آآه آه افكرتها، اللي فيها المصحف، مالها؟

- ضاعت!

- إمتى؟

جاوبتها ياسمين.

- لبستها بالليل وصحيت مالمقيتهاش في رقبتها؟

لم تُجيبنا هند مما أثار شكوكي وحيرتى للمرة المليون، فقط نظرت نظرة ذات مغزى وظلت تُحدق في الأرض طويلا، ثم رحلت، لم تتناول إفطارها، فقط ارتدت ملابسها وبعد دقائق كانت بالخارج، لم نفهم تصرفها، لم نتكلم، أتراها تعرف شيئا؟ أم أنها تذكرت شيئا آخر، مرت علينا ليلى وكأنها لا ترانى، فقط القت تحية الصباح على ياسمين وذهبت إلى المطبخ ثم إلى غرفتها، وأغلقت بابها!

لا أستطيع أن أفهم أو أستوعب ما يحدث الآن؟ تبدلت أحوالنا، ليست ياسمين إذن! هل هي ليلى؟ أم أصابتنا هلوسة وأصبحنا نسرق بعضنا البعض؟ من فيهن ياترى تلك الممثلة البارعة؟ وأين ذهبت هند؟ ذهبت أنا الأخرى إلى غرفتي، أعد ما تبقى من نقود وما أملكه من أشياء في قنا، ما بال الأشياء تختفي فجأة ولا تعود؟ أين تذهب ومن التي تأخذها ولماذا؟ هل نفحص الحقائق إذن؟ أفحص حقايبى أنا أولهم، لعلى مصابة بمرض عقلي يجعلني أسرق ولا أشعر؟ لا بد أن أعرف الحقيقة.

تمنيت لو أن أسمع صوت عماد أو أقابله حينها، ففي وجوده ترتاح نفسي وتستقر، وكأنه قد خدر كل ما بعقلي وقلبي من قلق، حتى ولو فترة قصيرة من الوقت.

(٤)

قضينا أغلب اليوم في البحث عن سلسلة ياسمين من أجل المعرفة، التي باتت السبب في ضياع صداقتنا والتخوين المستمر والقلق، جاءت ياسمين إلى غرفتي عاقدة يديها تفكر دون أن نتحدث، ظلت واقفة كما هي على باب الغرفة، لم نتناول إفطارنا أو أي وجبة، لم تعد لدينا شهية، ليلى ما زالت مكتتبه على الأرجح، تنام فترات طويلة ولا ترد أي سؤال أو أية تحية.

عند أذان العصر عادت هند من الخارج، هتفت في حماس فقدناه منذ بداية الأحداث المؤسفة.

- يا بنات.

مر كثير من الوقت نفتقد هذه الروح الحُلوة التي تُميزنا، أصبحنا نتجنب بعضنا البعض، ولم نعد كسابق عهدنا، نظرت إلى ياسمين في اندهاش وأردفت.

- تعالى يا هند.

جاءت هند وعلى وجهها علامات أمل وتفاؤل، نظرت إليها ياسمين في فضول، سألت هند.

- فين ليلي؟

أجبتها.

- أكيد نايمة.

- لأ صحوها، أنا عاوزا كوا كلكوا، الموضوع اللي بيحصلنا أنا

عرفت حاجة عنه، وفي قرار لازم يتاخذ مننا كلنا وحالا.

أعرف هند ونخها الصعيدي المتحجر، لن تقول شيئاً إلا بوجودنا

جميعاً كما قالت، أسرعت إلى غرفة ليلي وفتحتها، وجدتها نائمة كما

ظننت، فتحت إضاءة الغرفة بأكملها.

- ليلي.. اصحى بسرعة، هند عاوزانا كلنا عشان اللي بيحصلنا.

أفاقت ليلي من نومها، تقاوم عينيها النور المباغت، وتحاول

استيعاب الكلمات دون ردة فعل، أخذت بيديها كطفلة فنهضت

دون تفكير، ذهبنا إلى غرفتي حيث تجلس هند وياسمين في صمت

وانتظار، تكلمت هند وكأنها تخطب فينا.

- بصوا يا بنات، من الآخر كده مفيش تفسير لكل الحاجات

اللي بتحصلنا إلا إن في جن لابس واحدة فينا، أو عايش معنا في

الشقة، أنا بصراحة مشكتش في الموضوع ده على طول لأن إحنا

عايشين في الشقة بقالنا شهور، لو كان فيه حاجة كانت ظهرت من

بدرى، لكن يظهر إن العيب كده في واحدة فينا، أنا من الأقصر

وأدرى منكم بالمواضيع دي وشفتها كتير قدامى، يمكن حد متغاز

من واحدة فينا عملها حاجة؟ عموماً هنعرف كل حاجة.

لم نتحرك حركة واحدة من أماكننا ونحن نستمع بإنصات شديد إلى ما تقوله هند، ظللنا هكذا لفترة، ثم بدأنا التلفت حولنا والنظر لبعضنا البعض، تجردنا لدقائق من شكوكنا تجاه بعضنا، لنقع في شك أكبر وأعمق وأخطر، أنا لا أؤمن بمثل هذه الأشياء، فالحافظ هو الله، لم تبد ياسمين مقتنعة أيضًا لقولها.

- جديد الكلام ده يا هند!

ولم تلتق الفكرة قبولا عند ليلى أيضًا.

- وإزاي هنعرف بقى إن شاء الله؟ إوعى تقولي هنجيب دجال

في البيت؟!

- لا دجال إيه يا شيخة؟ هنروح لشيخ، شيخ كويس جدًا أعرفه

وأهلى كمان يعرفوه، أنا كلمته في التليفون لما سلسلة ياسمين ضاعت،

كان كتير بقى اللي بيحصل ده، قالى يا اما واحدة فيكم ملبوسة يا إما

البيت مسكون!

- يعنى من دماغك كده يا هند بدون ما تقوليلنا، روحى إنتي

وشوفي مين هيروح لو موافقين، أنا مش رايحة للناس دى.

- يا ليلى مفيش حل قدامنا غيره، مين أخذ سلسلة ياسمين؟ مين

قطع بووت مريم؟ مين قطع محفظتى؟ مين يوماتى بياخذ الفلوس من

محفظتى أنا ومريم؟ لولا إن ياسمين معتمدة على الفيزا كان اتسرفت

منها فلوس أكثر كمان؟

لم تجبها ليلي فنظرت لها هند في شك وتابعت.

- قوليلي مين يا ليلي لو عارفه؟

- تقصدي أنا يعني؟

حينها لم أقصد الاتهام المباشر، لكنني أردت أن أفرغ ما يدور بداخلي.

- معلى يا ليلي يعني، ما هو إنتي الوحيدة اللي محصلكيش

حاجة! حتى نفسك مكانا إحنا، كنت هتفكرى إزاي؟

- يعني إنتي موافقة يا مريم نروح لدجال؟

انطلق صوت هند مُدافعًا.

- شيخ مش دجال يا ليلي.

نظرت إلى ياسمين في تردد.

- مش عارفة، أفكر، ياسمين إيه رأيك؟

- والله أنا تعبت، أنا مبحبش الناس دي، بس لو هيقولنا في إيه

وانتو هتروحوها ضطر أروح.

تضغط هند على نقطة ضعفنا الآن، وهي «معرفة الحقيقة».

- مريم، مفيش وقت للتفكير، هو مستنينا بعد المغرب على طول،

لازم نقوم نلبس دلوقتي، على بال ما نروح المشواره ده يا دوب.

- هو فين يا هند؟

- في «البياضية».

- فين دي؟

- بين الأقصر وإسنا.

- ودي هنركبلها إيه دي؟

- ياللا ياللا يا بنات أنا عارفة الطريق.

قاومت ليلي.

- أنا مش رايحة، فكوني من الحوار ده.

لكنني ضغطت عليها بنفس أسلوب هند.

- ليه يا ليلي مش عاوزة تروحي، أصلا كل الشكوك ناحيتك

وإنتي مش عاوزة حد يعرف حاجة ليه؟ اللي مش راضي يروح يا

بنات يبقى هو اللي بيعمل كده فينا أو هو اللي عنده المشكلة بقى؟

- أوووف... أمري إلى الله.

في أقل من نصف الساعة كنا جميعا مستعدات للخروج، نرتدى ملابس بسيطة، يعلوها «البالطو» لما له من دور فعال في مواجهة برد شتاء الصعيد القارس، ارتدت هند «عباءة سوداء» وأمسكت سبحة بيديها مما جعلني أضحك على هيتها، أغلقنا البوابة الحديدية الزرقاء قبيل موعد أذان المغرب، مارين على الحواري الضيقة النظيفة، وما إن وصلنا إلى الشارع الرئيسي حتى استقللنا سيارة أجرة قاصدات موقف أتوبيسات قنا، طغى علينا إحساس المغامرة، إلا هند كانت في مهمة رسمية كبيرة وخطيرة، لاحظت أني ارتديت طرحتي الخضراء الخفيفة التي لن تغنى عنى شيئاً في مساء طقس شديد البرودة،

على العموم لقد تأخر الوقت كي أعود وأستبدلها، ولا أملك ما يكفي من النقود لشراء أخرى في طريقنا، فقد سُرقَت جميع نقودي إلا القليل، أتمنى أن يكفي لشراء الطعام والمواصلات حتى ترسل أُمِّي نقوداً أخرى، ولكن لماذا ترسلها؟ كي تُسرق من جديد؟ لا أريد نقوداً حتى أعرف أين تختفي.

وصلنا موقف الأتوبيسات ثم ركبنا ميكروباص (قنا - الأقصر)، وصلنا الأقصر ولم يَدُم البحث طويلاً عن ميكروباص آخر (الأقصر - إسنا)، يبدو أن هند تعرف الطريق جيداً كما قالت، استغرق الطريق كله ساعة ونصف الساعة تقريباً، هاتفت هند الشيخ لتخبره عن قُرب وصولنا.

قرية «البياضية» تقع في منتصف الطريق تقريباً بين الأقصر وإسنا، أو لنقل في ثلثه الأول، وصلنا عند قهوة بجانبها كنيسة، كان لابد أن ينتظرنا الشيخ هناك ليأخذنا إلى داره، هند تعرف الطريق إلى الكنيسة فقط، ولا تتذكر جيداً أين يقع بيته، خاصة مع حلول الظلام وقد وصلنا بعد أذان العشاء. نزلنا من الميكروباص فوجدناه منتظراً، يرتدى جلباباً أزرق، تلف رقبته كوفية حمراء، وصندل أسود جلدي، طويل، أسمر، رشيق، أسود العينين، يبتسم ابتسامة مُجيفة بعض الشيء، أظافره طويلة مُتسخة، مديده مصافحاً، وليس هذا من عادة شيوخ الصعيد.

- أهلا وسهلا يا بنات.. إزيكم؟
اتسعت ابتسامة هند في تفاخر.

- الشيخ «ماهر» يا بنات.

رددنا جميعًا.

- أهلا وسهلا.

سار وهند في المقدمة، وأنا وباسمين وليلى وراءهن، لم نتوقف عن الضحك على أئفه الأسباب، لا أدري ماذا حل بنا، ربما لأنها مغامرتنا الأولى، أغلب الظن أننا سوف نضحك ونستمع كثيرا الليلة، لم نلاحظ معالم الطريق من كثرة الضحك، كل ما تذكرته أن البيت يسبقه ممر طويل على يمينه زرع طويل رُبما قمح، ولا أدري ما يحده من جهة اليسار، عبرنا هذا المر الطيني التربة وراءهن لندخل فناء كبيرا واسعًا، أمامه منزل طيني صغير مطلى باللون الأبيض، ميزنا اللون على ضوء إضاءة ضعيفة مُعلقة خارج البيت، على يسار المدخل كليين طولهما يقترب من طولنا، لونها أسود فاحم، ينبحان بلا توقف ويشيران الخوف والتوتر بيننا، عيونهما تضيء في الظلام، لاحظ الشيخ حالنا وقال مطمئنًا.

- اتفضلوا يا بنات واقفين ليه؟

يتكلم الشيخ متبسّمًا هادئًا بلهجته الصعيدية الحادة المشابهة للهجة هند، نظرنا إلى الكلاب في خوف.

- متخافوش دول مربوطين.

أكمل جملته والكلاب لم تتوقف عن النباح إلا بنظرة واحدة منه، أسكتتهما وأسكتتهما ثم رجعا خطوات للخلف وجلسا، شاهدا ما حدث فسرت فينا رجفة، ليست مغامرة خفيفة الظل كما توقعنا،

ولكن لابد من إكمالها فلا مجال للتراجع الآن، بلا شك وقعناتن
تأثير الأجواء المحيطة، فمن الطبيعي أن تسيطر على حيوانك الأليف،
ها نحن نقف على عتبة بيته.

- اتفضلوا يا بنات، تعالوا من هنا.

تركنا البيت الطيني الصغير أمانا واتجهنا ناحية اليسار، مشينا
وراء هند ننظر إلى كلابه والنور الخافت يضيء أعينها أكثر، وهما
مازالا محدقين نحونا، نزلنا بضع درجات إلى غرفة تحت الأرض،
في هذه اللحظة تملك الخوف منا دفعة واحدة، الغرفة صغيرة، لون
جدرانها أزرق فاتح اللون، باب دخول الغرفة يقع في منتصفها
بالضبط، في مواجهة الباب مقعد خشبي، فوقه مباشرة عُلق سجادة
صلاة زرقاء قاتم لونها، بجانبها على اليمين صورة السيدة العذراء
تحمل السيد المسيح في وداعة، وبجانبها على اليسار صورة ثلاثة
لفرعون مهيب لم أميزه، على يمين الغرفة كنية قديمة الصُنع كبيرة
ملتصقة بالحائط، وعلى يسارها مكتب صغير فوقه كتب كثيرة قديمة
وجديدة، عليه أباجورة ذات إضاءة حمراء، على جانبي المكتب يوجد
كرسي واحد جلست عليه هند، وجلست أنا في منتصف الكنية عن
يمينني ليلي وعن يساري ياسمين.

كان الرجل على درجة كبيرة من الأدب والالطف، جلسنا
صامتات فأراد أن يكسر الجليد، أخذ يسألنا عن دراستنا وأحوالنا في
الجامعة، خُضنا في هذا الحديث لدقائق، وبعدها قال «إن العلم نور

حقيقي للإنسان وأن للعلم درجات كثيرة، منها المميّزة وهي التي خص الله بها بعض عباده الصالحين، وإن الشخص المتعلم حقًا يضيء نورًا لمن حوله» ثم أعطى كل منا ورقة بيضاء متوسطة الحجم لتكتب فيها اسمها واسم والدتها وتقوله بصوت عالٍ ففعلنا وعندما جاء دور ليلى.

- ليلي بنت حبيبة.

ابتسم الشيخ في ثقة غريبة.

- لا يا ليلي، إنتي اسمك لولا مش ليلي، إنتي مغيراه بس عشان مش عاجبك.

- لا اسمي ليلي.

- لا اسمك مش ليلي يا لولا، أنا آسف بس دي حاجة ما تزعلش؟ ده اسمك!

لم يُعجب هند ما يحدث فقررت أن تنهيه.

- لا إنتي اسمك لولا وإحنا كلنا عارفين.

نظرت ليلي إلى هند في حنق وصرخت فيها.

- وإنتي مالك إنتي؟

هنا أحسست أنه أبله فاستخففت به، نظر إليها الشيخ ثم سألها في تحد عن ملكية بيتها وكأنه يعرف ما تخفيه ويسخر من كذبها، وكأنها لعبة مُسلية، الغريب أن ليلي بدت كاذبة أيضًا فضحك بمكر وقاطعها.

- خلاص يا بنتي.. ساكنة مالكة ولا مأجرة... ما علينا.

ثم التفت إلى.

- لابسة أسود ليه يا مريم؟

- والدى توفي.

نظر إلى في ثقة وقال.

- توفي من أكثر من شهر ونص، ليه لسه لابسة الأسود؟ المفروض

نمشي تبع السنة الشريفة يا مريم.

قلت وقد غلبني الدهول.

- صح؟

نظرت إليه في شك وأردت أن أعيد تقييمي، فالرجل ليس أبلها
كما توقعت، فكرت وقتها أن هند زودته بالمعلومات إن لم تكن معه،
لكنني استرجعت أنها تضررت مثل تماما أم تراها خدعة كبيرة منهما؟
أثرت أن أركز فيما أنا فيه الآن وأترك التفكير لاسحقا، قاطع تفكيري
قائلاً.

- شوفوا يا بنات، هقرا على كل واحدة فيكم لو واحدة فيها

حاجة هييان، لو كنتم كويسين يبقى نشوف الشقة.

صحت في أمل وخوف.

- يعني تيجي معانا الشقة؟

- لا.. من غير ما أروح هعرف من هنا.

بدأ «ماهر» طقوسه لمعرفة المصابة، بدأت هند الطقوس وكأنها معتادة عليها، قام من مكانه ووضع يده اليمنى على رأسها، ويده اليسرى مسح على جبينها، ثم أخذ في ترديد عبارات غير مفهومة بلغة غريبة بصوت خفيض، ثم ردد (وجعلنا من الشجر الأخضر نارا) وقد لاحظت أنها من الآية القرآنية في سورة ياسين بسم الله الرحمن الرحيم «الذي جعل لكم من الشجر الأخضر نارا فإذا أنتم منه توقدون» في صوت مسموع، بعدها ظل يردد عبارة (يا بدوح .. ثم يتمم بصوت خافض كلام لا نسمعه يا بدوح.. ثم يعود ويتمم بصوت خافض كلام لا نسمعه يا بدوح) بصوت عال مُفزع، عندها انتفض جسده وتشنج وهدأ في نفس اللحظة! تشنُّج وهدوء في نفس الوقت! إنه يتصنع بلا شك!

لكننا شاهدنا هند وقد اختفي سواد حدقة عينيها، وانقلب إلى الأعلى، وتحولت عيناها إلى اللون الأبيض فقط، انتابنا ذهول لا يخلو من خوف، كنا نتابعها في ترقب وفضول، أما ليلى ظلت تُمعن النظر فقط في صورة الفرعوني على الجدار أمامها، بعدها طلب ورقتها البيضاء ليجلس ويكتب عليها بلون برتقالي غير مرئي كلمات غير مفهومة أيضا. (عرفت ذلك عندما جاء دوري وهممت بالنظر إلى ورقة ياسمين الملقاة على المكتب من باب الفضول)، ثم قامت ياسمين لتجلس على نفس الكرسي المقابل للمكتب وتنضم إلينا هند، نفس الطقوس وحركة العين والتشنجات والعبارات مع ياسمين لا يوجد أي فرق، ثم الكتابة على الورقة البيضاء وضمها إلى ورقة هند.

جاء دوري، كنت قد نلت حظي من الخوف ولا أريد المزيد، استسلمت وأقنعني أنه لا داعي للخوف خاصة وأن البنات على ما يرام مثلما أرى، لكن وما إن بدأ بترديد كلمات «يا بدوح.. يا بدوح» حتى أحسست برجفة سرت في جسدي كله وتوقف عقلي عن التحليل.

كانت ليلي معنا بجسدها فقط، عيناها وعقلها مع الفرعون المعلق، أمضت كل هذا الوقت في تأمل وكأنها يتحدثان، قامت ليل وأدت كل الطقوس ولكن من الواضح أنها أنهكتها جدًا واستهلكت من الجهد ما بذله مع ثلاثتنا! آثار التعب على وجهه بدت واضحة، جلس منهكا خلف مكتبه، يجاهد كي يرسم ابتسامة.. ينظر في أوراقنا البيضاء التي أمامه بعد أن مלאها بالحبر البرتقالي والكلمات الملبكة والدوائر والنجوم ورسوم أخرى كثيرة، لكن فضول هند لم يهدأ.

- ها يا سيدنا.. مين فينا فيها حاجة؟

أشار الشيخ أن كل منا بها مشاكل صغيرة مثل الحسد لهند، وريح جن ياسمين، وكلها أمور تُحل بوسائل بسيطة، لبس الفضة، الاستحمام بورق نبق، وما إلى غير ذلك من وصفات يرددها أمثاله، كنت وياسمين نستمع في تهكم، ردت ياسمين في حدة.

- لو عندي ريح جن صحيح.. طيب ما أقرأ سورة البقرة؟ إيه اللي يخيليني أطلطل؟

- وماله اقرى سورة البقرة طبعًا.

- بس أنت مقولتش كده الأول، تقول نبق وفضة ومنتجيش سيرة القرآن، إزاي شيخ ومتعالجش بالقرآن؟

تبسم الشيخ ابتسامة صفراء ولم يعلق، التفت إلى سريعًا.

- خليكى إنتي بعدين يا مريم هر جعلك،

ثم نظر في حيرة إلى ليلي وهي ما زالت تحديق في الفرعون وقال.

- ليلي.. الشيوخ اللي بتروحيلهم عاملين أحلى شغل، التحويلة

اللي عملاها قوية جدًا ومش مخليانى شايف أي حاجة عندك.

أعرف أن عمل التحويلة شيء مُعتاد ومهم لدى أغلب أهل

الصعيد، لتحويطهم من أي شر لهم وأهل بيتهم، فلا يستطيع أحد

إيذاءهم عن طريق السحر ولا الحسد ولا يمسهم جان.

لم تقاوم ليلي كلامه عن التحويلة فصمتت، أدرك أنها لن تقاوم

مرة أخرى فاسترسل وتكلم عن حبيبها السابق الذي تزوج حديثًا،

ولامها لتركه حيث إنه ما زال يحبها وكان على أنم الاستعداد لفعل

أي شيء من أجلها، ثم ابتسم في خبث وقال.

- بس انتو في حاجة مزعلاكم يا بنات.

قررت أخيرًا ياسمين أن تشاركه شيئًا لعله يجدي نفعًا.

- وماله نقولك زعلانين ليه، زعلانين على حالنا المايل، كل

البنات بتتخطب إلا إحنا قاعدين زي الفقر.

- نعملكوا حاجة طيب، عاوزة تتجوزي مين يا مريم؟

- عاوزة أتجوز مين!

- لو عاوزة تتجوزي حد معين هاتيلي اسم أمه بعد كده وتعالى،

طيب يا بنات.. نعمل دور شاي ونكمل.

قام وأتى بالشاي في دقيقتين فقط كأنه جاهز دائماً، لم نأخذ أي فرصة للتعليق على أي شيء، رأيت ياسمين الشاي ولم تستطع مقاومة إدمانها له فأخذت كوباً شربته حتى آخر رشفة دون تفكير، هندا لا تشرب الشاي مطلقاً فاعتذرت، بينما ساورتني الشكوك أنا وليل، وأحس بنا فلم يلح علينا كعادة الصعابدة، تركنا نعمل ما نسترع إليه أنفسنا، بعد أن رأيت ياسمين سليمة لم يصبها مكروه بعد شربها للشاي عن آخره، أخذت كوباً على مهل، نظر إلى ماهر وابتسم وكأنه عرف ما دار بعقلي، أخذت رشفة صغيرة على مهل، تشجعت ليل واخذت نفس الكوب من يدي وشربت قليل من الباقي، كان شاباً صعيدياً أصيلاً بالنعناع حلو المذاق، بعد أن شربت الشاي أصابني لوثة ضحك هستيرية لا أعرف لماذا، وبدأت سخافاتي تظهر معه.

- أنت بتشتغل إيه يا شيخ؟

- دكتور روحانيات.

- بالعربي ولا بالإنجليزي؟

- أنا اتعلمت العلم ده في نيجيريا.

- وكنت مبسوط هناك؟

- جداً.

- وياه اللي رجعت تاني؟

- بلدي أولى بيا، وولادي لازم يعرفوا بلد أبوهم خاصة إن أمهم نيجيرية.

انفلتت ضحكة عالية من القلب.

- يعنى زي دكتور زويل كده لما رجع عشان يفيد بلده؟

نظر إلى الشيخ في تحد.

- على راحتك يا مريم.

عادت ابتسامته الصفراء، هند تنظر إلى في غضب، ياسمين تبسم بينما ليلى لازالت تحلق مع الفرعون المريب على الجدار الأزرق، أقوم بحركات فجائية متتالية وألملم أطراف حجابي وأساوى ملابس عازمة على القيام وإنهاء هذه الجلسة السخيفة.

- ياللا ياللا يا بنات، إحنا اتأخرنا قوى.

- لا يعنى إزاي تمشوا، أنتم زي بناتي، باتوا معنا والله، وسط

مراقي وولادي دول هيفرحوا قوى، قوليلهم يا هند والله.

- الله يخليك يا سيدنا.

أردت أن أوقفه وأعود بذاكرته أنه فقط أداة لتسهيل أمر ما وأنا

لسنا أقرباءه.

- طيب حسابك كام بقى؟

- لا لا لا أنا مش هاخذ فلوس، هتديني فلوس على إيه؟

- مش عارفة بس مجهودك برضوا.

- قوليلهم خلاص يا هند.

دنيت من أذن هند.

- هو هيقشش علينا ولا إيه؟

- خلاص يا مريم إحنا أصلاً لينا معاه حساب، بقولك يا شيخ أنا عاوزة حاجة تشيل عنى الصدة.

كانت باسمين صامته ولىلى أول الفارين إلى الباب، وقفت على عتبه بينما لا تزال تحدق في الفرعون، عندما وصلت بالقرب من لىلى سمعت صوته يناديني

- يا مريم... هاتي جى هنا تانى، خدى ده رقم تليفونى والعنوان.

كان واثقاً مما يقول باستفزاز، أخذت الورقة ودستها في الجيب السحري بالمحفظة، وقفنا جميعاً نرى ما يفعله لهند.

- ثوانى بس يا بنات، اعمل لهند «فتح طريق».

كنت أعرف هذا المصطلح لكن هذه المرة الأولى التي أراه فيها، جاء بورقة بيضاء طويلة ثم طبقها كالمروحة الورقية، كتب طلاسم غير مفهومة بقلم حبر أزرق، استطعت أن أقرأ كلمة «الله» في نصف كل مقطع من الطلاسم بوضوح، إلى جانب بعض الحروف المتناثرة فكان لا يكتب (نحن) كلمة واحدة ولكن (ن ح ن)، طبق المروحة الورقية في قطعة قماش قديمة ألوانها أزرق وأحمر ثم أخاطها باحتراف.

حينها تذكرت صديقة لي في الجامعة من الأقصر، تدرس في كلية إعلام، فقيرة الحال والجمال، أحبت معيداً في الكلية وأرادت الزواج به، كان شيئاً من الخيال أن تفكر بمثله، الشاب مثقف من طبقة اجتماعية ومادية أعلى كثيراً ومختلفة تماماً عنها، ذهبت إلى «شيخ» في «إسنا» أمثال ماهر وما أكثرهم في الصعيد، خاصة

الأقصر وإسنا وما حولها، لم تمر السنة الدراسية وسط ذهولنا جميعًا إلا وقد تزوجت هذا الشاب، لم تبذل أي جهد معه، لم تبرهن أنها بنت أصيلة وسوف تقف معه في حلو أوقاته وأحلكها سواد، لم تُرهق نفسها في تعديل هيئتها أو تنحيف بدنها، لم يعرفها جيدًا، لم يجتبرها في مواقف كما يفعل باقي الشباب، لم يهتم بمستوى أهلها ولا بقله جمالها، لكنه أتاها وتمنى الزواج بها، ذهب إلى أهلها وقدم كل فروض الطاعة من أجلها في أقل من شهر وتزوجها في غضون السنة قبل أن يخطفها رجل آخر كما كان يقول في هوس دائها!

لم يستغرق فتح الطريق ثلاث دقائق كاملة، أخذته هند في غير هيبة ولا ريبة.

- أحطه في صدري يا شيخ؟

- حطيه دلوقتي في صدرك، لما تروحي شيليه تحت المخدة الجنب اليمين ونامي على جنبك اليمين، غير كده هتضطري تخلعيه كل ما تروحي الحمام.

قبل أن نخرج من الغرفة همست ياسمين في أذني «هو هيعمل إيه بالورق اللي فيه أسامينا؟»، فتنبعت وبدت على صوتي القلق.

- صحيح يا شيخ فين الورق اللي فيه أسامينا؟

ابتسمت نفس ابتسامته الصفراء.

- آآه الورق، ماتقلقوش.

مزق الورق قطعًا صغيرة عدة مرات حتى أصبح لا شيء، عرضت أن نأخذ قمامته بالخارج معنا، فواجهتني ابتسامته تحذيرية بما

تحمله الرجل من استهزاء واستخفاف، الآن يجب أن نرحل وكفاكل ما كان، أسرعت البنات أمامي بخطوات وكنت الأخيرة على مقربة منه فناداني.

- مريم.. إلا صحيح.. مفيش حاجة عندكم في البيت أثرية؟

- زي إيه؟

- زي صندوق خشب مثلاً؟

- وأنت عرفت إزاي؟

- أنا أعرف وأنا قاعد هنا مش لازم اتنقل، الصندوق ده هو سبب اللي اتتوا فيه، أنا ممكن آخده وأكشف عليه وأريحكم.

- بس الصندوق ده مش ملكنا، ده بتاع الحجة صاحبة البيت ولازم أكلمها أسألها الأول.

- على راحتك بس أكيد هي مش هترضى.

- أكيد ليه بقى؟

- لأنه أثرى والله أعلم جاياه منين، إنتي عارفة تجارة الآثار في الصعيد، عموماً فكرى وردى عليا.

- مش هديهولك إلا لما تيجى صاحبة البيت هي تديهولك، وده اللي عندي.

- عموماً معاكى رقمى وعنوانى وشاورى عقلك يا بنت الناس. هل يرانى بلهاء إلى هذه الدرجة هذا المشعوذ المختل، ربما عرف عن الصندوق من هند، وربما من شياطينه، لكنني لن أفرط فيما ليس

لي أبدا خاصة أنه أثري، لن أخون الأمانة ليبيعه هو بأعلى الأثمان، كانت حجته المسكينة أن الصندوق هو السبب، إذا كان هذا هو السبب فلماذا لم يوضح ذلك أمام كل البنات؟ حيلة ساذجة من دجال مُحْتال.

خرجنا من هذه الغرفة، أو المغارة إن صح التعبير في الساعة الحادية عشرة مساء، نظرنا إلى الكلاب فبادلتنا نفس النظرة الحادة التي لم تعد تُخيفنا دون أن تنبح، مشيت أنا وياسمين وليلى أولا والشيخ وهند ورائنا، عبرنا الفناء الكبير ولاحظنا أن البيت الطيني الصغير مغلق هذه المرة بلا أصوات، ربما نام أهل البيت، في ليالي الشتاء في قلب الصعيد لن تجد سوى الققط والكلاب في الطرقات، في القرى كل شيء يسكن بعد صلاة العشاء حتى ذوات الأربع.

خرجنا في حالة عكسية لما أتينا عليه، بدأنا نتلفت حولنا في استقراء للطريق، الجو شديد البرودة، سواد الليل فاحم كثيب لا ترى منه شيئا، لا تسمع صوت أي من المخلوقات، وكأننا في مدينة أشباح، فقط حفيف الزرع وتخبطه ببعضه في الهواء، الإنارة موضوعة على استحياء كل عدة أمتار كثيرة للإرشاد، إضاءة خفيفة جدًا ترهق عينيك عند تبين الطريق، مشينا في المر الطويل للمرة الثانية، عرفنا أن جهة اليمين بها ترعة أو بركة راكدة.

أدركنا أنه البيت الوحيد بين الزرع والترعة، لا يوجد حوله أي بيوت أخرى، ولا أي شيء على الاطلاق، مشينا وكأننا كنا مغيبات لفترة من الزمن، وقد صفعنا الهواء البارد على وجهنا صفعه قوية لزوم الإفاقة، نظرنا إلى بعضنا البعض نفس النظرة المحملة بالغضب

واللوم والندم، ساد الصمت بيننا لفترة ثم تكلمنا أخيرا وكانت بداية اللوم لياسمين.

- إحنا إزاي عملنا كده يا بنات؟ إحنا كنا مغيبات أكيد، ده إحنا حتى ما قلناش لأهلنا؟ يعنى لو كان حصلنا حاجة ولا حد كان هيعرف إحنا فين.

وكأنني نصف واعية تساءلت.

- عندك حق يا ياسمين أنا مش قادرة أصدق، شوفتوا الكلاب؟ شوفتم لما بصلهم وسكتوا؟

خرجت ليلي عن صمتها منذ رأت الفرعون المعلق على الحائط.
- يا جماعة اللي أكثر من الكلاب صورة الفرعون.

- صحيح يا ليلي إنتي كنت قاعدة مبحلقاله طول القاعدة وما نطقتيش كلمتين على بعض؟

- عاوزه أقول على حاجة بس ما تتضحوش، كلكم كانت عينكم بتقلب لفوق وبتبقى كلها بيضاء لما كان يقول (يا بدوح يا بدوح)!

تذكرت ما رأيته أنا أيضًا.

- آه شفتكم كلكم وإنتي كمان يا ليلي على فكرة.
واندفعت ياسمين مثلنا تتذكر.

- آه شفتكم برضه بس مارضيش أخضكم، يا نهار أسود!
أكملت ليلي.

- الفرعون اللي على الحيطه، كانت عنيه بتقلب بالتوازي مع كل

واحدة فيكو عينها بتقلب، حركة عين مريم كانت نفس حركة عينه
بالظبط! وهند وياسمين! والله العظيم.

قلت في توكيد.

- وأكيد إنتي بقى كمان طالما عينك قلبت يبقى أكيد عينه قلبت

معاكى!

أردفت ليلي في سخافة.

- يمكن.

استكملت ملاحظاتي.

- على فكرة أنا وهو بيقول الكلمة دى حسيت صوابع إيدي

بتعمل حركات غريبة في الهوا، الغريب إني مكتتش عارفة أسيطر
عليها، كأنها كانت بترسم كلام؟ غير أني اترعشت جامد.

لطمت ياسمين خدها في ندم.

- يا نهار أسود.. يا نهار أسود!

عادت فترة الصمت إلى أن قطعتها ياسمين للمرة الثانية.

- ارجعى ورا يا مريم ماتسيبيش هند لوحدها.

قالت ليلي في لؤم بين.

- وهي هند دى يتخاف عليها.

رجعت إلى هند والشيخ ماهر، سرت بجانب هند فوجدتها تُحدثه

عن ليلي بدورها.

- أهى كده من زمان يا شيخ ليلي دي، طول عمرها واعية وتخاف

على القرش، عايشة كده سفلة علينا.

لم أفهم موقف هند وليلى وهما اللتان تجتمعهما صداقة سنوات
الجامعة والمتشاركتان في نفس الغرفة! صحت في عجب.

- إيه ده هي طلعت ليلى؟

- مش عارفها يا مريم، بس هو شاكك في البيت.

- وليه ما قالش الكلام ده وإحنا قاعدين هناك؟

لم تُجب هند على سؤالي، وصلنا إلى الكنيسة ثم القهوة التي انتظرنا
عندها الدجال ماهر، صاحب القهوة الخالية تمامًا موجود بصحبة
صبيه يحسبان الإيراد وأشياء أخرى، نظر إلينا المعلم نظرة كلها
احتقار وصاح بصوت عالٍ!

- أستغفر الله العظيم، اللهم إنا نعوذ بك من الكُفر، شهل يا بني
خلينا نروح بقى.

تجاهلت هند نظرات صاحب القهوة ونظرت إلى شيخها.

- طيب يا شيخ لو عرفت حاجة أبقى كلمنى وإحنا لو حصل
حاجة تانية هكلمك برضه.

- لا أنا واقف معاكوا لحد ما أطمئن إنكم ركبتو، والله كتتم بينم
معانا؟

لمحنا ميكروباص قادم لعينين سائقه نظرة غير مريحة بالمرّة، أوفت
وسألت.

- قنا؟

- قنا؟ دلوقتي!

وانطلق بدون كلمة أخرى، بعد دقائق جاء ميكروباص آخر،
وعلى الفور وقفت هند أمامه.

- قنا؟

أجابها السائق وقد عزم الاستغلال.

- مخصوص ولا موقف؟

- أي حاجة، ياللا ياللا يا بنات اتاخرننا، مع السلامة يا شيخ.

نظر إلى ماهر في سخرية مسترة ولوح بيده.

- مع السلامة يا مريم.

ألقى سلامه بضحكة عالية غير منطقية، لم أفهم ما الداعي
للضحك ولم أرد السلام، فتحت هند باب الميكروباص الجرار
وأشارت إلينا أن ندخل، ثم أردف قائلاً.

- طمنوني عليكم أول ما توصلوا ضروري يا هند.

- حاضر يا سيدنا.

سائق الميكروباص كأغلب أمثاله يستمع إلى أغنية مُسفة بصوت
عالٍ، والمغنى ينوح طوال الأغنية، دخلت الميكروباص وجلست
على آخر كنية في جهة الشمال بجانب الشباك، ورائي دخلت ياسمين
وجلست على نفس الكنية في الجهة المقابلة بجانب الشباك الآخر،
في حين جلست هند وليلى على الكنية الصغيرة في المنتصف أمامنا،
كنا جميعاً نتابع الطريق من نوافذ السيارة وكأننا نبحث عن شيء ما؟
أحسست بتعب شديد وناشدت السائق.

- وطبي وطبي يا عم لو سمحت، الجو ليل ودماغنا مصدعة
وتعبانين.

برطم السائق غير سعيد ولا مقتنع بخفض صوت الكاسيت دون
أن ينظر إلينا.

- في حاجة ولا إيه؟ إنتو كنتوا فين؟

- مافيش يا عم مافيش.

- إنتو متترفزين ليه، لا صحيح كنتو فين؟

نظرت إليه ياسمين وقد أقسمت عيناها على تلقينه درسًا في
الأدب إذا سمعت كلمة إضافية، أردت أن أوفر طاقتنا جميعًا فأجبه
لعله ينتهي من فضوله.

- كنا عند ناس قرابيننا.

جزت ياسمين على أسنانها في غيظ.

- راجل جماز جمز يا ساتر.

لم يتته السائق من فضوله وتدخله فيما لا يعنيه فأراد أن يشارك
برأيه.

- آه قرابينكم، كنتوا بيتوا هناك، الدنيا شتا والساعة ١١ بالليل!

بدأ صبري ينفذ فنظرت له نظرة في مرآة السيارة فهمها جيدًا
فأغلق فمه، كانت أعصابي تغلي ولن أحتمل سخافات أحد الجمازين
كما تقول ياسمين، وصلني نفس إحساس كل من حولي في تلك
اللحظات، الندم والندم ثم الندم، فيما عدا هند، لأنها معتادة على
مثل هذه الأمور، تصدقها وتخوض فيها للنهائية، نظرت من الشباك

وتأملت ما حدث منذ أن جاءت هند وقت العصر لتقنعا وعدم تقديرى للأمور، ليلي التي كنا نقف جميعاً ضدها، تأملت ما حدث وكأنه شريط سينمائي، مغامرة غير محمودة العواقب لأربع بنات جامعات، يذهبن بمفردهن إلى دجال مُشعوذ، في قرية بمحافظة بداخل قلب الصعيد، في شتاء يناير القارس المخيف ليلاً، لا يعرف عنهن أهلهم ولا حتى أحد من أصدقائهم شيئاً، ماذا لو خُطفنا وهذا أتفه شيء محتمل في مثل هذا المكان المخيف؟ ماذا لو دس لنا ماهر شيئاً في الشاي؟ وما الفائدة من تقطيع أوراقنا؟ إنه يعرفنا الآن ويعرف أسماء أمهاتنا أيضاً، يستطيع أن يفعل ما يحلو له ولن ألومه، أدرس القانون وقد تعلمت أن القانون لا يحمي المغفلين، نظرت إلى البنات فوجدتهن في مثل حالتى صامتات متأملات، فندهت عليهن مداعبة، أو هكذا كنت أحاول.

- يا بدوح.

نظرن إلى جميعاً لكن ياسمين لم تبال، ظل رأسها مائلاً إلى الشباك، في حين نظرت إلى الخلف هند وليلي، نظرت لنا ليلي التي كانت تجلس مقابلة لي في الأمام مستفسرة.

- الله.. بدلتوا طرحكم ليه؟

أجبتها بسؤال.

- بدلنا طرحنا؟

- أيوه إنتي وياسمين بدلتوا طرحكم، إنتي بقيتي الصفراء وياسمين الخضراء أهو.

أخذت أتفحص ما الذي ارتديه فوق رأسى ثم تبادلت أنا
وياسمين نظراتنا لبعض وإلى ما ترتديه في ذهول! لقد بُدِّل حجابنا
فعلا ولا ندري كيف؟ في الحال خلعت طرحة ياسمين وأعطيتها
إياها كما خلعت طرحتى هي الأخرى، صرخت ياسمين.

- يا نهار أسود.. يا نهار أسود.. والله مابدلتها؟!

- والله مابدلتها، لأننا مش مجنونة مابدلتهاش.

أخفض السائق صوت الكاسيت أكثر ليستمع إلينا في وضوح،
أسرعت إلينا هند وليلى الجالستين في الكنبة التي أمامنا مباشرة بنفس
ترتيب مواجهتهما لنا، ليلى أمامى وهند أمام ياسمين، زاغت أعين
ليلى وهمست.

- وطوا صوتكم والنبي.. وطوا صوتكم، ممكن نتخطف هنا،
أبوس إديكم وطوا صوتكم.

شخصت هند ببصرها نحونا ولم تنطق بكلمة، لاحظنا أن السائق
فعلا يسترق السمع بشغف وفضول.

- هو في إيه؟

في سرعة ولخبطة أجابت ليلى.

- مفيش حاجة، عاوزين نوصل بقى علشان اتأخرنا قوي وأهلنا
مستنين.

حاولت هند تفسير ما حدث في برود وكأنها تُذكرنى بشيء نسيت،
- مش إنتي يا مريم ماكتتش عاجباك الطرحة من الصبح عشان
شيفون تلاقىكى بدلتها ونسيتي.
أجابتها ياسمين في عصبية.

- هي نسيت وأنا كمان نسيت يا هند؟

بقيت أنا وياسمين في صمت، نظرت ليلي إلى هند بحق وقالت.

- هي كانت شورة مهيبة، أنا عارفة إيه اللي كان خلانا نمشي ورا

واحدة زيك؟

لم تعلق هند، ظللت أبكي وأنا أفكر في أمي وأهلي، كنت أشتاق إليهم
وأفقد إحساس الأمان بجانبهم، وأنا أبكي بحرقة نظرت إلى الأرض،
كانت ليلي أمامي تواسيني وأرجلها في الممر الضيق الذي تخرج أو تدخل
منه الميكروباص، فإذا بي أبكي أكثر وأنا أنظر إلى ليلي في دهشة.

- وده إيه ده كمان؟

- في إيه؟

- إنتي بدلتى البوت بتاعك مع هند؟

نظرت كل منهما إلى رجلها، رفعت هند رأسها سريعًا بينما ظلت
ليلي تنظر إلى البوت الذي ترتديه وتسمرت، تحجرت الدموع في
عينها لتنزل على مهل وترفع رأسها في بطء شديد لتنظر إلي، عندها
تكلمت هند.

- أيوه بدلناهم.

جاءت كلمات ليلي باكية نافية.

- لا مابدلناهمش يا هند.

فاض الكيل بياسمين فانفجرت.

- بطل كذب ومدافعة عن الرجل ده بقى، حرام عليكى هو إحنا

ناقصين.

- أنا مش بدافع بس ليلي ناسية، ثم إنتي يا مريم قعدتي تترقي عليه وغمزتك بلاش، ثم أيوه إحنا بدلناهم يا ليلي.

تذكرت شيئًا هاما لتأكيد نفي ليلي.

- ومن إمتي كانت مقاستكوا واحدة يا هند؟

صمتت بعدها هند إلى أن وصلنا، الآن تغير تفكيري ناحية ليلي، هل تكون هند وراء ما يحدث؟ وإذا كان هذا صحيحا. لماذا ذهبنا إلى هذا الدجال؟ قطعت هند حبل أفكارى.

- بص يا أسطى لو سمحت طلعلنا على طيبة، نروح عندى على البيت أحسن النهارده يا بنات. (طيبة حى راقى بينه وبين الأقصر ربيع ساعة).

- طيب ماشى.

لم يبد منا أي اعتراض أو موافقة، كنا في حالة نفسية لا تسمح بأى نوع من التفاوض على أي شيء، وصلنا طيبة، وإلى فيلا والد هند وأمام البوابة الحديدية وقف الميكروباص، كان شقيقها «طارق» يقف في الدور الثانى حين وصلنا، دخلت أنا وليلى وياسمين وتركنا هند تدفع للسائق، سمعنا صوتها العالى تفاصله في الأجرة، إلى أن جاءنى صوت السائق عالٍ فأزعج من في البيت جميعًا.

- ده منظر بنات محترمة ده؟ جاين الساعة ١١ ونص، انتو كتو فين؟

هرولت كالمجنونة من الداخل إلى الخارج، التقطت حجرًا من الأرض وقذفته به من شدة الغيظ منه ومما نحن فيه، نزل شقيقها من

الدور الثاني إلينا مسرعًا، كان السائق قد مضى إلى حال سبيله! وقفت مكانى وتأملت نفسي وردود أفعالي، فتوجست خيفة على عقلي! أصبحت لا أفكر قبل أن أفعل أي شيء، جاء صوت طارق شقيق هند في الخلفية.

- إيه اللي جايكم دلوقتي؟

قبل أن ننطق أسرع والدة هند إلينا، لتأكد من وجودنا بعد أن سمعت صوتنا وصوت السيارة بفضل هدوء المكان الشديد، عندما رأتنا هُبت وانكرت وجودنا في هذه الساعات المتأخرة من الليل وحدنا خارج البيت؟ تكلمت بلغتها الصعيدية وبلهجة حادة لم نعتدها منها من قبل.

- إيه ده يا بنات، إيه اللي جابكوا دلوقتي.

أردفت هند.

- النور قطع في قنا قلنا نيجي نذاكر هنا.

لم تنظلي على الأم هذه الحججة الواهية، فرفعت حاجبيها وقالت.

- اتقطع من امتى يعنى؟

- من العصر يا أمي واستنيناها مجاش، قلنا نيجي هنا أحسن.

- ولما هو قطع العصر ما كنتوا جيتوا وقت العصر مش في الليالي

كده؟!

- اللي حصل بقى يا أمي نعمل إيه دلوقتي يعنى؟ ادخلوا انتو يا

بنات على الأوضة وأنا جاية.

في الخلفية سمعنا الصدام مازال مُتحدماً بين هند وأمها، تأنياً على التأخير وكلام عن الميكروباص والسائق إلى أن أغلقنا الباب وراءنا، فتخافت الصوت شيئاً فشيئاً.

تتميز غرفة هند بألوان زاهية من اللون الوردى والفوشيا والموف، بها شباك بيضاوى الفتحة كبير يطل على حديقة المنزل، تتكون من سريرين وخزانة صغيرة بينهما ودولاب في المقابل، جلست أنا وياسمين على سرير وليلى على السرير المقابل، أنظر أنا إلى ياسمين وليلى تنظر لي، دخلت هند وأغلقت الباب وراءها بعنف، دخلت مباشرة إلى الشباك، فتحته إلى آخره ووقفت تنظر إلى الحديقة، سادت فترة صمت ليست بالقليلة، أدارت هند وجهها لنا فجأة وقالت.

- إحنا في العيلة على طول بنروح للراجل ده وهو راجل كريس، أنا مرضيتش أتكلم قدام ماما، وموضوع الطرح بتاعكوا ده يا مريم، اكيد انتو بدلتوها ونسيتوا، إنتي مكنش عاجبك طرحتك عشان شيفون، صح؟

عادت ياسمين تنفي بعصية.

- طيب هي مكنش عاجبها طرحتها، وأنا؟ مريم نومتي مغناطيسى وقلعتنى الطرحة من غير ما أحس؟ إنتي عبيطة ولا إيه؟ بصى يا هند بلاش تفتحي الموضوع ده تاني.

أرادت ليلى تهدئة الموقف خاصة ونحن في منزل هند.

- يا ياسمين اهدي مش كده، حصل خير يا جماعة.

توقفت هند تسمع ياسمين يهدوء، صمتنا للحظات، ثم قطعت الصمت.

- مش جعائين؟

قلت في ارهاق.

- لا مش جعانة.

ساندتنى ليلي.

- ولا أنا.

لم ترد ياسمين، جلست على السرير ناظرة للأرض بشرود، قالت
هند في مرح غريب.

- أنا جعانة وهاروح أعمل عشا وآجى.

بعد عدة دقائق جاءت هند بصينية كبيرة تحمل عددًا من أنواع الأجبان
والمرىب والخبز الفرنسي، رأينا العشاء فانفتحت شهيتنا، وجلسنا جميعًا على
الأرض حول صينية الساندويتشات لتأكل، قالت هند مبتسمة.

- انتو مش كنتو مش جعائين من شوية؟

نظرت لها في تعب.

- جُعت.

ضحكت هند وليلي وضحكت معهن وتبسمت ياسمين وهي
تمضغ طعامها ببطء وشرود، أخذنا حمامًا دافئًا واحدة تلو الأخرى
بعد كل ما عايناه من تعب، لعل الماء يُجلى ويُذهب عنا ما حدث،
تمنيت أن تكون الأمور بهذه البساطة، أعطتنا هند ملابس للنوم، بعد
أن استمتعنا بدفء المياه كانت هند قد أعدت لنا أكوابًا من الكاكاو
الساخن، لسان حالنا يقول «أحسنتى اختيار مشروب الشتاء يا هند،
جميعًا نحتاج نكهة الشيكولاته الآن بعد كل ما عايناه».

نامت هند و لیلی علی سریر و أنا و یاسمین علی السریر المقابل،
كنت أشعر بیاسمین و كأنها لم تذوق طعم النوم مثلي تمامًا، شعرت
بتأنيب الضمير يقتلني، كنت أخاف الله و عقابه أكثر بكثير من خوئي
مما قد نواجهه في المستقبل، كيف نسيت أن الله هو القادر الجبار فوق
كل شيء؟ و أننا كلنا مخلوقات ضعيفة في ملكوته، مهما بلغت قوتنا
فإننا أضعف من مشيئته، ما علينا إلا أن ندعوه فيستجيب، ما علينا
إلا أن نطلب القوة من القوى فنقوى، كيف طاوعتني؟ نهضت من
نومي و جلست مكاني أساوي شعري إلى الورا و أنا أستغفر الله،
فقلت یاسمین.

- في إيه يا مريم؟

- مش عارفه أنا م خالص.

- ولا أنا.

- صحيح نسيت أقولكم مش ماهر قالي على صندوق الحجة
سعاد عايزه؟

- صندوق إيه؟

- الصندوق الأثري اللي كان في أوضة السنترال قال هو ده السبب

- طيب ما نديهوله؟

- تاني يا یاسمین دجالين و كُفْر؟

تذكرت فتح القفل.

- صحيح يا یاسمین، الصندوق كان عليه قفل متعرفيش راح
فين؟

- لا مشفتوش، يمكن واقع هنا ولا هنا، خلاص نديه لصاحبه

ولا حتى نرديه لو هو المشكلة يا مريم، ده إنتي حطاه في أوضتك.

- لا يا ياسمين دي أمانة، أنا لا هارميه ولا هديهوله، ده بيقول كده علشان بيعه بشيء وشويات، لما تبقى ترجع صاحبتة ده شكله قيم وأنتيكة.

بعد لحظات صمت أكملت ما يدور في عقلي.

- إحنا فعلا غلطنا يا ياسمين غلطة كبيرة، يا رب استرها، يا رب جيب العواقب سليمة، أنا خايفة قوى من ربنا.

- ربنا غفور رحيم هيرحمنا إن شاء الله، لكن تفتكري رجل زي ده ممكن يرحمنا؟

- بس هو كان كويس معنا الصراحة!


- واللي حصلنا يا مريم؟

- بصراحة يا ياسمين إحنا أكثر اثنين اتريقنا عليه وقاوحنا معاه، يمكن اللي حصل ده كان قرصة ودن، خاصة هو مكشش بيرد! كان بيتسم ابتسامة صفراء كده وشفتي واحنا بنركب ضحك ضحكة عجيبة.

- ممكن، معرفش، طب وجزم هند وليلى؟

بعد فترة غلبنا النوم دون أن ندري فقد كنا في شدة الإرهاق، في هذه الليلة جاءني عماد في أحلامي واقفًا كما كان في الكلية في نفس المكان الذي قابلته فيه، وقف مُنبتها إياي قائلاً.

«أنا قتلتك خدي بالك يا مريم وإنتي حرة، وقتلك بلاش ثقة في حد... مسمعتيش الكلام! مش عارف أعملك إيه دلوقتي»



كنت أتجول وحيدة في شوارع قديمة، نظيفة، غريبة وشديدة الجمال أيضًا، بيوت أثرية لا مثيل لها اليوم إلا من بقايا هارثة لا تلقى منا المعاملة التي تليق بحُسنها، معمارها بسيط وجميل وقوى الصُّنع يقف في فخر واعتزاز، كأنه امرأة تتباهى بجمالها الرباني الذي لم يُلوث بعد، جدران مبنية من الطوب الأصفر الكبير الحجم تُزينها مشربيات خشبية صُنعت بدقة متناهية، مطلية بلون بَنى أصيل، بعض المنازل مزخرفة من الخارج بألوان هادئة متناسقة، والبعض الآخر محفور علي حجرها بعض آيات الذكر الحكيم في دقة وحلاوة، فنون لم أر مثلها إلا في المتاحف والأماكن الأثرية فقط، أما واجهات المساجد فقد بُنيت بأحجار منحوتة ومُزخرفة عوضًا عن الطوب، الشوارع نظيفة جدًا حتى في أدق منحنياتها مهما ضاقت.

بعض النساء يرتدين سروالًا وقميصًا، بعض القمصان من الحرير، له ذيل مطرز بالذهب وثوب قصير فوقه مزركش، يمحيط به حزام مزركش أيضًا ثم رداء خارجي ذو أكمام واسعة، والبعض

الأخر يرتدى فوق قميص قصير ثوب طويل يحيط به حزام مُرركش ثم غطاء يحكم الرأس، وغطاء آخر طويل من الخلف والجوانب فوفا، بعض السيدات ترتدى البرقع المطرز بالذهب الذي قد يتساوى طوله مع طولها تقريباً، وأخريات يكتفين بالتخفي وراء غطاء الرأس الكبير والذي يغطي أكثر من ثلثى جسمها، وهناك من لم تُخف وجهها لا وراء بُرقع ولا خلف غطاء رأس، لكن جميع هذه القطع مطرزة بالحرير أو بخيوط ذهبية وفضية أحسبها ذهباً وفضة حقيقيين عند بعض من يلبسونها.

رأيت نساء ترتدى شيئاً يشبه إلى حد كبير القُفطان المغربي بألوان واضحة صارخة، أيضاً مُطرز ومزخرف بجمال آخاذ، لكن الشيء الملحوظ أن غالبية النساء قد تزين بالقررايط والأساور والخواتم والخلخيل من الذهب والفضة.

تجول بصري فرأيت عيناى رجال يرتدون سروالا واسعاً، يغلِق عليه حذاء جلدى متوسط أو قصير الرقبة وجلابا قصيرا أو قميص، يربطهما حزام من المعدن أو من القماش المزخرف بلون مُختلف عادة، ثم عباءة مفتوحة من الأمام لمزيد من الوقار، بعض الرجال يرتدى جلاباباً طويلاً لا يظهر السروال، تُلف الرأس بعمامة تدور حول طاقة في الوسط بلون مُختلف، وقد زُينت العمامة عند بعض الرجال بجوهرة ثمينة أو حجراً كريماً في منتصفها فوق الجبهة.

من هؤلاء؟ كيف جئت إلى هنا وأين أنا؟ كم تمنيت أن أعيش هذه الأجواء في أحلامي، أترانى أحلم أم أنى قد انتقلت بالفعل؟ هل من الممكن أن يهرب بى عقلى الباطن إلى مكان أردت أن أراه

في زمن مختلف؟ أم أني في الأساس من هذا العصر وقد سافرت إلى
عصور نحسبها متقدمة؟ لكن مهلاً، ما هذه الملابس التي ارتديها!
إنني ارتدي مثلهم تمامًا حتى أنني ارتدي بُرقعًا طويلًا على وجهي!
كيف حدث ذلك؟!

إنني في سوق به بعض الباعة، الناس يروحون ويحيثون في عجلة
وفي بطء، حمدت الله حمدًا كثيرًا عندما رأيت امرأتين واقفتين في أحد
الأركان القريبة مني، يتبادلان الحديث بصوت ليس منخفضًا أو
لعله عالٍ بعض الشيء، لكنه كان كفيلاً بأن يصل لأذني، فوقفت
على مقربة أسترق السمع لعلني أعرف أين أنا، ومن هؤلاء ومن أكون
بينهم، لعلهم يعرفونني، أو يعرفونني بنفسى ويختصروا علي ما سوف
أمر به من جنون، إلى أن دار هذا الحديث بينهما.

- ألم تدري بعد؟ لقد أتى من قوص البارحة.

- من هو؟

نظرت السيدة في نفاذ صبر، ثم أطلقت زفيرًا وحاولت رسم
ابتسامة.

- يا فاطمة يا حبيبتي... عمن نتكلم بالأساس؟

بدالي أن فاطمة تتذكر، لكن ملاحظها رسمت سؤالًا في الطريق.

- الشيخ عبد الرحيم القنائي القادم من أرض الحجاز، ولكن ما
علاقة قوص به يا خولة؟

بدت خولة مُهتمة إلى حد كبير، كأنها تتبع أثر الشيخ.

- ما سمعته من زوجي أن الشيخ مغربي الأصل، وُلد بسبته

بالمغرب الأقصى، وأن نسبه يرجع إلى الإمام الحسين بن علي بن أبي طالب، وقد تتلمذ في مسقط رأسه على يد والده الشيخ «أحمد بن حجون»، لكن والده توفي وهو بعمر الثانية عشرة، كان الشيخ شديد التعلق بأبيه فمرض لفقده، لذلك أشار الأطباء أن يغادر البلاد إلى أن تهدأ نفسه، فسافر إلى دمشق في ضيافة أخواله، ونهل من العلم ما جعل صيته يذيع بين الناس هناك، لكنه عاد إلى بلده، ثم إلى أرض الحجاز.

- فما بال قوص إذن؟

- الصبر يا فاطمة، لقد قابله الشيخ «مجد الدين القشيري» في موسم الحج، ودعاه لزيارة قوص والمكوث بها لتلقين أهلها العلم، لكنه ذهب إلى هناك بضعة أيام فقط، ثم قرر المجيء هنا إلى «قنا».

- وما الذي غير وجهة الشيخ يا ترى؟

- لرؤيا رآها في منامه وتكررت عليه، ولاقتناعه أن أهل قوص ليسوا بالحاجة إليه كأهل قنا.

- لقد فهمت الآن، ولكن إلى متى يمكث العالم يا أم منتصر؟

- لا أحد يعرف يا فاطمة، لا أحد يعرف.

انتابني دُوار وكدت أن أقع فاستندت إلى الحائط بجانبى، ورفعت البُرقع كي أتنفس، حينها جرت فاطمة وخولة إلى في دُعر غير مُصطنع، واستندت إليهما، قالت فاطمة في خوف.

- أنت بخير يا أختاه؟

أجبتها وقد تهدجت أنفاسي.

- نعم الحمد لله.

جاءت نبرات صوت خولة جدية.

- إذا أردت مساعدة فرجاء اطلبى، نملك من الوقت ما يكفي
لايصالك إلى بيتك.

- بيتى !!

- نعم بيتك.. أين يقع؟

- لا أدري.

نظرت خولة إلى فاطمة في ارتياب ثم إلى في شك، قاطعتها فاطمة.

- دعيني أخمن.. أنت غريبة على قنا، لكنتك توحى بالغبرة عن
الديار؟

- نعم أنا من أسوان.

- وماذا أتى بك إلى هنا؟

قالتها خولة في شك، كان على أن أحاول التحدث بلغتهم ومجارة
الموقف فأنا لا أعرف يقينا هل هذا حلم أم واقع؟ لكنى وجدت
لسانى ينطق بلغتنا العربية الجميلة في سلاسة لم أعهدا من قبل.

- ذهبت في رؤية ابنة عم لي، لكنى فقدت العنوان ولا أتذكره.

- إذن أتيت بمفردك؟

قاطعتها فاطمة مرة ثانية.

- لا ترهقها بكثرة السؤال يا خولة، أوشتك الشمس أن تغرب
يمكنك المبيت عندي ولا حرج.

كانت خولة تنظر إلى فاطمة وعينيها تقول لا تقدمى أية عروض

فنحن لا نعرف من تكون ومن أين أتت؟ قد تكون جاسوسة مثلاً، نظرت إليها في تردد ولم أجب لكنها أكملت.

- تبدين متعبة وفي حاجة إلى الراحة.

قررت خولة أن نتعرف إلى بعضنا البعض وقد بادرت فاطمة بعرضها الكريم.

- أنا خولة بنت عبد الوهاب القرمزى، وهذه فاطمة الزهراء بنت عثمان الأشعري، ما اسمك؟

- مريم بنت فاروق المختار.

تأملوا الاسم وكأنهم يبحثون عن مثيله في ذاكرتهم، ولكن فاطمة لم تبال، وحدها خولة بقيت في شك وحذر، جاء صوت فاطمة بقرار.

- خولة سوف آخذ مريم إلى البيت لتستريح، وعند إشراق شمس الغد تستطيعين الرحيل يا مريم أو وقتها تشاءين.

لم أستطع إلا الموافقة، أريد الاسترخاء وأشعر بتعب شديد، ولا أدري أين أنا ولا أستطيع الرجوع إلى حيث كنت.

- أشكر كرمك يا فاطمة.

- لا بأس يا مريم، خولة سوف نتقابل بعد الغد في نفس المكان والميعاد لا تنسى.

- إن شاء الله.

مشيت مستندة على فاطمة في الاتجاه المعاكس لطريق خولة، كنت أستمع إليهما غير مُصدقة لما أنا فيه، أرى الناس في الشوارع التي لم أراها من قبل وأنا غير مُدركة! ماذا حدث؟ أين أمي وأختي وأخي

وجدتى وجميع أهلى؟ أين أصدقائى؟ هل أنا طالبة كلية الحقوق
في سنة ٢٠١١ ميلادية، أم أنى في سنة... أى سنة هذه؟ أين هاتفي
وكيف ارتديت هذه الملابس ومتى؟ أريد أجوبة على كل تساؤلاتي
وإلا سوف ينفجر عقلي، بادرتها بسؤال.

- عفواً سوف أسألك سؤالاً قد تتوجسين خيفة منى بعده، وأنا
مقدماً أرجوكى ألا تفعلنى، قد رأيت خولة وحذرها منى، لكنى
أخشى أن لوثة ما قد أصابت عقلى في الصميم.

- لا بد أنك مررت بظروف قاسية، لا تبتئسى يا أختى ولا
تحمل نفسك ما لا طاقة لها به، اسألى سؤالك وسوف أكون شديدة
الصراحة معك.

- في أى الأعوام نحن؟

رجعت فاطمة برأسها إلى الورااء وفتحت عينيها أكثر.

- لعل الشمس قد أصابت رأسك يا مريم! إنها السنة الـ ٥٥٥
هجرية - ١١٦١ ميلادية.

(٥)

كان طارق شقيق هند قد اتفق معها على اصطحابنا إلى قنا في الصباح حيث مكان عمله، لكننا لم ننفذ هذا الاتفاق في الساعة الثامنة صباحاً كما وعدته، وغفونا إلى ما بعد وقت الظهر، وبالطبع ذهب هو إلى وجهته، كنا جميعاً نفتقد إحساس النعاس، أخذنا من الوقت ما يكفيننا من تملل، تناولنا إفطارنا في وقت متأخر، ثم ودعنا والدته هند بلفة كبيرة من الطعام كانت قد أعدتها لنا خصيصاً اليوم باكراً، إنها وجبة الغداء اليوم، استقللنا الميكروباص في الثانية بعد الظهر، لم نتحدث في أي شيء مما حدث بالأمس على الإطلاق، بل تحدثنا عن المذاكرة والامتحانات التي لم يتبق على ميعادها إلا شهر واحد، تعهدت ليلى بعمل جدول مذاكرة اليوم لأن الوقت يجرى ولا بد من ملاحقة دروسنا.

لم أذكر لهم أي شيء عن مقابلتى بعماد والتي كانت صدفة، فلم أكن مستعدة للدخول في أي نقاش، أو تعليق حتى لو بدا تافها أو عادياً، أردت أن أبقى الأمر بينى وبين نفسي فقط، ثم إن الرجل يرتبط في علاقة قوية، هذا واضح وضوح الشمس، من الرجال يذهب إلى فتاته قبل ميعاده خوفاً عليها من الانتظار بالرغم من انشغاله؟ إنه من النوع النادر الذي لم يعد له وجود، فيماذا يُفيد الحكى في كل الأحوال، أخرجتني ليلى من هذا التساؤل وهي تشدد علينا.

- إحننا لازم نشد يا بنات مافضلش إلا شهر، أمي لو عرفت إني
لسه في سنة تانية هتدبحني هي فاكرة إني في ثالثة.
وافقتها ياسمين على الفور.

- آه يا بنات لازم نشد على نفسنا شوية.

وصلنا قنا حوالي الثالثة عصرًا ثم إلى الشقة وفتحنا الأنوار،
ووضعنا الطعام في المطبخ، جاء صوت هند مجلجلاً.

- اقلعوا بقي يا بنات وتعالوا نسخن الأكل أنا جعانة.

فعلنا وجلسنا حول الغداء نأكل ونتكلم ونضحك سويًا،
متناسيات عن عمد ما مررنا به من أحداث، أكدت ليلي مرة أخرى.

- بصوا بقي يا بنات إحننا النهارده آخر يوم في الصياغة، من بكرة
هناكر بجد، نأكل ونلحق نخرج شوية عشان نبقي براحتنا ونلحق
نرجع بدري.

لم تُمانع، كنا نحتاج إلى الترفيه وبشدة، قُمننا لنستعد للخروج، وفي
هذه الأثناء هممت بالخروج من غرفتي لاحضار شيء ما نسيت به غرفة
الاستقبال، فرأيت ليلي تحمل الصندوق الخشبي الأثري فوق رأسها
وتمشى بثبات متجهة نحو الحمام وتنظر إلى في غل رهيب! نظرت لها
في ذهول وناديتها بصوت عال فلم تلتفت إلى مرة أخرى ولم ترد
ندائي، لكن وما إن دخلت ليلي الحمام أمام عيني، حتى رأيتها تخرج
من غرفتها تُمسك بشيء من أدوات تجميل، ثم قالت.

- عايزة إيه يا مريم؟

عندها أحسست بيلل لم أسيطر عليه بنصفي الأسفل، حاولت أن

أسيطر على ما تبقى لدى من أعصاب، لكنني بقيت صامتة مذهولة ولم أرد أن ترى ليلى ما حدث لي، لكنها سألت.

- مالك مبلمة كده ليه؟

- كنت عايزة حاجة مش فاكرها.

تركناها مُسرعة ودخلت غرفتي وأغلقت الباب، رأيت الصندوق في مكانه، وانتابني الفزع لكنني لم أرد أن أعكر صفوهن الذي يبدو أنه سوف يكون مؤقتاً ولم أبح لأحد يومها بما رأيت، هل يكون ماهر الدجال على حق؟ أم أنه أرسل من يخيفني ورائي عقابا لرفض تلبية طلبه؟

خرجنا الساعة السابعة مساءً، ضحكوا وقضوا وقتاً جميلاً كالأيام التي اعتدناها سوياً، أما أنا فقد كنت أتظاهر بهذا وحسب، وبينما نتجول في شوارع قنا، أخذت سيارة فارهة حديثة في الاقتراب منا على مهل، نظرت نظرة خاطفة على سائقها لأشبع فضولي، شاب وسيم جداً وبجانبه شاب آخر أقل وسامة، أسرعنا في خطواتنا، السيارة تسير موازية لنا تماماً، تكلم الشاب الوسيم وأقسم أنه لا يريد إلا أن يُحدثها هي! هي من؟ من فينا؟ كنت أسير أنا وياسمين في المقدمة وليلى وهند وراءنا، ولكنني لاحظت أن السيارة في منتصفنا نحن الأربعة، أسرعت ياسمين وجذبتني من يدي.

- ياللا يا مريم إحنا نسبق عشان مش عاوزة مشاكل، كفاية اللي حصل امبارح.

كانت ياسمين تربطها علاقة حب بوكيل نيابة من سوهاج يدعى «هشام»، لا أعلم إذا كانت فعلاً تحبه أم تريد الزواج به وتتخذ الحب

وسيلة؟ كما تفعل بنات حواء، ولما كانت استراحتته بقنا، فقد كانت تخاف أن يراها هو، أو يراها من يعرفهن فينقل أخبارها له، قررت أن أتركهن ونذهب أنا وياسمين سويا، فقد أحسست أن واحدة منهن يروقها أحدهما، ولن أقيم معركة في الشارع الآن، كما أني في آخر المطاف لا أقرر نيابة عنهن، فقط أبدى ملاحظاتي عندما أرى شيئا غير مريح، في النهاية مهما كانت قوة الصداقة لن تستطيع أن تفرض مبادئك على من تُصادق، أشرت لمن قاتلة.

- يا بنات إحنا هانروح المساكن نجيب ورق المذاكرة لينا كلنا، وانتوا جيوا طلبات البيت وانتوا راجعين.

(المساكن بقنا هي المنطقة التي بها الجامعة، بعيدة عن وسط المدينة وتكون شديدة الظلام ليلا خاصة في الشتاء)، انتهينا ورجعنا إلى البيت في التاسعة مساء، كانت الساعة العاشرة والنصف عندما سمعت صوت ليلى تدق بيديها شباك غرفتي من الخارج:

- افتحي يا مريم بسرعة على بال ما ألف، عاوزة أحكيلكوا على حته موضوع.

نهضت بسرعة لفتح باب الشقة أنا وياسمين، لم تكن هند معها، فسألت.

- أو مال فين هند؟

- بتجيب طلبات من السوبر ماركت وجاية، اسكتوا يا بنات.. الواد طلع فظييع، مُز جدًا، وميكلمش كلمة عربي.

- إنتو كلمتوه ولا لإيه؟ ومش معنى إنه ميكلمش عربي إنه كويس أو وحش على فكرة.

- لا.. إحنا طلعنا نأكل في المطعم اللي بنروحه ده يا بنات طلّعوا ورائنا، وبصينا لقيناهم جاين علينا، الواد الفطيع طلع اسمه عمر، المهم كلمونا وأخذنا أرقام تليفونات بعض، قتلته أنت كان قصدك على مين؟ قالى اللي لابسة فستان! فهمت إنها هند مش أنا، حتى الولد طلع جتل جدًا وعزمننا على الأكل، نزلوا قبلنا من المطعم وإحنا وراهم، كلمته هند بعد كده، قالها أنا كنت متأكد إنك هتتكلمى، إحنا رايحين فندق «بسمه»، لو تجبوا تيجوا تعالوا، قمنا واخدين تاكسى ورايحين، أصل هناك محدش هيشوفنا لكن الأماكن الثانية ممكن أي حد يشوف هند ويفتن لهيتم صاحبها! وقالتله إن اسمها مى وإنها من أسوان! بس في حاجة يا بنات، هند قالتلى ما أقولكمش حاجة! عقدت ياسمين حاجبيها في نفور.

- ده على أساس إننا هنغير منها لا سمح الله؟ ولا هنبصلها بصة وحشة عشان هيتم؟

ثم توقفت عن الكلام كأنها تذكرت شيئاً.

- إيه ده يا بنات؟ انتو مش ملاحظين حاجة؟ إحنا ماکملناش ٢٤ ساعة من ساعة ما رجعنا من عند الشيخ ماهر ده وفتحت عليها إزاي! الظاهر فتح الطريق ده بجدة ولا إيه؟

ضحكنا جميعاً وتمنيينا أننا لو رجعلنا الشيخ يحضر لنا فتح طريق مثلها، كنا نقولها على سبيل المزاح المسوخ بجدة، لكننى لم أهتم لكل هذا كنت أفكر في السيدة التى تشبهت بليلى ودخلت الحمام، يا ترى ماذا تريد؟ ولماذا لم تظهر إلا لي؟ أم أنها ظهرت لإحدى البنات ولم تُبَحْ مثلي؟

تحدثت ليل الحقيقة في تساؤل مغلف بغيره.
- بس مش قادرة أوصفلكم يا جماعة الولد ده كان عامل إزاي
مش هتصدقوا...

إزاي أعجب بهند؟!

كان عمر ضابط جيش من قنا يعمل في الغردقة، في الثلاثين من عمره، طويل، رشيق، أسمر، شعره أملس أسود، رائحته عطره تمتزج برائحة السجائر لشير الغرائز الأنثوية المنتشية حوله، هذا ما جاء في وصف «سى عمر» من صديقتنا ليل الماثمة، أخيراً جاءت هند بالطلبات وتركتها في المطبخ والفاتورة على التليفزيون حتى نقتسم الحساب على أربعة، ذهبت إلى غرفتها وأغلقت الباب متعللة أنها تريد أن تستريح، لم تبدأ ليلى أو تستريح هي الأخرى، فهند في علاقة أخرى الآن، ثم أن عمر رآهما معا واختار هند التي لا تعرف الفرق بين العباءة والفستان؟ إنه أعمى والسر في فتح الطريق، بينما أنا وياسمين جالستان عندي في الغرفة بلا هدف واضح، جاءت ليلى تنصدى ملامح العناد قسامت وجهها.

- الواد ده خسارة في هند، إزاي يعنى ده فظيح!

تحدثت إليهن بناء على ما أراه من خبرات.

- بصوا يا بنات.. هو أكيد واخذ باله من لبس هند يعنى، وممكن يكون هيكلها تسلية في فترة قعاده في قنا بس، أو ممكن يكون فعلا مُعجب بيها، في كل الأحوال ابعدوا عنه.
أردفت ليلى في غيظ.

- لا يا مريم إنتي مشفتيش كان بيصلها إزاي! ده كان مبهورا ده
مش واحد عاوز يتسلى، بقولكوا إيه الواد رقمه معايا تعالوا نشتغله؟
اشتعلت روح الطفولة الخاملة عند ياسمين ولم تنطفئ.

- آه ياللا نشتغله شوية.

- ياللا يا ياسمين رنى عليه.

أردفت في عصبية.

- طب يا جماعة أنا بقول تطلعوا بره عشان شكلكم فاضين.

نظروا إلى نظرة مبهمة ولم يناقشنى، كانت مشاعر الفضول
والإثارة قد تملكتهن، مشاعر لا تتفاوض معك عندما تُعجب
بشخص جديد غامض، مشاعر ممزوجة بتحد أنثوي وغيره عليية،
خرجن سريعا فالوقت يداهمهن وهن يردن معرفة من هو «عمر»
الشاب الوسيم الغني، أغلقوا نور الغرفة والباب وراءهن وذهبن.

في صوت إغلاق الباب والنور حاولت أن أسترخى مستلقية
على أحد جانبي، شاخصة بعينى في اتجاه الحائط، أنظر في اللاشيء،
في المجهول، فاجأنى صوت من ورائى مباشرة ناحية اليمين، شديد
القرب بعطسة شديدة! فزعت واقفة في مكانى ذهبت إلى حيث أضيء
نور الغرفة من جديد، فتحت الباب ناظرة إلى السرير وإلى جميع أركان
الغرفة، لا أحدا!

ظللت أردد «الله أكبر.. الله أكبر، أعوذ بالله من الشيطان الرجيم»،
حاولت إقناع نفسى أنه الوهم بلا شك، الشك الذي صاحبنى في الفترة
الأخيرة كظلى والذي أتمنى أن يفارقنى لأحيا طبيعية كما في السابق،

لكنني لمست آثار عطسة على كفي وخدي الأيمن فأقنعت نفسي أنها آثار أى شئ آخر، رُبها عرق، لم أغلق الباب مرة ثانية ولكنني واربته ليدخل نور غرفة الاستقبال متسللاً إلى، أغلقت النور مرة ثانية وأنا أقرأ القرآن لأحاول النوم، حاولت أيضاً أن أتذكر كيف كان مذاق راحة البال، دقائق وخرجت من الغرفة لأرى ماذا يفعل البنات الآن فوجدت ليلى وياسمين في «السترال» يضحكن كالأطفال بينما تغلق هند باب غرفتها عليها.

ما زالت البنات تتحدث عن عمر وقد أصبح حديث الساعة وكيف حدثوه هاتفياً ولم يعرهن أى اهتمام، أنا أيضاً لم أعرهن أى اهتمام، فما يشغلنى أكبر وأعمق من سخافاتهن، ذهبت مرة أخرى إلى الغرفة لأنام، عرفت بعد ذلك أنهم لم يعثرن على عمر في المواقع الاجتماعية لحسن حظه.

استلقيت على سريري أنظر إلى سقف الغرفة، لم أستطع النوم وقتها إلى أن رأيت هالة بيضاء صغيرة تحترق الظلام، ظل حجمها يكبر ويكبر أمامى، وأنا غير فزعة مما أرى، حتى ملأت الغرفة كاملة واحتوتنى، ورُحت في إغفاءة لم أدر مدتها لكنها كانت مُريحة والحمد لله.

استيقظت في صباح اليوم التالى مُبكراً على صوت هند وهي تقول بصوت عالٍ «يا بدوح.. يا بدوح.. اصحوا بقي»، تشد ستائر البيت حيث تعلن أشعة الشمس الصعيدية القوية عن وجودها القوي على جدران الشقة، لم تكتف هند بهذا، أضاءت أنوار الغرف والشقة كلها في حماس ونشاط، استيقظت قبلنا وذهبت لشراء الفطور وحضرته وظلت توظفنا من راحتنا حتى ذهب النوم وابتعد، إنها انتعاشة الحب

في بادئ أمره، تناولنا الإفطار وذهبنا إلى الجامعة كي نأخذ جداول الامتحانات وأرقام الجلوس.

تقع الجامعة في منطقة نائية عن ازدحام المدينة، تعودنا في حالة ضيق الوقت أن نرتاد سيارات الأجرة، ولكن في يوم نشيط كهذا فوسيلة المواصلات الأكثر أمانا هي الميكروباص، نستقله ونذهب إلى محكمة الاستئناف، لنستقل ميكروباص آخر إلى الجامعة، هذا هو خط سيرنا، نرتدى جميعا ملابس كأمثلنا من الطلبة، ملابس عادية، إلا هند ترتدى العباءة، كانت تدور أحداث قضية مهمة جدًا في المحكمة، كثير من الضباط ورجال الأمن في الطريق، لم ير أحد هند في ذلك اليوم إلا ووقف مشدوها إليها مبهورًا وكأنها جاءت من عالم آخر ملائكي بريء إلى دنيتنا العفنة الشيطانية! أهبنا يومنا الدراسي ورجعنا سويًا إلى المنزل، أتينا بالمنضدة التي تحمل التلفزيون حتى نذاكر عليها جميعا في غرفة الاستقبال، وبدأنا نذاكر، ولكن كمعادة أغلب طلبة الجامعة المغتربين، تأتي المذاكرة في أول قائمة أولوياتهم، إذا ما تحدثوا مع أهلهم، لكنها في حقيقة الأمر آخر شيء يشغل بالهم، أو قد لا يشغله من الأساس، ظللنا نتحدث من الساعة السادسة مساء إلى أن اكتشفنا أن عقارب الساعة تدق العاشرة مساء، لاحظت نظرات البنات لهند بين الحين والآخر، أعرف هذه النظرات الأنثوية التي تقطر غيرة واستنكارًا، تكلمت ياسمين وقد أصابتها العدوى.

- والله يا هند فتح الطريق عامل معاكى أحلى شغل.

- ليه يعنى؟

- كل الناس النهارده كانت بتبص عليكى، لدرجة إنى بصيت
معاهم أشوف بيبصوا على إيه؟ وإنتي يعنى حتى مش لابسة لبس
ملفت..

نظرت إليها هند فى صلابة.

- أنا أصلا حلوة يا ياسمين.

أردت أن أنهى النقاش.

- طب يا عم الحلوة منك ليها خرينا نذاكر، مذاكرناش خالص.
بعد وقت قليل دقت الساعة الحادية عشرة، لم نكن تناولنا طعام
الغذاء، فى برد الشتاء لم تقدر أن تُعد إحدانا أى وجبة خفيفة، الجميع
تملص وفضلنا الجوع والإعياء على مجهود يتبعه شبع، قلتها بيأس.
- أنا هنام.

أكملت ياسمين وكأنها تستعد لشيء ما.

- أنا كمان لازم أعمل تليفون.

ألقي الجميع الأرقام التي تصاحبنا والتي تحمل كثيرًا من الأحلام
والأسرار، وذهبت كل منا إلى غرفتها، هممت بالنوم من شدة التعب
لكنى لم أجرؤ على غلق الباب، فقط واربتة كما فعلت بالأمس بعد
سماع صوت العطسة! العطسة التي لا أريد أن أتوقف عندها إلى الآن
تماما كالسيدة التي تحمل الصندوق!

بعد دقائق سمعت إحدى البنات تُعد طعاما، لم أنو القيام فأننا فى
شدة التعب وأحتاج إلى النوم كما أحتاج إلى الهواء لأتففس، ولكنى
بعد بضعة دقائق أخرى لم أستطع مقاومة رائحة البطاطس والدجاج

المقلي، لن أنجح في النوم بعمق وأنا أشعر بجُوع قارس، تبعت
الرائحة لأشارك صاحبة الطعام لُقمة صغيرة تسد جوعى، نهضت
وفتحت باب الغرفة الموارب، مصدر الرائحة هو مطبخنا العزيز،
تسللت إليه لأفاجئ احدى البنات، عندما وصلت إلى المطبخ وجدته
خاوياً! آثار دخان القلي تملأ الشقة، لا بد أنها هند وليلى؟ ذهبت إلى
غرفتهما وفتحت الباب فجأة وصحت.

- إنتويا كلاب.

وقفت مكاني للحظات، كانت ليل تصفح الانترنت بينما كانت
تحدث هند عبر هاتفها تحت الغطاء!
سألنتى ليل وهي ما زالت تصفح المواقع الاجتماعية دون أن
تنظر إلي.

- عملتو الأكل؟ إنتو اللي كلاب، بس مش قادرين مش قادرين
ولما ندخل الأوضة تعملوه وتاكلوه وحدكم.
أجبتها نافية.

- أكل؟ أنا ما عملتش أكل!

نظرت ليل إلى ونفت بدورها.

- أنا ما عملتش حاجة؟

- إزاي أنا شامة ريحة الأكل جامدة حتى الدخان خنقنى!

ذهبنا ثلاثتنا إلى المطبخ من جديد نتفحص المنظر، كانت طاسة
القلي موجودة، ذهبت أتمسستها أنا وهند وجدناها باردة! ولكن
الدخان وسخونة التحمير لا يزالان بالمطبخ! بدون أن نتحدث

أجمعت عقولنا أنها ياسمين، اتجهنا إلى غرفتها وفتحنا الباب دون استئذان لنجدها في شجار عنيف مع هشام! فسألناها.

- ياسمين... عملتى أكل؟

أشارت بيديها بالنفي فكررت سؤالى.

- يعنى معملتيش أكل؟

بدت في حالة عصبية وقالت في حدة.

- ثانية واحدة يا هشام، والله ما عملت حاجة خالص، والنبى يا

بنات خدوا الباب معاكوا.

أغلقت الباب ثم نظرت إليهن في إصرار وتساؤل!

- لا لا يا جماعة أنا شامة ريحة أكل باينة!

أجابتنى هند.

- يمكن عند طنظ عاملين أكل وريحته جاية عندنا؟

- لا، إحنا قافلين الشباك ثم إن ريحة الأكل والدخان جاية من

البيت، والطاسة موجودة ومكانها زيت! ثم إنها أصلا مسافرة!

ظهرت ياسمين في حالة غضب شديدة، رويت لها ما حدث،

فتحنا الثلاجة وأخذنا نعيد النظر في كل شيء، فوجئنا بأكياس

الدجاج والبطاطس مفتوحين! هذا الكيس الكبير من الدجاج

وبداخله كيس البطاطس كان احدى المشتريات التي أحضرتها هند

البارحة فقط، والتي لم يمسهها أي منا بعد! سألتهن مرة أخرى.

- يا جماعة في حد فيكم أكل من الأكياس دى حاجة؟

جميعهن أجبن.

- لا والله!

أمسكنا بالأكياس لنعد المتبقي، الكيس مكتوب عليه ثمانى قطع
والموجود ستة قطع فقط، اثنتان ناقصتان! وبالطبع البطاطس لا يعد
لكنه مفتوح وناقص! نظرنا إلى بعضنا البعض ذاهلات، الجميع يؤكد
«لا والله ما أكلت ش حاجة»!

دخلت إلى غرفتى وأغلقت الباب، وأخذت في البكاء دون توقف،
شريط أسوأ فيلم في حياتى يمر أمامى للمرة المليون، البوت..
المحفظة.. النقود.. السلسلة.. الكلاب.. الفرعون وأعيننا.. حركة
يدي وعدم التحكم بها.. تبديل الطرح والأحذية.. الأحلام..
السيدة والصندوق.. العطسة.. والآن المطبخ والطعام! متى سيتهي
هذا الفيلم السخيف؟

بعد مرور حوالي ساعة من الزمن، لم أدر وقتها كمية الدموع التى
أسلتها، جاءتنى ياسمين تطرق الباب ففتحت لها ودخلت، لم أستطع
النظر إليها لتورم عيناى، دخلت الغرفة ثم جلست بعيدة عني في
هدوء.

· - ليه يا مريم كده بس، بتبكي ليه؟ أنا شاكة إن ليلى وهند هما اللي
عملوا كده ويكذبوا علينا، علشان ماعملو لناش أكل معاهم؟
- لا لا يا ياسمين، إنتي ناسية الطرح بتاعتنا ولا إيه؟ وبعدين إيه
عرفك إني بكيت؟
- سمعت صوتك.

أخبرتها عن السيدة التى رأيتها والعطسة، لم تعلق، لمحتها تنظر إلى

في زهو غريب، ثم ضحكت ضحكات على صوتها تدريجياً فكانت مفاجأة لي، نظرت إليها فوجدت ملاحظها أقرب إلى شيطان، توقفت عن الضحك، وفي لحظات كان وجهها مُلتصقاً بوجهي، نظرت إلى بحدة فارتعبت، وسرت في جسدي قشعريرة غريبة، ركزت في عيني للحظات للحظات وجاء صوتها كالفحيح يتوعدني.

«أنا مش همشي، ده بيتي، المرة دي يسموكي، المرة الجاية صوتك مش هيطلع».

أغمضت عيني وصرخت بأعلى صوت لي منذ أن جئت إلى هذه الأرض، فتحت عيني فلم أرها، جاءت البنات مهرولة وأولهن «ياسمين» التي سألت بفرع.

- ليه يا مريم كده بس، بتصرخي ليه؟

رددت ياسمين كلام السيدة مرة ثانية وللحظات لم أفهم شيئاً، كيف تُردد نفس الجمل؟ نظرت إليها في ذهول وصرخت أكثر وأكثر إلى أن فقدت الوعي وقت غير معلوم.

أفقت على سريرى مُستلقية عليه فوجدت البنات حولى قلقات، أردت أن أقاوم نفسي وأنظر إلى ياسمين فلا ذنب لها بما يحدث، فلم تكن هي أو ليلي في كل الأحوال، وهذا ما تريده هذه السيدة، التفرقة.. نظرت إليهن في وهن، قالت ياسمين في خوف وقلق.

- الحمد لله على سلامتك يا مريم.. مالك بس؟

واستفسرت هند في جدية.

- إيه اللي حصل يا مريم؟

في حين انتاب ليلي الفضول.

- إنتي كان شكلك مفزوع يا بنتي إيه اللي حصل؟

رويت لهم كل ما حدث لي، تشبه هذه السيدة بليلى وياسمين فوجهن في خوف وحيرة ولم يعلقن، قامت هند وليلي إلى غرفهما بعد مواساة شاردة وبقيت ياسمين.

- والله يا مريم ما عارفة أقولك إيه؟

وأخذت في البكاء هي الأخرى.

- طيب تعالى يا ياسمين نقوم نتوضا ونصلى.

كنت أقاوم خوفاً كلياً رأيت ليلي أو ياسمين وأقرأ القرآن سراً، فأنا لا أدري من فيهما الحقيقي؟ أشارت الساعة إلى الواحدة بعد منتصف الليل، حينها ذهبنا إلى الحمام وقابلنا هند تريد أن تتوضأ هي الأخرى.

أحسست بشيء يمسكني من رقبتى وأنا ساجدة، أخبرت ياسمين فأكدت أنه مجرد وهم وحالة نفسية.

- مريم... بلاش تركزي كده في كل حاجة عشان عقلك الباطن ميصورك حاجات تانية مُرعبة أكثر.

بعد الصلاة ذهبت ياسمين وتركتني وحدي مع أفكارى، هذا هو العقاب الإلهي للجوئنا إلى دجال مشعوذ، الشيخ ماهر كما تسميه هند، هو من وراء كل هذا العبث الذي نعيشه، صليت الفجر ورددت «لا إله إلا أنت سبحانك إني كنت من الظالمين» عددًا كبيرًا من المرات، حتى أعلنت ساعة الوقت أننا في التاسعة صباحًا،

أرهنق ذهني وضلت جميع حواسي طريقها إلى النوم أو الراحة المؤقتة، طالما لن أنام سوف أذهب إلى الجامعة، ذهبت إلى المطبخ في توجس لأصنع قهوة تساعدني على مواصلة اليوم، لم أجد سخان المياه، انتابتني مشاعر غضب عارمة، ذهبت إلى ياسمين فأقسمت أنها لم تره، عندما وجدته عند ليلى وهدد استراح شيء ما بداخلي، ولكن ردة فعلى كانت أكبر من الموقف، أخذته منها لأستخدمه بغرفتي فقط، فأنا من اشتريته وأنا أحق به الآن.

عقدت العزم على الذهاب إلى الجامعة مُرتدية نظارتي السوداء، حتى لا يرى أحد احمرار عيني وتورمها، والذي سيؤكد لكل من سيرها أي قد بكيت لساعات متواصلة، تمنيت بشدة رؤية عماد وتعمدت أن أذهب إلى نفس المكان الذي قابلته فيه من قبل، لم أستطع أن أكتب إعلان فرحتي عندما رأيته مرة ثانية، بالرغم من كل ما أمر به من أحداث، ناديته وكأني أستنجد به في صرخة صادقة..

- عماد.

كانت ابتسامته مختلفة هذه المرة شبه خالية من الخجل ولكن لاحظ فرحة بعينه يريد أن يخفيها.

- مريم.. عاملة إيه؟

أجبتة بنبرة حزينة رغم فرحتي لرؤيته.

- الحمد لله على كل شيء.

- يا رب تكوني بخير، مالك؟ في حاجة ثانية حصلت ولا إيه؟
اتفضلي اقعدني.

- سيبك من الكلام ده دلوقتي وقولي، أنت هنا مستني إيهان؟
- أنا بحب المكان ده تحديداً جداً معرفش ليه، يمكن بحب
الشجرة دي علشان كبيرة وقديمة، برضه مش عارف، بس مش
مستني إيهان هي معندهاش النهارده محاضرات.

- يعني أنت جاي تقعد مع نفسك هنا بس؟

- يعني... ممكن جاي أشوفك وأطمئن عليك برضه.

رغم علمي أنه لم ولن يكون لي، لم أرتبك يوماً في حياتي مثلما ارتبكت
هذه اللحظة وتساءلت، هل يشعر تجاهي بالراحة التي أشعر بها تجاهه؟
أدرك أنه ليس حباً بالتأكيد ولكنه انجذاب وفضول.

- تشوفني أنا؟ بس ماكنش فيه ميعاد!

- الأرواح بتقابل.. لو مضايقتك بلاش، بس أنا بصراحة كنت
عايز أطمئن عليك.

ابتسمت لإيهاني بتلاقي الأرواح وتنافرها، ثم تذكرت ما أمر به.

- عماد.. في أحداث كثير حصلت وحلمت بيك!

- بيا به بقي؟ احكي لي.

- والله يا عماد مش عارفة أقولك إيه! بس في الحلم كنت بتقولي أنا
فلتلك خلي بالك من نفسك، ومش عارف هقدر أعملك إيه. حاجة
كده، كأنك حاسس بيا.

- حصل إيه يا مريم؟

- حصل بلاوى.. الموضوع بقي علني يا عماد، بيعملوا أكل
ويظهروا وأنا مش عارفة أنا م لا آكل ولا أعيش أصلاً.

- هما مين اللي بيعملوا أكل يا مريم؟
- العفاريت يا عماد والله، عملوا فراخ وبطاطس، وفي واحدة
ظهرت.

سرح عماد ثم همس وكأنه يُحدث نفسه.

- هي بتحبهم.

- هي مين اللي بتحبهم؟

- أمى بتحبهم.. ما جايز الريحة جاية من عندها؟

- إزاي وهي مسافرة؟

- آه صحيح، واللي ظهرت دي شكلها إيه؟

- على شكل ليلي.. وياسمين كمان.

- ممممم.

- الدخان من مطبخنا والطاسة والزيت وكله من عندنا، بصراحة

الموضوع زاد بعد ما رُحنا للدجال اللي اسمه ماهر ده ربنا يغفر لنا.

تغير وجه عماد وملاحه تمامًا لغضب لم أره عليه من قبل ونظر

للأرض ثم نظري نظرة قاسية لم أجد لها مُبررًا.

- مريم.. بلاش يا مريم.. أوعديني لا تكلميه ولا تروحي له تاني

يا مريم، مش هيبجي من وراه إلا الشر.

- لا والله من غير وعود، أنا باستغفر ربنا ليل نهار، وده درس

عُمري.

بدأت ملاحه تهدأ وحاول أن يبتسم.

- طيب أنا هسيبك دلوقتي لازم أمشي.

- له؟ خليك معايا شوية.

- معلش هشوفك تاني.. خلي بالك على نفسك.

- حاضر.

تمنيت أن أكون معه أينما ذهب، نوع نادر من الرجال، تحتل الحياة في وجوده.

عندما دخلت إلى «السيكشن» مزح بعض الزملاء بشأن النظارة، تجاهلتهم متعللة إني أعاني حساسية شديدة، ولا أستطيع عدم ارتدائها الآن.

ما أن يدخل «مازن» قاعة المحاضرات (السيكشن)، يصمت الجميع ويتبته، كانت شخصيته مهيبة تجعلك تحترمه فور رؤيته، معيد بالكلية تربطنا ببعض علاقات أسرية قديمة وقوية، شاب صعيدي من قنا، أسمر، طويل، وسيم الملامح، جذاب الطلعة، مستواه المادى ميسور، يعاملنى كشقيقة له، يعطينى نصائحه باستمرار، فهو يعرف المجتمع القناوي جيداً، لاحظ عدم تركيزي وتششتي على مدار مدة السيكشن، بعد أن انتهى هممت بالمغادرة فناداني.

- يا مريم، استني أنا عايزك.

مشيت معه إلى أن جلسنا على أقرب مقعد.

- مالك سر حانة ومضايقة ليه كده؟ ومش عايزة تقلعي النظارة.

لم أتمالك نفسي، بكيت فجأة أمامه، ظن أنني أعيش في ذكريات أبي ولهذا ارتدي الأسود وأبكي، فرويت له كل ما حدث منذ حادثة حذائي إلى الآن.

- إزاي يا مريم تروحي مكان زى ده؟ تلاقيه كمان أخذ منكم
فلوس قد كده؟

- لا والله ما أخذش جنيه!

- تلاقيه عاوز يجيب رجلكم طبعاً؟

استمر بكائى الذي لا فائدة منه، لكن لعله السبيل إلى راحتى.

- بصراحة بقي يا مريم أنا مابستريحش لأصحابك دول، طول

النهار خروج وسفرا طب فسح وقلنا ماشي، لكن كمان دجالين!

لاحظي إنك هنا مغتربة، والناس هنا مش زي ناس أسوان عارفينك.

- حتى لو هما زى مابتقول يا مازن، بس ده مالوش علاقة باللى

بيحصل.

- أقولك إيه يا مريم؟ ما عفريت إلا بنى آدم.

- طب والطرح اللي اتبدلت وكل اللي حصل؟

- الطرح دى قرصة ودن من الراجل الدجال ده، كفاية بقي يا

مريم إنتي في ليسانس السنة دى، ولو شيلتى مادة هتفضل وصمة

عار في الشهادة طول عمرك، افتكري أبوكي الله يرحمه، كل أصحابك

دول أصغر منك دراسياً يعنى لو شالو مادة هيطلعوا بيها السنة الجاية

عادي، مش فارقة معاهم.

- بص يا مازن، أنا هرجع أسوان.

- مينفعش يا مريم، لسه في حاجات مهمة جاية، أول ما ترجعي

اقفلى على نفسك باب الأوضة وما تختلطيش بيهم وذاكرى.

- أيوه هعمل كده، هجيب أكل نواشف في أوضتى ولا يمكن
مدخل المطبخ اللي بيتسرق منه الأكل ده تانى.

- تانى هاتقولى المطبخ؟ يا بنتي ما عفريت إلا بنى آدم، اللي بيحصل
ده منكم فيكم، اللي بيعملوا الحركات دى أصحابك، إنتي مش قلتيلي
قبل كده إن ياسمين دي بتحب تعمل مقابل فيكم؟

- والسبب اللي ظهرت؟ والسبب التانية؟ والعطسة؟ أقولك..
خلاص يا مازن.

- شوفي... ماتستحمليش عليهم كلمة إزاي؟

أنهت الحوار مع مازن وغادرت الجامعة متجهة إلى السوبر
ماركت، اشتريت بعض الأغذية الجاهزة وذهبت إلى المنزل، بعد أن
فتحت الباب وأغلقتة من الداخل وجدت البنات جالسات في صالة
الاستقبال يشاهدن التلفزيون، صامتات على غير العادة وكأنهن
ينظرن إلى عالم آخر، لمحت الشيف في التلفزيون يشرح طريقة طهى
أحد الأطباق في البرنامج المعتاد، ما بالهن يعشن في عالم آخر هكذا؟
هل حدث شيء آخر بغيابى؟ لن أبالي بعد اليوم، ذهبت إلى غرفتى
مباشرة ولم ألق التحية، دخلت ورائى هند بخطوة سريعة ومن ورائها
ياسمين وليلى في بطء، وقفنا على عتبة غرفتى وأنا بالداخل أمسك
بمقبض الباب لأغلقه.

قالتها هند بحزم.

- إيه؟ داخلة على أصنام؟

أجبتها بما لقنه لي مازن وأريد أن أصدقه.

- بصبي يا هند... بصوا كلكم، فاضل على الامتحانات أقل من شهر ومش فاضية أنا لشغل الحلق حوش بتاعكم ده، أنا هنام عشان أصحى أذاكر ومش عاوزة أسمع صوت حد فيكم؟

أنهيت التهديد المباشر وأغلقت الباب بوجههن بشراسة حقيقية لم أكتشفها بداخلي إلا حينها، كان عقلي الباطن يدافع عن مستقبل، وهديتي لأبي، لم أسمع أي تعليق من إحداهن، انصرفن في صمت غريب، بعد قليل دخلت الحمام لأتوضأ وأصلي، بعد أن أنهيت صلاتي تاركة باب الغرفة مفتوحًا وجدت ياسمين تقف أمامي منتظرة، اعتدت بعد أن رأيت ليلي وياسمين على غير هيتتهما أن أسمى كلما رأيتهما، فإن كانتا هما فسوف يكملان حديثهما، وإن كانتا غير ذلك سوف تتلاشيان كما فعلا من قبل.

- أعوذ بالله من الشيطان الرجيم.. بسم الله الرحمن الرحيم.

- مالك يا مريم.

- بصبي يا ياسمين أنا مخنوقة جدًا من الحوارات اللي بتحصل، وامتحاناتي فاضل عليها شهر، لو شلت مادة هتفضل وصمة عار لكن أنتم تشيلوها للسنة اللي جاية عادى مش فارقة معاكوا، لو سمحتى يا تدخلى وتقفلى الباب يا تفضلى عايزة أذاكر.

أجابتنى ضاحكة.

- طب أنا هتفضل يا مريم.

جلست في السرير المقابل لي بعد أن احضرت جهازًا لسماع الموسيقى، رتبت أوراقى وكتبت لأبدأ المذاكرة ثم رن جرس التليفون، كان مازن المتصل.

- إنتي زعلتي؟

- لأ طبعًا.

- لا والله يا مريم خدي بالك البلد هنا صغيرة ودماغ الناس أصغر،
ويفسر واكل حاجة على مزاجهم، إنتي متعرفيش الناس هنا بتقول إيه
على البنات المغتربات؟ «البنات اللي أهلها يغربوها على كلية غير طب
أو هندسة نقول عليها إيه»؟ إنتي لو قناوية محدش يقول عليكى نص
كلمة، لكن إنتي مغتربة وأنا في الآخر أخوكى وينصحك.
- خلاص يا مازن.

- إحنا أهل يا مريم خدي بالك على نفسك ولو عوزتي حاجة
كلمينى.

نظرت إلى ياسمين وسألت سؤالًا تعرف إجابته.

- إنتي اتكلمتى مع مازن ولا إيه؟

- آه.

ضحكت ياسمين.

- آه ... عشان كده بقي راجعة سخنانة علينا؟

بدأت ياسمين تتحدث في أمور مختلفة حتى تغير ما بداخلى
حتى ولو مؤقتًا، تتحدث وتضحك في تواصل بلا انقطاع، لم أعرها
انتباهى في البداية، كأنها بديل لراديو، أفكر في كل ما حدث ولا
يزال يحدث، أغامر بعقلى في مناطق لم أعرفها من قبل، ثم نظرت
اليها وبدأت تقبل ما تقول، كحيلة لتغيير مزاجى ولو مؤقتًا،
سمعتها تتحدث عن هند وعمر، فتذكرت اتصالها به مستكرة.

- هو أخبار هشام إليه؟

قلتها وأنا أعاتبها بعيني أو بالأحرى محاولة إفاقتها، ماذا عن هشام وكيل النيابة الذي تنوين الزواج به؟ هل كانت تحبه حقاً؟ نظرت إلى ياسمين وتغيرت ملامحها إلى حزن عميق.

- هشام خطب يا مريم.

- إليه؟ إليه الكلام ده يا ياسمين؟ امتى ده انتوا قريب كتتم مع

بعض؟ إزاي؟ وإزاي لسه بتكلميه؟

- وأنا بقلب في موبايله لقيتله صورة ببدلة سواريه وحاضن واحدة لابسة فستان سهرة.. بقوله إليه ده؟ قالى أنا كنت هصارحك بس كنت خايف عليكى تزعلي، البيه أهله مش راضيين بيا عشان أنا من أسوان مش من سوهاج زيهم، ومستوايا الاجتماعى والمادي عادي ما يشرفش، والدور اللي هما عايشينه يا ستي.

- عشان كده كتى بتخانقي في التلفون؟

- آه.

- وإزاي لسه بتكلميه دلوقتي؟

- بحبه يا مريم.. وهو كمان بيحبني، بس أهله مش راضيين، وبعدين هو حلفلي إنه سابها.

- طب ما كنتيش بتشوفي في إيده الدبلة؟

- لا، تخيلي كان بيقلعها قبل ما يشوفني.. زي الأفلام، أنا اللي هيجننى إزاي كان بيعمل كده يا مريم؟ أنا محستش! ده معايا على طول، بيوديني ويحبيني ومعايا على التلفون طول الوقت، هتجنن مش عارفة إزاي؟

لم أعلق ولم ألومها في موضوع عمر أكثر مما عقلت، ردة فعلها طبيعية جدًا، جزء منها يريد الانتقام، عادت ياسمين لسماع الموسيقى، وعاد غمى يدور في نفس الفلك مرة ثانية، هل يمكن لإحداهن أن تفعل كل هذا بنا كما يقول مازن؟ ماذا عن باقى الأحداث؟ جاءت ليلى تطرق الباب.

- مريم.. ما ترجى البويلر تاني في المطبخ؟ إحنا متشحططين.

- لآ، وماحدث يجيبلى سيرة المطبخ تاني.

ضحكت ياسمين مُستهزئة.

- أنا هجيب باب المحلات الجرار الحديد أقفلوكوا بيه المطبخ،

طب خليه في الصالة؟

- لآ يعني لآ، لو عايزين تعملوا حاجة تعالوا هنا في أوضتي.

كان عنادي ردًا غير مباشر على عدم اهتمامهن بما يحدث، أشعر أنهن لا يعطين الأحداث وزنها الحقيقي، ما إن يمر أي حدث حتى يجلسن سويًا يشربن الكاكاو ويضحكن! هذه التصرفات لا أستسيغها أبدًا، الطبيعي أن يتحملن جزءًا من المسئولية، لا أن أكون الوحيدة التي لا تنام ولا تأكل، وتفكر حتى اقترب غمى من الانفجار، هل كل ما نمر به لا يستحق منهن شيئًا من العناء من أجل معرفة حقيقته؟ أم أن مازن على حق في تخميناته؟ صاحت ليلى.

- ماشى يا مريم.

ذهبت ليلى، ودخلت هند غرفتي دون إذن، وضعت يديها في

خصرها علامة التحدى ناظرة لي نظرة استجواب.

- مالك إنتي النهارده مش حاملة المانجة؟
- بلا مانجة بلا سلطة، أيوه مش طايقة حد، اطلعوا بره عاوزة

أذاكر؟

نظرت إلى هند في لوم، غمزت باسمين بعينيهما لهند واصطحبتها
وغادرتا الغرفة، جلست أذاكر من الوقت ساعة حتى مللت رجوع
عقلي من حين لآخر لنفس المنطقة المظلمة، ثم خاطبت نفسي في ود
أستحقه «اعمل نسكافيه عشان تفوقي، واطلعي ذاكري بره على
الطرابيزة عشان القعدة دي هتنيك»، فتحت الباب ووجدت البنات
ينظفن منضدة التليفزيون لاستخدامها في المذاكرة ويجهزن أوراقهن،
رأوني فابتسمت وجوههن فرحًا، وهللن في طفولة نسيانها.

- هيبه، مريومة هتذاكر معانا.

تبسمت بتلقائية لردة فعلهن وألقيت تعليماتي.

- بس مش عاوزة أسمع نفس.

هززن رؤوسهن بالموافقة، رأيتهن يشربن القهوة، لقد دخلن
المطبخ ولم يهتمن لما حدث! هل أصدق مازن وأريح عقلي وبدني
وروحني؟ مر الوقت ونحن في مكاننا نستذكر ما فاتنا، صاحت هند.

- ياه، بقالنا ساعة بنذاكر!

قالتها في حماس.

- نكمل كمان ساعة وبعدين ناخذ نص ساعة راحة.

- بس الله يهديكى طلعيلنا البويلر في الصالة.

قالتها ليلي في استعطاف فهزرت رأسي مُوافقة، قامت وأحضرتني
من غرفتي إلى حيث نجلس لنذاكر على الشاي الصعيدي الجميل،

رأيتها تتعامل مع المطبخ وكأن شيئًا بالأمس لم يكن، تغسل الأكواب
وتملؤها بالشاي والسكر، تضعها في الصينية وتأتي مبتسمة!

على مدار ساعة المذاكرة الثانية كانت ليلي تشرب الشاي وتتململ
في جلستها، هند ترسم دوائر ونجوم، وياسمين تذاكر بجديده، أما
أنا فأذاكر وأراقبهما لعلى أصدق مازن، أوشكنا على بدء الاستراحة
سمعنا صوت شيء يقع على أرضية المطبخ، فزعت على الفور مُحَدِّدة
فيهن، فغرفاهى منتظرًا ما سيحدث، أردفت هند في ثقة.

- ما تخافيش يا بت، دى تلاقيها حته البلاستيكاية؟

قامت ليلي من مكانها لتستكشف الأمر.

- هي فعلا.

استفسرت لأتأكد.

- إيه حته البلاستيكاية دي؟

نظرت هند في ثقة وأكدت حدسها.

- دى علبة بلاستيك أم واحدة فينا كانت باعته فيها أكل، غسلتها

وحطيتها على طرف الرخامة.

أدركت حينها إنى أتخبطت في أفكارى بمجرد وقوع أي حدث
بسيط، أصبحت هشة مشوشة، أدعو الله قدر استطاعتي أن يقوينى
ويرينى الحقيقة، بدأت النصف ساعة من الاستراحة في الحديث عن
أمور عامة واحتساء الشاي إلى أن انتهى الوقت، لنبدأ الساعة الثالثة
من ساعات المذاكرة التي تسبق الامتحانات مباشرة، لعلنا نحصل
قدرًا كافيًا من العلم يؤهلنا لتجاوز السنة الدراسية بسلام.

(٦)

بعد دقائق معدودة سمعنا صوت الثلاجة يفتح ويغلق عدة مرات في عنف، كائن ما يبحث عن شيء ما، الطاسة اللعينة، الطاسة تُلقى بعنف على البوتاجاز، صوت الكبريت، اشعال البوتاجاز، صوت فتح زجاجة الزيت! الزيت ينزل على الطاسة، صوت طقطقة الزيت عندما يسخن على النار، الزيت يغلي الآن، وأخيراً.. « تششششش! » الدخان يتصاعد إلى خارج المطبخ في تتابع مذهل! صوت قلبي، رائحة البطاطس! رائحة الدجاج! الدجاج والبطاطس مرة أخرى!

مررنا بلحظات كأنها الدهر كله فوق رؤوسنا، حملناه ذاهلات مُحَدَقَات في اللاشيء الذي لا نراه غير مُصدقات أنفسنا، مازن لا يفهم شيئاً إذن، ليست هند أول ليلي ولا حتى ياسمين، كلنا سويًا الآن، نظرنا إلى بعضنا لنؤذي نفس المشهد، نؤذي نفس الحركة دون مساعد مخرج يوجهنا، وقفنا في أماكننا، كفوف اليد تغطي الخدود استعداداً للطمها بعد ثوان، الدموع تنهمر بغزارة متلاحقة لا تعرف التوقف، في ظل هذا العبث أتى صوت ياسمين قويًا مختلطًا بدموعها الصامتة تردد في تلاحق وإصرار الاستعانة بالله، بينما من يقلي الدجاج والبطاطس في المطبخ مازال مستمرًا مستمتعًا كما يبدو، تماكنت ياسمين أنفاسها.

- أعود بالله من الشيطان الرجيم.. بسم الله الرحمن الرحيم

﴿لِلَّهِ لَا إِلَهَ إِلَّا هُوَ الْعَلِيُّ الْيَوْمُ لَا تَأْخُذُهُ سِنَّةٌ وَلَا نَوْمٌ لَهُ مَا فِي السَّمَوَاتِ
 وَمَا فِي الْأَرْضِ مَنْ ذَا الَّذِي يَشْفَعُ عِنْدَهُ إِلَّا بِإِذْنِهِ يَعْلَمُ مَا بَيْنَ أَيْدِيهِمْ وَمَا
 خَلْفَهُمْ وَلَا يُحِيطُونَ بِشَيْءٍ مِنْ عِلْمِهِ إِلَّا بِمَا شَاءَ وَسِعَ كُرْسِيُّهُ السَّمَوَاتِ
 وَالْأَرْضَ وَلَا يَئُودُهُ حِفْظُهُمَا وَهُوَ الْعَلِيُّ الْعَظِيمُ ﴿﴾ ١

أصوات المطبخ ترتفع وتعلو كلما رددت ياسمين آية الكرسي،
 ظلت نبرة صوتها تعلو بقوة وحزم، والأصوات تعلو في نخبط شديد،
 الزيت.. الثلاجة.. صوت القلي.. أشياء تتكسر وأشياء تضرب
 بعضها البعض وأشياء تتحطم، كلما تعلو ياسمين بصوتها يرتفع
 صوت المطبخ صخبا.

صوت ياسمين.. صوت المطبخ.. صوت ياسمين.. صوت
 المطبخ.. صوت ياسمين..

صوت المطبخ، هنا تدخلت هند بحزم دون أن تبكي.

- الله أكبر... الله أكبر... الله أكبر... الله أكبر

توقفت ياسمين التي انقطعت أنفاسها، وظلت هند تقترب من
 المطبخ شيئا فشيئا وكأنها تتجسس على من فيه، أو ربما تهدئه بينما تكبر
 حنجرتها إلى أن دخلت المطبخ، كنت وليل نبكى دون فعل أي شيء
 ايجابى، نادى ياسمين هند مُحدرة.

- تعالى هنا يا هند.

ما إن دخلت هند حتى سكتت جميع الأصوات! وسكتت هند!
 نظرنا إلى بعضنا البعض في ذهول، ماذا فعلت هند، هل مازالت
 هناك؟ صرخت ياسمين.

١ سورة البقرة - الآية ٢٥٥.

- هند!

جاءت نبرة الأخيرة منفعلة.

- مفيش حد يا بنات، تعالوا بصوا.

أمسكت ليلى بطرف بيجامتي وأمسكت أنا بيد ياسمين، مشينا ثلاثتنا في خوف ناحية المطبخ، بالقرب منه، لن أدخله قطعاً، أريد فقط أن أرى ماذا حدث؟ الطاسة اللعينة على البوتاجاز بداخلها الزيت البارد تمامًا، بينما لازال الدخان يتصاعد خارج المطبخ مصطحبًا سخونته معه، تمامًا مثلما حدث في المرة السابقة! جاء صوتي مرتعشًا.

- افتحي كده يا هند نعد الفراخ؟

فتحت هند الثلاثجة ومدت يدها نحو الأكياس في جراحة ثم أردفت.

- الفراخ ناقصة اثنين والبطاطس متشال منه كمان يا بنات! يعنى

هما دلوقتي أربع قطع؟ والبيسى كمان مشروب منه وفاضل قلة!

أغلقت هند باب الثلاثجة وعلامات القلق تسود وجهها، أخيرًا أظهرت قلقها.

- إيه ده يا جماعة؟!

لم يكن لدينا أية إجابة، بعدها بدأت هند في ترتيب المطبخ، في نفس اليوم ونفس الساعة ونفس اللحظات، كيف تفعل هذا؟ لم ولن أفكر في إدراك جراحة هند في هذه الأمور، هل تستطيع إنسانة طبيعية مهما بلغت قوة أعصابها أن تفعل ما تفعله هند؟ لعل أبا لعل بعض الشيء.

أحسست بالعجز والذهول، سمعت مرات عديدة قصص من الصعيد المصرى، وفي أسوان قصص الجن الذي يسكن أعماق النيل، لكننى لم أفكر للحظة أنى قد أروى قصة مُشابهة في يوم من الأيام!

لقد خلق الله الإنس والجن فقط ليعبدون، سمعت ذات مرة أن مخلوقات الجن منهم المسلم والمسيحي واليهودي والملحد مثلنا تماماً، منهم الطيب ومنهم الشرير، منهم المسامح ومنهم المتقم المؤذي والعباذ بالله، أو من بهذا طالما أن خلقهم ذكر في القرآن، هذا الذي حدث في المطبخ ويحدث من قبل، هم الفاعلون، أو هو، أو هي؟ لا أدري، لكن الأصوات العنيفة الصادرة منهم أثناء وجودهم في المطبخ تدل على أنهم غاضبون، وربما قلقون أيضاً، زاد توترهم عندما قرأت ياسمين القرآن، كان هذا واضحاً، هل هو أو هم مسلمون؟ مسيحيون أم يهود؟ أم ملحدون؟ لماذا سكنت جميع الأصوات عندما دخلت هند بالرغم من تكبيرها المستمر قبل دخولها! هل تربطها صلة ما بهذه المخلوقات؟ أحسست وقتها أنها تروضها، أو على الأقل تعرف كيف تهدئ من روعها! تماماً كصاحب كلب يروضه.

عجزت عن فهم حقيقة ما يحدث ولماذا؟ ولماذا تحديداً في شهر الامتحانات؟ لا أريد الرسوب وسوف أحارب من أجل هذا الهدف، ولكن ماذا أفعل الآن؟ أراي أفق هزيلة وحيدة رغم وجود البنات حولي، أفتقد أهلي بشدة ولا أريد إخبار أحد منهم، لا أريد أن يعيشوا ولو حتى لحظات قلق من أجلي، يمر الشريط السينمائي الكريه مرة أخرى أمامي، لا أريد أن أراه لكني مُسيرة غير مُجيرة، فجأة تحولت مشاعري المتوترة إلى نمر يريد أن يفترس أي شيء، حتى ولو كان غير مرئي، تجمعتنا في غرفة ياسمين وهند لا تزال بالمطبخ تنظفه! فسألتهن.

- حاسين يايه دلوقتي يا بنات؟ ها؟ حسيتوا بيا؟ أحسن عشان تشيلوا المسئولية معايا شوية، اشمعنى أنا وحدي اللي شايلة المهم؟

قلتلكم على موضوع العطسة وعادى، قلتلكم على الست والست
التانية اللي ظهروا وعلى شكلكم كمان وبرضه عادى ولا حد اهتم
نفت ليلي.

- والله ما أعرف موضوع العطسة ده؟
سردت لها ما حدث معي، أبدت اندهاشًا غير مصطنع وقالت
مستنكرة.

- كل ده حصل من ساعة مارحنا للراجل ده.
دخلت هند الغرفة عاقدة زراعها اليسرى على وسطها ويدها
اليمنى تمسك ذقنها وهي تفكر.

- صحيح الشيخ قالي لو حاجة تاني حصلت أكلمه، أنا هاكلمه؟
صحت بغضب.

- لا يا هند ماتكلميهوش.

استجابت ياسمين على أمل.

- ليه يا مريم خيلينا نشوف في إيه.

- لا، أنا حاسة إن هو اللي بيعمل فينا كده؟

- ما هو لو هو اللي بيعمل فينا كده أدينا بنقوله أهو حصلنا الرعب
يا عم الحاج، كفاية كده، ونقوله إن إحنا رايجين تاني عشان يتعشم،
هو أكيد عاوز فلوس، نطمه بس.

- مش عارفة بس أنا وجهة نظري مانكلموش.

بعد مدة من الزمن لا أعلم إن كانت ساعات أم دقائق فقدت
إحساسي بالزمن وبأشياء كثيرة، فتحت هند مُكبر صوت تليفونها

المحمول، رن الهاتف الآخر، صوت دعاء ديني، مرت أمامي أحداث
قرية البياضية مرة أخرى، لا أستطيع نسيان تفاصيل ليلتها، صوت
خشن يرد.

- ألو.. سلامو عليكموا.

- وعليكم السلام يا شيخ، طبعاً أنت مش عارف أنا مين، أنا هند
اللي جيتلك أنا والبنات صحابي من كام يوم.

كيف يكون بين عائلتها وبينه حساب مفتوح ولا يعرفها؟ بل
تذكره بنفسها؟

- آه يا بابا إزيكم عاملين إيه؟ ليه ماتصلتوش لما وصلتكم
بالسلامة؟

- معلىش والله يا شيخ أصل اتلهينا نطلع على قنا ولا الأقصر،
المهم يا شيخ عاوزه أقول إن الشقة بيحصل فيها حاجات كتير.

وبدأت تقص عليه كل الأحداث وهو صامت وأكملت.

- مش بس ده يا شيخ، امبارح كان في ريحة أكل في الشقة جامدة
لحد ما جات مريم عندنا وعرفنا كلنا إن ماحدث فينا عمل الأكل ده،
ودلوقتى إحنا وقاعدين حصل كده!

- طيب يا هند افتحى الميكروفون وعدى على الأوض كلها وأنا
هاقرأ.

ظل الميكروفون «على حد تعبير ماهر مفتوحاً، وتابعت هند السير
وحدها في الغرف، غرفة تلو الأخرى، تقف في المنتصف والأركان
وهو يقرأ، لكنه لم يكن من القرآن في شيء، يتحدث بلغة غير مفهومة،

وكانها مجموعة طلاس ممتقطة ومتشابكة خالية من ذكر الله، بالطبع كان للمطبخ فيه نصيب الأسد.

بعد هذا العرض المسرحي الغريب، جلسنا جميعًا في غرفة ياسمين نتذكر الأحداث التي مررنا بها من بداية لقائنا بباهر، وبينما نتحدث البنات أحسست أن عقلي يذهب إلى عالم آخر، أرجوك لا تذهب، أو اذهب وخذني معك لعلني أفهم شيئًا واحدًا، لم نعرف لطريق النوم وسيلة، أدرنا التليفزيون لنستمع إلى آيات القرآن الكريم، ذهبت هند وليلى إلى غرفتهما وذهبت أنا إلى غرفتي وتركنا ياسمين شاردة تفكر. بدأ الخوف ينجيم على أفكارنا ويسيطر على طريقة تفكيرنا، بدءًا من هذه الأيام لم نستطع أن نتجاهل ما حدث وما يحدث، وما سوف يحدث بالتأكيد ولو لوضع دقائق، حاولت أن أتذكر مريم الحقيقية، مريم الأخرى التي تعيش بداخلي، لن أستسلم أبدًا، مرت هذه الليلة دون أحداث أخرى.

أدركت الصباح الباهت أو هكذا كنت أراه، تآرجحت روحي بين اليأس والمقاومة، لكنني في هذا الصباح كنت أتعامل مع كل الأمور بياس، تحولت شخصيتي إلى شخصية أخرى بعيدة عني، فقط أقاوم رغبتني في ترك كل شيء والعودة إلى أسوان، إنها الأيام الفارقة في السنة الدراسية ورُبها في عمري كله، قررت أن أتخلص من كل هذه المشاعر السلبية وأستعين بالله على قضاء أموري.

قهوة باردة في الغرفة، القهوة التي تصنعها بالماء الساخن والبن والسكر ليست قهوة، ليست إلا شرابًا يساعد أجفانك على عدم الانزلاق إلى الأسفل فقط، القهوة الحقيقية لها طقوس خاصة، أحب

تلك اللحظات التي أتأملها في انتظار على نار هادئة إلى أن تقترب من الفوران فأرفعها في عشق، لتنزل ساخنة عطرة في قدح يتظرها بحرارة، إحساس حُرمت منه، والآن لا بد من احتساء هذا الشراب السخيف بدلًا من ذلك المشروب الرائع بينما أستعد للذهاب إلى الجامعة في هذا الوقت المبكر، لا بد أن أذاكر وأحاول تحصيل ما فاتني، ذهبت إلى الجامعة شاردة كالعادة، غير مُبالية بتعليقات زملائي، لا أتحدث إلى أحد، فقط إجابات قصيرة غير شافية، لم يعتد زملائي هذه الشخصية العجيبة، انتهت المحاضرة وخرجت أول طالبة من القاعة بدون أن أنطق بكلمة واحدة، أسرع إلى المنزل لأجد ياسمين تذاكر، لم أهتم.. ذهبت إلى غرفتي وكأني صنم متحرك! بعد قليل جاءت ياسمين تطرق باب غرفتي.

- في ناس عايزينك يا مريم بره.

خرجت لأرى زميلاتي بالجامعة اللاتي لم أنطق بكلمة واحدة معهن اليوم، سمر.. سارة وأخريات، سارة فتاة نعرفها بتدينها وحسن خلقها، سمر من أقرب الزميلات وأكثرهن ودًا لي، جلسن بغرفة الاستقبال، فذهبت لأستضيفهن، جلست على أحد الكراسي البلاستيك القريبة من التلفزيون.

- أهلا يا بنات إزيكم.

تحدثت سارة باهتمام وطيبة.

- إحنا جاين وراكي مخصوص علشان نعرف إيه اللي مضايقتك!

- أبدأ، ولا حاجة، بس بقالي فترة بذاكر ومش بنام.

جاء صوت سمر معترضًا على ما أقول.

- لا يا مريم، شكلك باين، عينك طالعة لبرة ووشك شكله
متغير وصعب، وخاسة جدًا، وبصراحة يعنى إحنا قلقانين عليكى
بقالنا فترة.

نظرت إليها سارة بعنف في تأنيب دون أن تنطق كلمة.. فأردت
طمأنتها.

- متقلقوش... بصراحة عندي مشاكل في البيت بس.

- طب قولى يا مريم.. إحنا أخوات... فضفضى.

قالتها سارة بصدق لمس قلبى.

- إن شاء الله كل حاجة هتبقى كويسة.

ظلت سارة تنظر إلى جدران الشقة وكأنها تتفحصها، ترسم على
وجهها علامات غير مريحة، باقى البنات ينظرن إلى متشككات فيما
أقول، نظراتهن لي ولبعضهن البعض تعطينى انطباع الشفقة التي
أستحقها بجدارية، أجبت أسئلتهن بجمل قصيرة تفي الغرض، فأنا
لا أريد أن أتحدث أكثر من هذا، أردت سارة بعفوية.

- بس إنتي صلى على النبى يا مريم وأمشي من الشقة دى.

جاءت جملة سارة في غير محلها تمامًا، إنها المرة الأولى التي تزورنى
فيها، لا أحد يعرف بالأمر غير مازن ولا يعقل أن يتفوه مازن بكلمة
واحدة مما يعرفه، ما بال سارة تتفحص الجدران هكذا؟

- ليه بتقولى كده؟

تلعثمت سارة وقالت.

- يعنى.. بعيدة ومش حلوة.

- لا يا سارة إزاي يعنى؟ طب أروح فين دلوقتى والامتحانات
أهى خلاص على الأبواب؟ وبعدين إحنا شقتنا بالنسبة للشقق اللي
بتأجر نضيفه جدًّا، إنتي عارفه مستوى الشقق إزاي، بس ليه بتقولى
كده؟

وقفت فجأة وحملت حقيبتها وقالت في عجلة.

- طيب خدى بالك على نفسك يا مريم، ياللا ياللا يا بنات عشان
متأخرش.

سلمت وذهبت البنات كُلى إلى وجهتها، كُنت على يقين بأن جلسة
نميمة بريئة سوف تنعقد فور خروجهن، وقد كان، فور وصول سمر
إلى بيتها هاتفنى.

- ألو.

- أيوة يا مريم، إيه يا بنتى مالك؟

- مفيش يا سمر مرهقة بس شوية.

- بقولك إيه.. البت سارة أول ما خرجنا من عندك قالت؛ يا
ساتر إيه الشقة اللي مريم قاعد فيها دى! شقة كده تقبض القلب، أنا
مش عارفه هي قاعده فيها إزاي دى؟ طول ما إحنا قاعدين خيالات
رايحة وجاية.

- يا سلام! وبعدين.

- أنا رديت وقتلتها تلاقى البنات أصحاب مريم مش بيصلوا،
بس إزاي صحيح يا مريم مش بيصلوا؟ ده كفاية هند لوحدها
حجبت بيت ربنا.

انتهت المكالمة دون تفسير أو تعليق مني أو منها.. فقط القليل من الأسئلة والكثير من «خلى بالك على نفسك»، حينها قررت للمرة الألف أن أسيطر على نفسي وأن أعمرى كلمة «خوف» من عقلي، على الأقل إلى أن تنتهى فترة الامتحانات بسلام، سوف أعمرى حديث مازن وأذاكر، لجأت لصنع نفس المشروب الكريه شبيه القهوة في غرفتي كي أذاكر، وبدأت رحلتى مع الملخصات والمراجع والكتب في هذه الليلة.

في هذه المرحلة تحديداً كانت الصلاة في حد ذاتها عملاً من أصعب ما يكون، ليس على قلبى ولكن ما يسبق الصلاة، الوضوء، كان الوضوء من أصعب الأشياء، بعد أن أنتويه تبتدى رحلة الشد والجذب، أشعر بيدي كأنها قد سُلت، وفي بعض الأحيان أقف أمام الحوض وكأن أحدا يشد يدي لمنعها من أن تدخل تحت الماء المتدفق من صنوبر المياه، أكاد أحس ما أقصه الآن كلما تذكرته، لا تستطيع ياسمين إتمام وضوئها! رأيتها وهي تُعافر لكي ترفع رجلها أثناء الوضوء، ذهبت إليها لأنى على علم بما تمر به فساعدتها، إلى أن قررت هي أن تتوضأ في «البانيو»، فترك المياه تنساب على يديها وأرجلها من شدة الألم.

ذهبت كل منا إلى غرفتها تصلى، كنت أصلى وكان شيئاً يمسك برقبتي أثناء الركوع والسجود، فلا أتنفس، أرجلى ثقيلة كأن ثبتت بها كل حديد، لم أهتم وظللت أركع وأسجد في إصرار وتعب، ثم جاء وقت الاستذكار الذي أتمناه بحق.

(٧)

كانت لنا عادة كلِّما احتاجت إحدانا شيئاً من الأخرى أن تتصل بهاتفها، فتعرف الأخيرة أن المتصلة تريد شيئاً ربما لكسل منها، فتذهب إلى غرفتها، بدأت أذاكر فرن هاتفي، وكانت ياسمين المتصلة، ذهبت إلى غرفتها ودخلت فوجدتها تتحدث في هاتفها المحمول! سألتها.

- إيه يا ياسمين عايزة إيه؟

تقطع ياسمين مكالمتها لثوان.

- إيه يا مريم في إيه؟

- رنيتي عليا؟

- لا أنا مرنيش!

- لا إنتي رنيتي عليا حالا!

- يا مريم أنا بتكلم في الموبايل قدامك، ومش معقول هاقوله ثانية

واحدة وأرن عليكي!

نظرت إلى هاتفي لأتحقق من قواى العقلية، برغم تأكدي من اتصالها بي، فلم أجد اسمها في سجل المكالمات التي لم يرد عليها! بدأت أتشكك في نفسي، لكنني استعدت ثقتي بنفسى في لحظات وأردفت.

- على فكرة يا ياسمين الموبايلات كمان فيها حاجة!

ضحكت ياسمين قائله.

- إيه بقى علاقة الجن بالتكنولوجيا؟

كانت تتحدث إلى عمر حينها، عندما سمعها تقول «جن» طلب منها أن يتحدث معي فوافقت، جاء صوته رافضاً.

- ازيك يا مريم.. عاملة إيه؟ إيه اللي انتو بتحكوه ده يا بنتي،

بطلوا خزعبلات؟

- لا يا عمر أنا مش عايزة حد يقول لي كده، اللي إحنا فيه مش

خزعبلات، إحنا اتبدلت طرحنا وشفنا ناس وسمعنا أصوات في

المطبخ وحاجات كتيرة حصلت!

- خلاص يا ستى مش خزعبلات، المهم إنتي عاملة إيه؟

أنهى عمر الجدال سريعاً لأنه سمع حدة لهجتي، حدة الحق، لم

يُصبنى الجنون بعد، ذهبت إلى غرفتي من جديد، يصاحبني إحساس

الرعب الذي اعتدته منذ فترة ليست بعيدة، لكنها تمر عليّ مرور

السنين، أعتقد أن غرفتي هي الأكثر أماناً من باقي الشقة الملعونة، أو

ربما كان عقلي الباطن يطمئنني، وجود شباك بالغرفة يطل على الشارع

وسماع أصوات المارة يعطيني إحساس الأمان المؤقت، مرت نصف

ساعة، فتحت ياسمين باب غرفتي في عصبية نتيجة مُشاجرتها التي

وصلت لأذني مع عمر.

- ها يا زفتة عايزة إيه؟

- في إيه؟

- رنيتى عليا؟

- لا ما رنيتش عليكى! مفيش مكالمات صادرة أهو؟

ذهبت ياسمين لتتحقق من هاتفها، لم تجد اسمي في المكالمات
الفاتة، جاءت إلى مرة أخرى مذهولة.

- معقول يكون في حاجة في الموبايلات كمان؟

- ها.. إيه الأخبار بقى دلوقتي؟ صدقتينى؟

- طب تعالي نشوف البنات واخدين جنب منا ليه؟

ذهبتا إلى غرفة هند وليلي وقصصنا عليهن ما حدث، صاحت ليلي

بعفوية.

- إيه ده؟ وإحنا كمان!

نظرت إليها هند في تهديد وقالت.

- وإحنا إيه؟

تجهم وجه ليلي وانطفأ ثم قالت.

- لا ولا حاجة، بقلوكم إيه... أنا مش قادرة أعيش في الشقة دي،

أنا همشي بكره وأذاكر في بيتنا.

بدت هند مسيطرة على ليلي، تركتها تتحدثان غير مبالية بما

يقولان، أصابتنى حالة من اليأس، ذهبت إلى غرفتي أبكي، ها أنا

الآن أمضى خمسة أيام لم أذق خلالها طعم النوم أو الراحة، نسيت

طعم الأكل واشتاء أي شيء في الدنيا، دخلت في وصلة مناجاة مع

الخالق بصوت عال دون أن أدري.

'يارب.. يمكن أكون عملت حاجة غلط في حياتي وأنا ما عرفش،

لو هو ده عقابي يارب ماتخليش عقابي كده»، سجدت على الأرض
 فجأة وبصوت عالٍ خاشع بالكِ ظلمت أردد لفترة: ﴿رَبَّنَا لَا تُؤَاخِذْنَا
 إِن نَسِينَا أَوْ أَخْفَاْنَا رَبَّنَا وَلَا تَحْمِلْ عَلَيْنَا إِمْرًا كَمَا حَمَلْتَهُ عَلَى
 الَّذِينَ مِن قَبْلِنَا رَبَّنَا وَلَا تُحَمِّلْنَا مَا لَا طَاقَةَ لَنَا بِهِ ۗ وَاعْفُ عَنَّا وَارْحَمْنَا
 وَأَرْحَمْنَا أَنْتَ مَوْلَانَا فَانصُرْنَا عَلَى الْقَوْمِ الْكَافِرِينَ ﴿١﴾

انتهيت من مناجاتي للقدير العظيم وجففت دموعي، ثم أتيت
 بأربع ورقات بيضاء كبيرة وقلم ملون عريض حتى يكون الخط
 واضحًا ومعجون أسنان لتثبيت الورق على الحائط، ثم كتبت على
 الورقة الأولى «الله»، الثانية «لا إله إلا الله»، الثالثة «محمد رسول الله»،
 الرابعة «ألا بذكر الله تطمئن القلوب» ثم علقتها على جدران غرفتي.
 قضيت الليلة كلها أستقبل مكالمات ياسمين التي لم تطلبها، لم
 أكلف نفسي عناء الذهاب إليها مرة أخرى، كنت أيضًا على تمام
 التأكد أن نفس الشيء يحدث معها، وأنها تفعل تمامًا مثل ما أفعل!
 فكرت في أن أجيب الهاتف، قاومت خوفي فانتابني خليط من
 الأحاسيس كالفضول والتحدي والغضب والعند، لن أستطيع
 أن أصف اجتماعها في إحساس واحد، قررت أن أجيب من يتصل
 فهممت بالرد فسكت الصوت!

فتحت الهاتف لأرى المكالمات الفائتة، لم يُدرج اسم ياسمين بها،
 المكالمات حقيقية ولكنها غير موجودة، كأنها وهم، سوف أفترض
 أنني الموهومة، هل تتوهم ياسمين هي الأخرى؟ لكن لماذا ياسمين
 تحديدًا؟ لماذا ربطوا الاتصالات بيني وياسمين وبين هند وليل؟

٢ (سورة البقرة الآية رقم ٢٨٦).

جاء صوت أذان الفجر فهذأت جميع المخلوقات، توضأت
بالغرفة من زجاجات المياه المعدنية التي أملاها، لم أجرؤ على مغادرة
الغرفة حينها، عندما تذهب حيث تشاء وقتها تشاء دون تفكير أو
خوف، عليك أن تحمد الله على ذلك، فكم من نعم لا نُدرِكها إلا
عند فُقدانها، صليت وجلست أقرأ القرآن، ونسيت معنى كلمة
مذاكرة تماما، قرأت سورة البقرة كاملة، أوشكت المياه المعدنية على
النفاذ ففتحت الباب لأذهب إلى الحمام وأجدد وضوئي، فوجدت
هند وليلى تقفان على باب غرفتهما، وياسمين أيضا تقف على باب
غرفتها، من الواضح أننا جميعا فتحنا أبوابنا في نفس اللحظة،
الجميع يريد أن يتوضأ، الجميع يلجأ إلى الخالق، ملامح البنات تُعلن
أن النوم لم يكن زائرا، توجد علامات استفهام وأسئلة في عيني كل
منهن لكنهن لا يتحدثن، توضأت ليلي وهند سويا ثم جاء دوري
أنا وياسمين فتملكتني روح المقاومة والشجاعة فجأة فطلبت من
ياسمين أن تبدأ وسأنتظرها بالخارج، كنت أحس بالأمان المؤقت
عندما نكون جميعا على مقربة من بعض، توضأت ياسمين ثم جاء
دوري لتتظرنني هي بالخارج فلم نكن نغلق باب الحمام بأي حال
من الأحوال!

فتحت الصنبور فوجدت المياه شديدة السخونة حتى أنها
أحرقت يدي وفجأة تحولت إلى جليد من شدة برودتها! لم يكن
سخان المياه يوما هكذا؟ مازلت أتوجع كل وضوء، كلما أدخلت
يدي تحت المياه الجارية أحسست بأيد قوية تُشدها بعيدا، فصرخت.
- آه.. آه..

انتبهت باسمين بالخارج وكأنها تكتمت نفس الشيء في نفسها بعد
أن زادت حدته عن ذي قبل ثم قالت بصوت عالٍ.
- معلى يا مريم، استحملي، وأنا كما أن يا مريم حد بيشد إيدي
ورجلي جامدا

كانت المقاومة حقًا شديدة إلى أن تدخل أيدينا تحت المياه، حينها
تصبح الأمور أسهل، كنت أفكر أثناء الوضوء فيما سأفعله بعد
الصلاة، سوف أغلق غرفتي وأبدأ بالمذاكرة، أريد أن أستجمع قواي
وأحلامي، لا يمكنني المجازفة بسنة من عمري وسنة من قلق أهلي
وجهدهم، نجاحي هو هدية أبي، أريد أن أظل متيقظة أكبر قدر
من الوقت، الوقت الذي لا يرحم ولا يعرف صعوبة الظروف، فقط
يمر ويمر مثل هذا الماء الذي يجري أمامي، غير عابثا بما نحمله
من هموم وأمنيات وخوف، تمنيت لو أن يمر بطيئًا؟ لو أن عقارب
الساعة ترجع إلى الخلف قليلا، أريد أن أستعيد نفسي وعقلي، لكنني
استطعت أن أتغلب على خوفي وأدخل الحمام وحدي.

وفجأة انتظمت المياه على درجة حرارة معتدلة وخفت حركة
الأيدي والأرجل فتوضأت بخفة، كل شيء طبيعي! أترانا نرعب
أنفسنا أكثر مما يجب؟ أم نتوهم كل هذا؟ أغسل وجهي بيدي وأنظر
في المرأة، من هذه التي أراها؟ ما كل هذا الإرهاق! ما هذه الهالات
السوداء العظيمة المحيطة بعيني؟ أغسل وجهي مرات ومرات،
أنظر في المرأة مرات أخرى ربما يذهب هذا السواد أسفل عيني؟
مرة أخيرة أغسل وجهي بيدي الاثنتين ناشدة استرخاء لا أجده،
أنظر في المرأة لأرى يد ثلاثة تغسل وجهي معي!

لم أصدق ما رأيت، اتسعت عيناى عن آخرهما حتى أوشتك
على الانفجار وتحجرت في مكاني، أغمضت عيني وغسلت وجهي
ثم نظرت في المرأة، فلم أجد شيئاً، أغمضت عيني وغسلت وجهي
مرات ونظرت في المرأة فوجمت.

اليد الثالثة مُحضر الماء وتغسل وجهي وكلتا يداى متسمرتان في
الهواء، مازلت في مكاني، قواى تنهار لا تستطيع أرجلي أن تحملني،
ولا تستطيع حنجرتي أن تنطق بهمسة لأنادي ياسمين! مددت يدي
لأتحسس هذه اليد الثالثة الجديدة لأجدها حقيقية! وضعت يدي
بسرعة تحت صنبور المياه الجاري الذي أصبح بارداً فجأة ومددتها
مرة أخرى على وجهي في نفس الوضع لعلى أصبت بالجنون
أو أصاب عيني مرض، لا أرى شيئاً هذه المرة، إنه عقلي الباطن
المريض الذي أتلفته من قلة نومي، الحمد لله لا شيء، لا بد أنه
ضعف إبصار، وأنا لم أنم نوماً عميقاً منذ فترة طويلة، مرة أخرى
أغسل، يدي تحت الماء ثم على وجهي لتصاحب يداى الاثنتين هذه
اليد الثالثة الغريبة من جديد، اليد الثالثة على وجهي تفعل مثلما
تفعل يداى تماماً!

لم أتمالك نفسي، خرجت من الحمام مهرولة لا أستطيع التنفس،
لا تحملني قدماى أسرع الخطى للخارج في هلع هائل، ارتطمت
بياسمين التي كانت مازالت تنتظرني بالخارج، سألتني عن سبب
تأخيري.

- مالك أتأخرتي ليه كل ده؟ شفتى أيدينا محروقة إزاي من
السخان؟ مريم.. ادخلي على جوجل وهاتي دعاء الوضوء، عايزة

أقولك إن حركة السخان دي ما بتحصلش إلا في الوضوء بس!
كده أكيد الجن يا مريم مش عاوزنا نتوضى ونصلى!
لم أرو هذه القصة لها ولا لأي من البنات حينها، كان الحدث
أكبر بكثير من السخان وثقل الأيدي والأرجل، كان فوق الاحتمال،
أخذت قراري وقتها بالوضوء في غرفتي كما فعلت قبل ذلك
بزجاجات المياه المعدنية، بعد أن أحضرت الدعاء أخذنا نرده
سويا لنحفظه، ثم أجهشنا بالبكاء واحتضنا بعض إلى أن انتهينا من
بكاتنا اليأس، صلينا الفجر والسنة، ذهبت ياسمين إلى غرفتها بعد
ذلك وظللت أنا أسبح وأستغفر وأقرأ الأذكار، ظللت أواظب على
وضوئي في غرفتي ولن أتوضأ في الحمام مرة أخرى.

جاء نور الصباح أخيرا وملا الأرض أمانا، لا بد من حضور
المحاضرات، ذهبت إلى الجامعة في حوالي الساعة التاسعة صباحا،
لم أدرك أنني قد أسقط على الأرض أو أستسلم لإغفاءة سريعة في
أي مكان دون وعي بسبب انعدام النوم، بمجرد أن جلست في
«السكشن» ملت براسي إلى الأمام وغطيت في نوم عميق لم أذقه منذ
أيام طويلة، استيقظت على صوت ويد مازن.

- مريم.. مريم.. اصحبي يا بابا.. مالك؟

- هي المحاضرة خلصت؟

- آه خلصت، إنتي من ساعة ماجيتي وإنتي نايمة! إيه الحكاية؟

مارضيتش أصحبيكي.

- كويس إنك ماصحتنيش.

نظر إلى مازن نظرة مليئة بالقلق والفضول، وسألني.

- إيه أخبار الشقة؟

- الشقة باظت خالص يا مازن.

ثم قصصت عليه جميع الأحداث الأخيرة بينما دموعي تتساقط
وأنا أستغفر الله.

- أنا خالص يا مازن خلاص مش قادرة.. مش عارفة أعمل إيه؟

انتابتنى حالة هستيريا وعلى صوت بكائى، جففت دموعي
وأخذت قرار.


- أنا همشي، هي الساعة كام دلوقتي؟ الساعة ٢.. خلاص همشي
في قطر الساعة ٥.

- لأ إنتي جيبي شنطك وتعالى عندي في البيت، والله ما عفريت
إلابنى آدم، أو واحدة فيكم هي اللي فيها حاجة وبتأذيكم.

- بصراحة يا مازن كلهم زى، وشهم زفت، حزين ومهموم
وكلهم مابقوش يدخلوا المطبخ ولا الحمام، كله بيدخل حمامات
المطاعم والجامعة، وكله بياكل دليفري مع إن في أكل كثير في المطبخ،
هو المطبخ ده مسكون، ودايما دلوقتي نسمع كركبة فيه كأن حد بيدور
على حاجة؟ ده بقى عادى جدًا، لا يا مازن كل البنات كدا.

- الامتحانات بتقرب يا مريم مينفعش تسافري دلوقتي خالص،
إنسي الموضوع ده، هقعد أقولك الكلام بتاع كل مرة؟

- لا يا مازن أنا همشي.



«كُنْتُ جالسة في غُرْفَةِ الاستقبال أفكر فيما يحدث ثم سمعت إحدى البنات تُحْضِرُ الطعام، وأثناء ذلك طرق الباب ثلاث طرقات فقمْتُ لأرى من الطارق، فتحت الباب مُوارباً فلم أتبين أحداً بالخارج، فتحتهُ على مصراعيه لأرى من كان يطرق الباب وكأنني قد نُقلت إلى عالمٍ آخر في ثوانٍ معدودة، رأيتني أبحث عن شيءٍ لا أعرفه وألف وأدور في فناء بيتٍ واسعٍ من طابقيين، مزركشة أرضيته بألوان كثيرة متداخلة ومتجانسة بشكلٍ يثير البهجة في النفس، ألوان الحوائط بيضاء وزرقاء زاهية تجعلك على حين بغتة تشعر بالأمل، يغطي الزرع الأخضر والورد أركانها،

كثير من الغرف المغلقة تملأ جوانب ساحة فناءه والتي تزينها نافورة مياه في منتصفها، تُصدرُ خريراً كأنه إيقاع موسيقى فريد، كانت أبواب البيت خشبية بنية اللون طويلة عتيقة شامخة، الشبايك على نفس طراز الأبواب مع اختلاف أماكنها، منها صغيرة الحجم مكانها عالٍ للتهوية، ومنها متوسطة الحجم في مكانها المعتاد، أو على

حسب الاحتياج والرغبة، أما سقف البيت فكان أشبه بالسما في علوه على شكل قبة هائلة، وبينما أتجول في هذا البيت لم أدرك ما أبحث عنه فنظرت إلى السلم الخشبي الذي يقودني إلى الطابق الثاني، عرجت عليه في خيفة وتوجس، فقد حل الليل وانتشر الظلام ولم يكن هناك أحد لأتحدث إليه، في الطابق الثاني كانت أبواب الغرف العديدة كلها مغلقة ورأيت بابا وحيدا كبيرا لغرفة مختلف طرازه عن كل الأبواب.. باب كبير مُنقسم نصفين يُفتح ويُغلق من اليمين ومن الشمال، الباب مفتوح على مصراعيه يصدر عنه ضوء شعاع أبيض خافت، ساقنتني قدماي إليه ونظرت بداخل الغرفة، فرأيت شيخاً مُسنأ يُشع وجهه نورا، ذو لحية بيضاء عظيمة، أطلق شعره الأبيض الطويل على كتفيه في حُرية، وسيم رغم شيخوخته، يرتدي جلباباً أبيض قصير وتحتة سروال أبيض وحذاء جلدي سلس وناعم لونه أخضر فاتح على شكل محذب يشبه البلغة المغربية، على رأسه غطاء أبيض مُتلى من الجانبين.

كان الشيخ يجلس في الغرفة وحده على سرير في منتصف الحجرة مستندا بكلتا يديه عليه، خلفه شبك في أعلى الحائط وهو مصدر الضوء، نظراته حادة وثاقبة لدرجة تخيلت معها أنه ينتظرني منذ فترة ويعاتبني لذلك، كان من الواضح أن الشيخ ينتظر أحدا بالفعل، مع ذلك بدى لي أنه يتسم، عندما هممت بالانصراف من أمامه نادى بصوت عذب تردد في المكان وترك رهبة..

«مريم.. نقاء القلب هبة من الله، والأمانة إما ابتلاء وإما أجر عظيم، بارك الله فيك وعليك»

(٨)

لم أعتد حمل مفتاح الشقة في الفترة الأخيرة لا أعرف لماذا، ذهبت إلى البيت وظلمت أدق جرس الباب لعشرة دقائق كاملة، أين ذهبت البنات؟ هل أتصل بياسمين؟ ربما تظن أنهم من يتصلوا سوف أتصل بليلي، جاء صوتها باردًا.

- ألو.

- إنتوفين؟

- إحنا سافرنا الأقصر!

- يا نهار أسود.. أنتم كلكم؟

- لا.. ياسمين موجودة بس أنا كان لازم أغسل هدومي.

- فتحت ياسمين الباب أثناء المكالمة فانهيت المكالمة مع ليلي.

- معلش يا مريم كنت بصلى.

- طب على صوتك ولا حتى استغفري اقطعي الصلاة إنتي

عارفة مش معايا مفتاح والبنات سافروا.

- إيه ده هما البنات سافروا؟

- أيوه.

- يعني لا قالوا ولا حس ولا خبر! شايفة يا مريم هما بيعملوا كده ليه؟ يعني المفروض نقرب من بعض مش نبعد عن بعض ا وليه هند تقفش مننا كده؟

- كلميهم يا ياسمين واسألهم هما بيعملوا ليه كده؟

- لا مش هكلمهم، ده موقف ناس عايزة تقطع، ولما بتكونى فى الجامعة دايا قافلين الباب عليهم ومش بيكلمونى خالص دلوقتى، وإنتي كمان يا مريم بقيتي عاملة زيم، لو بتعمري بحاجات صعبة أنا بمر بالأصعب والله بس مش بحكي عشان متخافيش أكثر؟

اذن لقد مرت بتجارب هي الأخرى ولم تتحدث عن شيئا؟ كان تخميني صائبا، تكلمت وهي تبكي بحرقة فأحسست بالشفقة عليها مثلما أحس بالشفقة على نفسي تماما، ثم أكملت.

- مريم.. ممكن أسالك سؤال؟ ليه بتقفلى أوزتك بالمفتاح وإنتي خارجة؟

- بصراحة أنا بحس إن أوزتي أكثر أوضة أمان فى الشقة.

- لما هي كده مبتناميش ليه؟

- أنا عارفه بقى؟ أهو إحساس وخلاص، بضحك على نفسي، سيبيني موهومة فيه.

- ربنا يعدي اللي إحنا فيه على خير؟

- طب قومي البسي وتعالى ناكل حاجة برة، أنا هقع من طولي.

كان وقت العصر تقريبا ومن المفترض أن أحضر حقيبتى استعدادا للمغادرة ونسيت ما قلته لمازن، لا أعرف كيف؟ فقط

ذكرتني إشارات الجوع المنبعث من غمي إلى أمعائي، أنها لن تواصل المسيرة إلا بعد أن أملاها شيئا يساعدنا على البقاء، ذهبنا إلى إحدى مطاعم الوجبات السريعة، طلبنا كئماً هائلاً من الطعام على غرار طبيعة الجمال في اجترار الطعام، التهمت هذه كميات وكأني سوف أخزنها كي تساعدني على اجتياز ما يمكن أن أمر به في الأيام المقبلة، سوف أجتز الأكل والنوم والطاقة والتركيز على ما يبدو، بعد أن انتهينا من الطعام خطرت لي فكرة، لماذا لا نذهب إلى أهل الدين بحق، شيخ في جامع، بهذه البساطة، طرحنا الفكرة على ياسمين فلم تمنع.

لكن حار أمرنا بين المساجد، هل نذهب إلى مسجد قريب فيتعرف علينا مُرتادوه من الجيران؟ فنحن المغتربات يعرفنا أهل المنطقة جيداً، حينها لن نسلم من ألسنتهم أبداً، أم نذهب إلى مسجد كبير به كثير من الشيوخ ويقصده البعيد والقريب، في ظل فرص ضعيفة للتعرف علينا، وأخيراً عقدنا العزم على الذهاب إلى مسجد «عبد الرحيم القناوي» وقد كان. مسجد كبير وجميل وتأتي الناس لزيارته من جميع أنحاء مصر، يقع المقام بداخله في غرفة منفصلة، طريق المسجد طويل مملوء بالسيارات والمرئدين من كل البلاد المحيطة.

جاءنا شيخ في الطريق يحمل صندوقاً خشبياً يدعونا إلى التبرع لمعونة الشتاء، كنت قد أحتفظت بجزء من النقود لتوزيعها على الفقراء كصدقة بنية الخلاص مما أنا فيه، فأعطيته بعضاً منها، شكرني مبتسماً وغادر، وزعت باقى النقود على من في طريق الجامع من الفقراء أو المتسولين وما أكثرهم، أثناء ذلك رأيت الشيخ الكبير الذي كنت قد رأيت في منامي سابقاً على بُعد أمتار، لم أصدق ما أرى، إنه هو.

وجهه سمح ومُريح، كان سائرًا بين الناس يتفقد حال المسجد، ثم توقف ورآني فابتسم ابتسامة طويلة واسعة، لكنه سرعان ما توارى خلف جمع الرجال الذين اصطفوا للصلاة، واستحالت الرؤية بيني وبينه، هزت ياسمين ذراعي وقالت.

- مريم.. ياللا تتوضى ونصلي.

توضأنا وصلينا ركعتين تحية المسجد، ثم اتجهنا للمقام لقراءة الفاتحة، فوجدت يافطة مكتوب عليها «وأعبد ربك حتى يأتيك اليقين» مُعلقة أعلاه فبكيت، رُبما علا صوت بكائي وأنا أدعو دُعاء متقطعًا، عندها رآني شيخ كبير وظن أني أفعل ما يفعله البعض عند المقام من استجداء وطلب وساطة حاشا لله، فقال ناصحًا.

- ماتخليش حد بينك وبين ربنا، ادعى ربنا على طول واستغفري

كثير.

كانت ياسمين تجذبني طيلة الوقت من ملابسي إشارة إلى عدم التحدث مع أحد، فقد ظنت أنني لن أملك الجرأة الكافية، ظنت أنني تكلمت عن الرغبة فقط وأن الفعل بعيد لأننا ندرك طبيعة المجتمع الذي نعيش فيه، في جميع الأحوال سيلقى اللوم علينا دون الانتباه للتفاصيل، نفهم بعضنا البعض دون كلام أحيانًا، كنت أعرف أنها لا تريد التحدث مع أحد لكنني تجاهلتها وتعاملت بأنانية رُبما تخلصنا مما نواجهه، فقرررت أن أقص قصتنا عليه طلبًا لمساعدته، لكنني سرعان ما رأيت جفاء يُطل من عينيه.

- انتوا مش قاعدين في المدينة؟ ما تقولوا للمشرف؟

- لا إحننا ماجرين شقة مفروشة.
نظرنه بدت أكثر قسوة وغير متماشية مع ما أقصه، ومع ما يرى
من انكسار واستغاثة من بنات في عمر أولاده.
- وإيه اللي مقعدكوا في شقة مفروشة؟
استفزت إجابته ياسمين فقالت في حدة.
- اللي حصل بقى يا شيخ، عندك حل للى إحننا بنقوله ولا لا؟
فسألني في عدم اكتراث لها.
- إنتي في كلية إيه؟
- حقوق.

- تقولوا لي حقوق وتجارة وآداب! منتظرين إيه يعني من شقة
مفروشة؟ مش عارفين اللي قبلكوا عملوا إيه فيها، ولا يمكن إنتوا؟
شوفي جاين الجامع لابسين إيه؟
دُهشت مما يقول.

- هو ده اللي همك؟
- كنتي دخلتي خدمة اجتماعية في أسوان؟
- يا سلاااام! يعني إنت سبت كل ده، ومسكت في إننا سايبين
بلدنا وفي كلية إيه! مازن كان عنده حق والله.

تركنا المُستشيخ وذهبنا بعيدًا بعد أن واجهنا بنظرة ازدراء أخرى،
وبعد أن منحته نظرة ندم عميقة، للأسف ياسمين مُحقة، لن يصدقنا
أو يفهمنا أحد هنا، أحسست باليأس يدغدغ أطرافى، وأعطيت

الناس الحق في اللجوء إلى أمثال ماهر الدجال، فلا أحد يسمع ولا يوجد رجال دين سمحين بحق، يقدرّون ما نمر به على أغلب الظن، أين ذهبوا؟ كانت ياسمين تبرطم وتلعن هذا المجتمع بعبادته وتقاليده، ومعتقداته التي لا ترحم من هم في ظروفنا، تلعن الحكم على الناس بالأعراف البائدة التي لم يتم منحها شيء من التهذيب أو التطور طوال قرون وعقود، هل تستطيع أن تحكم على بنات تسكن شقة مفروشة من أجل العلم بأى شيء دون معرفتهم؟ هل تجرؤ على الحكم بأى شيء على أي إنسان دون معرفته؟ حتى وإن كنت تملك المعرفة فأنت لا تملك الحكم، لكن دائما ما تأتي إجابة هذا السؤال بنعم في مجتمعنا.

نعم تستطيع إذا كنت فردًا تربي على ذلك في مجتمع تخلف عن العالم، وما زال يُصدر هذه المعتقدات لأجيال قادمة منعزلة عن التطوير الفكري والتفكير السمع، مسحت ما تبقى من دموع ونظرت إلى ياسمين في عناد مفاجئ انتابني.

- ياللا يا ياسمين ندخل الجامع نصلي ركعتين لله قبل ما نمشي.

- مش قلتك ماتقوليش لحد، دول عمرهم ما هيحسوا بينا.

سمعنا نداء الرحمن في أذان العشاء، فدخلنا مرة ثانية وبعد أن انتهينا من الصلاة دخل الهدوء إلى قلبي، في أثناء خروجنا من الجامع رأيت الشيخ الذي كان يجمع التبرعات للشئاء، كان يخرج هو الآخر من المسجد، ناديت عليه وسط رفض ياسمين للمرة الثانية واستعدادها للرد العنيف على أي تجريح من أي مُستشخٍ آخر.

- لو سمحت.. يا شيخ.
- رأى الشيخ وأشار على نفسه يتحقق إذا كنت أقصده هو ام شخصًا آخر.
- أنا؟
- أيوه يا شيخ.. لو تسمع دقيقة؟
- نعم.
- عاوزاك في خدمة يا شيخ الله يخليك.
- قصصت عليه ما قصصته على الشيخ الأول، فلم يستنكر وجودنا في شقة مفروشة طلبا للدراسة كسابقه، ولم نر علامات الاشتمزاز تطل علينا من ملامح وجهه السمحة.
- يا ساتر يا رب، ده أكيد في حاجة في الشقة دي، طب انتوا بتصلوا يا بتي؟
- آه بنصلى والله.
- انتوا كام واحدة؟
- أربعة.
- طب فين الباقي؟ ما جايز هما ولا حاجة الله أعلم.
- مسافرين.
- لا هاتوهم وتعالوا لي هنا، أنا باقى موجود من بعد العصر، واستغفروا ربنا كثير وداوموا القرآن في البيت خاصة سورة البقرة.
- حاضر يا شيخ، شكرًا الله يكرمك... ممكن سؤال أخير.

- خير يا بنتي إن شاء الله.

- في شيخ هنا دقنه بيضا وطويلة ولابس أبيض كده وطويل،
اسمه إيه؟

- دقنه بيضا وقصيرة تقصدي؟

- لا لا دي طويلة خالص، ويلبس زي بُلغة كده وشعره أبيض
عند كفه.

- أنا بقالي فوق العشرين سنة هنا مشفتش شيخ بالموصفات دي.

- أنا لسه شايفاه من شوية هناك كان بين المُصلين بس معرفتش
أروح له.

نظر الشيخ لي ثم بدا كأنه يفكر، ثم لمعت عيناه وقال مستفسراً.

- أسمر شوية ونحيل وطويل؟

- أيوة يا شيخ صح.

- شفّتيه فين؟

- هناك في الساحة كان بيشف على حاجة تقريبا.

- وبتسأل عليه ليه؟

- لأنّي شفّته بمنامي واستغربت لما شفّته هنا.


نظر لي الشيخ بإمعان ثم تبسم.

- حافظي على قلبك نقيًا، صافيًا وعامرًا بالايان، وداومي

الاستغفار يا بنتي، السلام عليكم، ربنا معاكم.

تركنا ورحل، لم أفهم كيف بدا أنه يعرف من أسأل عنه ولم يجب
سؤالي؟ على كل الأحوال كان الشيخ سمحاً ومُتفهماً، انه القاعدة
الشاذة هنا في مجتمع انقلبت معاييره وأصبحت القاعدة الشاذة هي
السائدة والعكس صحيح! مع ذلك بقيت ابتسامة الشيخ المجهول في
ذاكرتي وتمنيت لقائه بشدة.

بمجرد أن دخلنا الشقة أدت التلفزيون على قناة للقرآن
الكريم، ذهبت كل منا إلى غرفتها وحاولت أن أنام لأرتاح ولكني
أردت أن أسمع صوتاً من دمي، فذهبت إلى «السنترال» واطمانت
على شقيقتي «ريهام»، ودخلت غرفتي أحاول النوم، ولم أشعر بشيء
بعدها.



نظرت إليها في حيرة وحاولت أن أتذكر هذه الشوارع والطرق
لعلني أكون في الأصل منها، لكنني فشلت ولم تسعفني ذاكرتي، مشينا
لا أدري كم من الوقت إلى أن توقفت عند دار أثرية كباقي التي أراها،
ذات بوابة كبيرة بيضاوية الشكل بنية اللون، تقبع داخل كم هائل
من الأحجار الصفراء الكبيرة التي أعشقها، يتوسط الباب من الجهة
العلوية مطرقة نحاس قيمة، يعلو الباب بعدة أمتار مشربية كبيرة
منقسمة إلى قسمين، نظرت فاطمة فوق وفتحت الباب بمفتاح كبير
وصعدنا الدرج وهي تحدثني.

- لا داعي للقلق فزوجي جعفر مُسافر إلى القاهرة المعزولم يرزقني
الله بالذرية بعد، الليلة أنا وأنت فقط.

تعجبت من بساطتها وقلت.

- إذا كان أحد لا بد أن يقلق فإنه أنت بلا ريب.

جاءتني ابتسامتها المطمئنة الواثقة.

- «قل لن يصيبنا إلا ما كتب الله لنا».

- هل لي بسؤال آخر وأخير اليوم؟

- تفضلي يا مريم.

- من هو الحاكم في هذا الزمن؟

- كان من المفروض أنا أقلق حقا منك أو عليك، لكن قلبي يحدثني أنه لا داعي للقلق، سوف أجيب سؤالك الأخير يا مريم شريطة عدم مُحاولتك إثارة شكوكي مرة أخرى اليوم على الأقل، إنه العاضد لدين الله.

- العاضد لدين الله، لن أنسى ما حييت ما تفعله الآن من أجلي، أنت طيبة القلب.

- لا تُضحخي الحدث، فما نزرعه الآن سنحصده يوماً ما بلا شك. دخلت المنزل ووقفت أتأمله، ساحة كبيرة بها مشربيات. تلف البيت بأكمله تحتها كنب طيني البنية فوقه وسادات كالسجاد، في المنتصف منضدة خشبية مصنوعة بنفس زخارف المشربيات، تتوسط الساحة نافورة مياه من الرخام الأبيض متوسطة الحجم تقف كعروس ليلة عرسها، تضيء جواراً ناعماً من الصفاء والجمال في البيت، المصابيح غريبة الشكل موضوعة على طوب مبنى في الأركان (عرفت بعد ذلك أنهم يستخدمون الزيت أو شمع العسل لإنارتها) ، هناك على يساري درج طويل من الخشب البني اللون ليصلك بالدور الثاني والأخير من البيت، أشارت فاطمة إلى الغرفة الوحيدة الموجودة بالساحة الأولى إنها غرفتي الليلة لأستريح ثم نظرت لي في تمنن.

- أنت تعب ومرهقة يا مريم، سوف أحضر لك شيئاً تقوتين به، انتظريني.

تأملت البيت وجلست عند النافورة، أخذت أضع يدي تحت

مانها ثم أمسح به وجهي وعيني، ثم أتأمل البيت تارة أخرى، بعد قليل أحضرت فاطمة قدّران من الزجاج، القدر الأكبر به شيئاً أبيض يشبه العجين والآخر به حلبة ولبن وتمر، عرفت الحلبة من رائحتها المميزة رغم اختلاط ألوان القدر، قالت في فخر وكرم.

- لقد جلبت لك تلبينة وغُرَيْقة لأنك لست على ما يرام يا مريم، أريدك أن تأكلي حتى تشبعي ثم تخلدي إلى النوم.
- شكراً لك.. سوف أفعل إن شاء الله.

- لا تفكري في شيء يعكر صفو روحك، لا تدعى آلام الدنيا وأحزانها تأكل من عقلك، وتذكري أن كُل إلى زوال، وأن لا شيء باقٍ معها طال عمره، فانعمي بعيشك الآن وسلمي الأمر للواحد القهار، طابت ليلتك يا عزيزتي.

أحسست بسلام يملأ روحي وأنا أرد ابتسامتها أثناء مغادرتها لتنام، هذه السيدة تأمن الغرباء في بيتها وهي بمفردها لكنها تُسلم الأمر كله لله، لم تسألني كثيراً من أين جئت وإلى أين العزم، فقط أحست بوجع نفسي فأشفقت على ولم تساهم في إرهابي، يا لك من ملاك يا فاطمة، لا أعرف كيف أرد لك الجميل.

أكلت حتى امتلأت، الطعام طيب وشهي لم أذق مثله من قبل ثم دخلت إلى الغرفة، اتكأت على السرير ومنعت عقلي من التفكير، بعدئذ شرعت في قراءة آية الكرسي ولكنني لا أتذكر هل أكملت أم غُصت في نوم عميق.

(٩)

جاء أذان الفجر فانتبهت إلى الصوت المُدوي عبر الميكرفون «الله أكبر» فانفتحت عيني تدور في أركان الغرفة رُغمًا عنها، إنها غرفتي بشقة فنا، لم يحدث شيء؟ أم حدث في غفليتي؟ أين أنا؟ بالتأكيد فقدت عقلي وأصبت بلوثة وهلاوس، أخذت أردد «بسم الله الرحمن الرحيم» عدة مرات وأنا أتلفت يمينا ويسارا لأتأكد أين أنا، حسب التوقيت لسنة ١٤٣٣ هجرية - ٢٠١١ ميلادية فأنا قد نمت نومًا عميقًا لمدة ثلاث ساعات كاملة فحمدت الله على ذلك، بدأ عقلي في استرجاع كل الأحداث والبنات وتذكرت أحداث الشقة وأني لا أقرب الحمام فقممت لأتوضأ في الغرفة كما تعودت في الفترة الأخيرة، كانت زجاجات المياه تنفذ مني دون أن التفت إلى عددها الذي بات كبيراً، توضأت وصليت الفجر ثم تنفيذاً للوعدي مع نفسي قرأت سورة البقرة كاملة.

أخذت جهاز الحاسب المحمول وفتحت الانترنت، وذهبت أبحث عن سنة ٥٥٥ هجرية - ١١٦١ ميلادية، يا ربى ما هذا؟ إنه الخليفة الفاطمي العاضد لدين الله أبو محمد عبد الله بن يوسف بن الحافظ لدين الله، وُلد حسب رواية المقرئزي يوم الثلاثاء لعشر من المحرم سنة ٥٤٦ هجرية وبُويع لثلاث عشرة من رجب سنة ٥٥٥ هجرية وعمره يومئذ تسع سنين.

أنا لم أحفظ الأسماء التاريخية يوماً في حياتي بعد أن ينتهي اختبار مادة التاريخ بالمدرسة، لم أسمع هذا الاسم قط، ولم أقرأ عن هذه الحقبة التاريخية ولم أدرسها، ولا أدري عنها شيئاً إلا ما قد يأتيني صدفة في عمل فني أو حتى في إحدى المجلات، من أين أتى عقلي في هذا الحلم العجيب بهذه الأسماء؟

بحثت عن «سيدي عبد الرحيم القناوي أو عبد الرحيم القناوي» وهو عالم الدين والتفسير الإسلامي المغربي الأصل، «السيد عبد الرحيم بن أحمد بن حجون وينتهي نسبه إلى الإمام الحسين بن علي بن أبي طالب، ولد في ترغاي من مقاطعة سبتة في المغرب الأقصى وذلك في الأول من شعبان سنة ٥٢١ هـ/ ١١٢٧ م، إذن كان مغربي الأصل!

توفي الشيخ عبد الرحيم القناوي يوم الثلاثاء ١٩ صفر سنة ٥٩٢ هـ الموافق ٢٣ يناير ١١٩٦ بعد صلاة الفجر وعمره ٧١ عامًا، قضى منها ٤١ عامًا في الصعيد، إذن قد ذهب إلى قنا آتياً من الحجاز في نفس السنة حقيقة كما قالت خولة! جاء وهو في الثلاثين من عمره تقريباً!

جلست مكان صلاتي على الأرض أحاول أن أفهم، ما هذا الحلم العجيب والذي بدا كأنه حقيقة، وكل تلك المعلومات التي تبدو صحيحة! أكاد أجن، ما هذه الرؤية الذي أكلت فيها وأكاد أحس بنكهة الطعام في فمي، حينها أحسست شيئاً ما بين ضروسي فتحسسته بلساني وأخرجته من فمي فإذا بي أرى بقايا تمر! ما هذا الذي يحدث معي؟ أنقذني يا رحمن..

يا مُغيث أغثنى.. يا مُغيث أغثنى.. يا مُغيث أغثنى.

كانت الساعة الثامنة صباحا عندما دق جرس الباب، حاولت جاهدة أن أكون طبيعية لئلا يلاحظ أحد شيئا فقممت لأفتح، وجدت ليلي وهند قد أتيا أخيرا، فقلت بتهكم واضح.

- انتو جيتوا.. انتو اركبتوا إمتى عشان توصلوا دلوقتي؟

أجابت هند.

- صحينا الفجر عشان نركب ٧ الصبح، دى ليلي عندها « جمال

إبراهيم» النهارده.. إنتي عارفاه صعب إزاي؟

أشرت إلى ليلي في حنق وسألت هند.

- وهي مابتكلمش ليه؟

نظقت ليلي في بؤس.

- صاحية من النوم بدري وكنت نايمة متأخر.

- وإزاي تسافروا من غير ما تقولوا لياسمين؟ مالكووا يا جماعة

واخذين جنب ليه؟

تكلمت هند بشيء من العصبية.

- ولا مالنا ولا حاجة الامتحانات على الأبواب.

- بس برضه يا جماعة إحنا مع بعض في الشقة، مش كان المفروض

تقولوا إحنا مسافرين؟

هنا فتحت ياسمين باب غرفتها وأتت إلينا مُعلقة.

- إنتوا جيتوا؟

تبسمت هند وتكلمت بلهجتها الصعيدية.

- آه جينا، والمرة دي مش جايبة معايا لقمة أكل، مش حاطة حاجة في الثلاجة العجيبة دي!
أردفت في غيظ وتساؤل.

- أنا مش فاهمة إحنا إزاي بنتعامل مع الشقة دي! أنا كل يوم أقول هسافر ومش راجعة تاني ومش بقدر مش عارفة ليه! هي الساعة كام دلوقتي؟
أجابتنى هند.

- الساعة ٨ ونص.

- يسيه.. طالما فات قطر ٦ و٧ الصبح يبقى لازم أستنى ٥ المغرب، الميكروباص من هنا لأسوان زحمة وحوادث مش ناقصة وبعدين مينفعش أدخل على أهلي في وقت متأخر، يارب هون... إلا صحيح هو إنتو ما بتمشوش ليه؟
عادت هند لبرودها من جديد.

- يا بت سيبك يا بت من الهبل ده.. دي حاجات عادى على فكرة، في إيه في الشقة يخلينا نمشي يعني؟
- بتقولي في إيه؟

كنت على وشك أن أحكي كل ما حدث معي لكن تراجع، نظرت ياسمين إلى هند نظرة لم أستطع أن أقرأها، نظرة «لاعب البوكرة»، نظرة جامدة للملامح يصعب قراءتها، على العموم كانت

نظرة لم تعرفها هند أي اهتمام، ضحكت الأخيرة في استخفاف وقالت
بلهجة صعيدية أحفظها.

- يا بت إنتي شوفتي إيسيه؟ دي حاجات بسيطة.

أردفت ليلي باستهزاء وشك.

- بيهزروا معنا يا مريم، يعني فيها إيه لما تلاقي البيسي ناقصة

وبعدين تتملي؟

أدركت ما تقول ولم يكن قد وصل لعلمي إلى تلك اللحظة،

فقلت بذهول.

- إيه ده؟ هي إزازة البيسي اتملت تاني كمان؟

نظرت ليلي إلى هند وكأنها بُهتت، وصلني إحساس الشك في

نبرة صوتها وكأنها كانت تتهمني في نقصان وملء زجاجة المياه

الغازية، وكأنها تمت بداخلها أن أكون أنا الفاعلة، أكملت حديثي.

- انتو عارفين إيه أكثر حاجة مُرعبة هنا؟

تساءلت هند.

- إيه؟

- أنتم.. ردود أفعالكم مُرعبة أكثر من اللي بيحصل.

دخلت غرفتي بعدها مباشرة وتحدثت إلى نفسي بصوت عالٍ

«شكل كلام مازن صح، دول بنات غريبة»، أحسست باحتياجي

الشديد إلى صديقتي الوحيدة التي تحسني وتفهمني.. أختي ريهام.

- ألو.. أيوه يا ريهام

- أوبة يا بنتي عاملة إيه؟

- أنا تعبانة قوي ومش بنام خالص.

جاء صوت ريهام مُستخفًا.

- ليه يعني مقطعة نفسك مذاكرة؟

- ريهام.. بتحصل حاجات غريبة في الشقة، الشقة فيها جن..

لابسني.. لابس واحدة فينا؟ أنا أو البنات؟ معرفش فيه إيه؟

وللمرة الألف بدأت أقص التفاصيل بدءاً من تقطيع حذائي وحتى الآن، لم تُعلق ريهام ولو مرة واحدة حتى أنني مرات كنت أتحقق من أنها ما زالت على الخط، بعد أن توقفت على الكلام أحسست بأحتي تريد أن تطير وتخطفني مما أنا فيه إلى بيتنا بأسوان مباشرة، صرخت في لهفة.

- إنتي إزاي قاعدة عندك يا مريم؟ من أول مرة حصل فيها حاجة

كده إزاي لسه قاعدة؟!

- معرفش يا ريهام معرفش! وبعدين مواعيد القطر.....

- يا ستي اركبي تاكسي ولو مش معاك فلوس كفاية إحنا ندفع

هنا!

- بس يا ريهام ماتجيبيش سيرة لماما؟

- إنتي يا مريم يا بتهزري يا مش فاهمة الكلام اللي بتقوليه ده قد

ليه كبير وخطير؟

- بس ما تقوليش لماما؟

- مش هتكلم دلوقتي بس لو ماجيتيش على طول هقول للبيت كله.

- لا أنا جاية.. إزاي راحت من بالي فكرة التاكسي دي؟ بس أنا خايفة ياريهام من الناس دي.

- ناس مين؟

- اللي حواليا، أنا بقيت أحس بيهم في كل مكان حتى في الوضوء! دلوقتي بقيت أتوضأ في الأوضة.

- تعالي بسرعة بقولك.. وهي فين ياسمين؟ مبرجعش ليه هيا كمان؟ إنتو يا جماعة بتكلموا جد في اللي بيحصل ده؟ إزاي مبرجعوش!

- ياسمين زى تمام إحنا فعلا مش عارفين ليه مش بنرجع! كأننا مربوطون في المكان، أنا هروح دلوقتي أجيب ورق مهم جداً وهاجي، حتى لما تيجي أيام الامتحانات هقعد عند سمر بس مش جاية الشقة دي تاني، أنا هنزل أروح السكشن دلوقتي.

- طيب طمئيني وقولي هتعملي إيه يا مريم.

- حاضر.

تحسنت حالتي النفسية تحسنا نسيباً نتيجة الفضفضة مع ريهام، فهى دمي الذي يجري في عروقي، وسندي الذي لن يُجيب ظني أبداً، ذهبت إلى الجامعة ولأول مرة منذ فترة أستشعر ذهني حاضر، قابلت سمر وسارة وشكرتهما على مساعدتهما وطمأنتهما قائلة.

- أنا ماشية النهارده يا بنات.

- له يا شيخه؟ ده كتاب القانون التجاري صعب ومش متعرفي
تذاكره وحدك.

كانت سمر تكن لي إخلاصًا حقيقيًا.

- معلىش يا سمر، لو فيه حاجة هبقى أتصل بيكوا تفهموهالى
على التليفون.

أردفت سارة في صدق.

- والله أحسن يا مريم، مهما كان الواحد في بيته ووسط أهله
أحسن، مهما كانت المادة صعبة هتبقى سهلة إن شاء الله، أحسن من
الغربة والبهدلة، امشي يا مريم.. امشي، إنتي شكلك متضايق وبتقولي
عندك مشاكل في البيت خليكى قريبة منهم.. ربنا معاكى.

أعلم إحساس سارة بما لم أقصه عليها، حملت نظراتها وتشجيعها
لمغادرتي وعقدت العزم، ربما هي رسالة الله لأغادر دون انتظار،
أحسست براحة مضاعفة مفاجئة، وانفتحت شهيتي التي فقدتها
لأيام طويلة، ثم أوصيت البنات أن يرسلوا لي أي أوراق مهمة في
هذه الأيام الحرجة بالقطار كما تعودنا دائمًا.

في الساعة الثانية ظهرًا رجعت إلى الشقة لأرتب حقيبة سفري،
سوف أسافر اليوم إن شاء الله، أما ياسمين فلها كامل الحرية في أن
تأتي معي أو تمكث وتتحمل، ضغطت الجرس فلم يفتح أحد لدقائق
ثم سمعت خطوات مُسرعة، كانت ياسمين تفتح الباب بسرعة تتأكد
من الطارق وتهرول إلى الداخل في هلع، دخلت وأغلقت الباب
ورائى أتساءل ماذا بها؟ باب غرفتها مفتوح، دخلت إلى غرفة هند

وليل في توجس، لأجدها وليل جوار هند التي ملأ جسدها عرق
غزير وتلونت بشرتها باللون الأزرق، كان الجسد يحنض، وقفت
ياسمين في حالة خوف وقلق، وليل لا تدري ماذا تفعل! سألتها في
ذعر.

- في إيه؟

ياسمين تندب وتقول.

- تعالي شو في اللي حجت بيت ربنا عملت إيه؟

- في إيه؟

- هند انتحرت!

- إيه!!!

- عشان أبو هيثم مش راضي بجوازهم.

انتابتي حالة ذعر شديدة، ما هذا الذي يحدث؟ ماذا لو ماتت؟
كيف تفعل هذا بنفسها وبأهلها وبنا؟ ولكنني تذكرت.. على الرغم
من أن هند تعرفت على «عمر الشافعي» الضابط قبل ذلك، إلا أنه
لا أحد بضامي «هيثم» عندها، هيثم قصة حياتها، جمعها الحب منذ
ثلاث سنوات، تعرفت إلى أهله وتوددت لهم وعاملتها أمه كصديقة
على الحياد، لكن أحلام هند تجاوزت حدودها واطمأنت إلى أن
زواجها من هيثم أصبح مسألة وقت، يبدو أن وقع الصدمة شديدة
عليها الآن من أناس عرفتهم جيداً لمدة ثلاث سنوات كاملة، الصدمة
الآن صدمتان: صدمة الحبيب المتخاذل وصدمة الأهل المنافقون،
تساءل عقلي كيف انتحرت؟

- انتحرت إزاي؟
- شربت دواء الضغط بتاعك كله!
- بتاعي أنا؟
- آه.
- إزاي وأنا باب أوضتى قفلاه والمفتاح في شنطتي؟ أنا متأكدة إنه كان في الأوضة!
- مش وقته يا مريم هنعمل إيه؟
- طيب نقلها المستشفى.. يا نهار أسود.. البنت بتموت.
- هيطلبوا كارنيه الجامعة وهتبقى فضيحة ومش هيعدوها على خير.. ده انتحار يا مريم.
- تدهورت حالة هند من سيع إلى أسوأ خلال مناقشتنا وازداد نوترنا، صرخت فيهن.
- يعنى هنسيبها تموت يعني؟ إحنا نقول إن كان عندها هبوط فكثرت الجرعة بتاعة الدواء ومكتتش واكله.
- أخيراً نطق ليل.
- لا يا جماعة بلاش نكدب، الموضوع ممكن يبقى فيه سين وجيم، تعالوا نشوف حد من البلد نفسها يودينا؟
- أشارت لي ياسمين لتتحدث على انفراد فذهبت مسرعة إليها.
- تعالي عايزاكي في موضوع، إيه رأيك نجيب عمر يوصلنا المستشفى؟

- يا سلام؟ ولما هند وليلى يشوفوه، يعرفوا إنك بتكلميه دلوقتي؟
- هند أصلا كانت بتضحك عليه في اسمها وكل حاجة، وأنا
هارسيه يناديه باسمها اللي قالتله عليه، وكمان هي متعرفش إني أعرفه
وأهي فرصة بالمره تعرف؟

- طب والله فكرة وبالمره تعرف وهو أصلا مش فارق معاه،
ومابقاش يكلمها من ساعة ما فتح الطريق ضاع منها، بس هي
دلوقتي يا حبيبتى مش حاسة بحاجة.

تذكرت حجاب فتح الطريق الذي صنعه ماهر والذي فقدته
هند، هل وجدته ياسمين؟ هل سرقته؟ هل نتأثر بهذه الأفعال حقا؟
أم أنها أوهام؟ قاطعتنى ياسمين.

- لما تفوق هتعرف أنا همدخل أقولهم.

اقتربنا من هند التي أصبحت شبه جثة تتنفس وتنظر إلينا ولا
تتكلم، ليلي تجلس بطرف السرير تحاول اجهاض دموع باحثة عن
طريقها.

- أنا عندي واحد صاحبي ضابط اسمه عمر يوصلنا المستشفى؟
قالتها ياسمين بجزأة تُحسد عليها، أردفت ليلي بصوت خافض
ودهشة.

- يا نهاري هتعملي كده؟

- آه هعمل كده.

على صوت ليلي في قصد.

- لا يكون هو اللي عرفتيه قبل كده يا هند؟

كانت هند تفقد وعيها ثم تستعيده في وهن، اتصلت ياسمين
بعمر وأخبرته، لم يتأخر عن مساعدتنا ووعدنا بالوصول بعد عشر
دقائق، أدركت الموقف وقاطعتهن.

- باللا يا ليلي قومي البسي.

- لا ياسنى مش رايحة ده انتحار.

- نعم!! طيب على الأقل مش أحسن ماتقعدي وحدك هنا؟

- لا يا مريم أنا قاعدة.

لم تكن ليلي تريد أن ترى عمر بصحبة ياسمين، فلماذا لم تكن هي
من الأساس؟ الغيرة اللعينة، لم أفهم كيف لها أن تتحمل مجالسة من
في الشقة وتترك صديقتها في موقف كهذا! جاء عمر في ميعاده كما
وعد، خرجت أنا أولاً بينما خرجت هند مستندة على ليلي وياسمين
في حالة يرثى لها، وأنا عمر فقام لتحيتنا.

- إزيك يا مريم عاملة إيه؟ ألف سلامة عليك يا هند ولا أقول

يا مي؟

سمعت هند نبرة صوته واسم «مي» وأسود وجهها أكثر،
وسمعناها تبرطم «ده هو.. يا نهار أسود»، سألنا عمر.

- نروح الهلال الأحمر ولا المستشفى العام؟

لم نجبه لعدم خبرتنا في هذه الأمور بقنا، اتصل بزميله في العمل.

- الو.. باشا.. بنت خالتي صاحبها تعبانة شوية، نروح الهلال

الأحمر ولا المستشفى العام؟

أنهى عمر محادثته وقد عزم الأمر.

- هنروح المستشفى العام.

وصلنا المشفى ودخلت هند مستندة على عمر وياسمين، بينما ظللت أنا بالخارج، لم أستطع أن أتحمك بأعصابى، بعد مرور خمس دقائق أتاني دكتور من المستشفى.

- لو سمحتى كارنيه الجامعة بتاعها؟

- معلش إحنا نزلنا بسرعة مش معانا الكارنيه بتاعها.

- طب ممكن الكارنيه بتاعك إنتي؟

- طب ممكن ثانية واحدة؟

ذهبت إلى عمر الذي كان بصحبة ياسمين وهند فتأديت عليه.

- عمر.. تعالى.

- في حاجة؟

- الدكتور عاوز..

- عاوز فلوس؟

- لأ عاوز الكارنيه بتاعها.

- إيه الهبل ده.. هو فين؟

ذهب إليه عمر.

- محتاجين الكارنيه لو سمحت؟

- خد الكارنيه بتاعي.

- مينفعش يا باشا أنا لازم أعمل إثبات حالة.

- ليه؟ هي واحدة مخدرات ولا على وشها مطوة؟ واحدة ضغطها
واطى إيه المشكلة في ده؟

- ده إجراء روتيني بس.. إحنا متعاقدين مع الجامعة وبنقدم
تقرير سنوي وبندي للطلبة خصم هنا عشان المستشفى الجامعي
قلت خلاص، فلازم آخذ كارنيه.. أحجز باسم مين؟

تأني ياسمين مسرعة: «الحقوا لازم يعلقوها محاليل»، أردف عمر.
- احجز باسمي أنا.

- مينفعش يا باشا والله.

نظر عمر إلى الدكتور وكظم غيظه ونادى علينا.

- يا مريم.. يا ياسمين.. هاتو هند بسرعة والله لأروح الهلال
الأحمر ووظف في أم المستشفى العام، هادف التكاليف كاملة أنت مال
أمك أنت، مش عايز خصم، مش فاهم أنا يعني.

حالة هند في تدهور أكيد ومستمر، ونحن في قلق متصاعد،
أردفت ياسمين.

- أنا عمري ما شفت بلد زي دي؟ البنت بتموت مننا، كنت
قلتلهم قرابيك وخلاص، مش لازم تقول طلبة جامعة، البلد
دي ماورهاش غير تعقيد الأمور، نخرج يتكلموا علينا، نضحك
يتكلموا، نلبس يتكلموا! حتى لما نعيانموت يعني؟

لم يعلق أحد، وصلنا إلى الهلال الأحمر في تمام الساعة الخامسة
مساء، مستوى النظافة عندهم أعلى بكثير من المستشفى العام، دخل
عمر قبلنا وتفاهم معهم أولاً، جاء عمر ومعه اثنان من التمرجية

ونقالة لأخذ هند، كانت قد فقدت وعيها في هذه المرحلة تمامًا،
أعطانا عمر ارشاداته.

- لو حد سألكم على حاجة ماتردوش.

بعد دقائق خرج الطبيب متوترًا بعد أن عاينها.

- لا يمكن ده يكون ضغط طبيعي أبدا، دي واخدة حاجة، انتوا
فعلا أنقذتوها، ده في الآخر مكنتش لاقى نبض أقيسه!

ظلت هند فاقدة الوعي لفترة ليست بقليلة، ثم علقوا لها المحاليل
المطلوبة، خرج الطبيب لسؤالنا.

- هي أصلا عندها ضغط يا جماعة؟

لم يجب أحد منا على الاطلاق، كنا في شدة التوتر، كرر سؤاله في
تعجب.

- عندها ضغط يا جماعة؟

تبرعت بالاجابة.

- هي يا دكتور حسست بهبوط راحت أخذت نقط Effortil بس
يظهر إنها كترت الجرعة شوية.

- إزاي ده؟ هي أي حاجة تتأخذ وخلاص! انتوا شكلكم متعلم!
إزاي كده بس؟

تركنا الطبيب وذهب إلى حيث وجهته ثم ذهب وراءه عمر
للإطمئنان ودفع المصاريف، كانت هند في غرفة منفصلة تغذيها
المحاليل اللازمة، رأيت ياسمين تجلس على الأرض في ذهول،
فجلست على كرسي بجانبها أبكي، تساءلت ياسمين.

- هو إيه اللي بيحصلنا ده؟
- مش وقت ندب يا ياسمين.
- إزاي يعنى هند تتحر ومين اللي جاب الدواء بتاعك بره يا
مريم ومين اللي خلاها تعمل كده؟
- هي كانت بتقول دايبا ده اللي بيحصل ده ولا حاجة وبتستهزئ
بيهم.

- صح يا مريم صح، زى ما يكونوا بيوروها ممكن يخلوها هي
بنفسها تعمل إيه في نفسها، وبإيه؟ بالدوا اللي كان في أوضتك امين
طلعه؟

اتصلت ريهام فأجبتها على الفور.

- أيوه يا ريهام.

- إيه يا مريم مجيتيش ليه؟

- هند تعبانة قوي.

- إنتي بتستهيل بقى؟ يبقى مفيش حاجة بتحصل، كل شوية
بحجة ولا إيه؟

لم أجبها ولم أتمالك أعصابي فأغلقت الهاتف في وجهها، تذكرت
ياسمين شيئاً فقالت.

- على فكرة أختك كلمتني النهارده وأنا مردتش.

- أصل أنا حكيتها النهارده يا ياسمين، أنا هكلم ليلي.. هي إزاي
قاعدة كل ده وحدها في الشقة؟

- ليل.. دى البت دي طلعت إيه؟ بس لما نفضى يا مريم.. أنا
شاكة إنها سبب كل اللي بيحصلنا ده.

- يا سلام؟ عرفتي إزاي؟

- بتشوفي جراتها وإزاي قادرة تقعد في الشقة لوحدها؟ ده حتى
ماهر الدجال اللي رحاله ما عرفلهاش أول من آخر!

كالعادة لا يوجد دليل قطعي ضد أي منا، مجرد أقاويل
واستنتاجات ولا أدلة، اتصلت والدة هند بهاتفها فلم نجبها، اتصلت
بهاتفى فلم أجبها أيضًا، أخيرًا أجابت ليلى على اتصالنا..

- أيوه يا ليلى.. إنتي فين؟ إنتي ليه مش بتسألني علينا؟

- أنا رحت لأصحابي في السكن بتاعهم.

- طيب مش تعدي علينا وتشوفي إيه اللي جرى معنا!

- يعنى هيحصلنا إيه أكثر من اللي بيحصلنا؟

- لا وإنتي متأثرة قوى من اللي بيحصلنا، عموما إحنا بس مش
عارفين نقول لأهلها ولا لأ؟

- لا طبعًا، أوعوا تقولوا لأهلها، الدكتور قال إيه؟

- لسه مش عارفين.. الحالة مش مستقرة، خدي معاكي ياسمين..

ثوانى

أشارت إلى ياسمين أنها لا تريد التحدث معها.

- مش عارفه راحت فين كانت لسه جنبى لما تيجى هكلمك.

- طيب باى.

- باي.

نظرت ياسمين في تعجب.

- إزاي يعنى عاملة صاحبته ورايحه جاية معاها وشوفي أنا وإنتي
اللي واقفين ومتصدرين لها!

- والله كتر خير عمر يا ياسمين، إحنا من غيره مكناش عارفين
منعمل إيه؟

- Hero مش كده؟

- آه ياختي Hero! وده وقته إنتي كمان؟

ظل عمر يجيء ويذهب ما بين الطبيب ودفن مصاريف وشراء
أدوية ومحاليل وأخيرًا جاء إلينا.

- ياللا يا بنات قوموا روحوا إنتو وأنا قاعد جنبها.
استنكرت ما يقوله.

- لا يا عمر إحنا بايتين معاها.

- طب ياللا نروح ناكل حاجة، هي كده كده نايمه مش حاسة
بحاجة.

تذكرت الطعام.

- أكل.. يااااااه والله الواحد نسي شكل الأكل ده.

كان عمر يعلم تطورات الأحداث معنا من خلال ياسمين، نظر
إلينا وكأنه تذكر شيئًا.

- تعالوا هنا بقى، هو الكلام اللي بتقول عليه ياسمين ده يحصل
بجد؟ ولا إنتو بتستهبلوا؟

- لا والله يا عمر.. أنت ماتعرفش حاجة، أنا لا باكل ولا بانام
ولا بذاكر ولا أي حاجة! وكل ما أنوي السفر تحصل حاجة، إمبراح
كانت زيارتنا للجامع والنهارده هند واللي حصلها، وهكذا لازم
يفوتني القطر بالرغم إن موضوع سفري مش بيروح من بالي، حاسة
إني مربوطة مكاني عشان مسافرش! مش عارفة ليه حاسة كده! مش
هتفهمني أنا عارفة، بس أنا هتجنن يا عمر.. هتجنن.

- والله ما عفريت إلا بنى آدم، تلاقيهم هند وليلى اللي بيعملوا
فيكم كده؟ طب تفسري بإيه بعدها عنكم الفترة اللي فاتت؟ وشوفي
سبحان الله محدش وقف مع هند غيركم!

- طب ما تجيب لنا شيخ يقرأ قرآن في البيت يا عمر؟
نظر لي نظرة سريعة كلها استخفاف ثم أخذ يضحك بصوت
عال، بعدها بثوان نهض من مكانه واقفًا.

- أنا هاطلع أجيبلكم عصير.
في هذه الأثناء اتصلت والدة هند على هاتفها فلم نجب، اتصلت
بهاتفى فلم أجب للمرة الثانية وأحسست بارتباك شديد، رجع عمر
حاملًا العصير لثلاثتنا، فلمح التوتر على وجهي وسألني.
- مالك؟

- أم هند عمالة تتكلم مش عارفة أرد ولا لا؟
- طبعاً ردي.. قوليلها نايمه.

اتصلت بها من هاتفني.

- أبوه يا طنط... عاملة إيه، معلش كنت في الحمام مسمعتش

التليفون.

- أبوه يا مريم، ليه ماكلمتنيش هند؟

- هي نايمه يا طنط دلوقتي عشان بقالنا فترة مش بنام كويس من
المذاكرة، فتلاقي نومها ثقيل حبتين، هخليها تكلمك أول ما تصحي.
سكتت والدة هند وكأنها غير مقتنعة بما أقول ثم تحدثت.

- طيب ضروري تخليها تكلمني يا مريم.

أنهيت مكالمة والدة هند وأنا أحد الله أنها لم تطل أكثر من ذلك،
أمله عدم ملاحظتها ارتباكي، ربما أحست شيء غير طبيعي، أتراها
تشعر بابتها؟ هل تشعر أمي بي إذن؟ هنا خرج الطبيب علينا
منفحصًا وجوهنا.

- مين فيكم مريم؟

- أنا.. في حاجة يا دكتور؟

- تعالى كلميها، عايزة تشوفك.

دخلت لأرى هند، وجه شاحب هزيل على رأس جسد لا يختلف
كثيرًا عنه، وقد تحول إلى هيكل عظمي بارزًا من تحت الغطاء في
غضون ساعات، تنظر إلى في امتنان من خلال عيناها الجاحظتان،
ابتمت وأمسكت يدها مداعبة.

- سلامتك يا هنوود.

- الله يسلمك.. مين بره؟
- عمر وياسمين.
- فين ليل؟
- ليلي مجتش أصلاً.
- حتى لما لقيتنا اتأخرنا كده؟
- بس يا هند أنا مش عايزة أنكد عليك، خليكى إنتي بس في نفسك الأول.
- غمغمت هند.
- صح والله على الأصل دور.
- لم أريد أن أثقل عليها، كفاها ما هي فيه وما سوف تلاقه من تأنيب ضميرها بعد ذلك، جلست على المقعد الوحيد بالفرقة بجوارها تمسكة بيدها أشد من أزرها، سألتني.
- هو عمر عرف إيه اللي حصل؟
- ماتشغليش بالك إنتي دلوقتي بأى حاجة، ربنا يقومك بالسلامة.
- أنا مش عارفة عملت كده إزاي؟ ده أنا كده حجتي راحت استغفر الله العظيم.. استغفر الله العظيم، ياللا نطلع يا مريم أنا بقيت كويسة.
- لما نشوف الدكتور هيقول إيه، إلا هو إنتي صحيح جبتي الدرا بتاعي إزاي؟

- لقبته عندي وكنت بعيط مكتتبه وعقلي صورلي كده هرتاح.
- ده مش عقلك ده شيطان، الدوا أنا قافلة عليه بالمفتاح في ارضتي ارحمك يا رب.
- نركتها وغادرت الغرفة، رأني عمر فسأل.
- فيه حاجة ولا إيه؟
- لا أبدا بتطمئن بس وعاوزة تخرج.
- على فكرة الدكتور قالى ممكن ساعة ونروحها، بس يطمئن إن الحالة استقرت، بس هي محتاجة عناية وغذاء كويس جدًا.
- ماشي نرجع وأنا ممكن أخذها عندي في الأوضة وأراعيها أحسن مراعية، لكن دخول المطبخ مستحيل.
- نظر عمر بعينه إلى السقف في ياس.
- بيسيه، خلاص يا ياسمين أنا هاجيبها أكل وإنتي اعمليه.
- ما إحنا عندنا أكل يا عمر، هما بياكلوه، مش هيسيوه، بيتحمر ويتاكل!
- أردفت ياسمين.
- أول ما نروح شغلى قرآن في الصلاة بره.
- زفر عمر متأففا.
- عايشين في خزعبلات إنتوا.
- كان عمر ولا يزال مقتنعًا بعدم مصداقيتنا، وأن كل ما نقصه من وحي خيالنا، انه مجتمع الصعيد الذي يؤمن بالخرافات وأعمال

الذجل والسحر والشعوذة، قصص اختلقناها فصدقناها كما يعتقد هو.

أشارت عقارب الساعة إلى الحادية عشر مساءً، مرت الساعة في سلام واستقرت حالة هند، حمدنا الله على عدم فقدانها كما كان وارد حسب قول الطبيب المعالج، في طريق عودتنا إلى الشقة كان عمر يتكلم معنا جميعاً محاولاً تخفيف ما مررنا به من معاناة وخاصة هند، أخذ يداعبها حتى اقتنص منها ابتسامات حقيقية متفرقة وممتنة أيضاً، أوقف السيارة أمام أحد السوبر ماركتات واشترى لنا كثيراً من العصائر والمياه والطعام الجاهز، إلى أن وصلنا أخيراً.. نزلت هند مستندة على ياسمين وعلى وعند مدخل العمارة نادى عمر.

- مريم، تعالى.

- أيوه يا عمر.

- خدي آية الكرسي دي خليها معاكي هتحميكي، ولو في أي حاجة حصلت كلموني.

كانت سلسلة من الفضة بها آية الكرسي، نظرت إليها في إعجاب، وإليه في فرح وشكر، وتساءلت «هل صدقتي عمر؟» ربما.. فرحي بالسلسلة لم يكن فرحاً بهدية غير متوقعة، وإنما كان نتيجة محاولة تصديق عمر لما يحدث، لو صدقتي عمر الذي يملك عقلية أغلب الرجال فسوف يصدقني على الأرجح من مثله بعد ذلك ممن سوف أضطر إلى قص ما عانيته عليهم إذا لزم الأمر، قبلت الهدية من أخ أستشعر احترامه لي لكنني تساءلت بعد ذلك نفسي هل أهدى مثلاً لياسمين؟

كنت قد عودت نفسي قبل أن أدخل البيت أن أقرأ آية الكرسي
والمعوذتين وبعض الأذكار، تساورني الهموم في كل مرة أدخل فيها
الشقة لما لاقيته فيها، وما سوف ألقيه، أم ستتهي هذه الخزعبلات
قريبا كما يسميها عمر؟

أدركت أن الإحساس بالأمان نعمة كبيرة لا تُقدر بثمن، حتى لو
كان في مكان مثل المشفى الذي زُرناه، إنها أشياء لا نعرف قيمتها إلا
بفقدانها، الأمان من الأشياء التي لا تشتري ولا تُباع للأسف، فقد
جاء يوما أفضل فيه المكوث في مشفى على المكوث في سريري في ليل
الشتاء القارس! من يصدق؟

استضفت هند في غرفتي، سندت رأسها على وسادة وأخذت
اسقيها من العصائر ما تحملته معدتها في هذا الوقت، خرجت إلى
غرفة الاستقبال وفتحت التلفزيون، رقم قناة القرآن الكريم أحفظه
عن ظهر قلب، استمعت إلى أول آيتين من سورة «المُلك» واتجهت
مرة ثانية إلى غرفتي، أتوضأ فيها كالعادة وأصلي كل الصلوات الفاتنة
قضاء، كانت المرحلة التالية هي الأصعب، مرحلة تبديل ملابسِي،
كنت أخاف من تبديل ملابسِي مؤخرا فلم نستحم لأيام، أنادي على
احدى البنات وأبدل ملابسِي في وجودها، وكالعادة اعتمدنا على
هامات الجامعة والمطاعم في مرور المياه على أجسادنا فقط.

كانت عادتي أن أخلع جميع أدوات زيتي كالحواتم والساعة
والسلسلة في البيت، فأنا لا أطيقها بعد الاستراحة من ملابس الخروج
لإحساس الراحة في ملابس البيت، دائما أضع الحُلى في علبة صغيرة،
بينما أضع ساعتِي فوق رف سريري الخشبي الملتصق في ظهره،

كى أتمكن من معرفة الوقت من حين لآخر، تأكدت من أن هند غلبها النوم فوضعت ساعتى ورائى على رف السرير وأغلقت النور وبدأت أغمض عيني استعداداً للنوم غير مُحتمل، هنا دقت ياسمين على الباب:

- ليه مش فاتحة قرآن في الصلاة؟

قمت من مكاني فزعة، فعرفت ياسمين جوابي على الفور.

- أنا كنت فتحاه! هو قفل؟ هو قفل يا ياسمين؟ هو قفل؟

- خلاص خلاص يا مريم، وطى صوتك عشان هند نايمة.

وكالعادة أخفق النوم في العثور على جفون يُلاقيها ولو حتى لدقائق معدودة، أخذ التوتر يزيد من حدته معي كلما فكرت في أمر التلفزيون، وأخذت أردد الاستغفار إلى أن انتابني حالة من الاستنكار لما يفعله بى الله، فقد كنت على شفا حفرة من الكفر والعباذ بالله، وأخذت أردد «ليه بس كده يا رب؟ أنا ما عملتش حاجة وحشة للدرجة دى في حياتى عشان يبقى عقابك كده، ولو على الدجال ما أنا استغفرتك؟ ما أنا اديت الغلابة صدقة عشان تسامحنى؟ ليه بس كده؟» يبدو أن صوتي كان عاليًا ونبرتي حادة فاستيقظت هند.

- مالك يا مريم؟

- القرآن اللي بره طفى لوحده!

قامت هند واسندت ظهرها إلى وسادة في قلق ارتسم على ملامحها.

- يا شيخخة إنتي مش عارفه تليفزيونا؟ ده صيني، متخافيش كده...

دى وصلة يا مريم مش ريسيفر، ممكن يكون الرجل غير القنوات؟ إنتي الصبح روجي له وخليه يبجي يظبط القنوات، أو اتصلى بيه يبجي.

لم أعلق على ما قالته، أراد عقلى الباطن أن يصدق ما تقول رغم علمه بالحقيقة، كما أحسست بالذنب تجاهها وهي المريضة التي لا تقوى على الكلام، أعطيتها ملامح الموافقة فرجعت مرة أخرى إلى وضعية النوم.

كانت ياسمين تشبث دوما بخصوصيتها، فهي مثلي تماما تؤجر الغرفة منفردة بها، يأتي المساء فتدخل صومعتها مغلقة بابها حتى صباح اليوم التالي، لكنها أتت الينا في غرفتي ترندي إسدال الصلاة حاملة المصحف والسبحة وسجادة الصلاة!

- أنا مقعد معاكوا الليلة دى عشان آخذ بالي من هند.

نظرت إلى عينيها فوجدتها زائغتان لا تريد أن يراهما أحد منا، يديها ترتعشان، وجهها تكسوه حمرة شديدة، تلتعلم في الكلام كأنها تعلمت النطق حديثا، فسألتها.

- حصل حاجة يا ياسمين؟

لم تواجهني عيناها قط.

- لا يا شيخة محصلش حاجة خالص.

- حصل حاجة ولا إيه؟


انفجرت ياسمين بحددة.

- اسكتي بقى شوية.. إيه؟ اللي جاي عليكى حصل حاجة حصل حاجة! أنا جايه أقعد معاكم بس.

جلست بعدها على الأرض تسبح وتستغفر، بينما أخذت نظرات شكى تندفع منطلقة نحوها في ريب ولم أصدقها.

- طب طالما إنتي معانا في الأوضة بقى، أنا هنام شوية.. ولا
تروحي أوضتك صحيني، أوعي تطلعي وأنا نايمة؟
نظرت إلى هاتفي راجية السلام.
- طب هاتي موبايلك أشغل القرآن نسمعه.

تركنا باب الغرفة مفتوحًا ليلتها، خلعت ساعة يدي ووضعتها
ورائي على رف السرير ونمت نوم قلق متقطع، كنت أفزع بين الحين
والآخر، أتأكد من وجود ياسمين معي، لم يفارقني وجه «مامر
الدجال» ليلتها في أحلامي المتقطعة، ثم غالبني النعاس ورُحت في
ثبات عميق.



كنت أتوضأ لأصلي الصُّبح وإذا بصوت فاطمة الزهراء يجلجل في أرجاء البيت في بهجة.

- لقد سُرت بزيارتك بالأمس وفرحت فرحًا شديدًا، وإنى أغار منك يا مريم، فقد ازددت جمالًا تبارك الله، زغم مرور خمس سنوات كاملة.

توقفت عن الوضوء ونظرت حولي، فرأيتني أتوضأ في حمام أنثري من الحجارة الصفراء، وبجانبي إبريق من النحاس به ماء يتوسط طبق كبير من النحاس، عليه منشفة مصنوعة من قماش لم أعتده!

ها قد أتيت مرة ثانية، ولكنني إعتدت الموقف شيئًا ما ولم أنزعج كما المرة السابقة، ولم أتساءل هل ما يجلب بي نعمة أم نقمة؟ حقيقة أم حُلْم؟ فقط استسلمت في هدوء، بقي أن أستوعب ماذا جرى فأنا قد وصلت البارحة على حد قولها، هل يا ترى قابلت خولة أيضًا؟ ولماذا جئت من الأساس؟

أكملت وضوئي وخرجت فلاحظت أني في الدور الثاني بيت فاطمة، كان شبيها للساحة بالدور الأول لكن الساحة به أصفر والغرف أكثر، رأيت جلبابي الأزرق النهري اللون الذي لا أتذكر من أين جئت به أو متى ارتديته، كان جلباباً طويلاً يتوسطه حزام مُذهب واسع الأكمام أطرافه جميعها مطرزة كما الحزام، فوق رأسي طاقية زرقاء، يعلوها غطاء رأس طويل أبيض اللون مُثبت يكاد يلامس أطراف ثوبي ولم يكن هناك بُرقع هذه المرة، امتدت يد صغيرة تُمسك بطرف جلبابي، نظرت إلى الأسفل لأرى من يكون، كان طفلاً جميلاً بشوش يشبه فاطمة إلى حد كبير، ابتسمت له ثم رفعته لأمله فابتسم لي وداعبني، فأمسكته وسألته مُداعبة بدوري.

- ما اسمك يا فتى؟

- على بن جعفر بن اسماعيل.

أنت فاطمة ضاحكة وهي تحمل قدور من الطعام وتضعها على المنضدة.

- بات على في الرابعة من عُمره، لقد كُنْتُ بِشارةٍ سعيدة يا مريم، منذ أن وطأت قدميك هذا البيت وقد حُلَّت مشاكل، رزقني الله بعل ثم ابنتي بهجة.

بحشت عيني عنها فأردفت فاطمة.

- مازالت نائمة الآن، كانوا نائمين عندما وصلتني البارحة والآن زوجي قد سافر فجر اليوم إلى قوص، جعفر كثير الترحال لاشتغاله بالتجارة كما تعلمين، لكنه يبلغك أنه سوف يصطحبك مغرب اليوم إلى مبعاك كما وعدك فلا تقلقي.

- أنا سعيدة جدًا من أجلك يا فاطمة يا صاحبة القلب الطيب،
مهلاً.. إلى أين يصطحبني زوجك؟

- ألم تطلبي منه البارحة مقابلة الشيخ القنائي؟
مرت لحظات صمت أحاول أن أعى شيئاً مما تقول ثم استطردت
ساهرة.

- الشيخ «عبد الرحيم القنائي»؟ أتمنى ذلك.
- يجب أن تفخري بنفسك يا مريم، أنتِ طالبة علم، دارسة
لكتاب الله وشريعته والفقهاء الإسلامى، أنا حقاً فخورة بك.
مرت لحظات أحاول استيعاب الأمر واستجماع كلماتي.
- الفخر في أن تفعل ما يجب عليك فعله بحب واعتزاز وضمير
حي، أنا أطلب العلم وأريد أن ألتقي بعالم جليل، وأنت تُفني حياتك
في تربية جيل قويم ليأتي عبد الرحيم القنائي مرة ثانية، وكل من يعمل
بجد في موضعه يجب أن يفخر بنفسه.

تبسمت فاطمة بعد اطرائي، فأردت تغيير المناقشة.

- لكنني أرى النساء بحال جيدة هنا يا فاطمة أليس كذلك؟
- نحمد المولى على جميع نعمه، رغم توالي الأحداث وكثرة
النزاعات، وتخوف رجال البلاط الفاطمي من نوايا صلاح الدين،
وانتهاء الخلافة الفاطمية، إلا أن أحوال النساء جيدة والحمد لله، أحياناً
أنتذكر رواية الجدات لنا عن واقعة الخليفة «الحاكم بأمر الله» فارتعب،
على عكس ما كان عليه الخليفة المعز لدين الله رحمه الله، والتي كانت
امرأته «مولاتنا أم الأمراء تغريد»، امرأة ذات عقلية تجارية فذة،

أتعلمين يا مريم أن الخليفة كان يطلب مشورتها في كثير من أمور الدولة؟ وقد شيدت كثير من المنشآت المهمة، والآن أحمد الله وأسجد له شكرًا على ما نحن فيه.

- نعم، قرأت عن زوجة الخليفة المعز لدين الله، كان حقًا شيئًا جميلًا أن تحظى النساء بمكانة في ذلك العصر، لكن ما الذي فعله الخليفة الحاكم بأمر الله؟

نظرت فاطمة إلى في ذهول يمسحه شك تعمدت تجاهله تمامًا.

- ألم تُصغى يوما إلى حكايات الجدات الشهيرة يا مريم؟ الخليفة الحاكم بأمر الله هو من حبس النساء في البيوت لسبع سنوات كاملة، لغيرته الشديدة عليهن ومنعهن من التطلع من الطاقات، أو أسطح البيوت وأباح للمحتسبين دم المرأة التي تخرج من منزلها ومنع الإسكافية حتى من صنع أحذية لهن.

- ما هذا الهراء؟ أو تخرج من بيتها إلى قبرها فقط؟

- كانت هناك حالات مُستثناة تستخرج بها تصاريح لأداء فريضة الحج، وغُسل الموتى، وعمل الأرامل المحتاجين ببيع غزلهن.

- كأنهن جنس ثالث! وماذا فعلن؟

- لا شيء، لم تخرج النساء من البيوت إلا بموت الخليفة الحاكم بأمر الله، وتولى الخليفة «الظاهر لإعزاز دين الله»، والذي أفرج عنهن، فعمت الفرحة والبهجة حينئذ، وقد سُميت مواليد البنات بهجة وفرحة في هذه السنة، وبهجة كانت إحدى جداتي والتي تفاءلت بسيرتها فسميت مولودتي بهجة باسمها.

- مُباركة «بهجة» إن شاء الله يا فاطمة.

- هل تصدقين ما قُلت يا مريم؟

- أجل، ولم لا؟

- أنا لا أصدق ولا أكذب.

- ماذا تعنين؟

- لا أدري.

- أيكذب التاريخ؟

- حقًا لا أدري يا مريم، إنها مجرد تراث، هل روايات الجدات صحيحة؟ أم لعب بها هواهم فأضاف أو حذف؟ الأخبار تتناقل ولا أحد يدري صحتها من زورها.

- ساحك الله يا فاطمة، سوف أفكر في كل ما يُقال بعد سؤالك هذا.

- لا عليك يا مريم.

- سكتت فاطمة برهة وكأنها تفكر، راقبتها وسألت.

- ماذا يدور بخاطرك يا صديقتي؟

- أتعلمين يا مريم، عندما تتحدثين أو تسألني أسئلة غير منطقية، تُراودني أفكار أنك عابرة علينا، أى أنك لست من هذا الزمان، خاصة مع لكنتك الغربية، رُبما تحملين سرًا كبير، عُدرا أنا لا أستطيع أن أخفي عليك ما في صدرى، فبالرغم مما قد أفكر فيه إلا أنني أرتاح في صُحبتك وأحس بنقاء سريرتك، ولهذا أفتح لك بيتى في حُب خالص لا تشوبه شائبة.

- لا بأس يا فاطمة أستطيع أن أعى ما تقولينه وأن أحترمه، ولر
كنت بمكانك ما فعلت مثلك، لكننى أمضيت السنوات الخمس
الماضية في السودان عند أخوالى، ولا أعرف شيئاً مما يحدث بمصر.
تبسمت في وداعة وأردفت.

- أعلم هذا وأعمل على تصديقك.

ابتسمت ولم أشأ أن أكمل الكذبة فسألته في سداجة.

- من أين علمتى بهذا؟

- لقد علمت منك البارحة يا مريم، لم يمر وقت طويل حتى

تسنى؟

ناجيت الله بداخلي كثيراً، يا الله يا قدير عقلي لا يستطيع
الاستيعاب، وإني أستغيث بحولك وقوتك لا إله إلا أنت.

- آه لقد تذكرت، أثار السفر يا فاطمة، دعينا من هذا وأخبريني
عن الخليفة وأخبار الخلافة.

- الخليفة رغم صغر سنه إلا أنه عادل وبه كثير من الرحمة، كريماً
سمحاً لطيفاً لين الجانب يغلب عليه الخير وينقاد إليه، لكنه متغالياً في
مذهبه شديداً على من يخالفه.

- والشيخ عبد الرحيم القناني؟

- سوف تقابلين الشيخ وتخبريني أنت يا عزيزتي مريم، فأنا حتى
الآن لم يسبق لي لقاءه.

بعد أن انتهينا من صلاة الظهر في جماعة استأذنت منى فاطمة لتعد
طعام الغداء، كى يكون جاهزاً عند عودة زوجها، جلست وحيدة

بعد أن كنت مع «على وبهجة» لبرهة تلعب سويا، وبعد أن أخذتهم فاطمة لنوم القيلولة أخذت أفكر في حالي وما آل إليه، اجتناب التفكير لن يكون هو الحل بالتأكيد الآن كما فعلت المرة السابقة، لن يجب كثرة تساؤلاتي إلا البحث مع الصبر، لكنني اعتمدت في حياتي في القرن الواحد والعشرين أن البحث عن أى شيء في غاية السهولة، ما عليك إلا فتح جهاز الحاسوب أو التليفون المحمول والبحث عبر موقع «جوجل» ثم يأتيك الجواب في أقل من ثواني.

هنا في السنة ٥٦٠ هجرية - ١١٦٦ ميلادية كيف أبحث عن تساؤلاتي؟ عندما أسأل فاطمة أرى في عينها حيرة ولا ألومها، وإنني أخاف أن أسأل زوجها، وأتعجب حقًا هل رأيت البارحة؟ ولماذا أريد أن أقابل الشيخ القنائي؟

على كل الأحوال أشعر بإثارة عندما أفكر في مقابلة الشيخ الجليل اليوم، حقًا أكاد لا أصدق ما أمر به! هل يُمكن أن يكون هذا بسبب زيارتي لمسجده؟ رأيت كتاب الله قريبا مني ففتحت بعفوية وقرأت بصوت مسموع.

«أعوذ بالله من الشيطان الرجيم.. بسم الله الرحمن الرحيم ﴿١﴾ وَالصَّحْحَىٰ ﴿٢﴾ وَاللَّيْلَ إِذَا سَجَىٰ ﴿٣﴾ مَا وَدَّعَكَ رَبُّكَ وَمَا قَلَىٰ ﴿٤﴾ وَاللَّآخِرَةَ خَيْرَ لَكَ مِنَ الْأُولَىٰ ﴿٥﴾ وَسَوْفَ يُعْطِيكَ رَبُّكَ فَتَرْضَىٰ ﴿٦﴾ أَلَمْ يَجِدْكَ يَتِيمًا فَآوَىٰ ﴿٧﴾ وَوَجَدَكَ ضَالًّا فَهَدَىٰ ﴿٨﴾ وَوَجَدَكَ عَابِلًا فَأَغْنَىٰ ﴿٩﴾ فَأَمَّا الْيَتِيمَ فَلَا تَقْهَرْ ﴿١٠﴾ وَأَمَّا السَّائِلَ فَلَا تَنْهَرْ ﴿١١﴾ وَأَمَّا بِنِعْمَةِ رَبِّكَ فَحَدِّثْ ﴿١٢﴾﴾^١

١ سورة الضحى.

ما إن أغلقت المصحف الشريف حتى نظرت إلى الأمور من مُنطلق آخر، لماذا لا يكون كل ما أمر به هبة من الله، نعمة ونفحة كي أرى وأعيش ما لا يستطيع أن يعيشه أهل زمانى، ثم أخذت أناجى القادر الوهاب.

«إلهي قد سلمتك أمري بغير اعتراض فاكتب لي الخير كله وارضى به ونور بصري وبصيرتي يا الله وارزقني شكرك على كل ما تؤول إليه المقادير».

قبل أن يُرفع أذان العصر أتى جعفر مُحملاً بخيرات الله إلى بيته، رأيت فاطمة وقد بدلت جلبابها وغطاء رأسها الطويل وترينت، كانت رائحة الطعام الشهوي والبخور المميزة المهدنة للأعصاب قد اختلطت سوريا وملأت جنبات البيت، ذهبت إليه ترحب به وابتسامتها يطل منها الحب وقد امتلأت قسامتها رضا.

جاءت فاطمة تدعوني لتناول الطعام مع أسرتهما الصغيرة، سلمت على جعفر واصطنعت أني ألقاه للمرة الثانية فرحب بي في أدب وحياء، كان طيباً يُحب زوجته ويعشق أولاده، ذو عقل خُلق ليعمل بالتجارة، كثرة أسفاره قد أكسبته خبرة ولباقة في التعامل مع كافة أنواع البشر.

جلسنا جميعاً في دائرة حول مائدة الطعام الذي طهته وقدمته فاطمة لنا بكل الحب، تكونت الوجبة من لحم الماعز مع حسائه، وبعض الخضروات والخبز المحمص، جلسنا جميعاً نأكل وبعد دقائق قطع جعفر الصمت.

- قد مررت على الشيخ «عبد الله القرشي» كى يأذن لنا الشيخ
القنائي في مقابلته بعد عصر اليوم.

- من هو الشيخ القرشي؟

نظر جعفر إلى فاطمة نظرة تقول من في قنا لم يعرف القرشي بعد؟
- حسنًا، لقد عرفت من فاطمة أنك آتية من السودان حديثا ريبا
لم تأتيك الأخبار بعد، انه أحد أولياء الله الصالحين في قنا وهو مُقرب
إلى شيخنا «العارف بالله عبد الرحيم القنائي».

لم أستطع أن أرد إلا بابتسامة امتنان ثم آثرت أن أركز مع الطعام
الشهى ومُداعبة الأطفال، انتقلا جعفر وفاطمة بالحديث إلى خططهم
في الأيام القادمة من زيارة الأقارب ومتابعة أحوالهم.

كُنت في عُجالة كى أرى الشيخ القنائي والذي لم تُرسم له حتى
صُورة تخيلية في عصري، انتهيت من الطعام وحاولت مُساعدة
فاطمة لكنها أبت وأصرت ألا أجهد نفسي قبيل مقابلتي الشيخ
الجليل، قمت لأداء صلاة العصر وذهبت فاطمة تنظف أرجاء
المنزل وتغسل القدور، ثم جاءت حاملة قفازًا أزرق في يديها.

- ارتدى قفازك يا مريم فأنى أراكِ جاهزة ومُتحمسة لمقابلة
الشيخ.. جعفر ينتظرك في الساحة السفلى.

- هل عبرت لكِ يوماً عن حُبى وخالص امتنانى؟

- تستطيعين فعل ذلك يا عزيزتى بزيارة سنوية كى أطمئن عليكِ.

ابتسمت وارتديت القفاز، كأنه فصل على كف يدي، لم أتعجب
بالطبع، نظرت نظرة حُب إلى فاطمة وعانقتها مُودعة ونزلت الدرج
فوجدت جعفر واقفا عند الباب يبتسم كأخ لي.

- هل أنتِ مُستعدة؟

- على أتم الاستعداد.

- على بركة الله.

انطلقنا في الطرقات التي أصبحت مألوفة لي نوعًا ما، مررنا بسوق حيث قابلت فاطمة وخولة للمرة الأولى والتي كانت على ما أظن منذ يومين ولكن حالهم يؤكد ما يقولون إن خمس سنوات كاملة قد مرت، ولولا أن أنجبت فاطمة لما صدقتها.

- إلى أين وجهتنا يا أخي؟

- إلى المسجد حيث يتواجد الشيخ لإعطاء دروسه.

- هلا تحدثني عن الشيخ يا جعفر؟

- تريدن مقابلته ولا تعرفيه؟

- لا أعرف عنه سوى أنه عالم جليل وحسب رغم ذبح صيته، لا

أعرف ما تعرفه أنت.

ابتسم في ذكاء واسترسل يقول.

- حسنًا لك ما طلبت، لقد أمضى طفولته في تحصيل العلم في

جامع ترغاي الكبير على يد والده، كما تتلمذ على يد كبار العلماء

فلم يكد يصل الثامنة من عمره حتى كان قد حفظ القرآن الكريم

وجوده تلاوة وفهما، وتوفي والده وهو في سن الثانية عشرة لذلك

مرض مرضًا شديدًا حتى حار الأطباء في علاجه، وأشار بعض

منهم إلى أنه يجب أن يغادر البلاد لما حدث فيها من عزاء لوالده،

قضى في دمشق ثماني سنوات نهل فيها من علماء دمشق وقد بدا لهم

ذكاء السيد عبد الرحيم وسرعة بديهته وحفظه وميله إلى التصوف فطلبوا منه وهو في سن العشرين أن يلقي الدروس فأبى، وذلك أدبا لأنه يعرف قد علماء دمشق وكان مقبيا عند أخيه فسألوا أخاه إقناعه فرفض وقرر العودة إلى بلدة ترغاي. وفي ترغاي وجد مكان أبيه شاغرا لم يقدم أحد على شغله لمعرفة مكانة الشيخ، وان ليس فيهم من يستحق هذه المكانة، واجتمع علماء ترغاي واصرروا على إحلال السيد عبد الرحيم مكان أبيه، فكان لهم ما طلبوا. وفي أول درس يلقيه الشيخ تكدس الناس لما بدا لهم من غزارة علم السيد عبد الرحيم الشيخ الصغير ذي العشرين عاما، وذاع صيته وتوافدت عليه الناس من البلاد المجاورة للقاءه، قضى السيد عبد الرحيم خمس سنوات على هذا النهج وما يقوم به من مهمة الوعظ والإرشاد عن واجبات المسلم نحو ربه ومجتمعه بأسلوب ساحر أخاذ أبكى المستمعين تأثرا وإعجابا.

- قصة من أعظم ما سمعت، ولكن ما الذي جعله يرحل وقد احتل مكانة عظيمة في ترغاي؟

- السبب هو أحداث المشرق في ذلك الوقت من تكتل قوى الاستعمار الأوروي المقنع تحت اسم الصليب، للهجوم على بلاد المشرق واستعمارها كانت تشد تفكيره بقوة إلى المشرق حيث كان يرى وجوب تكتل كل قوى المفكرين من المسلمين لحماية الدول الإسلامية، وفي تلك الأثناء توفيت والدته ولم يكن تزوج بعد وليس هناك صغار يسعى في تربيتهم، الأمر الذي جعله بالإضافة إلى الأسباب السابقة، أن يفكر في الرحيل إلى المشرق، ثم قرر السيد عبد

الرحيم الاتجاه إلى الحجاز حيث يؤدي فريضة الحج، لأنه لم يتسنى له أداؤها عندما كان بدمشق، وحتى يلتقى هناك في موسم الحج بعلماء المسلمين لمناقشة جوانب مشاكل العالم الإسلامي، وبعدها يرى إلى أين يوجهه المولى عز وجل. فرحل من ترغاي ميمنا وجهه شطر الحجاز لتأدية فريضة الحج، وفي طريقه مر بمدينة الإسكندرية والقاهرة فتركا في نفسه أثرا لم تمحه رحلته المقدسة إلى البلاد الحجازية. وبقي في البلاد الحجازية تسع سنوات قضاها متنقلا بين مكة والمدينة ينهل من علم وفضل فقهاؤها وعلمائها تارة وعابدا معتكفا بالبيت الحرام أو بمسجد المدينة تارة أخرى.

- ومن أين كان يكسب رزقه؟

- كان يسمى للتجارة في بعض المحاصيل حتى يستطيع التفرغ للعبادة والعلم دون أن يمد يده للاستجداء أو أن يكون عالة على أحد.

- وكيف جاء إلى مصر تحديداً؟

- أثناء موسم الحج العاشر التقى بمكة بأحد الشيوخ الأتقياء الورعين القادمين من مدينة قوص الشيخ «مجد الدين القشيري»، ودار بينهما حديث فتعارف فألفه، وأصر بعدها القشيري على أن يصحب عبد الرحيم إلى مصر وإلى قوص وقنا بالذات حيث أن مجتمعها متعطش إلى علم وفضل أمثاله، وأن واجبه الإسلامي يدعوه إلى الإقامة في قوص أو قنا ليرفع راية الإسلام وليعلم المسلمين أصول دينهم وليجعل منهم دعاة للحق وجنودا لدين الله.

- ووافق الشيخ.

- وأخيرا وافق الشيخ عبد الرحيم على الرحيل إلى مصر، فجاء بصحبته والذي كان يعمل حينئذ إماما بالمسجد «العُمري» بقوص، وهو أقدم مسجد في الصعيد، وكانت للشيخ القشيري مكانته المرموقة بين تلاميذه ومريديه، ولكن الشيخ لم يرغب البقاء في قوص وفضل الانتقال لمدينة قنا، تنفيذا لرؤى عديدة أخذت تلح عليه في الذهاب إلى قنا والإقامة بها ولأن قوص ليست في حاجة شديدة إليه فقد كانت وقتها غاصة بالعلماء والفقهاء وكبار المفكرين من أهل الدنيا والدين. وبعد أن أمضى عبد الرحيم ثلاثة أيام بقوص رحل إلى قنا حيث التقى بالشيخ عبد الله القرشي، أحد أوليائها الصالحين كما سبق وأشارت إليه، فانعقدت أواصر الألفة بينها وتحابا وتزاملا في الله. وقد ساعد جو قنا الهادئ الشيخ عبد الرحيم على حياة التأمل فأمضى عامين كاملين يتعبد ويدرس ويختلي بنفسه ليتعرف على خباياها، ولا يقطع عليه هذا الاختلاء وذاك التعبد إلا خروجه للتجارة التي يعتمد عليها في معاشه، ومنذ ذلك الحين لُقّب بالقنائي.

- كانت خولة تقول أخبار صحيحة اذن.

- رحمها الله رحمة واسعة، كانت تتقد ذكاء، لكن ماذا قالت خولة؟

- هل ماتت خولة؟

تأثرت لسماع نبأ وفاتها وكأنها صديقة قديمة حقا، لا أجد تفسير لما شعرت به.

- ألا تدرين؟ توفاهما الله في هدوء وهي نائمة السنة الماضية.

- إنا لله وانا إليه راجعون.. رحمها الله رحمة واسعة.

سادت لحظات حداد ثم أراد جعفر أن يهون على..

- يا أختي مريم كُلنا زائرون، زائلون، كُلنا راحلون، لكننا فقط لا ندرى من يرحل أولاً، ومن سوف ينتظر قليلاً، فهونى على نفسك، ندعو الله لكل أمواتنا ولنا الثبات واللقاء في الجنة بإذن الرحمن الرحيم.

تذكرت أبى ولم أستطع أن أخفي دموع تسابقت في مجراها فأسرع جعفر في تهدئتي.

- فاطمة تقول إنك امرأة قوية لا تأبى شيئاً.

نظرت إليه وابتسمت وجففت دموعي.

- أنت طيب القلب مثل فاطمة يا جعفر.

- جزاك الله كل خير يا أختي مريم.

- والآن أريد أن أعرف إلى أى مدرسة ينتمي الشيخ؟

- لا نستطيع أن نقول إن الشيخ صاحب طريقة يا مريم، فهو لم يحرص نفسه بين طائفة معينة، لكن نستطيع أن نقول أنها مدرسة شاملة من العلم الصوفي المحمدي وهي مدرسة فكرية إسلامية تصوفية.

بعد بُرهة رأيت المسجد المراد على بُعد أمتار فغمرتني الفرحة والرهبة والدهشة وتلجم لساني وأخذت أمسح عن جبتي العرق وتجمدت أطرافي، نظر إلى جعفر وابتسم ابتسامة واسعة.

- هكذا حال المرئدين العاشقين، سوف أتركك معه يا مريم حتى
تستفيضي وسوف أرجع لأصطحبك إلى البيت بعد ساعة إن شاء الله.
- أشكرك يا جعفر.

وصلنا لساحة في الخلاء كبيرة، رجال كثيرون مُغادرون وقد انتهوا
من درسهم مع الشيخ القنائي، استقبلنا الشيخ القرشي وحياني ثم
تبسم وقال ان الشيخ في انتظارنا.

كان الشيخ القرشي كبيراً في السن والمقام، ذو لحية بيضاء كبيرة،
تغطي وجهه ابتسامة تنيره، تجعلك لا تلتفت إلى تجاعيده المنقوشة
بعمق على قسماته، تعكس سنوات من الحكمة والورع.

مشيت خطوات وبجانبي جعفر والشيخ القرشي في هذه الساحة،
أرى من بعيد رجل يجلس القرفصاء أمامه لوح خشبي عليه كتاب
يقراً فيه، يرتدى ما يرتديه الرجال في هذا العصر، إلا أنه قد ارتاح من
عمامته ووضعها بجانبه على صندوق خشبي متوسط الحجم، رُسمت
عليه نقوش، وبه قفل من فضة محفور عليه آيات من القرآن الكريم،
نظر باتجاهها عندما أحس وقع أقدامنا حتى بعد أن خلعنا أحذيتنا،
أغلق الكتاب ونهض واقفاً باسمًا لثلاثا يحينا.

«العارف بالله عبد الرحيم القنائي»

- لم أكن بالسودان يا سيدي.
رفعت رأسي لأنظر إليه فوجدت ابتسامته مازالت حاضرة
فأكملت.

- إنها حُجة اختلفتها كي لا يشك أحداً بأمرى.

- ولماذا أخفيت عني الحقيقة؟

- لن تُصدقني، ولن يصدقني أحد، فأنا نفسي لا أصدق نفسي.
ضحكت عيناه ولم يندهش ولم يبدِ انزعاجاً، نظر إلى عيني مباشرة
نظرة ساحرة ذات مغزى، تحمل الكثير من الحب النقي، كثير من
الإعجاب، وكأنه قد تلقى إجابة كان ينتظرها، ثم ابتسم وأكمل
مطمئناً إياي.

- أنا سوف أفعل.

كان صوته عذباً مطمئناً وكافياً لأن أفعل ما يريد، نظرت إليه
مرة أخرى فوجدته يبتسم ابتسامة مختلفة حيرتني، فجاءت ابتسامتي
مُرتبكة ولم يستطع لساني أن يُفصح عن شيء، لكنه قرأ عيني جيداً.
- تكلمي يا عزيزتي.

- هل لي بوعد من شيخنا الجليل أن يصدقني وحسب؟

اعتدل أكثر في جلسته وتغيرت ابتسامته فجعلتني أشعرُ بالُفة
تجاهه وكانني أعرفه منذ مئات السنين، لم ينتظر وسبقني.

- أعلم من أين أتيت يا مريم، وأعلم لماذا، وكنت بانتظارك.
اختفت ابتسامتي تدريجيًا في تساؤل، نظرت إلى عينيه فوجدته
رائعًا وهادئًا تمامًا، ثم أردف في هدوء.

- لا تخافي ولا تشغلي بكثرة السؤال، فهناك الكثير في الكون لم
نفهمه بعد، وما علم السابقين وعلم الحاضرين وعلم اللاحقين إلا
نقطة في بحر من علم العليم، طالما تؤمنين بالخالق حق اليقين فلا
تعجبي قدرته.

- عقلي يرفض ما أرى، وقلبي ينبض بالإيمان أن كل ما أمر به
حقيقي، وأنا بين هذا وذاك لا أدري أين الصواب؟

- العقل يقبل الأشياء على حقيقتها ويستدل بالأدلة المادية
وظواهر الأمور، أما القلب إن كان سليم، فهو خزائن المحبة ونور
المُحِبِّين والمُرِيدِينَ في كل زمان ومكان، القلب لا تُقيدُه حواجز
ولا تحده أسوار، ولا تملكه شهوات فهو حُرٌّ طليق في ملكوت
من يجب، يدري ولا تدري، يرى في الظلام الحالك ما لا يستطيع
عقلك رؤيته في وضوح النهار، فإن آمنت به فتح أبواب خير لك،
وإن لم يكن أغلقه في وجهك واستمر في البحث عنم يستحقه.

- إذن فكل هذا حقيقي؟

- من يستمع إلى هذا قد يستشعر ميلًا نحو كفة القلب، لكن
حقيقة الأمر لا بد من انسجامهما معًا لإعمار الكون توافقًا مع القوانين
الإلهية، فلولا العقل لفسد القلب البشر بأهوائه، ولولا القلب لفسد
العقل البشر بأطماعه.

مرت لحظات سكون وتأمل بيننا وكنت قد سُحرت بها سمعت
واسترسلت بصوت خافت مُواجهة.

- لم أعد أفهم شيئاً، لكن ما أستطيع أن أجزم به إنني قد أتيت من
زمن نُدرت فيه المحبة الخالصة.

- سوف أقص عليك شيئاً من الحقيقة، في زمن آخر بعيد أتيت
أنتِ منه بإرادتك، يكون إرثي وإرث أمثالي ممن اجتهدوا في حب
الله مطمع للدجالين والسحرة، سيحاول الشرفاء المحافظة عليه،
لكن الفتنة عظيمة والايان شحيح، عندما يكثر المُجاهرين بذنوبهم
والمُخالفين لشرع الله، ويتوالى الفاسدون حُكام ومحكومين عبر السنين
ويستبق الناس لفعل المعاصي وهم يعلمون، بل يجادلون في المحرمات
ويهرطقون، عندما تعترض الناس على قضاء الله ويكُفّر الملحدون
مُتكبرون على الخالق، عندما يفسر الغافلون آيات الله على الأهواء
ويتخذونها عُذراً للإباحة الموبقات، عندما يُحنث الرجال وتفجّر النساء
ويتنشر الباطل ويكتسح الغلاء البلاد، يسمعون الأذان إلى أن ينتهي
ويمر الوقت دون عقد العزم على تلبية النداء، يمر الوقت أكثر إلى أن
يمضي وقت الصلاة، والناس ذائبون في صخبهم وانشغالهم بأمور
زائلة غير مُدركين ما فوتوا عليهم من خيرات وغُفران، يُباح الدم
وتنتشر الحروب، يكُفّر الناس بعضهم بعضاً بغير دليل وينقسمون على
أنفسهم، لقد أتيت من زمن من يقبض على دينه كالقابض على جمرة من
النار كما قال الرسول الكريم (صلى الله عليه وسلم)، لكن الخير باقياً
وها أنا أراكِ تأتين أملاً في الخلاص من الشرور وحامية لمقتنياتك وإرثي
من أجدادي، وهذه ليست مُصادفة لقد كان اختيار.

- هنا يكمن السؤال، لماذا أنا؟

- كل خلق الله مُطيع له سبحانه، كُل الأقدار نافذة، وما الوقت إلا مخلوق مُطيع من مخلوقات الله تعالى يسبح في الملكوت، كُل المخلوقات تفعل ما تؤمر وأن هذا لشرف سامٍ وعظيم.

- أتمنى لو يجتمع أهلي معي ونعيش هنا فأواظب على الدرس وأنهل من علمك يا سيدي.

- أما أهلك فهذا قدرهم، وأما أنت فإنك تفعلين ما تمنيت يا مريم.

- كيف؟

- تتلقين درس حياتك الآن، وسوف تحمى إرثي من السقوط في أيدي من لا يخافون المولى عز وجل (حاشا لله)، وأنى أؤكد لك أن حماية الغافلين عن الأذى وعمما دُبر لهم وربما آذاهم، إن هو إلا أمر عظيم وخوض حرب أزلية منذ بدء الخليقة، بين الخير والشر ودائماً ما ينتصر الخير وإن طال الأمد.

- كيف؟

- وحدها المحبة تُغير الفكر وتمسح الأحزان، وليس اتباع الحبيب لحبيبه دليل محبة كما قد يظن الناس، إنها الاتباع لا بد له من اثبات بالفعل، وما كان فعلك في اتباع أثرى إلا دليل محبتك لي في الله، ومحبتك لفعل الخير ودرء الأذى.

في هذه اللحظات نزلت دموع فرحة وخوف في حضرته، فراقبها في رحمة وحنو واحتوتني كلماته.

- البكاء يغسل الروح ويُطهر النفس، تملكين روح تهفو إلى خالقها في وداعة، ونفسك اللوامة تلومك دوماً وتستنكر الخطأ، وهذا بذرة من بذور الايمان وأحد أسراره، ما مريك ما هو إلا درس في دُنْيَاكِ ودعوات مُستجابة بصلاح حالك إن شاء الله.

- وما أنا عليه الآن يا سيدي؟

- أما ما أنت عليه الآن فلك فيه الاختيار، إما أن تستمرى في اندهاشك فيفوتك حاضرک وما قد تتعلميه، أو أن تُزِيل ما بنفسك من شوائب وتُقدمي وتنهلي من العلم.

- أريد أن أعرف كيف عرفت كل هذا؟ وكيف كنت في انتظاري

ومنذ متى؟

- المعرفة بحر واسع وعمق الماء درجات، ونحن البشر نحسب أنفسنا علماء الأرض وننسى أن فوق كل ذو علم عليم، دعيني أجاب النصف الثاني من سؤالك، انتظرتك منذ أن سُرِق الإرث.

نظرت إلى الصندوق وتأملتة، ان هذا هو إرثه الحقيقي إذن وما يتكلم عنه، لا بد أن بداخله سر، أليس هذا الصندوق الذي رفضت أن أعطيه لماهر! تبسم القنائي وكأنه قرأ ما يدور بعقلي.

- ما زال أمامك الكثير لتعلميه يا مريم، لكن تذكرى جيداً أن من أهم أخلاق العالم قل علمه أو كثر، أن ينفع بعلمه الآخرين، فينقله ويورثه لعم الفائدة، فيعود النفع على الأمة كلها إن شاء الله.

- بماذا تنصحنني عند عودتي؟

- انتبهى جيداً لصُحبتك في دار الدنيا، تعلمي الحذر، واعلمي

أنه لن يستطيع مخلوق أذيتك أو إصلاح حالك إلا بمشيئة الله تعالى، فانفضي الخوف عنك فأنت مع الخالق، وقد كرمك فلا تهين نفسك بنفسك، كوني مُسبحة حاملة ذاكرة له أينما كنت، داومي على الاستغفار فإنه كنز لا يفنى أبداً وسر عظيم من الأسرار العُليا، وفي كل أحوالك استفت قلبك يا مريم فإن قلب المؤمن دليله.

- وكيف لي أن ألقاك حينها أريد؟

نظر لي نظرة حانية وابتسم.

- سوف آتي لزيارتك بين الحين والآخر يا عزيزتي، لا تخافي من

شيء ورب الكون معنا.

استيقظت من نومي في الساعة التاسعة صباحًا، أحسست بسعادة مُتناهية غير مُتباشية مع ما أمر به من أحداث، أمعنت النظر في هاتفني المحمول لأنأكد في أى السنوات نحن مرة أخرى، مازلنا في سنة ٢٠١١ ميلادية وليست ١١٦٦ ميلادية، تأكدت من التقويم القبطى والاسلامى ليطمئن قلبي أكثر، لقد عُدت وقد تمزق قلبي بين هذا وذاك، وكنت أتمنى أن أعيش فيهما وبهما الاثنان معا.

وجدت ياسمين تغط في نوم عميق عند نهاية أرجل هند، أشفقت على حالتها وهي نائمة في خوف، لا أدري حَقًا لماذا لا تتكلم هذه الفتاة مثلما أفعل أنا ولو قليلًا لتخفف عن نفسها، أنا على تمام التأكد أن شيئًا بشع قد حدث لها بالأمس، أنا الأقل قدرة على التحمل من ثلاثتهم، يستنكرون الأشياء ويستخفون بها، بل ويستهزئون منها أحيانًا أخرى، لكن الأكيد أن هذا العهد قد ولى وها هم يُحْفون الأحداث عنى، قُمت من مكاني لأتفقد الصندوق، نظرت له وتحسسته كأنى أراه للمرة الأولى وعانقته، جلبت ملاءة من دولابى وغطيته حرصًا على قيمته، أحست بحركتى ياسمين فتلملت في نومها فحاولت إفاقتها.

- ياسمين... قومي يا حبيبي روجي نامي في أوضتك، إحنا الصُبح وأنا صحيت خلاص.

- لا خليني هنا يا مريم معاكم.

- حصل إيه في أوضتك إمبراح؟

- والنبي حلي عن سمايا دلوقتي وسيبيني أنام.

دق جرس الباب فأسرت إليه، فتحتة فوجدت ليل أمامي، دخلت مُحملة بنظرة برود غير محتملة، تحمل في يديها شنطة بلاستيكية نفوح منها رائحة طعام شهوي.

- إزيكم يا جماعة عاملين إيه؟ والله ماعرفتش أنام من القلق

إمبراح.

أجبتها في استهزاء.

- لا ما هو واضح!

- والله كنت قلقانة جداً، بس إنتي عارفة يا مريم الشقة مقدرش

أقعد فيها لوحدي.

- واكتشفتي دلوقتي إن الشقة متقدرش تقعدني فيها لوحدي؟

نظرت إلى دون أن تجيب سؤالي، ثم دخلت لترى هند وياسمين،

ونادت بصوت عالٍ.

- ياللا يا بنات أنا جاييلكم فول وطعمية.

استيقظت ياسمين وهند على صوتها، كان جسد هند المريض يحتاج

أن يتغذى بشدة، قامت هند من مضجعها وأسندتها ياسمين على وسادة،

أفسحت ليلى مساحة على سرير هند لتضع الإفطار لتأكل جميعاً، أخذت هند تأكل وتعاتبها بالكلام أحياناً وبنظراتها طول الوقت، لم تهتم ياسمين بما يدور بينهم وأخذت تأكل بنهم، بينما أفرغت شدة غيظي فيما أكلت، أمضغ الطعام وأنظر إليها في غيظ غير مُستتر، بينما أنهى طعامي ومع آخر قضمة، تنبهت أنني رأيت شيئاً يلعب من طرف عيني، تسمرت يدي للحظة وقررت أن أنظر ما هذا فوجدتها ساعة يدي، الساعة التي وضعتها على رف السرير بالأمس قبل أن أنام أرتديها في يدي الآن دون أن ألمسها أو أنظر إليها مرة واحدة! نظرت إلى البنات في صمت وترقب، لاحظتني ياسمين فسألت.

- في إيه يا مريم؟

- لا لا لا... أنا مش قادرة أعيش هنا، مش هقدر كده، الساعة أنا قلعاها امبارح كالعادة على رف السرير، إيه اللي جابها في أيدي؟ إيه اللي جابها في أيدي؟ اطلعوا بره.. اطلعوا بره.

انتابتنى حالة هستيرية غير مسبوقه، وقعت على الأرض فجأة دون أن أعي وفرغت ما ملأت به معدتي للتو على الأرض، لم أدرك أنني لطمت خدودي وقتها وأنا أردد عبارة «ليه أنا بس.. اشمعنى أنا؟» وبحركة تلقائية خلعت الساعة وألقيتها على الأرض، وقعت وأخذت أدوسها بأرجلي في هستيريا، حتى تكسرت تحت أرجلي لآخر قطعة فهي الآن ممسوسة، هذا ما اعتقدته حينها، وبعد أن انتهيت من تكسيرها غبت عن الوعي.

عندما أفقت كنت قد فقدت إحساسى بالزمن، لا أريد أن أعرف

الوقت، لكن أريد أن أعرف ما هذا الذي يحدث معنا ولماذا؟ حينها وجدت جسدي ملقى على سريري، فتحت عيني لأرى من يجتبي النور خلفه فوجدت ليلي وباسمين ينظران إلى واجهتين مترقبتين لحظة استيقاظي، هند مازالت في حالة إعياء تتابعني من السرير المقابل، لطالما اعتقدت أن غرفتي بأمان، لا أدري حقا لماذا ساورني هذا الاعتقاد وأنا علم يقين أنه كذبة أكذبها على نفسي.

لكنه وحده كان يطمئنني ويعينني على تحمل كل هذا كلما تذكرته، كلما تذكرت كلماته أستعيد قوتي من جديد، كلما رأيت عينيه وصلابة إيمانها خجلت من ضعفي، ساعمني يا شبيخي العزيز فسرعان ما تغلب على أفكاري وأحداث الحاضر بكل آلامها وغموضها.

باسمين تنظر إلي دون كلام وتمسك بالمصحف مفتوحًا، من الواضح أنها مكثت بجانبني تقرأ القرآن، طلبت مرآة فأعطتها لي ليلي، نظرت في المرآة لأجد وجهًا شاحبًا أصفر اللون، تغطي الهالات الشديدة السواد جزءًا لا بأس به من محيط عيني، يضرب اللون الأزرق أطراف العين من شدة ارتطامي بالأرض، لم تنبس إحدى البنات بكلمة واحدة فهن متفرجات مذعورات، هذه هي المرة الأولى التي يروني بهذه الحالة البائسة، كانوا قد اطمئنوا أنني بخير على الأقل جسديا الآن، فظلت هند وليلي جالستين تسندان رأسهما على خدهما كأنهما في مأثم بينما تقرأ ياسمين القرآن بصوت خفيض.

هذه أيضا هي المرة الأولى التي نجتمع بها نحن الأربعة في غرفتي لمدة من الزمن لا أعرفها ولم أريد أن أعرفها حينها، فلازالت حالة

الهباج والهستيريا مستمرة معي، لماذا الساعة تحديداً بعد ما مررت به من أحداث؟ لماذا بعد رؤيتي الشيخ القنائي؟ هل هناك من يريد أن يذكرني بالوقت؟ لا أدري، هل ما حدث لي حقيقة؟ أيكون اختباراً لقوة أعصابي؟ لصلابة إيماني؟ أم أنها علامة لأحداث قادمة متعلقة بالزمن؟

- أسترها يا رب.

نطقتها هند في وهن، لكنني صرخت فيهن.

- حد يجيب لي موبايي.

نظرت كل واحدة على حدة إلى في ذهول، مُتعجبات أسلوبى فصرخت مرة أخرى.

- بسرعة..

قامت ليلى منتفضة فأحضرتة إلي.

- خلاص يا مريم أهو أهو..

أحسست من نظراتهن أني قد أصبت بمرض عقلي، أم أنهم يُقدرون حقاً ما حدث بالفعل أمامهم؟ ظللت أردد في صوت عالٍ جدًا «يا رب.. يا رب.. اللهم ارفع مقتك و غضبك عنا».

- ألو.. أنت بتاع وصلة الدش؟ إحنا الطلبة اللي ساكنين في بيت «الحجة سعاد»، فاكرنا؟ كنت عملتلنا الوصلة بتاعة الدش، هي قناة القرآن الكريم فيها مشكلة ولا أنت شيلتها ولا حاجة؟

- فاكركم طبعاً يا أبله.. أنا مشيلتش حاجة وقناة القرآن والقنوات الرياضية ثابتين.

- طيب ممكن تيجى عشان الوصلة فيها حاجة؟
- ريع ساعة يا أبله وأبقى عندك.. يمكن العيب في التليفزيون؟
- لا.. كل القنوات الأرضية شغالة والفضائية كمان ماعدا القرآن!
- طب يا أبله أنا جاي.

كانت حالتي النفسية مُنعكسة على مظهري الخارجي بقوة، أهدل ملاسبي بسرعة غريبة وكأني في مسابقة سُرعَة، ارتدى البيجاما الوحيدة التي لا أعرف لماذا لا أهدلها، أرفع بنطلون البيجاما إلى أقصى ارتفاع ممكن، أضع بداخله الجزء العلوي من البيجاما وكأني أحمي جسدي من شيء لا أعرفه، شعري يرسم دائرة غير منتظمة معقودة فوق رأسي، ولا أدري لماذا ارتدي حقيبة يدي ذات اليد الطويلة في البيت، معلقة ما بين الكتفين لتصل قريبة من الرُكبة، وأهل باستمرار سكينًا كنا قد نسيناه خارج المطبخ قبل الأحداث الأخيرة، أعصابي المنفلتة ترافقني ليلا نهارًا، الأهم من هذا كله أنني لم أعد أصلي وخلفت وعدي لنفسي بقراءة سورة البقرة يوميًا، ربما كانت زيارة القناتي تذكرة لي.

لا زالت البنات في حالة ذهول وربما خوف من حالتي، أو على حالتي في أحسن التقديرات، ظلوا ينظرون لي ولا يبدأون الكلام معي أبدًا، نظرات تُوجه لمن فقد عقله حديثًا، أو أنهم ليسوا على تمام التأكد من هذا بعد، نظرات تملؤها الحيرة والشفقة، أنهيت الاتصال الهاتفي مع صاحب المحل لأصرخ في وجوههم.

- شوفتوا.. مفيش مشكلة في الوصلة أهه؟

مرت دقائق من الوقت حسبما أظن فقطعت ليلي الصمت الشديد.
- أنا معاكوا إن فيه حاجة في الشقة، بس فاضل على الامتحانات
أقل من أسبوعين دلوقتي هنروح فين؟ وما تنسوش كل السكنات
مليانة.

دق جرس الباب فقامت ليلي لفتحه، ثم اصطحبت صاحب
محل الدش إلى مكان التلفزيون، انضمت وياسمين لنرى ما
هو عيب التلفزيون، بمجرد أن فتحه ظهرت قناة القرآن الكريم
واضحة وضوح الشمس بأحسن صورة وبأحسن صوت، بعد أن
تفقد الرجل والوصلات والتركيبات والتلفزيون نظر إلى في ريبة.

- ما هي يا أبله كل القنوات شغالة.. والقرآن شغال زي الفل،
إحنا وصلتنا محدش اشتكى منها الصراحة غيركم!

- طيب شكرا ولو حصل حاجة تاني هكلمك.

أعطاني نظرة مُريية وانصرف الرجل إلى وجهته، بينما جلست أنا
في غرفة الاستقبال في عصبية وترقب شديد، رأيت هند تستند إلى ليلي
متجهين لغرفتهما، دخلت ياسمين إلى غرفتها، لم تُغلق الباب، بقيت
تقرأ القرآن وتبكي في صمت.

لم أبال بأي منهن، ما يشغلني هو تعاملي مع غير المرثيين، أترى
خوفنا وعجزنا مع الجن يأتي من التخفي؟ إنه التخفي بلا أدنى شك
الذي يعطيهم القوة والرغبة، لكن ماذا لو رأيناهم؟ هل تزول الرهبة
وينمحي الخوف؟

جلست على الكنبه بالخارج وأخذت قرار صعبا فكرت فيه طوال

فترة الأحداث الماضية، سوف أقيم حوارا مع الجن، سوف أتحدث معه لأفهم ماذا يريد بالضبط فيرجئني ويستريح، ألا يتعب من هذه الألاعيب؟ ألا يهتم بشئونه الخاصة ويتركنا نحن الآخرين لشئوننا؟ ما هذا الفراغ؟ أنا لا أملك ما يكفي من الوقت حقا لهذا المزاح السخيف؟ سوف أتكلم معه أو معها أو ربما معهم لا أدري؟ لكن كيف؟ أنا لا أعرف الطقوس المتبعة؟ سوف أكلهم بطريقتي، ببساطة.

فجأة سمعت صوتا غريبا عننا يندهنى بصوت خفيض، «مريم... يا مريم...»، لا يمكن أن تكون البنات، انهم يغلقون أبواب غرفهم، حتى ياسمين أغلقت بابها منذ دقائق، فكيف أسمعهم وأنا بغرفة الاستقبال؟ للمرة الأولى في حياتي لم أخف ولكن تملكني إحساس التحدي والعصبية وربما الفضول والثأر معا فصرخت.

- اطلعولى.. اطلعولى.. يالى هنا... أنا عاوزة أتكلم معاكو.. اطلعولى نتفاهم.

قلت هذا بينما أنا في طريقي إلى غرفتي مرة أخرى، ثم أكملت بصوت عالٍ.

- انتوا فاكرين إني هخاف؟ لا خلاص زمن وعدى، أنا مبقتش أخاف، أنا معاياربنا، وكفاية إن اللي أنا معلقاه على الحيطه ده مخوفكم، انتو طبعاً أجبن من كده؟

كان صوتي في علو مستمر وأنا أقول هذه الكلمات إلى أن ختمت كلامي بآية الكرسي بصوت عالٍ، لم أعرف من قبل أي أملك هذه الطبقات في حنجرتي، فتحت ياسمين باب غرفتها وجاءت لي باكية.

- بس بقى يا مريم... بس... بس.

جلست على سريري أتهد وأنهج من فرط الإرهاق، ثم نظرت إليها فوجدتها تقول لي بصوت عالٍ غير مبالية وكأنها تريد من أن يسمعن كلامها وهي تشير باتجاه غرفة هند وليلى.

- أنا مفيش حاجة معكنة عليا قد البلوى اللي جوه دى، عاملة نفسها خايفة وأراهن إنها معاهم أصلا.

كلانا كان يعرف أنها تقصد ليلي، فكثيرا ما وجهت ياسمين أصابع الاتهام نحوها في كثير من المواقف، مرت لحظات حاولت كل منا أن تهدأ نفسها كى نمارس حياتنا الطبيعية، كنت أنظر خلالها للعدم، شاردة متأملة في اللا شيء.

- إنتي مش رايحة الجامعة يا مريم؟

- أنا لا رايحة ولا جاية، أنا عشان معاد القطر ميفوتنيش وإنتي عايزة تيجى معايا تعالى مش عايزة إنتي حرة.

- بس روحى النهارده آخر يوم وخلص.

جاء ردي في حدة.

- لأ مش هروح.. مش هروح.

ربما أرادني أن أريح عقلي قليلا لأستريح، إن هيتى العامة وتصرفاتى لا توحى بالخير على الإطلاق، ولكنى لا أستطيع إلا التفكير فيما يحدث الآن، ونسيت إحساس نفسي المطمئنة إثر زيارتى لفاطمة والقناتى، ظلت هند وليلى بغرفتهما، وياسمين واقفة في غرفتها تارة، ومعى تارة أخرى لا تدري ماذا تفعل،

أحسست بانكسارها نتيجة ما يحدث كما لم أشاهدها من قبل، انتابتنى حالة شديدة من العناد وقتها، ظللت أفتح التلفزيون لتظل على قناة القرآن ويأتيني صوت القرآن مجلجلاً، لا تمر دقيقة ويُطفئ التلفزيون دون أن لمسه! رأت ياسمين المرة الأولى فجذعت وهرولت إلى غرفتها تبكي، بينما لم أياس ولم أبكى أنا هذه المرة، فتحت مرة ثانية وما أن أسمع صوت القرآن حتى يُطفئ مرة أخرى، وكان من يفعل هذا بي تتملكه نفس حالة العناد.

فتحت التلفزيون للمرة الثالثة فشاهدت زر لوحة التحكم الخاصة به تطفى هذه المرة، رأيت الزر وهو ينضغط إلى الأسفل مطفئاً الجهاز! أسرعت إلى غرفتي وأحضرت هاتفي المحمول لأشغل ما به من آيات قرآنية، فتحت الهاتف وجاءتنى آيات الله العظيم لمدة دقيقة أحسست خلالها بالانتصار حتى توقف الهاتف ولم يعد يعمل بعد ذلك نظرت إليه في حدة أكثر عنادًا من ذي قبل وصرخت.

- أنتم فاكرنى كده هستسلم يعنى؟ طب أهو.

ثم أخذت في قراءة آية الكرسي بصوت عالٍ أخذ في التصاعد، سمعت حينها بكاء ياسمين أت من غرفتها في حين فتحت هند ولبلى باب غرفتهما وأنوا.

ليلي تنظر إلى في ذهول.

- بس يا مريم.

أردفت هند في تحدى.

- سيبها يا ليلي.. يا ريت يطلعوا نشوف هما عايزين إيه؟ لو حد طلعلك يا مريم قوليلي أنا قاعدة، ساعتها لو قرينا قرآن هيتحرقوا.

خرجت باسمين من غرفتها لترد كلام هند.
- لا يا حبيبتى.. هما قبل ما يتحرقوا إحنا هنكون موتنا من
الخنضة.

قررت أن أفتح التلفزيون مرة أخرى ليطفئه هو بدوره مرة
أخرى أيضًا، ظللت أضربه بعنف وأنا أردد آية الكرسي وضغطت
رقم قناة القرآن الكريم ولم ينطفئ مرة ثانية، أحسست للمرة الثانية
بالانتصار، ظللت واقفة لدقائق أراقب ما يحدث فلم يحدث شيئًا،
إزداد احساسى بزهو الانتصار ومشيت رافعة رأسى متجهة نحو
غرفتى.

دخلت غرفتى فوجدت الأربع ورقات اللاتى كنت قد كتبهم
من قبل «الله» و«لا إله إلا الله» و«محمد رسول الله» و«ألا بذكر الله
تطمئن القلوب» في وضع مقلوب على الحائط، لقد تركوا الورق
معلقًا بعد أن قلبوه معكوسًا، إذن لم أنتصر بعد.

وفي أثناء تأملى للجدران التى علق عليها الورقات إذا بصليب
كبير يرسم بجانبهم أمام عيني بخط قلم رصاص خفيف، تزداد
قوة وضوحه تدريجيًا على الجدار، تمامًا كأني أشاهد رساما يرسم
لوحته حتى أتمكن من رؤيتها مكتملة! كنت في حالة مُزرية من
الْيأس في هذه اللحظات، وتوقف صوت القرآن بالخارج، فرميت
شنتطى على الأرض هي والسكين البلهاء التي أحملها كالمجانين،
جلست مكاني على الأرض، وأدركت أن الحوار آت قريبًا جدًا،
ولم لا وقد عرضته أنا من قبل؟ وسعيت إليه، كان القرار لا بد منه

فقررت أن أتحدث معه، من جلستى اليائسة على الأرض تمحرج صوتى من شدة الخوف، ثم تذكرت نصيحة القنائي لي بعدم الخوف فتشجعت ونطقت وكانت المفاجأة.

- أنت مين؟

كُتِبَ على الحائط بخط كأنه رسم «تعرفين من أنا..»، شاهدت ما كُتِبَ وأنا في شرود تام كأننى في كابوس مُفزع.
- بسم الله الرحمن الرحيم.. والله ما أعرف.

كُتِبَ على الحائط «من انتعلتى حذاء زفافها بدون إذن» سقطت دموعى في صمت وقد أحسست بشئ من الظلم المجهول.

- أنا عمري ما لبست جزمة حد... مش جزمة فرح كمان.

أحسست ببرودة غمرت الغرفة وغمرتنى فجأة، ومرت لحظات سكون لم يُكتب فيها شيء، فجأة طارت كتبى وأوراقى في أرجاء الغرفة، خبات وجهي داخل كفوف يدي، لحظات مرت كأيام، هدأت العاصفة ثم كُتِبَ بخط كبير عريض ملأ جزء لا بأس به من الحائط..... «كاذبة»!

هذا الذي يحدث أصبح واقعاً، لسنا وحدنا ومن يفعل هذا سوف يظهر بلا شك في مرحلة من المراحل، من السهل عليه أن يتلبس جسدى الضعيف، هذا يسير فأنا لا أصلى ولا أذكر الله في انتظام، ستكون مقاومتي هشة، ولو شاء لتلبسنا جميعاً أنا وياسمين وليلي وهند، أو على الأرجح يتلبس أي جسد منا ويدعها تقتل الباقي في غفلة؟

ما لا أفهمه الآن هل يحتاج كل هذا كي يقتلنا؟ لو أراد ذلك لظهر
بصورته الحقيقية لنموت من الخضة كما تقول ياسمين، لا أدري ولا
أفهم شيئاً.

حاولت أن أتشبث بروح «القنائي» التي حاورتني كالحقيقة، أو
ربما كانت حقيقة، بكلماته وما ورائها، ربما تكون حصني المنيع الآن،
لا بد أن أهزم ضعفي لينتصر إيهائي، أين ذهبت مريم المثابرة العنيدة.
لكنني بدلا من أن يحيطني نور إيهائي، أحاطني ظلام نفسي
ورأيت السواد يملأ داخلي، ويملاً من حولي وما حولي، ولا حول
لي ولا قوة، ففز إلى ذهني عُمر فجأة فأردت أن أكلمه وكان أعماقي
تستغيث به، أخذت هاتفني وذهبت إلى ياسمين في غرفتها.

- ياسمين.. اديني رقم عمر.. أنا عاوزاه.

- ماشى.. أهو

- الو.. أيوة يا عمر أنا مريم.

- أيوة يا مريم.. مال صوتك؟

حين سأل عن تغير صوتي انفجرت في البكاء.

- مش قادرة أقعد في الشقة يا عمر.

- طب البسى يا مريم وأنا هعدى عليكى.

تبسم وجه ياسمين واقترحت.

- ما تقعدوا مع بعض ربعاية كده وتعدوا عليا؟

هززت رأسي بالموافقة فلا وقت لدى لأشاهد غراميات الآن،

حان وقت المغارب فخرجت أنتظره بالخارج، أتى عمر مُسرِعاً شهماً
كعادته، نظر إلى في شفقة وهو ينزل من سيارته.

- إيه ده يا مريم مالك؟ إنتي شايفة شكلك بقى إزاي؟ أنا بقارن
بين شكلك أول مرة شفتك فيها ودلوقتي، ده إنتي كنتي أشيك
واحدة فيهم، اهدى يا مريم مفيش حاجة مستاهلة.

- عمر.. أنا مش عاوزه أتكلم في الموضوع ده، ويعدين أقولك..
خلاص مش خارجة.

دخلت الشقة مرة أخرى وتركته مثل المجانين، لم أكن في حاجة
إلى مزيد من اللوم أو الشكوك، فالموضوع أصبح يقينا الآن لا جدال
في ذلك، كانت ياسمين ترتدى ملابسها استعداداً للقاء عمر.

- إيه ده؟ انتوا ما خرجتوش ولا إيه؟

- إحنا أصلاً ما تحركناش، أنا ما دخلتش العربية أصلاً، وهو بره
مستنيكى على فكرة.

لم أدرك وقتها تحديداً ماذا أريد.. أردت شيئاً لا أعرفه، أحسست
أني تائهة أتلمس خطواتي نحو الأمان في سواد قاتم فلا أرى الطريق.
- أنا ماشية ومش هناخر خالص وبالمره أجيب لنا حاجة ناكلها.

- ما تعمليش حسابي يا ياسمين.

لاحظت أن هند بدأت في التقرب إلينا مرة أخرى، أو بالأحرى
بعد محبتها، سمعتها تتحدث إلى ياسمين وتحكى عن علاقاتها السابقة
بعمر وتعتذر انها لم تجربنا من قبل، لكنها كانت نصيحة ليل لها بعدم
إخبارنا بأى شيء عنها لكي لا نحسدها!

خرجت ياسمين مع عمر وظلت ليلي بغرفتها تذاكر، طلبت من هند أن تجلس معي فأنا لا أريد أن أبقى وحيدة، دخلت هند غرفتي ورأت الصليب المرسوم وما كُتِب على الحائط فتسمرت لبرهة في مكانها، أحضرت هند المصحف وظلت تقرأ القرآن بصوت عالٍ، ثم أتت بأدوات النظافة وأخذت تنظيف الحائط وتقرأ القرآن وبقيت مكاني أشاهدها متعجبة لجرءتها وبقيت أيضا آثار الرسم والخط الرصاصي قابعين مكانهم، من الجائز أن الرسامة ترانا الآن وتضحك من ضعفنا في سخرية، فعلى الرغم من أن أدوات النظافة كانت حادة وقوية، إلا أن ما على الحائط بقي أقوى، واضحا في تحدٍ، لم نتحدث في أي شيء على الإطلاق ولكنني قطعت الصمت.

- بس برضه يا هند انتو أغراب جدًا! هو إنتي خايفة بجد؟ أنا بقيت أخاف منكم ومن برودكم أكثر من الشقة!

تركت هند المصحف جانبًا والتفتت إلى في ثقة كأنها تعلم ما بي مُسبقًا.

- بصي يا مريم.. الجن مذكور في القرآن، ووارد جدًا طبعًا يكون فيه حاجة، لأ هو أكيد في حاجة بعد كل اللي مرينا وبنمر به، وكمان وارد تحصل لأي حد على فكرة مش إحنا بس، أمال إحنا ليه رُحنا للشيوخ ماهر؟ بس أنا مش بخاف، إنتي متخافيش يا مريم.. دايبا قولي «الله أكبر»، الله أكبر من كل حاجة.

كلامها كان منطقيًا ومعقول، بالإضافة إلى أن أهل الأقصر معتادون على مثل هذه الأمور، فهمت أني أعقل ما تقول فاستطردت قائلة.

- وإنتي مكبرة الموضوع برضه.

- طيب واللي على الحيطه يا هند دى مش حاجة كبيرة؟

- بس خلاص، فهمت يا مريم، ده يا بت جن مسيحي راكب الشقة، يا اما راكب واحده فينا؟ مين بقى؟ ده شغلة الشيوخ مش شغلتنا.

رجعت ياسمين مبكرا كما قالت وأحضرت الطعام لكنى لم أكل شيئاً، أحسست بإرهاق شديد، كنت في حاجة إلى نوم عميق أكثر من أي طعام، ولكن كيف أطمئن حتى أنام؟ فنعمة النوم مرتبطة ارتباطاً وثيقاً بنعمة الأمان، وهي نعمة قد سُلبت مني، والله وحده أعلى وأعلم متى أستردها.

كانت الساعة الحادية عشرة مساءً، تركت باب الغرفة مُواربًا وأغلقت نورها، بينما كان نور غرفة الاستقبال ضاربًا أشعته في غرفتي، كنت أسمع حينها القرآن يُفتح ويُغلق في التلفزيون من تلقاء نفسه بالخارج، وكان أحدًا يستغزني أو يفتعل مُشاجرة، أو يُعلن عن وجوده فأريني ماذا أنت فاعلة؟ افتعلت البرود حتى يمل، لكنه لم يفعل.

فتحت نور الغرفة من جديد وأحضرت شنطة صغيرة وضعت فيها بعض الملابس القليلة فغدا سوف أسافر إلى أسوان لا محالة، كانت هند منشغلة بشيء ما فظلت تمجج وتذهب أمام غرفتي طوال الوقت، ليل ما زالت تذاكر في غرفتها، بينما يصلني صوت ياسمين تحدث في التلفزيون مع عمر، أغلقت نور الغرفة مرة ثانية وفتحت شباك غرفتي كي أشعر بونس الشارع رغم هدوئه إلا من عابر أو اثنين كل دقائق معدودة.

وفجأة توقف صوت القرآن ولم يفتح مرة ثانية وسمعت صوت المطبخ المعتاد، أحد ما يبحث عن أدوات المطبخ في صوت عالٍ فيقرع بعضهم ببعض ويفتح ويغلق الأدراج في عصبية، صوت الثلاجة يُفتح، صوت الأكياس التي بداخلها، الزيت المغل، وصوت

التحمير «تشششششششش» ليتصاعد الدخان إلى خارج المطبخ فيملا غرفة الاستقبال برائحة الدجاج المقلي، ومنها إلى غرفنا واحدة تلو الأخرى، هذا الفيلم السخيف لن ينتهي، لكنني سوف أنبيه على الأقل مع نفسي عندما أسافر غداً.

تمددت على سريري على الضوء الخافت القادم من الخارج، فرايت خيالاً أسود يقوم ويتشكل من الأرض إلى أن أصبح رجلاً نحيف جداً طويل جداً يقف عند ركن الغرفة! أخذت أفرك عيني فرايته محدداً بقوة، رأسه تنظر باتجاه باب الغرفة ثم التفتت رأسه نحو ليثوان، واتجه خارجاً من باب الغرفة الموارب دون فتحه ونفذ منه للخارج، أحسست قلبي قد عجز عن الخفقان وأنني أمر بحالة لا وعي أو هذيان فهذا الذي أراه مستحيلًا، ثم أقنعت نفسي أنه شيء من الهذيان.

بعد دقائق قليلة جاءني صوت كعب عال يندق الأرض في انتظام، بالتأكيد ليست هند؟ أم أن عمر قد أتى مرة أخرى ليقابل ياسمين؟ لا أحد منا يخرج في مثل هذا التوقيت من الليل، استجمعت ما تبقى من قوة وخرجت لأرى من من البنات التي سوف تخرج الآن ولماذا، فربما حدث شيئاً لا يُحتمل معها، ليل و هند بغرفتهم وياسمين لازالت تشاجر مع عمر في الهاتف.

دخلت غرفتي وأغلقت بابها، ونظرت من مكان المفتاح، انضم صوت آخر لكن كأنه حذاء رجل، وبدا كأنه يلاحق صاحبة الكعب العالي، لازلت أسمع صوت الكعب العالي والحذاء الرجالي مع اقتراب ظل نحو غرفتي، وسمعت صوت ضحكة لامرأة! ضحكة

عالية! وفجأة سكتت الأصوات كلها وأظلم مكان المفتاح الموجود في الباب، إنها بالخارج... أمام باب غرفتي مباشرة!

كتمت أنفاسي من شدة الخوف ولم أستطع الوقوف أكثر من هذا ولكن جسدي التصق بالباب، كنت في شدة الرعب من أن أتركه فيدخل أو تدخل وكان الباب هو المانع وقد رأيت بعيني من نفذ منه منذ قليل؟ كان حقيقة ولم يكن هذا هذياناً!

تذكرت حديث هند الأخير فرددت بصوت يريد أن يعلو «الله أكبر.. الله أكبر» فبدأ صوت الكعب يذهب بعيداً وبدأ النور يأتي تدريجياً من مكان مفتاح باب الغرفة، ثم سمعت من تتعل الكعب تتجول بكل حرية في غرفة الاستقبال والمطبخ، تجيء وتذهب كيفما تشاء، ظللت أنظر من مكان المفتاح فلم أستطيع تحديد شكله أو شكلها، فقط خيالات تمر، وأصوات الأرجل، الرجل والمرأة واضحة وقوية ومسموعة، تارة تقف وتارة يلاحقها الرجل، كأنه يهدنها أو يعنفها لا أدري، صوت ضحكات خافت وعال، مرت الدقائق كسنوات ثم اقترب الصوت مرة ثانية، واختفى النور تدريجياً إلى أن وقف أمام باب الغرفة مرة أخرى، فتذكرت، حديث هند وكيف أن آية الكرسي تحرقهم فهممت أن أقرأها بصوت عالٍ.. «بسم الله الرحمن الرحيم... الله... الله.. الله...»، ماذا حدث لي؟ لقد نسيتها! كيف أنساها؟ «بسم الله الرحمن الرحيم.. الله لا إله.. الله.. الله..»، لا أستطيع أن أتذكرها! يعلو صوت الضحكات، ماذا أفعل الآن؟ «الله أكبر.. الله أكبر».. يجرى الكعب مسرعاً إلى الخارج ويأتيني النور وتسكت الضحكات. أصمت فيأتيني الصوت والظل تدريجياً

مقربًا، «الله أكبر.. الله أكبر» فيجرب الصوت مرة أخرى يتبعه الظل،
يأتي صوت الكعب متأنياً هذه المرة لا أعلم لماذا أتخيله يحمل سكيناً
لذبحي؟

تخييلات من وحي الطفولة لو كان يريد قتلى لجعلنى أفعلها
بنفسى، يقترب الصوت أكثر في تحدى.. آه.. لقد تذكرت «بسم الله
الرحمن الرحيم.. ولا يؤده حفظهما وهو العلى العظيم!» لكن هذا
الجزء الأخير من الآية فقط، ماذا حدث لي؟

يجرى الصوت فأسمع صوت الخذاء الرجالي يمشى في ثقة،
والكعب يجربى ثم صوت كأنه كعبلة ويقع شيئاً ما على الأرض!

تذكرت هدية عمر السلسلة الفضة التى تحمل آية الكرسي لكي
أقرأها، لكنها في الدولاب وأنا مازلت ملتصقة بالباب لا أقوى على
تركه، فلا أنا قادرة على الخروج منه ولا أنا قادرة على التجول داخل
الغرفة.

اقرب الصوت والظل مرة أخرى مسرعين نحو باب الغرفة..
هب هواء بارد فجأة نحو الباب كأنه يدفعه! عندها عرفت أنى هالكة
لا محالة فقررت أن أردد الشهادة: «أشهد أن.. لا.. اله... إلا الله...
وأشهد أن... محمداً... رسول... الله»، كنت أتلعثم وكاننى أتعلم
النطق حديثاً! كيف؟ لا أعرف!

تذكرت حديث هند للمرة الثالثة «لو حد طلعلك نادينى»، كان
الهاتف قريب منى لحسن الحظ فأخذته، بينما أقلب فى الأرقام أتانى
الصوت مسرعاً هذه المرة فرددت الشهادة فى تلعثم فسمعت صوت
الكعب يجربى، وهكذا كلما أبحث عن هند فى التليفون يأتينى الصوت،

أردد الشهادة فيجري الصوت، إلى أن اتصلت بياسمين بدلا من هند
لا أدري لماذا؟ ربما لن أحتفل مشهد الحوار بينهما وبين هند حقيقة
مثلما كنت أدعى شجاعة محادثتها؟ مهلا، أنا التي أردت هذا من
البداية! ألم أقل لها إنني أريد أن أفاهم معها؟ ها هم قد أتوا لي، ماذا
أريد؟ ما طلبته يتحقق الآن!

أنا التي أحضرتهم إلى هنا بفجاجة وجهل وعلى أن أعالج الأمر
بحكمة، لكن من أين تأتي الحكمة الآن؟ الحكمة والخوف لا
يجتمعان.

- الو.. ياسمين... تعالي بسرعة بسرعة.

لم أعطها فرصة للرد، أغلقت الخط وأنا أردد الشهادة في تلغثم،
جاءت إلى ياسمين وقد غطى وجهها الغضب والحمرمة معا، أنت
ياسمين في أقل من دقيقتين وكان من الواضح أنها لم تمر بأى مما مررت
به أنا.

- عمر ده زفت وشكاك جدًا.

- ياسمين.. هما شكلهم جاين عندي الأوضة.

- إيه؟ جاين عندك الأوضة؟ إنتي شكلك عامل كده ليه؟

- أنا مش هاحكيلك.. اسمعي إنتي بنفسك.

مرت ربع ساعة دون أن يأتي أحدا، لكن الكعب العالي
والضحكات بدأت في الاقتراب من جديد مرة ثانية، ما أن سمعت
ياسمين ما يحدث مختلطاً برائحة الدجاج المقلى الآتى من المطبخ حتى
امتقع وجهها خوفا وأخذت تردد بصوت عالي «يا لطيف يا لطيف»..

الله أكبر الله أكبر» فيجري صوت الكعب مبتعدًا مرة أخرى كما كان يفعل معي، الحمد لله أنها تمر بنفس التجربة لثلاثا يقولون أي أفتعل وأضخم الأمور، ثم سمعنا صوت الخذاء الرجالي يلحق بها كالعادة، كان وجهي يغطيه عرقًا يكفي لملأ الغرفة بأكملها، حاولت جاهدة أن أقرأ آية الكرسي لكن حالتني كانت في تدهور مستمر.

- اسمها إيه يا ياسمين الآية اللي كنت باقراها؟ اسمها إيه بسرعة؟
اللي ادهانى عمر؟

لم تجبني فقد كانت منشغلة بترديد «يا لطيف يا لطيف.. الله أكبر الله أكبر» ليجري صوت الكعب الآخذ في الاقتراب والبعد مصاحبًا ظله معه، وفجأة وأنا أحدثها رأيتني أرثدي ساعتني الثانية التي كالعادة أضعها على رف السرير! في هذه الحالة أحسست أني اعتدت بعض الأشياء التي كنت أنهار بحدوثها سابقًا، ربما فقدت شيئًا من الخوف برغم تبولى اللإرادي في أوقات صعبة مررت بها، أو فقدت جزء من احساسى وربما عقلى، نظرت إلى الساعة وقلت في هيسثيريا.
- أهلا وسهلا.. إنتي هنا؟ طيب كويس كنت هاشيل همك لو نسينك.

علقت ياسمين في تعجب.

- بس يا ظريفة مش وقتك خالص.

كانت ياسمين تقف ملتصقة بالباب مثلي تمامًا تنصت تارة وتنظر من مكان مفتاح الباب تارة أخرى، لكن وجودها بجانبني أعطاني شيئًا من الاطمئنان، تصتت آخر مرة ثم زفرت نفسًا عميقًا.

- بقولك إيه.

- إيه؟

- الصوت راح.

«إلى أسوان»

لا أعرف كم من الوقت مضى ليلتها ليأتى الصباح، فقط استمررت في الدعاء «يارب طلع نورك.. يا رب طلع الصبح» إلى أن جاءنى صوت آذان الفجر عذبا شافيا، لكنى ما زلت لا أجزؤ على الخروج في مثل هذه العتمة لا بد أن أنتظر النور، عندها وجدت ليلي حاملة حقيبتها، وياسمين تحضر باقى الأشياء المهمة التي سوف تأخذها هي الأخرى، سبقت كلمات ليلي.

- أنا هروح عند قرابى جوز أختى.

فعمقت هند بملامح تكسوها الهزال والارهاق.

- أنا كمان هروح عشان محتاجة راحة وغذا.

ارتديت ملابسى في عجلة بعد أن رتبت الصندوق الخشبي بيافيه وما استطعت حمله من حاجياتى بجانب باب الشقة، الأولوية عندى للصندوق وان لم آخذ شيئا من حاجياتى، وذهبت أخيرا إلى موقف تجتمع فيه أصناف السيارات الأجرة فلن أحتمل أن أنتظر ميعاد القطار، لا أحبذ ركوب الميكروباص العادى لما أراه من حوادث يومية على الطريق، سوف أبحث عن سيارة أجرة مخصوص، تقلنى

أنا وباسمين من البيت إلى أسوان لكثرة ما نحمله من أمتعة لكنى
لم أجد بعد عدة محاولات، نظرت حائرة إلى الأرض فجاءنى شاب
ينظر إلى وكأنه يعرفنى..

- صباح الخير.. هو في مشكلة ولا إيه؟

- حضرتك مين؟

- شكلك مش واخدة بالك منى، أنا الدكتور اللي كان هيعالج
صاحبتك في المستشفى العام، مش حضرتك أخت الطابط اللي اتخانق
معانا؟

جاء صوت أحد السائقين جهورًا.

- يا أبله لو عايزة تروحي أسوان دلوقتي مش هينفع، لازم
تستى إحنا بنكلملك سواق معاه عربية بييجو يوديكي مخصوص،
بس استنيه بقى.

- أنا هروح أسوان النهارده يعني هروح أسوان النهارده.

تدخل الطبيب مرة أخرى.

- هو إنتي من أسوان؟ أنا من أسوان على فكرة.

- أووووف.

- هي صاحبتك العيانة عاملة إيه؟ على فكرة إنتي كمان شكلك
عيان قوي! هو في حاجة؟

كنت قد سئمت هؤلاء المتطفلين الجهازين، بعد أن أرهقنى تطفله،
أشرت إلى تاكسى عائدة إلى الشقة، يبدو أن خطتى فاشلة في إيجاد ما

يربحنا حتى ولو كانت سيارة أجرة، رأيت البوابة الحديدية مفتوحة على غير العادة وهند ياسمين جالسين على السلم ينتظروني حاملين حقائبهم وحقبتي التي كنت قد أعددتها بجانبها الصندوق الخشبي، تبكي ياسمين بكاء حارًا رافضة الكلام، حاولت أن أعرف وقد أخذتني حالة موقفهم.

- إيه ده يا بنات؟ إيه اللي حصل؟

ياسمين تبكي في هلع، بينما كسا وجه هند اصفرار ووجوم لم أعهدهما من قبل، تمتت الأخيرة.

- لا إله إلا الله.. ياللا ياللا عشان هيشم مستيني.
سألتها بتلقائية.

- هيشم! هو انتو مش سيبتوا بعض؟

- مش وقته مش وقته.. ياللا سلام، خدي ياسمين وامشوا.

انهارت ياسمين ترجوني أن نرحل.

- ياللا يا مريم من هنا.. نروح المحطة نقعد فيها.

- نقعد فيها من دلوقتي؟

ظلت تبكي دون توقف.

- آه.. ده آمن مكان... ياللا..

- طب فين بقية حاجتي.. شاحن الموبايل وال..

قاطعتني ياسمين في حدة غير مسبوقة.

- أنا مش داخلة تاني الشقة دي!

- إيه اللي حصل؟

قالتها هند مُسرعة.

- أنا ماشية يا بنات.. ياسمين هتقولك.

- إيه اللي حصل يا ياسمين؟

ظلت تبكي ولم تجب هذا السؤال إلى الآن!

كانت الساعة الثانية ظهرا عندما وصلنا إلى محطة القطار، ما هي إلا دقائق قليلة حتى رأيت عمر يقترب منا ينظر إلى ياسمين في غضب شديد، يتكلم بصوت عالٍ.

- هو إنتي فاكرة هيخيل عليا الفيلم العربي ده؟ أنا عمر الشافعي..
إنتي تنزلي من ورايا يا ياسمين؟ إنتي فاكرة إني مش هعرف؟ الفيلم ده
تشغليه لحد تاني.. قال جن وعفارت قال؟

لم تجيبه ياسمين، كأنه لم يأت من الأساس، نظر جميع من سمعوا
حديثه بالمحطة الينا في فضول، منصتين لباقي القصة، فنهرته.

- بس يا عمر.. وطى صوتك بس.

- بس إنتي يا مريم.. طلعي نفسك بره الموضوع ده خالص، جن
إيه يا بنت الناس، ده انتو تجننوا بلد.

- خلاص والنبي يا عمر وطى صوتك.

- لا يا مريم إنتي ماتعرفيش، أنا مش عارف إيه اللي مشاها مع
الأشكال دى، الثلاثة بيكلمونى في وقت واحد.. الثلاثة! الست هند
بتاعة الجن دى بعد ما رجعت من المستشفى فضلت تكلمنى وأنا

ما بردش عشان خاطرها، والتالته اللي اسمها ليلي ما بطلتش رسم من
أول يوم، وأنا مطنش وفي الآخر تصرفاتها غريبة، وتبكي لي كل يوم
قال إيه الجن أكل أكلي وخزعبلات!

استمرت في تهدئة عمر إلى أن تركنا وانصرف، بعد أن سمع
جميع الركاب قصتنا، واستمرت ياسمين في تجاهلها وكأنه يتحدث
إلى شخص آخر غيرها.

ركبنا القطار أخيرا وتعاهدنا أننا لن نخبر أهلنا بما حدث، وسوف
نذهب سويا لشيخ من أسوان نعرفه موثوق فيه.

(١٢)

وصلت البيت في تمام الساعة الثانية عشر صباحاً، كانت جدتي تلازم أمي في فترة الحداد على أبي في هذه الأثناء، فتحت جدتي الباب، دقت النظر لتعرف من الطارق، استبينت حفيدتها ففزعت، من نظرتها أدركت أنني قد تبدلت، فلم أعد أذكر على أي شكل كنت قبل ذلك، فقدت خمسة عشر كيلو جرامات من وزني في خمسة عشر يوماً فقط! وجهي مصبوغ باللون الأصفر والأسود معاً، لم أستحم منذ أن إحتدت الأحداث في الشقة، لم أكن أجرؤ لأفعلها، عيناى زانفتان شاردتان طوال الوقت، لم أكن أعير أي شيء أي انتباه فقد كنت دائمة التفكير فيها حدث.

يُفتح باب بيتي بأسوان.. توجد غرفة الاستقبال التي تتكون من طقم صالون على اليمين وكرسيان تتوسطهما منضدة صغيرة عليها أباجورة وبعض الصور الفوتوغرافية، ومنضدة سفرة أمامه على جهة الشمال يتوسطهم تليفزيون على منضدة صغيرة، تملأ حوائط غرفة الاستقبال صور آثار النوبة القديمة والمعابد الفرعونية داخل براونز زجاجية، في مواجهة الباب عم طول على يمينه المطبخ أولاً ثم الحمام ثانياً، وعلى الشمال تقع غرفة أخي الشاغرة لظروف لعمله خارج أسوان، ثم غرفتي أنا وريهام وفي آخر الممر غرفة والدتي التي

تشاركها مع جدتي الآن، نظرت جدتي في لهفة وقالت بلهجة نوية أصيلة.

- إيه يا بنتي مالك؟ وايه اللي جابك دلوقت؟ وإيه الصندوق اللي شرايلاه ده؟

لم أجب تسأولاتها، كنت في شدة الإرهاق وما أحتاجه حقا الآن هو النوم، استيقظت أمي وريهام على صوت جدتي، ألقبت سلاما باردا واتجهت إلى غرفتي مباشرة، نظرت إلى ريهام وكأنها تتفحص شخصا غريباً عنها ثم أردفت.

- شكلك...

- خاسة مش كده؟

- بصراحة شكلك زي..

وصلت بيتي أخيرا ووصل القلق إليهم، لم يناموا ليلتها، يأتيني صوت جدتي وهي تحث أمي على معرفة ما لحق بي من ضرر، تحدّثها بصوت عالٍ تظن أنه وشوشة، انها على يقين أنني أصابني مكروه، وتريد أن تعرف ما هو، ظلت تردد ما تقوله لأمي.

- قومي شو في بتك... البت مش عاجباني..

بعد أن تأملت غرفتي التي اشتقت إليها كثيرا، بدأت أخلع ملابسني في أمان، دخلت أمي فجأة وأنا أبدل ملابسني، فشهقت وصرخت.

- إيه يا بنت الخرابيش والتعاوير والكدمات اللي مالية جسمك

دى؟ كأنك مضروبة علقه! وايه اللي جابك دلوقت؟ وشكلك
عامل كده ليه؟

نظرت إليها وأجبت في برود من شدة الإرهاق.
- مفيش.

استفد برود أعصابى أمى فضربتنى في كتفى ودفعتنى إلى
الخلف في غيظ.

- انطقى يا بت إيه اللي عمل فيكى كده؟ إنتي هتفضلى طول
عمرك كده مجننانى؟

كانت ريهام تعض على أصابعها في خوف وهي تنظر لي،
ولأول مرة أحسست أن خوفها منى أنا، تركتني أمى الآن وذهبت
إلى جدتى، فعاد صوتها يُكرر الكلمات على أمى.

- شفتى بتك؟ إيه يا ربي اللي بيحصلنا ده؟ هاتولى الموبايل
أكلم العطار يعملنا «كناسة عطار».
أردفت أمى.

- يا ماما بخور إيه دلوقتى الساعة داخله على واحدة بعد نص
الليل!

رغم صعوبة الأيام وما مررت به، إلا أنني كنت في سعادة
غامرة هذه الليلة، أحسست بالأمان يغمرنى وسط أهل وبين
أحضان جدران بيتى، ها أنا أدخل الحمام لأستحم أخيرًا، لكن ما
هذه الكلمات التي رأتها أمى؟ نظرت في المرأة وتأملت جسدى،
فإذا بى أرى كثيرًا من الجروح الحديثة وكأنني صُربت بسوط

لأيام متتالية! متى حدث لي هذا؟ لم أرى هذه الأسواط والجروح على جسدي بما أنني لم أستحم منذ أيام، ولم أكن لأتأمله أبداً وأنا أبدل ملابسى بسرعة البرق في قنأ، لك كل العذر يا أمى، ولها كل الحق في قلقها فقد تفاجأت أنا مثلها تماماً، انتهيت من الاستحمام في ساعتين، وقفت تحت المياه وأغمضت عيني في سلام.

لا أصدق يقينا أنني الآن في بيتى، لعل أحلم؟ سوف نرى. فقط ليتهم يكفوا عن الأسئلة الليلة، أريد أن أنام.. أريد أن أغلق عيني دون قلق، هل هذا بالأمر العسير؟ أخذتني نفسي بعيداً متسائلة: «يا.. أخيراً أنا في بيتنا؟ لا هيجى صوت الكعب العالي، ولا الصور هتقلب ولا صور ترسم، وناس تتقلب ناس تانية، ولا ساعتى هتيجى في إيدي ولا التحمير بالليل يشتغل، الحمد لله، دى أول خطوات التخلص من الأذى لو كان العيب فيا، او حتى لو كنت اتلبست ولا كنت ممسوسة، البيت آمن وأنا جنب أهلى اللي ما يعرفوش حاجة غير ربنا».

خرجت من الحمام إلى غرفتى، فوجدت أمى تحاصر ربهام بأسئلتها في حين تردد الأخيرة «والله يا ماما ما عرفش»، أمسكت أمى بهاتفها المحمول بعدها.

- ألو أبوه يا ياسمين.. بقولك مريم مالها؟

.....

- بتضحكي عليا يا ياسمين؟ هو أنا مش معرف بنتي؟

صرخت غاضبة.

- إيه يا ماما بتكلمي الناس ليه؟ عايزة تفضحيني؟ في إيه؟
مالي يعني؟ لو سمحتوا اطلعوا بره بقى عشان أنا عاوزة أنام
ورعبانة مش فاضية للحوارات دي.

- مفيش نوم إلا ما تقوليلي مالك خاسة كده ليه وإيه اللي في
جسمك ده؟

- مافيش يا ماما، اتصلي بيازن اسأليه قد إيه إحنا مطحونين
في المواد؟

لم تقتنع أمي، نظرت في غضب وقلق وخرجت، كانت ريهام
ثابتة على نظرة الخوف المتفجرة من عينيها ولا تتكلم، كان ما
يشغلني وقتها هو شعوري بالأمان فقط، أريد أن انام، نظرت
إلى بيتي وغرفتي وكأنني في حلم، تتكون غرفتنا من سريرين في
مُقابل بابها، يتوسطهما منضدة مستطيلة عليها أباجورة وبعض
صورنا، كتب تقرأها ريهام قبل النوم، فوقها شباك ودائماً يتوسطها
المُصحف الشريف، على يمين الغرفة وعلى يسارها دولاب دائري
كبير، عليه عدة مرايا من الخارج نستخدمها أنا وريهام وقت
الزينة، لم أتخيل بعد كل ما عانيته أن أصل إلى بيتي مرة أخرى،
أخيراً تكلمت ريهام ولكن بصوت ضعيف خائف.

- هو إنتي شكلك عامل كده ليه؟

نظرت إلى إحدى المرايا المعلقة في الدولاب، فوجدت وجه
يشبه الوجه الأدمي لونه أصفر، يغطي عيناى الجاحظتين من
جميع الاتجاهات هالات سوداء عظيمة، يخيل اليك أن «نن العين»

أصبح أعلى من جفونها، عينين فيهم من الغموض المرعب ما يكفي لاثارة شكوك ريهام وأمي وجدتي وأي انسان يرانى، أضف إلى ذلك آثار الضرب والخرايش المتناثرة بقوة وكثرة على جسدى، جزعت من شكلى، لكنى تجاوزت الأمر من أجل ساعات نوم أتمناها بقوة.

استجديت النوم بعدما أطفئت ريهام اضاءة الأباJOR لكنى لم أستطيع، استمر عقلى يسألنى «هو ممكن أكون أنا السبب إني أجيلهم الحاجات دى هنا البيت؟»، جفلت عيني لدقائق فأتانى صوت جدتى عاليًا والتي تحسبه هى منخفضًا كعادتها..

- قومي يا بنتى شوفي بتك، إنتي هتنامى وتسيبى بتك كده؟
إنتي مسمعتيش كلامى من الأول، هم البنات ليهم غربة؟ حد يسبب الجامعات الخاصة ويروح لتعليم الحكومة؟ البنات ماتتشرش في الغربة، البت مالهاش غربة.

كان حديث جدتى وأمي التي كان صوتها منخفضا بحق يدور حول شكهم ان ما حدث لي بسبب علاقة غرامية! أردت أن أسرد لهم قصتى، آلام لا تتوقعونها ولا تحسبون لها حسابات، وأخيرًا علا صوت أمى باكيًا.

- يعنى أعمل إيه بس يا ماما؟

- قومي جيبى بتك تنام هنا وتقولنا ماله، تلاقى واد ضحك على عقلها ولا أخذ فلوسها ولا عملها مصيبة! أمال البنات بينضحك على عقلهم إزاي يا ختي؟

- استرها يا رب، استرها يا رب.

«استرها يا رب» كانت آخر ما سمعته في هذه الليلة، وقدّر الله لي أن أنام من الوقت عدداً من الساعات، قليلة كانت أو كثيرة، لا أبالي، المهم أنني أستعيد إحساسى بالأمان مرة أخرى الآن، أحمد الله اللطيف بعباده.

(١٣)

الساعة السابعة والنصف صباح من صبح يوم حديد، قمت
ريهام تعالي قبل أن تذهب لعمهم. جاءت أمي وحدثني وقد مررت
النور وشباك الغرفة سويًا وأخذوا في إداقتي بانقوة، نظهرت لي
ناائمة ولكن باءت محاولتي بانفشل.

استيقظت فوجدت جدي تجلس مستندة على عصفه في آخر
طرف السرير وأمي بجانبني صائحة.

- قومي اصحي قولي لي مالك؟

- ماليش.

- انطقي قولي يا مريم.

- ماليش.

نفزنتي جدي بعصاها في غيظ وصاحت هي الأخرى.

- انطقي يا بت قولي قامت قيامتك.

كانت ريهام تتزين في مرآة الحمام وهي تتابع ما يحدث وتنظر إلي
نظرة ذات مغزى إلى أن فاض بها فأنت إلينا.

- ما تقولي يا مريم بقى.. ساكنة ليه؟

كنت أحترم وعدي لياسمين ونحن في طريق عودتنا بعدم التحدث عن شيء، لكنني استسلمت إلى إلحاح أمي وجدتي، وتحفيز شقيقتي بالإفصاح، فبدأت أقص عليهم ما حدث، أحداث غير متتابعة، إنما شيء من هنا وشيء من هناك من الذاكرة المتاحة، لم أكن أجرؤ على ذكر سفري إلى «الدجال ماهر» لكنني ذكرت انقطاعي عن الصلاة والذكر وقراءة القرآن، تبدلت ملامح أمي تمامًا، فلا بد أنها كانت مهياة لرواية الولد الذي غرر بي كما ظنت جدتي، لكن ما تعرفه الآن أخطر على ما أظن، تجمد وجه أمي على ملامح اللاشئ، عينيها مفتوحتين عن آخرهما، تنهمر دموعها في صمت كأنها شلال لا ينقطع، بينما خلعت جدتي نظارتها من فوق أعينها وتركت عصاها جانبًا وأخذت تنظر لي في ذهول! ما أن انتهيت من حديثي حتى جذبتني جدتي من ذراعي بقوة تجاه الحمام.

- اتوضى.. اتوضى يا مريم.

دخلنا الحمام سويًا، فتحت جدتي النور، ثم فتحت صنوبر المياه وأخذت تمسح بيديها في كل مكان في جسدي بالماء في كل ركن من أركان الضوء وهي تسمي، إلى أن حان آخر أركان الضوء الخاص بالأرجل، فأحسست بأن جسدي يستقر فوق جبلين لا يطيعان لإرداتي، راودتني ذكرياتي مع الضوء في «قنا» فبكيت بصوت عالٍ، أجزم أنه أفرع أمي التي لازالت تبكي بالخارج.

- مش قادرة.. رجلى كأنهم مربوطين بحديد يا تيتة.

- استعيذ بالله وارفعي رجلك يا بتي، دول ماسكينك.

قاومت لأرفع رجلى الثانية، نظرت إلى أمى التي كانت واقفة تبكي في صمت وذهول، كأنها تحضر فيلم كئيب، جلست جدتى وأمى على سريرى مهمومين، ارتديت اسدال الصلاة واتخذت اتجاه القبلة في الاتجاه المعاكس لهما، أعطيتهم ظهرى وأقمت الصلاة، انتهيت من صلاتى وسلمت، التفت إليهم فوجدت الرعب والدهشة قد ملأت وجوههم وأعينهم فزع!

ظلوا هكذا ذاهلين محدقين في وجهى، بحركة تلقائية لطمت أمى وجهها وهي تنفحص وجهى، بينما أحسست بجدتى خائفة من شيء في وجهى، استدرت ونظرت إلى المرأة، فوجدت دماء ساخنة قد غطت وجهى كله! دماء طازجة كأنها آتية من مخلوق ذُبح للتوا

دماء ذات رائحة نتنه، لم أصدق ما أرى، أخذت مناديل ورقية وأخذت أمسحه حتى أتمكن من رؤية عيني، وأحدد الاتجاه الذي يأتي منه؟ بقيت أزيله في جنون حتى أعرف مصدره، ربما نزيف مفاجئ بأنفى؟ لكن إذا كان كذلك كيف وصل إلى جبهتى وجميع وجهى؟ وكيف سألت هذه الكمية الغزيرة؟ وما هذه الرائحة الكريهة؟ نظرت إلى سجادة الصلاة فلم أجد أثرا لبقعة واحدة من الدماء، اذن فقد جاء في لحظات التسليم من الصلاة! هل هذا معقول؟ صرخت أمى.

- قومي بسرعة لإغسلى النجاسة دى.. ريمحته وحشة.

أمسكت جدتى بهاتفها حينها.

- ألو.. أبو يا شيخ، أنت مش عارفنى؟ تعالى الحقنى، تعالى الحق أختك، بت بتك يا شيخ، راكبها الجماعة، أبوه أبوه.. لابسها

الجماعة.. لا.. لا.. مش بالليل تجيلها دلوقتي، دي بتنزل دم وتقبل
على الصلاة.

انهت المكالمة مع الشيخ ثم نظرت لنا تظمئتنا.

- خلاص الشيخ جاي دلوقتي.

حاولت أمي الاتصال بياسمين فلم تجيبها، فاتصلت بأخواتها

الأكبر «يسرا» و«هبه» وقصت عليهما كل شيء.

تأخر الشيخ كثيرا على مواعده، فاتصلت جدتي به كثيرا تحته
على أن يُعجل، ثم أدارت جهاز الكاسيت لنستمع إلى سورة البقرة،
أحسست كهرباء تسري في أذني وجسدي عند بدأ التلاوة، تؤلني
إيلاما شديدا لا أتحملة، سددت أذني في ظل مراقبة جدتي، صرخت
فيهم.

- وطوا الصوت ده شوية.

أكدت جدتي في ثقة.

- أهو... شفتي؟ أهو اللي راكبك ده هو اللي مش عاوزك تسمعيه

ولا تصلي، قاوميه يا مريم.. قاوميه.

كنت مُددة على فراشي، تجلس جدتي بجانبى ممسكة بيدي طوال
الوقت، تقرأ القرآن، للمرة الأولى في حياتي لا أريد سماع القرآن، من
شدة ألم الكهرباء التي أحسستها في أذني وفي رأسي! أبداً لم أصدق هذه
القصص من قبل، لم أفهم معنى لها، والآن أختبرها بنفسى، لا أدري
هل ما تعتقده جدتي حقيقة؟ تجي أمي للأطمئنان فأنظر إلى عينيها
الحزينة وأشعر بالذنب تجاهها، ألا يكفيني حزنها على فراق والدي؟

الآن أزيد من همومها، تولت جدتي مهمة وضوئي عند كل صلاة، عادت ريهام من عملها مع اقتراب صلاة المغرب، وسمعت عتاب أمي لها على عدم اخبارهم بما حدث، فاعتذرت ريهام مبررة أنها كانت قد وعدتني بعدم التحدث في هذا الشأن إلى أن أعود إلى أسوان.

بعد أن انتهيت من صلاة المغرب مباشرة رن جرس الباب، فتحت أمي الباب ورحبت بالشيخ، ثم اتصلت بيسرا وهبه للمجيء مصطحين ياسمين معهم، بعد دقائق حضر الجميع، جلسوا جميعاً في صالة الاستقبال فارتديت ملابسى وخرجت إليهم مع جدتي التي كنت استند إليها بدلاً من أن تستند هي إلى.

جلس الشيخ في المنتصف نحو طه نحن من كل الجوانب، جلست أمي أمامه بنفس حالة الصباح ذاهلة دامعة صامتة، كنت أنظر إلى الجميع وأتجاوزها كى لا أزيد احساسى بالذنب، هبه وجدتي وأنا نجلس على صف واحد، ويسرا على كرسى منفصل، بينما كانت ياسمين تجلس على يسار الشيخ، فكرت أن أبعث برسالة لها كى لا تبوح بقصة ماهر ولا أي شيء يتعلق به، نظرت إلى يديها فوجدتها لا تحمل هاتفها معها فوجمت، لم تتحرك ريهام من غرفتها، قطع صوت أمي الصمت.

- أهلا يا شيخ، دول بقي ..

قاطعها الشيخ.

- ثوانى.

بدأ في قراءة سورة البقرة حتى انتهى من الجزء الأول منها، ثم نظر
إلى أبيه عطف صادق.

- مالكم يا بابا؟

أرادت أمي أن تتحدث نيابة عنا فقاطعتها بركة وأشار لي.

- خليها هي تتكلم.

بدأت أقص عليه بعض الأحداث بإيجاز شديد، فإذا بوجه ماهر
يطل من جميع الصور المعلقة فوق الشيخ، صورة باهتة ثم تبدأ في
الوضوح تدريجياً، حتى أنني لم أستطيع أن أزيح عيني عن الصور،
وهو الشيء الذي لاحظته الشيخ وركز عليه معي ورُبما أزعجه؟ بعد
أن انضحت صورة ماهر تماماً على جميع الصور المعلقة على الحائط،
شبهت شهقة خاطفة تلتها رعشة في يدي لاحظها الشيخ ولم أقدر
على إيقافها، سألتني في حزم.

- هو ده بس اللي حصل؟

أجبت به بشرود.

- آه...

قد ملأني إحساس بالذنب يحنني على الاعتراف بما فعلته، حتى
أشفي تماماً وإحساس آخر خائف لا يريد أن يزيد من حزن أمي،
أخذاً يتصارعان وأنا أنتظر النتيجة.

نظر الشيخ متشككاً فيما أقول.

- متأكدة؟ انتوا معملتوش حاجة تانية؟

نظرت إليه متوقعة عواقب انتصار إحساسى بالذنب، لقد
أغضبت رب العالمين بلجوثي إلى ساحر مشعوذ، وسفري دون
علم أهلي رغم ثقتهم بي، فلو أن مكروها أصابني تلك الليلة لكان
اختفائي غامضاً، نعم لقد أخطأت ولا بد أن أتطهر الآن وأصلح ما
أفسدته، فاعترفت باكية.

- لا مش هو ده بالطبط الي حصل.

كان بكاء الخلاص كما أحسنه، بكاء غير مُتقطع صوته عال،
والجميع يرمقونني في ذهول وترقب، أكملت حديثي.

- بصراحة.. إحنا بعد ما حصلت معانا الأحداث الأولى، واحدة
معانا قالت نروح لواحد اسمه ماهر.

ثم قصصت كل الأحداث التي حاولت اخفائها ونسيانها، في ظل
هدوء ما قبل العاصفة، انتابت أُمى الغضب والدهشة.

- كده يا مريم دي آخرتها؟ تروحي لدجالين؟

هنا هاجت كل من يسرا وهبة يؤنبنانا أنا وياسمين، التي لازمها
الصمت من أول الجلسة إلى آخرها، قام الشيخ من جلسته مهدئا لهما
فلم يسمعه فاضطر إلى رفع صوته.

- لو سمحتم مش كده.. اتفضلوا جوه على الأوضة لو سمحتم.

مازالت ريهام تغلق غرفتها عليها وكأنها تحصن نفسها من شيء
لا تقوى حتى على السماع عنه، قامت جدتي مستندة على عصاها
ويسرا وهبة متجهين إلى الغرفة وهي تبرطم «أدى آخرة الدلع..
البت ماهاش غربة.. سفر وتنطيط، عايزة لبس.. تروح مصر تجيبها

تقولك عايزة توب (تقصد اللاب توب) تحمّلها! أدى آخرتها.. البت
مالهاش غربة، نظر الينا الشيخ في رافة.

- قولولي يا بنات.. لما الرجل ماهر ده بدأ يقرا حاجات في المطبخ
وهو على الموبايل.. لما سمعتوا صوت الطبخ.. كان يقول إيه؟

- ياسمين.. فكريني كده.. أنا مش فاكهة بجد؟

رفضت ياسمين الحديث تمامًا ولم تُجِب! فأردت مساعدتها.

- يا ياسمين.. قولي إيه اللي كان بيحصلك؟ فاكهة يوم مارجعت
من الموقف لقيتك لامة الشنط إنتي وهند، وقاعدين بره وكتتى
بتعيطي؟ ساعتها قلتيلي أنا مش داخله الشقة دى تانى.. إيه اللي
حصل؟

نظرت إلى ياسمين في حزن وأصررت على صمتها، حاول الشيخ
حثها على الكلام.

- وإنتي يا ياسمين، إيه اللي بيحصلك؟

- مفيش.

صحت غاضبة.

- كدابة، لما كنت بحكيها عن الرضوء كانت بتقول وأنا كمان، وفي
مرة كانت خايفة تنام في أوضتها وكانت بتترعش ونامت عند رجل
هند ولا انها تنام في الأوضة، ده غير سلسلتها الفضة اللي اختفت من
رقبتها، وآخر يوم كانت قاعدة على السلم مرعوبة وبتعيط.

نظر إليها الشيخ متأملًا في حين تأملت أنا موقفها، صحيح انها ليست
بجراة هند، أو حدة ليلي، لكن قدرتها على التحمل تفوقني بمراحل،

لقد تحملت أصوات المطبخ، وقاومت الكعب العال، والظل والمرأتان واليد الثالثة في الحمام! ما الذي حدث ليهزمها هكذا وترفض الحديث عنه بتعنت؟ لا بد أنه كان شيء أكبر، أكمل الشيخ.

- قصة البوت يا مريم، من امتى تقريبا؟

- من حوالي شهر وكام يوم تقريبا، أنا ممكن أجييلك نمرة ماهرده لو عايز تسأله على حاجة؟

- أعوذ بالله، مالي أنا وماله؟

تسللت أمتى وتساءلت في ترقب.

- هما خلاص كده لبسهم جن؟

أجابها الشيخ في أسى.

- من اللي بتشكيه مريم، البنات متبهدين خالص.

بدأت عيني تدمع ولم أرى أحدا من دموعي مع أذان العشاء، قام الشيخ ليصلي ثم يكمل ما بدأه، ذهبنا إلى الغرفة بالداخل، يجدننا الصمت، بعد أن انتهى نادى علينا وأكمل معنا، أو بمعنى أدق معي.

- إنتي عارفة يا بابا إنتي عملتي إيه؟ إنتي عارفة إنتي وقاعدة كده منجسة المكان حواليكى؟ عارفة صلواتك مش محسوبة لمدة قد إيه؟ عارفة كده ولا مش عارفة؟ استغفري ربنا يا بابا استغفري.

بكى قلبى بكاء توبة من كل ما فعلته، خرجت ياسمين عن صمتها المدهش هنا وشاركتنى البكاء، وهو الشئ الوحيد الذي تشاركناه بعد ذلك إلى الآن، استطرده الشيخ.

- إنا بنستعيز بالله من الشيطان الرجيم وإنتي بتروحي له
برجلك؟ هو ماهر ده إيه غير شيطان من شياطين الانس والعياذ
بالله؟ تعالى يا بابا اقعدي جنبى هنا.

كان شيخا صادقاً عطوفاً حنوناً رثيفاً بنا إلى أقصى الحدود، سمح
الوجه والأخلاق، أزهرياً يسمع ولا يحكم، انما يرشد بتعاليم الإسلام
ومنهج القرآن ولا يقبل نقود أو هدايا عينية.

جلست على يمينه وظلت ياسمين على يساره، قرأ علينا كثير من
الآيات القرآنية سوياً، ثم قرأ آيات معينة على رأس كل واحدة منا
على حدى، تلاها بالرقية الشرعية ثم بعض الأدعية، كنت خلالها
مغمضة العينين أستغفر الله، مر كثير من الوقت لتصبح الساعة الآن
العاشرة والنصف مساءً، كانت أمى تعامله كطبيب تنتظر تشخيصه
لحالة مريض.

- إيه الكلام يا شيخ؟

- أنا هجيلهم بكرة تانى.

كان الشيخ مرهقا بعد أن أنهى جلسته معنا، لكن أمى حاصرته
بالأسئلة.

- هي عشان كده خاصة؟

- أنا قرئت عليها مفيش حاجة فيها إن شاء الله.

أوضحت سبب نقصان وزنى.

- أنا خاصة عشان مكتتش باكل في المطبخ، والأصوات اللي فيه

ولا كنت بقدر أنام من اللي بيحصل في باقي الشقة.

نظر إلى الشيخ وقال لي مُشفقاً.

- كتر خيرك يا بنتي أنا مش عارف كتتي قاعدة كده إزاي؟

- مش عارفه يا شيخ.. كنت حاسة متقيدة في المكان!

- أعود بالله من الشيطان الرجيم!

نظر الشيخ إلى أمي متوجساً.

- أنا تعبت.. هجيلهم بكرة، النهارده يا بنات مفيش نوم إلا لما تصلوا كل الصلوات، وتناموا على وضوء وتستغفروا وتقرأوا سورة «ياسين»، «ألا بذكر الله تطمئن القلوب»، ومع كل أذان فجر تقرأوا أو آخر سورة «البقرة»، لما تحصلنا حاجة نلجأ لمين؟ لله سبحانه وتعالى.

- بس أنا تعبت منهم يا شيخ.

- بعد اللي عملناه النهارده ومجهوداتك في الاستغفار والذكر وارد حد يطلعك منهم! لو حد طلعك أو حسيتي بشعور غريب أو دم نزل تاني لازم تكلميني، بس إنتي خليكى دايبا في ذكر الله.

كان الشيخ بوجه كلامه إلى فقط دون ياسمين وكأنها غير موجودة! ربها لأنها لم تتحدث منذ البداية! ثم لمحت نظرات يأس وحزن عميق في عيني أمي وهي تتحدث مع الشيخ وتوصله إلى الباب، بعدها خرجت يسرا وهبه وجدتي من الغرفة لينضموا إلينا قلقين بينما ريهام مازالت تجلس على سريرها متكمنة خائفة، سألت هبه.

- إيه الأخبار يا جماعة؟

رددت أمي ما قاله الشيخ.

- والله هو يقول مفيش حاجة ظاهرة عليهم بس لو حسوا
بحاجة نتصل بيه على طول.

هنا خرجت هبه عن اتزانها وعلى صوتها.

- تسافروا من بلد لبلد من غير اذن أهاليكم؟ ده لا أدب ولا
دين ولا تربية تقول كده! أخص عليكم.. دى آخرة الأمانة؟ ولين؟
لدجال!

لقد أنبت نفسي وعنفتها بما يكفي ولم أكن أستطيع تحمل المزيد
فتركتهم جميعا دون استئذان ودخلت غرفتي لريهام، نظرت اليها
فوجدتها على حالها منكمشة توشك أن تبكي.

- قالك إيه؟

سألتنى ريهام في خوف.

- مفيش حاجة بس لو حسيت بحاجة أكلمه.

- ممممم.

(١٤)

جلست على سريري وأمسكت بالمصحف وبدأت في قراءة سورة ياسين، كانت قرأتى هنا تتسم بالخشوع، كانت جدتى تجمج وتذهب متكأة على عصاها تتحدث إلى نفسها والى في غضب، كانت توجه لي كلامتها وتضربني ضربات خفيفة بعصاها في كتفي فأضطر إلى قطع قراءتي وأنظر إليها في عطف، ما أجمل هذه السيدة، تعيش من أجل أولادها وأحفادها فقط، تهتم بأدق تفاصيل حياتهم، تخاف عليهم وتحميهم بكل ما استطاعت من قوة رغم ضعفها وقلة حيلتها، أحضرت كرسيًا تحمله في مشقة ووضعت بجانب سريري وجلست تتكى على عصاها وتؤكد صحة ما قالت من قبل.

- واحدة في سنك تشيل موبايلىن ليه؟ وايه لازمة التاب توب (تقصد اللاب توب) تاخديه معاكى الجامعة؟ نايمة طول النهار وصاحية تجمعي الصلوات وليلك كله على التاب توب! ربنا قال كده؟

كنت أحاول الرجوع إلى القراءة لأنى أعرفها جيدا ستظل تؤنبنى طوال الوقت، رجعت إلى القراءة فأخطأت وزدت ألف ولام على الآية، كانت جدتى تحفظ كثير من السور عن ظهر قلب، فنغزتنى في كتفي بعصاها.

- غلط، غلط، جبتي الألف دي مينين؟ طبعا ما شياطينك هي
اللي بتقولك!

أردت وقتها أن أضحك بشدة، لكن إذا فعلتها قد يرجعوني حتى
الموت من فرط الغيظ، فتغلبت على هذا الشعور وأظهرت العكس.

- يووووه يا تيتة، سييبنى بقي شوية؟

- لا مش هسيبك، أسيبك ياخدوكى منى؟ والله أبدا.

نظرت إليها في حب وشفقة مما سببته لها ولأمى ولجميع من في البيت،
وحدت الله أن أخى لم يحضر كل هذه الأحداث، لا أعلم ما كان سوف
يفعله تحديدا. جاءت أمى أيضا مشفقة على أمها فأرادت أن تستريح.

- قومى يا أمى نامى.

- أنا هنام هنا جنبها، أنا مش هخليهم يخذوها، روحى إنتي
نامى.. إنتي اللي فيكى مكفيكى يا بتى، كفاية قطعة وسطك عليهم.

أبت جدتى بعد محاولات أمى المستميتة أن تتركنى بمفردي لثلا
يخطفني الجن على حد اعتقادها! كانت الساعة الثانية عشر صباحا
وكانت هذه هي المرة الأولى حقا التي أنام فيها مطمئنة، أشعر بسلام
عميق يفمرنى رغم كل ما مررت به من خوف وشكوك.

فتحت عيني ورأيت ساعة الحائط تشير عقاربها إلى الساعة
العاشرة صباحا، هل غفوت كل هذه الساعات حقا، مرت في سلام
كأنها دقائق، نظرت بجانبى فوجدت جدتى مازالت على هيبتها!
بجانبي تنظر لي في حب متكأة على عصاها! هل زار النوم هذه
السيدة؟ سألتنى بحب.

- حاجة حصلتلك؟

- لا يا تبتة والله، الحمد لله، أول مرة أنا مطمنة!

- طب تعالى معايا.

ذهبت بي إلى الحمام توضئني كالعادة، ولأول مرة تخف حركة الأرجل في الوضوء وتعود إلى نسبة كبيرة من طبيعتها، أحسست بفرحة داخلية ولكنى تذكرت الدم الذي نزفته من أنفي والذي انتقل إلى جميع وجهي لا أعلم كيف والذي لم يترك أثرًا على سجادة الصلاة! فتمنيت من الله ألا أراه مرة أخرى، افترشت السجادة متأهبة للصلاة في حين جلست جدتي تنظر إلى في ترقب، هل سأنزف دما أم لا؟ أنهيت الصلاة والتفت إلى جدتي في خوف وكأني أسألها هل بي شيء؟ فرأيت وجهها البشوش يضحك فعرفت الجواب، أحضرت لي جدتي فاتح شهية وإفطارًا فخماً كان كافيًا لفتح شهية أي إنسان، لكنني لم أكن لأحتمل أكثر مما أتقوت به فقط، سمعت صوت أمي تتصل بوالدة هند وليلى وتقص عليهم ما حدث، توقعت ردة فعلهم لكن لم أعرفها.

أحمد الله كل لحظة على وجود هبته الغالية جدتي خاصة في مثل هذه الظروف، كانت فترة الحداد تقتضي أن تمكث أمي بالبيت أربعة أشهر وعشرة أيام كاملة، حدثت هذه الأحداث بالطبع في أثناء فترة الحداد فاعتمدت أمي على أخوات ياسمين لمصاحبتى لقنا مرة أخرى من أجل الأيام الأخيرة بها، ذلك لأنها تعرفهم كعائلة منذ زمن وثق بهم، وعلى والدة هند وليلى من باب الأمانة فلم تكن صلتها بهم.

قوية، فقط بعض الاتصالات للاطمئنان وتقديم الواجبات والتهنئة في الأعياد وما شابه ذلك.

اقتحمت أمى الغرفة وأصدرت تعليقات صارمة.

- إنتي سامعة طبعاً؟ أنا قلت لكل الأمهات عشان يبقوا عارفين المصيبة اللي انتوا فيها، وبعد كده لما تروحي تجيبى بقية حاجتك اللي في قنا مش هتروحي وحدك، هيكون معاكى أخوات ياسمين وأمهات البنات.

هنا تذكرت قنا من جديد وتذكرت الامتحانات التي سوف أرسب فيها بلا شك، خرجت أمى إلى المطبخ فرن هاتفي، انه عمر.. ترددت أأجيبه أم لا؟ ولما لا؟ كنت قد نسيت واقعة محطة القطار وما فعله عمر بياسمين فما نحن فيه أكبر بكثير من التفكير في مثل هذه الأشياء الآن، أخذت الهاتف لأنكلم بعيداً عن جدتي، التي كانت تلازمني وترافقني كظلي حتى إلى الحمام خوفاً من أن يحطفني الجن، دخلت غرفة أمى لأرد عليه بصوت منخفض.

- أيوه يا عمر.

- مريم.. أنا مش عارف أقولك إيه؟ أنا بتصل عشان أعتذر لك، بس الحيوانة الثانية دى مش هتأسف لها.

- لو سمحت يا عمر، من غير غلط، وكفاية قوى اللي عملته في المحطة!

- أنا مش هبرر اللي عملته، أنا آسف.. بس طمنيني عليكوا.. عملتوا إيه؟

بدأت أحكى باختصار ما مررنا به مع الشيخ ورويت له كيف
ظهر لي وجه الشيخ ماهر على البراويز المعلقة على الجدران تدريجياً
وما قاله الشيخ، لم يعلق عمر حينها لكنى أحسست أنها المرة الأولى
التي ينصت فيها عمر باهتمام وجدية دون أن يسخر منا أو يكذبنا.

- إنتي جاية قنا امتى؟

هنا سمعت صوت جدتى يأتي في الخلفية «ولاد مين اللي
بتحكيلهم على فضيحتك؟»

- مش عارفة بس ماما عاوزانى أجيب بقية حاجاتي، ومش
عارفة أنكلم دلوقتي يا عمر، البيت كله قالب عليا وجدتى زى ما
انت سامعها أهو، لازم أقفل.. باى.

أنهيت مكالمتى معه فجاءتنى منه رسالة «ماتشيليش هم حاجة
في قنا خالص ولو عايزة فندق تأجريه أو شقة هبقى معاكى.. بس
الكلام ده ليكى إنتي لوحدك!»

أرسلت رسالة رداله «ربنا يخليك يا عمر.. ده برضه العشم، بس
على فكرة باسمين مش وحشة قوى كده! نتكلم بعدين»
رأيت أمى تتصل بهازن.

- أيوة يا مازن ازيك؟ كنت عايزة أقولك على مريم والشقة اللي
كانت فيها.

..... -

- انت كنت عارف؟ طيب أعمل إيه فيها دلوقتي؟

..... -

- هل تحق تحصل دروسها؟

-

- طيب طيب يا مازن ماشي.. ياللا سلام.

جاءت أمي تنظر لي في شدة وحزم.

- إنتي هتسافري بكرة، فاضل على الامتحانات خمسة أيام بس ومازن هيشركك المنهج ليل نهار عشان تعوضني، هتقعدى في فندق ومشوف أختك ولا خالتك حد فيهم يعرف ياخذ إجازة من شغله وييجي معاكي، أسوأ الفروض هيبقى معاكي ياسمين وأخواتها.

جاء الشيخ مرة ثانية في المساء لتكملة جلسته بحضور نفس المجموعة باستثناء ريهام طبعاً، هذه الجلسة أهدأ كثيراً من الجلسة الأولى، فلم يظهر وجه الشيخ ماهر ولم أبكى أنا أو ياسمين، كانت مقتصرة على قراءة القرآن والأدعية، ثم أعطانا ماء زمزم لنقرأ عليه قرآن ونشره أو نتوضأ به شرط أن لا تقع منه قطرات على الأرض، وجود جدتي بجانبى في حد ذاته هو قمة الأمان كما أنها تدفعنى للترحم دينياً أكثر من ذي قبل وأحافظ على صلواتي وأذكارى وقراءتي للقرآن.

تمكنت أخيراً يسرا وزوجها وهبة من السفر معنا أنا وياسمين بعدها بيومين، أقمنا في الفندق الكبير الوحيد بقنا، ووصلنا بعد اتصال أمى بيازن بيوم ونصف على الأقل، لم ينقطع اتصالنا بعمر، كانت ياسمين تتصل به ونحن في القطار في طريقنا إلى قنا فيرفض أن يكلمها فتعطيني إياه كي أخبره بمسيرة الأمور معنا، أتحدث بصوت مُنخفض.

- أبوه يا عمر.. إحنا قربنا للشقة.

- أنا جايلك.

- لا تبجي فين يا عمر؟ ده أمهات البنات وأهلهم هنا؟

- لا يا مريم أنا جايلك، إنتي الوحيدة اللي مش معاكي أهلك، وإنتي لو بتعتبريني أخوكى بجد خليني موجود معاكي..

وصلنا الشارع فوجدت سيارته تقف أمام العمارة، وجدنا أناساً كثيرة يطلون من الشبايك وبنات من الجامعة يقفن بالخارج، ناظرين الينا بمحذثن بعضهم في ريبة وحياء مُزيف، باب العمارة مفتوح وباب الشقة أيضاً، لم أعرف إلى الآن ما الذي حدث ومن الذي أخبر الحجة سعاد، قبل أن أدخل هذه الشقة الملعونة تذكرت

أن أقرأ آية الكرسي فقرأتها واستعدت بالله من الشيطان الرجيم ودخلنا، رأيت شيخ يرتدى الزى الأزهرى ذو العمامة البيضاء والطاقيـة الحمراء الشهيرة يجلس في منتصف الحضور، كانت له هبة واجلال تستشعرهما عند رؤيته، بمجرد دخولنا الشقة التفتت إلينا الحجة سعاد ونظرت إلى في غضب شديد.

- أهلا يا هانم.. مين قالك تفتحي الأوضة؟ أنا قلتك تفتحي الأوضة دى؟ أنا مش منبهة مية ألف مرة بلاش تفتحوا الأوضة دى؟ ثلاث أوض مش مكفينكم؟ انتوا متعرفوش الطلبة اللي في سكنات الجامعة عايشين إزاي؟ دى عنابر والبنات نايمة فيها.

- أوضة؟ أوضة إيه؟

كنت بالفعل قد نسيت تمامًا فتح الغرفة الرابعة، حدثنى نفسي أن ما نحن فيه أسوأ بكثير، وهذه السيدة المخبولة تركت كل شيء وتحدثت فقط عن مخالفتى لأوامرها!

نظرت إلى الشيخ مرة أخرى في تمنعن، فعرفت أنه الشيخ الذي أعطيته تبرعات الشتاء بمسجد «عبد الرحيم القناوي»، فاطمأننت وعرفته بنفسى.

- السلام عليكم، ازيك يا شيخ، أن اللي جيتلك مسجد سيدي القناوي وحكيتلك اللي حصل معايا ومع صحباتى.

نظر إلى وتبسم.

- فاكرك يا بنتى، هو إنتي اللي هنا؟

- ربنا نجانا يا شيخ والله، أنا شفت بلاوى.

- الحمد لله الذي لا يحمده على مكروه سواه.

هند ووالدتها وليلى ووالدتها والحجة سعاد جالسين، لم نلق السلام ولم يكلم أحدنا الآخر، كما تبادلت الأمهات والأخوات نظرات الازدراء والانتقام لبعض، كل بنت في نظر أهلها هي البرينة المضحوك عليها من قبل الآخرين وهي من تم التفرير بها لتسافر من بلدة إلى أخرى بدون موافقة أهلها، إذا كنا جميعاً قد عُرر بنا فمن هي المذنبة بيننا؟

نحن جميعاً قد أخطئنا ولا نريد تحمل المسئولية أو رؤية عواقب خطئنا، الحمد لله إني أدرك هذا، فالادراك في حد ذاته نعمة كبيرة، استطرت الحجة سعاد.

- الأوضة اللي إنتي فتحتها؟ ليه فتحتها؟

ألفت هند التهمة بعيداً عنها.

- هي اللي قالت لنا نفتح الأوضة.

صرخت الحجة سعاد مُكررة.

- ليه فتحتها؟ أموت وأعرف فتحتها ليه وانتو أربعة بس والشقة ثلاث أوض!

نظرت إلى هند وسردت بإيجاز.

- هقول ليه، جت ليل بتقولى أنا عاوزة أقعد معاكى في الأوضة عشان مابتعرفش تمام بالليل من مكالمات هند، فاقترحت عليها نفتح الأوضة دى ونعملها سنترال عشان تتكلم هند براحتها،

كان أقارب وجيران الحجة سعاد على علم بالأحداث طبقاً لروايتها، فكنا نستقبل من حين لآخر شخصيات لم نرها من قبل، يلقوا السلام ثم يجلسوا ليطمئنوا عليها كما يدعون، تساءلت أين «عماد»؟ أين ابنها؟ بالرغم من خلافاته معها، إلا أن من واجبه أن يقف بجانبها الآن، حتى وإن كان الحق بعيداً عنها، قامت الحجة سعاد لتدخل الحمام في شقتها، وسوف تعود بعد دقائق، الجميع يجلسون في انتظارها بينما الشيخ يقرأ القرآن، وباب الشقة مازال مفتوح، هنا نادتنى ياسمين وهمست في الحاح.

- كلمى عمر.. كلمى عمر.

تعجبت مما تقول ونظرت إليها في دهشة.

- أكلمه أفرله إيه دلوقتى يا ياسمين؟ سيبنى باللى أنا فيه الله يخليكى.

- ما اللي إنتي فيه كلنا فيه يا مريم، ياللا خليه يدخل.

أجبتها وقد وقف عقلى عن التفكير.

- إيه؟ يدخل فين والأهالي دى نقولها إيه؟

- أنا هتصرف بس خليه يدخل بسرعة..

- طيب أنا هكلمه بس إنتي اللي تشيلي الليلة؟ أنا مش ناقصة.

- ماشي مالكيش دعوة، كأنه قريب الحجة سعاد.

- بالضبط، أنا ماليش دعوة.

اتصلت به فرد في الحال.

- أيوه يا عمر.. تعالى بسرعة.

سأل يسترشد بي ماذا يفعل في موقف كهذا.

- أقول إيه طيب؟ قريبك؟

- لا ماليش دعوة، ياسمين هاتظبط.. هي قالتلي كده.

جاء عمر في دقيقتين ودخل، صاحبتة نظرات الأهالي مستفسرة

«أنت مين؟» لكنه تجاهل تساؤل الأعين وألقى السلام.

- السلام عليكم، إيه الأخبار؟

قامت ياسمين إليه تحدّثه في سلاسة، تظاهرت أمام أهلها أنه أحد أقارب الحجة سعاد، وأحد ساكني العمارة، وتظاهرت أمام الباقون أنه قريبها، تطلب الموقف جرأة وثقة لم أكن لأتحلى بهما، قامت هند من مكانها وجاءت إلى تهمس في تعجب.

- إيه اللي ياسمين بتعمله ده؟ جايبه عمر لحد هنا! فضحيتنا هتبقى بجلاجل.

نظرت إلى هند وكأنني أراهم جميعاً لأول مرة، ما تنتقده هند ليس حفاظاً على التقاليد حقيقة، إنها الغيرة فقط لا غير.

نزلت الحججة سعاد وجلست مكانها بجانب الباب، لم دار حوار
مُهم بين يسرا ووالدة ليل مُتعلق بفترة الامتحانات، سألت والدة
ليل.

- طب البنات دي هتروح فين دلوقتى؟

أجابتها يسرا.

- إحنا هانقعد في فندق مؤقتًا لحد مانشوف هنعمل إيه.

انتهى الشيخ من قرائته لجزء من القرآن الكريم، أخذ يدهو أدهية
من القرآن، انتهى من الدعاء ونظر إلى والدة ليل بعيون لملؤها الثقة.

- أصلا كده ولا كده كانوا لازم يمشوا من الشقة دى.

نظرت إليه الحججة سعاد واقتضبت حاجبيها، فبادلها نفس النظرة
في غضب، ينهرها صوته مُستخفًا بها في استجواب غليظ.

- الأوضة اللي جوه دى يا حاجة فيها حاجات كبيرة جدًا! صح؟

لم ترتبك الحججة سعاد واستجمعت قواها وتجاهلته، واصل الشيخ
كلامه ناظرًا إلينا جميعًا وأشار إلى الحججة سعاد.

- الست دى كانت بتحضر فيها أرواح، وفي مشكلة كبيرة

حصلت زمان معاها، صح يا حجة؟

أحمرت وجنتيها ولم تنطق، فتحت عينيها في ذهول وكأنها
تسترجع ذكريات قديمة، مال الشيخ بجسده إلى الأمام بالتجاهها ثم
رمى هذه القبلة في وجهنا جميعا ليسمع ردها، تحاصرنا نظراته في
تحذ واستنكار.

- صح كلامي؟

لم تجبه بالنفي أو الايجاب، أكمل الشيخ.

- الأوضة دى كان محبوس جن كثير فيها بتعويدة، فلما فتحتوا الأوضة طلوعوا في الشقة كلها، يبدو إن الحجة كانت بتحاول تحضر روح أحد الصالحين. استغفر الله العظيم، لما جاتلك المجموعة دول معرفتيش تصرفيهم، وبالكاد جبتى تعويدة قديمة من ماهر الساحر تجبسهم كلهم في الأوضة دي، غير أن في حدث مهم وخطير حصل في نفس الأوضة، صح؟

عندما ذكر أمامى الاسم لم أستطع أن أتذكر إلا ماهر الدجال، فأنا لا أعرف ماهر غيره، سألت في دهشة واندفاع.

- الشيخ ماهر بتاع البياضية؟

نظرت إلى هند غير مصدقة ورأيت هند والبنات وقد انتابهم نفس حالتى ناظرين إلى لا شيء، نظر الشيخ إلى في غضب واسترسل.

- ماهوش شيخ يا بنتى ده مشعوذ، أعوذ بالله من الكفر.

نظرت الحجة سعاد إلى في حنق.

- عاجبك كده.. منك لله.

تذكرت ما قاله لي عماد ابنها فقلت كأني نسيت بُرهانًا لبراءتى.

- أنا مش فاهمة إيه اللي مضايقت قوى كده! إلا لو كان كلام الشيخ صح؟ وعلى فكرة بقى ابنك عماد هو اللي قال لي أفتح الأوضة لو عايزة، يعنى متصرفتش لوحدي.

التفتت إلى الحجة سعاد في ببطء كأنها قادمة من عالم آخر.

- عماد مين؟

- عماد ابنك.

نظرت لي نظرة كلها شك وعدم تصديق ووقفت وساد الصمت
لثواني، مرت كأنها ساعات، ثم بلعت ريقها ونطقت.

- شفتيه فين وامتى؟

- اتقابلنا صدفة في الجامعة كذا مرة، ومرة على السلم هنا، وهو
اللي قالى إنه عادى لو فتحت الأوضة الرابعة.

ظلت تنظر إلى في بلاهة لكنى اكتشفت أن الجمع الغفير أيضا
يعيرنى نفس النظرة، وهنا ظهر صاحب محل الدش في وسط الحضور
مذهولاً كالباقي وقال في صوت خائف..

- سلام قولاً من رب رحيم.

نظرت إلى الحجة سعاد وتحدثت كأنها في عالم آخر ترى منه ما
تريد.

- عماد ابني مات!

نظرت إليها في استخفاف.

- لا حول ولا قوة إلا بالله، يعنى مش عشان متخافه معاه تقولي

مات حرام عليكى.

- أنا ابني ميت من أكثر من ١٥ سنة.

لم أصدق ما تقول.

- بتقولي إيه؟ أنا قصدي عماد.

- معنديش غيره، مات من أكثر من ١٥ سنة.

أحاطت يداي بأذني، لا أريد أن أسمع.

- بس.. بس متقوليش كده، أو مال مين اللي كان يقابلني

ريكلمني حرام عليكي.

نظرت البنات إلى وفغرن أفواههن، وبدأت أنهار ونزلت دموعي سيولاً في سابقة لم أعهد لها، كما انهارت البنات أيضاً واضعات كفوفهن على وجوههن غير مُصدقات، جحظت عين عمر ولا أذكر حالة الباقيين، لكن أتذكر تمامًا حالة الحجة سعاد، التي قامت إلى وضغطت على كلتا ذراعي وهزتنني في عنف.

- هو جالك؟ انطقي... جالك إمتى وفين؟ ومجاليش أنا ليه؟

أنا أمه؟ أنا اللي تعبت لحد ما جيته وأنا اللي ربيته، أنا اللي بتمنى أشوفه... يجييك إنتي ليه؟

ساد صمت مهيب، وبقيت أبكي بلا توقف وكان الله لم يخلق إلا البكاء في هذه الدنيا، واصلت الحجة سعاد ما بدأت في هيستيريا وظلت تعنفني وتهزني بكل قوتها وكأنها تعاقبني.

- اتكلمى قوليلي حرام عليكي، قالك إيه... لا لا إنتي أكيد بتكدي.

- والله ما بكذب، هو لابس بدلة قديمة شوية ورفيع وأسمر، بأمانة إنك بتحبي الفراخ والبطاطس.. صح؟ هو قالى كده «هي بتحبهم».

- دى إيمان اللي كانت بتحب الفراخ والبطاطس مش أنا.
- إيمان خطيبته؟ كانت يعني إيه؟
- صاحب محل الدش يقرأ القرآن بصوت شبه مسموع ويتمتم.
- سلام قولاً من رب رحيم.
- ثم تذكرت شيئاً مهماً يساعد موقفي، فسألت ياسمين.
- ياسمين.. فاكرة الحج أمين عامر؟
- لأ.. مين ده؟
- يا ياسمين البياع اللي وصلنى لعماد لما جينا نشوف الشقة.
- آه.. صاحب الدكان اللي على أول الشارع بره خالص؟
- قوليلهم.. هو اللي ودانى لمكتب عماد في الأول والأتين
وصلونى لعندك، والحج أمين فضل مستننى تحت لحد ما طلعتك
واتفقنا.
- أردفت الحجة سعاد
- مكتب عماد مقبول من يوم ما...
سكنت فجأة لثوانى ثم أكملت في إنكار
- إنتي كدابة.. طب ومقلتليش ليه ساعتها؟
قصصت عليها ما كان ثم أكملت.
- عماد قالى انه على خلاف معاكي، وإنه أحسن أقولك أنا شفت
اليافطة اللي على أول الشارع... اسألى الحج أمين.
صاح في دهشة أحد أقارب الحجة سعاد وجارها.

- حج أمين مين يا آنسة؟
- صاحب المحل الصغير اللي بره على الشارع.
في ظل بكائي وبكاء الحجة سعاد وذهول الجميع، قالت الحجة
سعاد.

- المحل اللي على طول قافل؟
أكدت ياسمين.

- فعلا من ساعة ما جينا والرجل مش ببيان.
تكلم الرجل مرة ثانية في استنكار.

- بيان إزاي وهو ميت من يبجي عشر سنين!
أردت أن أتأكد.

- يا جماعة الرجل حجمه قليل كده، قصير ورفيع؟
نظر لى الشيخ في رافة.

- الله يرحمه يا بنتى كنت أعرفه ومشيت في جنازته وكان عماد
يبجبه جدًا الله يرحمهم ويرحم أمواتنا جميعًا.
نظرت إليه وصرخت باكية.

- لا.... لا.... لا يا ياسمين إنتي شفتيه معايا.. يا جماعة حرام
عليكم إحنا مش مجانين.. أنا مش مجنونة.

انهارت ياسمين في البكاء ودفنت رأسها بين يديها، ولم ينطق أحد
لئوانى أورها دقائق لا أدري، تكلم الشيخ في حزم.

- عملتى إيه في ابيان يا حاجة سعاد؟

- أنا معملتلهاش حاجة.. إيمان انتحرت لما رفضت جوازها
وهددت ابني إني هأذيها لو اتجوزوا لكن معملتش حاجة، كنت بهدد
بس، هي اللي عملت، هي اللي كانت بتغير عليه بجنون، وكانت
عايزة تاخده مني، وفوق كل ده كانت نصرانية، وكيان بحراوية
ملهاش عوايدنا. تذكرت ما مربي، فهمست.

- الصليب المرسوم!

نظرت الحجة سعاد في اللاشع وأردفت في هوس بات واضح.
- المفروض يتجوز واحدة نقاوة عيني أنا، واحدة متاخدوش
مني، واحدة أنا اللي امشيها على كيني، مش تشتكيني له.
أكمل الشيخ مواجهته.

- وعماد ابنك مات إزاي؟

اعتدلت في جلستها حتى واجهته في غضب.

- ولو انه مش من حقك تسأل أصلا، لكن حاضر هقولكم كلكم،
هرضي فضولكم اللي مش هيموت، عماد كان هيتجوز في الشقة دي.
ترقرقت دموع الحجة سعاد وشردت بعيدا، نظر الشيخ اليها
وكانه يعرف الماضي.

- وبعدين كمي.

- كنت عارفة انه بيحبها هنا علشان تختار لون الحيطه والحاجات
بتاعة العرايس دي، كان معاها المفتاح وشايلة حاجاتها هنا، كانت
بتيجي لوحدها معاه من الجامعة عادى، وأهلها عارفين برضه
عادى! مشفتش فُجر كده.

في ايقاع سريع انقطع نور الشقة للحظات وسمعنا صوت السكون،
ثم عاد النور من جديد، وسط همهمات واستعاذات بالله، اكتشفت أن
نور النهار غير قادر على منحك الأمان في تلك اللحظات، فرغم أننا
جميعًا نعلم أن توقيتنا الصباح إلا أنه قد بات ليلاً مُخَيِّفًا في لحظات
قصيرة.

نظر الشيخ إلى مصادر النور ثم أكمل في صوت يملؤه الإيمان.
- كمل أنا سامع.

- في مرة امتحاننا خناقة كبيرة ووعدتها ان الجوازة دي مش هتتم،
كنت دايماً بقولها كده، تانى يوم بالليل وأنا قاعدة فوق سمعت الباب
بيتنح وبتقفل، بعدها بشوية سمعت الباب بيفتح ويقفل تانى وكان
الوقت اتأخر فقلقت، وأنا بلبس سمعت صوت عماد يبصرخ ويعيط،
على بال ما نزلت لقيته مرمى على الأرض دمه سايح ويبطلع في الروح
خلاص، وهي مرمية جنبه قاطعة شرايينها وقاطعة النفس، يا حبيب
قلب أمك ياخويا.

عقب الشيخ ليتأكد.

- الاتنين انتحروا هنا؟

جففت دموعها وقالت كأنها في كامل وعيها لكن نظراتها زائغة.

- هي انتحرت بس، عماد عايش.

ثم نظرت إلى نظرة شيطانية.

- كان بيطلعلك فين قولى؟

لم تجف دموعي، أتمنى أن يكون كابوسًا سخيّف أضطر أن أجيب
على أسئلته.

- في الجامعة، كنت بشوفه صدفة والله كل مرة.

انطلق بخور هائل في الشقة لانعلم مصدره، نظر الجميع في ذعر،
مرت لحظات كأنها الدهر، هدا دخان البخور شيئًا فشيئًا، رأيناه قادم
من خارج باب الشقة، خرج بعض الأقارب ليعرفوا مصدر البخور
حتى وصلوا للشارع، لكن عادوا بلا إجابة مقنعة، لا أحد يسكن
غيرنا في العمارة ولم يمر غريب أماننا يحمل مبخرة! نظر الشيخ في
ثبات إلى الجميع وأردف.

- اهدوا يا جماعة وأقروا قرآن في سرکم، كملی لو سمحتِ أنا
سامع.

كانت الحجة سعاد في عالم آخر، سيطرت على عينيها نظرات
هستيرية شيطانية وهي تنظر للبخور، كانت ملاحظها تضحك وتبكي
في وقت واحد.

هال عمر ما يسمع ويرى، نظر إلى لا يكاد يصدق وأردف في
صوت خفيض.

- كل مرة! هما كام مرة؟ وازای هو ميت؟

قاطعته الحجة سعاد في حدة.

- هو بيبقى جايلك دي مش صدفة، قولي فين جوه الجامعة أروح

له؟

اضطرتت إلى إجابتها غير مُصدقة لما أقول أو أسمع.

- في حته كده ناحية كلية حقوق.

أكملت سؤالها وكأنها تعرف إجابتي.

- عند شجرة كبيرة؟

- أيوه صح وقالى إنه بيحبها مش عارف ليه.

صاح بعض الحاضرين « أعوذ بالله من الشيطان الرجيم »

تذكرت هند شيئاً فصاحت بدورها.

- يا لهوى علشان كده سارة قالتلى إنهم قلقانين عليكى، وإن في

بنات شافوكى قاعدة بتكلمي نفسك هناك!

ثم أكدت ليلي.

- وقالتلى أنا كمان.. ده بجد بقى!

صحت في غضب.

- إيه؟ وليه مقولتوليش؟

أكمل صاحب محل الدش في ريبة.

- «سلام قولاً من رب رحيم»، صراحة يا أبله أنا كنت فاكرك في

الأول تعبانة شوية، لأنى أول مرة شفتك هنا كنتى واقفة في الشارع

بتكلمي نفسك، دخلتى العمارة عند الحججة سعاد، وبعدين لمحتك

بتكلمي نفسك تانى في مدخل العمارة، شفتك لن البوابة كانت

مفتوحة على آخرها، قلت يمكن بتكلم الحججة، لكن ملقيتش حد

برضه! قلت أكيد لا مؤاخذه بعافية شوية، مع إنك لسه صغيرة، بس

لما جيتيل بعدها إنتي والأبله صاحبتك لقيتك بتكلمي زينا عادى،

قلت يمكن بتعالجى وكده، ربنا يعفو عنك مكنتش فاكرك ملبوسة
اللهم احفظنا، ما خطرش في بالى كل ده!
عقت ليل.

- بصراحة يا مريم إحنا قلنا أكيد أعصابك تعبانة من اللي
بيحصل، حتى بعد كده إنتي في البيت مكنتيش طبيعية خالص.
أكملت حديثها الحجة سعاد بصوت مسموع شاردة في ملكوتها.
- عند الشجرة الكبيرة، ده المكان اللي كان بيقابل فيه ايمان، وده
المكان اللي دفنت فيه حاجة تخصه، آه يا قلب أمك.

ثم انهارت وسندها الشيخ وعمر، أفاقت مرة ثانية في ثوانى
وظلت تبكي، وعندها تذكرنا جميعًا الدجاج والبطاطس! لم أكن
لأربط بين عماد وما يحدث في البيت، تذكرت هند أحداث المطبخ.
- يا نهار أسود الفراخ والبطاطس لأن فعلا مفيش أكل تانى كان
بيختفي! أنا مش فاهمة حاجة هو في عفاريت بتاكل؟
نظرت إلى ياسمين وتنبهت قائلة.

- الكعب العالى ده أكيد هي، تفتكرى هي اللي كانت عايزة
تأذيني؟ ياسمين إنتي شفتي الخيال وسمعتي الكعب معايا.. صح.
جحظت عيون ياسمين وتمتمت.

- صح.
نظرت إلى الحجة سعاد في غل وشهامة.
- كانت بتغير عليه موت.

تمنيت لو أن يمر الوقت فأفقد ذاكرة هذا اليوم، أو هذه الفترة.
- إيه الكلام ده؟ لا حول ولا قوة إلا بالله، يارب أكيد ده كابوس.
هند وليل في حالة ذهول كما جميع الحضور، استكمل الشيخ
استجوابه.

- والصندوق الأثرى جيبته منين؟ لو متكلمتيش والله اتصل
حالا بشرطة الآثار تيجي هنا.

- الصندوق أثرى بس مش أنا اللي سرقته، ومش بتهدد على
فكرة، أنا اشتريته من واحد معروفش ومش من نواحيننا، ده كان
لزوم تكملة الطقوس وكان لازم يكون صاحبه من الأتقياء الورعين،
بعد كده عرفت انه بتاع «سيدي القناوي».

مسحت دموعي وانتابني شيء من القوة عند سماعي سيرة
صندوق «الشيخ القناوي»، تذكرت كلماته وتوجيهاته، الأمانة،
عفت في صلابه.

- جوه الصندوق سيف مكتوب عليه آيات قرآنية، لكن مش
واضحة قوى وقماش قديم، ولبة وشموع وورق وكتاب، كل
الحاجات أثرية وراجعة للشيخ عبد الرحيم القناوي.
نظر إلى الشيخ كأنه يربط الخيوط ببعضها.

- تعرفي يا مريم أن الحاج أمين عامر كان متصوف من مريدي
سيدي «عبد الرحيم القناوي»؟ لا إله إلا الله، واللى متعرفيهوش يا
ست سعاد إن ابنك كان من مريديه هو كمان، وكل ليلة جمعة ونهارها
كان بييجي يصلى ويتصدق، ده شيء غريب والله سبحانه الله.

- سكت الجميع وجحظت العيون ولجّمت الألسنة لا تنفوه شيئاً،
أردت أن أعطيها معلومة لن تسعدها.
- عارفة يا حجة ان ماهر الدجال كان عايز الصندوق وأنا
مرضيتش أديهوله.
- ماهر كان عايزه؟ ده قابض تمنه لأنه كان وسيط البايع، والكلام
ده امتى؟
- وإنتي مسافرة وأنا مرضيتش أديهوله وشيلته في أوضتى.
- الحاجة الوحيدة اللي عملتها صح، قومي هاتى الصندوق
حالا.
- لا أنسي، الصندوق في أسوان، وهيروح شرطة الآثار خلاص.
- أنا هوديكي في داهية لو مرجعش.
- أنا اللي كريمة معاكى علشان مبلغتش، ويا ريت لو تبلفى
الشرطة كده وورينى.
- ثم نظرت إلى البنات في شك.
- بس الصندوق كان عليه قفل كبير أترى مش لاقياه؟ مرة وأنا
بتكلم في الأوضة ملقتهوش وقولتكلم عليه قولتولي منعرفش.
- أقسمت ياسمين.
- والله ما أعرف.
- تابعت ليلي الحوار.
- ولا أنا قتلتك.

- أنا اللي فتحت الصندوق.
انجبت الأنظار نحو هند، وصدمت والدتها وأردفت.

- إيه؟

أكملت هند اعترافها.

- كنت قاعدة لوحدي زهقانة، كنت بحاول مفكرش كثير في موضوع معين، وبصراحة كان عندي فضول، فتحتة بأعجوبة، بالسكينة اللي كتتي دايمًا ماسكاها يا مريم، وبعدها من غير ما أحس لقبت الأوضة بتلف بيا، كأن حد ضربني على راسي، افتكرت ضغطي واطي، لكن كان في خيالات رايحة جاية كأنها بتجري وبسرعة جدًا، رجعت على أوضتي وقفلتها، سمعت باب من الأوض بيتفتح وينفعل بعنف! وفجأة حسيت إني مخنوقة جدًا، وكل حياتي مالهاش لازمة ومفيهاش فايده وقعدت أعيط وحمدي كثير.

سألتها في حيرة منها.

- ليه مكلمتيش حد فينا؟

- مجاش على بالي أكلم حد منكم خالص، ببص جنبى لقيت دوا مريم بتاع الضغط رُحت واخذاه كله من غير حتى ما أفكر، ومدرتيش بحاجة إلا في المستشفى لما بدأت أفوق وروحنا تاني.
عنفتها والدتها.

- يا نهارك أسود يا هند، ليه محدش قالى حرام عليكم؟ ده إنتي حسابك معايا عسير، واستنى لما أقول لأبوكى هيلوع فيكى، اصبرى. همست ياسمين وكأنها تستكشف شيئًا لم يخطر ببالنا من قبل.

- يعنى ده كان السبب في محاولة انتحارك؟
لم تسمع همستها والدة هند، سألتها بدورى.
- وفين القفل يا هند؟

- القفل معايا لما جريت على الأوضة وقفلتها عليا اكتشفت انه في
أيدي، أكيد مكنش قصدى أخده يا مريم ده كان فضول بس.
جاء تعنيف والدتها أقسى.

- رجعى القفل إنتي عايزاهم يبجولنا البيت الله يحرقك، اديه
لمريم توديه للشرطة مع الصندوق.
ردت الحجة سعاد في قوة وعند.

- الصندوق والقفل لازم يرجعوا، الصندوق ده كان بتاع
«سيدي القناوي» وكل اللي كان في الصندوق استعنت به علشان
أحضر روحه، وأسأله على ابني لأجل ما يدلني عليه، بعد ما فشلت
أحضر روح ابني عشان يساعني، لكن ماهر ضحك عليا وقال
تعويذة بتستدعى أرواح شريرة والله مكنتش أعرف، هو منه لله
كان قصده يعمل حاجة في البيت علشان أفضل رايحة جاية عليه،
والفلوس متقطعش لكن اللي جه كان شديد عليا وعليه.
مرت لحظات سكوت وبكاء، ثم استطردت قاتلة.

- وعماد حبيبي مجاش، بدل ما يطلع لي عماد ابني حبيبي تطلعلي
إيمان منها لله كانت روحها خبيثة، ومعرفتش أحبسها ولا هى ولا
اللي معاها، ووقتها واحد من أهل الخير جابلي حد يحبسهم في الأوضة
اللي جو.

كان الدهول هو القاسم المشترك بين كل الحضور دون استثناء أو
مُبالغة، ثم أكملت في غير وعى.

- يا حبيبي يا عماد ياللي فطرت قلب أمك عليك، مكنش قصدي
نموت يا حبيب قلب أمك، كان قصدي أبعدھا، ليه هي مامتش قبل
ما تاخذك مني، هي الحرباية اللي غوته لحد ما بقى مجنون بيھا.

نظر إليها الشيخ في ازدراء وتعجب ثم سأھا.

- یعنی إيهان خطيبتھ مانتحرتش لوحدها؟

(١٧)

هنا وقعت كل الصور المعلقة على الحائط مرة واحدة، وانطفأ النور من جديد، ونسينا أننا في نهار يومنا وقد تحول إلى ليل غطيس، وانتشر الرُعب بيننا، وبينما الجميع مأخوذ بما حدث، رأيت أمامي «عماد» و«إيمان» يدخلان من الباب، «عماد» أراه كخيال لكنه قوى واضح الآن، وإيمان شابة بيضاء طويلة، شعرها بنى مسدول، لم أميز ملابسها، فركت عيني غير مصدقة، لكن ما أراه حقيقي! نظرت إلى الوجوه فوجدتها مازالت متعلقة بالحائط، لا أحد يراهم، أنا فقط أستطيع.

«إيمان» تبدو منفعة وتمسك بيديها علبة كرتون مثل علب الأحذية، «عماد» يرتدى نفس البدلة التي طالما رأيته بها، كُنت أحسبه غير مُهتم لهذه الشئون، لم أكن لأفكر في شيء آخر كالذي أراه الآن، لحق بإيمان ثم أغلق الباب وراءه!

رأى الجميع الباب وقد أُغلق دون لمسه، هنا انطلقت «الله أكبر» من الحضور تُدوى المكان من جميع الألسنة، ولكن الحجّة سعاد لم تخف ونظرت إلى الحائط يمينا وشمالا في تحدى ودموعها سائلة على خدها، صوت بكاء خافت هنا وهناك ولحظات رُعب كأنها الدهر كله.

جلست إيمان في إحدى الزوايا البعيدة غاضبة تبكي ورمت
بالذي تمسكه، فافتتح الصندوق الكرتون قليلاً، فاذا بي أرى
الحذاء الأبيض الذي كان بالصندوق الخشبي العتيق، والذي
انتعلته يوماً ما! لقد كانت هي من تكتب على الحائط.. إنها
«إيمان»، قد سبق وتحاورنا ونحن في عوالم مختلفة، بطريقة مختلفة،
والآن أراها! ثم سمعت حوار بينهما بكت فيه إيمان بحُرقة في
وقت قصير لم أستطع إحصاءه.

- مامتك مش هتسيينا نتجوز يا عماد دى بتكرهني، أنا مش
عارفة عملتلها إيه لكل ده؟

- وبعدين معاكى مش بتقولي بعنتك العشا لما شافتك
موجودة؟

- استغربتها جداً، أول مرة تبقى كويسة معايا، تخيل إنها بعتالي
فراخ ويطاطس المحمرة اللي بحبهم.

- شفنى بقى، اصبري عليها، والله دى طيبة إنتي مش فاهماها،
تعالى ناكلنا لقمة حلوة من أكل أمى بقى، أنا جعان.

- حاضر يا عماد، علشانك أستحمل أى حاجة، بس..

دخلنا إلى الغرفة الرابعة، قمت من مكاني وراءهما لاستكمل
حل اللغز، عقلي قد خُدر وبات في عالمها رُغمًا عنى.
أردف عماد في ضيق يحاول كتبهانه.

- بس إيه تانى؟

- يا عماد الحاجات اللي بشوفها هنا بقت كتير قوي، وأنا
صدقتني مش خوافة ولا مجنونة.

- تانى يا ايمان؟

رايت صينية الطعام امامها، عليها دجاج وبطاطس محمرة،
والسكينة السكينة التى فُتح بها الباب، وأيضًا قفل الصندوق،
والتي طالما أمسكتها بدون سبب واضح! والتي على ما يبدو
استخدمها عماد في تقطيع شرايينه لاحقًا عندما انتحرت ايمان بها
أيضًا.

- تانى وتالت ومليون، أنا بشوف حاجات وبسمع أصوات
عجبية كثيرة كل مرة وأنا بحط حاجاتى في البيت.
- يا حبيبتي تلاقىها ماما فوق بتعمل حاجات.

- لا يا عماد لأ، ده كله في الأوضة اللي إحنا قاعدين فيها دى،
وبالذات من ساعة ما مامتك جابت الصندوق ده هنا، حتى
شكله غريب، آثار ده ولا إيه؟

- ايمان، إنتي بتعمدى هنا كثير لوحدك، طبيعي خيالك يهين
لك حاجات، أصوات كثير حوالينا، صوت الثلاجة في حد ذاته
ممکن يرعبك، عادى يا حبيبتي والله.

بدا عماد غير مُصدق لما تقوله، نظرت له ايمان تتمنى لو أصغى
وصدق.

- يا عماد أرجوك حس بيا في اللي بقوله ده، أنا تعبت، كوابيس
كثير، حاجات بتختفي ومش بتبان، ساعات كثير بسمع كركبة في
الحمام ويطنش، ويقول الصوت جاى من المنور، ساعات بحس
حد ماسكنى من رقبتى، بلاش كل ده، إمبراح الصندوق ده اتفتح
واتفعل كذا مرة وأنا في الحمام، اتبيلى إن حد جرى على بره.

تحدث عماد في سُخرية.

- كمان حد جرى؟

- والمسيح الحي مش بكذب يا عماد، أنت المفروض أقرب حد ليا، المفروض تصدقنى.

- أنا مش بكذبك، إنتي بنفسك قلتي اتيهيألى، لكن نقترض ان فعلا كان في حد بيلعب في الصندوق، حد حرامى، أو حد عايز يخوفك، إزاي والقفل الكبير ده كله عليه.

- مش عارفة هتجنن، نفسي أخلص من الكابوس ده، نفسي أرتاح، أنا كاتمة في نفسي بقالى كتير، ومحدش حاسس بيا، نفسي أرتاح خالص بقى حتى لو هموت بس أرتاح.

- بعد الشر عليكى، إيه الكلام ده!

- الموت مش شر يا عماد، الموت راحة أبدية وسلام.

- مش عايز أسمع الكلام ده تانى بقى، أنا ما صدقت إن الموضوع اتحل من ناحية أهلك وكانوا في منتهى التحضر معايا، موضوع أمى هيتحل، وأوعدك هترتاحي وهرتاح وكل حاجة هتبقى تمام، حبيبتى إحنا مش أول حالة نتجوز، تعصب الناس بس هو اللي خلاه حرام، اهدى يا ايهان بس وأنا هقنعها ومتخافيش.

- ياريت يا عماد، مش كفاية ان أهلى وافقوا وده كان مستحيل، وبعدين لو معرفتش تقنعها والله هموت نفسي أنا تعبت من الدنيا خلاص.

- متقوليش كده أبدًا، ورينى جبتى ليه ياللا؟

- جزمة الفرح.

- شيك قوى الجزمة هسيلها معايا لحد يوم الفرح.

مرت ثوانى وأنا لا أدرى هل أنا يقظة أم نائمة أم أنه عقلى
الباطن أم أصبت بالجنون،

تلاوشوا شيئًا فشيئًا من أمامى، تحركت كروبوت انتهت
بطاريتها، خرجت إلى الجمع في غرفة الاستقبال.

نظر إلى الشيخ في تمعن وسأل.

- كتنى فين يا مريم؟ خليكِ معنا هنا أحسن.

حقيقة، لم أجرؤ على قول شيئًا وأنا أرى الجميع خائفين من
وقوع الصور المعلقة وانغلاق الباب فقط، ما بالهم لو حكيت ما
أراه، أنا الآن ملبوسة في نظرهم، سوف يوصموننى بأثنى السبب
وأثنى من جلبت هذا كله لهم وللبيت، كنت أريد أن أثبت لنفسى
أن من تحركت مشاعرى تجاهه يومًا ما حى يرزق، فهممت ان
أناديه لكنه لم يرانى! كان كل تركيزه أن يُسعد «إيهان»!

دعوت رب العالمين أن ينقذنى مما أنا فيه راجية النجاة، ظللت
أردد «يا مغيث أغثنى يا مغيث أغثنى»، لا بد أن أخاطر وأكشف
ما حدث لأنأكد منه، إنها الأمانة.

ظللت الحجة سعاد تبكي فنظرت إليها وأردفت في اتهام.

- إيهان وعماد متحروش، الحجة سعاد عملت لها سحر لحد ما
البنيت زهقت من حياتها وانتحرت.

نظر إلى الشيخ في شك وتساءل، ونظر ناحية الطرقة سريعاً.
- تقصدي تقولي إن عماد انتحر بعد ما شاف إيمان ميتة؟
- ده الأرجح يا شيخ.

نظر الجميع إلى وسمعت همهمات الاستعاذة ونظرات الخوف
نظل في وجل، جحظت عين الحججة سعاد لكنها لم تنطق بكلمة
واحدة.

لم أجيب الشيخ وثبت نظري على الحججة سعاد، نظر إلى الشيخ
وقد خمن شيئاً ما فنظر بدوره إلى الحججة سعاد وسألها في حدة.

- الكلام ده صحيح يا ست سعاد؟

تملكتها حالة هيسيرية مُربية، نظرت إلينا وتحدثت وكأنها
تصرخ وقد أصبحت عينيها بلون أحمر دموى حتى هُيمع إلى أنها
تدمع دماً.

- مكنش قصدي مكنش قصدي قلت، عايزين إيه.

أردفت في اصرار.

- عايزين نعرف الحقيقة.

صرخت بحدة.

- أيوة عملتلها عمل عند الشيخ ماهر، خلاص.. ارتاحتى،
بعتلها العشا كمان فيه سحر تاكله، لكن عماد حبيبي رجع بدري
يومها وأكل معها على غير عادته بالليل.

نظر الشيخ إليها وقد أمسك سبخته وشرع في الاستغفار ثم
أردف.

- إيه اللي حصل بالضبط؟

لم تنقطع الحجة سعاد عن العويل لحظة واحدة، ثم نظرت له في سُخرية وتحدي.

- يعني كنت فاكرنى هسكت لما أشوفه بيروح لها ويسببني؟ أكيد كانت عاملة له عمل، عملت لها عمل أقوى ولما مجابش نتيجة، عملت سحر أسود، يظهر كان قوى جدًا فعملها مشاكل كثير، لدرجة انها انتحرت، أنا مكنتش قصدى أموتها، كنت عايزة أبعدها عن ابني بس، لكن ليه عماد ابني يموت ليه ليه؟ ليه يروح علشان واحدة متساوئش ومش من توبنا.

ثم جففت دموعها فجأة ونظرت إلى السقف وصرخت في صوت جهورى.

- ليه يارب؟ ليه.. ليه؟

ثم نظرت لنا جميعًا وابتسمت في هستيرية وقالت.

- بس عماد مامتش، عماد عايش، انا عارفة.

أحسست أنها لا تريد أن تفيق من حلمها، تارة تعترف بموته وتارة تؤكد حياته، ساد الصمت وسمعنا صوت الدموع، أردف الشيخ.

- أعوذ بالله من الشيطان الرجيم، أنا كنت فاكرك ست وحشة، طلعتى شيطانة أعوذ بالله، تعملى كده في ابنك الوحيد؟! وفاكرة ربنا هيسيبك؟ إنتي ست مش طبيعية، بس جزائك لازم تاخديه، والناس دى كلها شاهدة، لا حول ولا قوة إلا بالله.

ظل الجميع في ترقب وذهول، وجوه غلب عليها الدهشة،
قلوب ترتجف تستعيز بالله العظيم مما ترى وتسمع.

جففت دموعى ونظرت إلى الشيخ الذي بدأ ينظر إلى الأرض
لثوانى، وفجأة نظر إلى الحائط في ريبة وقال في حزم.

- أنا لازم أقرأ دلوقتى يا جماعة.

سكت الجميع فوراً، بدأ في قراءة «سورة البقرة» حاملاً زجاجة
مياه، ثم قام ريباً في منتصف السورة لا أدري مسترسلاً في القراءة
في المطبخ أولاً ثم جميع الغرف بالتوالى يقرأ القرآن ثم يرش من
المياه التي يحملها على عتبة كل غرفة وفي أركانها في تمهل عجيب.

بينما يقرأ الشيخ أواخر سورة البقرة ونحن نستمع في ذهول
تام، هنا فقط بدأ عقلى يربط الأحداث، لماذا أهملت هذه السيدة
الأحداث المهمة التى مرت بنا وركزت على الغرفة فقط؟
السكينة! التى كان قلبى يُقبض كلما رأيتها لا أعلم لماذا؟ ومع
ذلك كُنت أمسكها بدون داعٍ، نفس السكين فُتح بها الباب،
وفتحت بها هند القفل أيضاً، هل يُعقل أن تكون السكين هي
من قطعت حذائى ومحفظه هند؟ هل يُعقل أن تكون هي الغرفة؟
ولكن غرفة «السنترال» كانت آمنه طوال فترة الأحداث؟! الحذاء
الأبيض (الكعب العالى)! صوت ملاحقة الحذاء الرجالي للكعب
العالى هو نفس الصوت الذي سمعته اليوم عند دخولهما! ايبان
الغاضبة وعماد المُحب.

وقف عمر مذهولاً مكتوف الأيدى غير مُصدق ما يسمع أو

يرى، هنا فهمت مغزى أن تاتى ياسمين بعمر إلى الشقة مجازفة
احتمالات كثيرة، أرادت ياسمين أن يستمع عمر لكلام الشيخ
الوقور بعد أن ينتهي من قراءة القرآن، أرادت أن يصدقها بعد
أن كذبها وشك في تصرفاتها مرارا وتكرارا! أرادت أن تراه يعتذر
لها ولو بعينه، كان تصرفا ذكيا لا يخلو من مخاطرة كبيرة، لا بد أنها
تجبه بشدة.

سكتت الحناجر وبدأت الأعين تتجه نحو الحجة سعاد
مستفسرة ومُستنكرة، كانت هي الأخرى تشعر بالغضب وقد
أيقظنا ماضيا كانت قد طوته، فاذا به يعاود الظهور أمامنا الآن
ويفضحها، نظر الشيخ إليها في حنق فانفجرت.

- إيه.. بتبصولى كده ليه؟ مكنش عندى غيره، جنبته على
كبر، ومات شاب زى الورد ملحقتش أفرح بيه، مكنتش قادرة
أستوعب انه خلاص مشى وأنى هكمل لوحدى، حاولت أروح
له معرفتش، حلفت لأجيبه تانى حتى لو هستعين بإبليس نفسه،
خلاص عرفتوا وارتاحتوا؟ يا رب تنولوها كلكم عشان تحسوا
بيا، وبعدين محدش له حاجة عندى، أنا طالعة البيت أرتاح،
ساعتين زمن تكونوا لميتوا هلاهيلكم ومشيتوا، المفتاح عاوزاه
بعد ساعتين اتنين.

تركتنا وانصرفت إلى منزلها ونحن لم نفق من ذهولنا بعد
وعيوننا مازالت تراقبها إلى أن اختفت من أمامنا، عقب الشيخ.
- كلموها تانى خلوها تمدلكم كمان ساعة إضافية، عشان

تلقوا تلموا كل الحاجات دى، لازم أبلغ البوليس ياخدوا
اجراءاتهم دى أمانة هنتحاسب عليها، لا حول ولا قوة إلا بالله،
وانتي يا مريم ده تليفونى يا بنتى، أنا عايزك.

وعدت الشيخ بالاتصال، لم آخذ كل متعلقاتى، كُنت خائفة
منها، فقط بعض الأشياء التى أعتبرها ذات قيمة، جمعتها وتركتها
عند سمر زميلتى بالكلية، ثم تفرقنا كل إلى وجهته، ذهبت أنا
وياسمين وأخواتها وزوج يسرا إلى فندق «بسمه» وبالطبع رجعت
هند ووالدتها إلى الأقصر ولم أهتم بالسؤال عن ليلي ووالدتها.

كنت شديدة التأكد أن عمر لن ينام ليلتها، سوف يعيد حساباته
مع نفسه، إن عوالم الجن والسحر مذكور في القرآن الكريم وفي
جميع الأديان، لا بد من تحصين أنفسنا بالتقرب إلى الله، لكنه رغم
مجازفة ياسمين لم يعتذر ولم يتقرب إليها أبدًا بعدها، لعله لم يكن
يجبها حقًا منذ البداية.

(١٨)

بعد غد تبدأ أول امتحاناتي وياسمين سوف تبدأ امتحاناتها غدا، تستغرق فترة الامتحانات شهراً تقريبا، لم نذاكر أي مادة ولا نتذكر شيئاً على الإطلاق، اتصلت بيازن بعد أن وصلنا الفندق ثم ذهبت إلى بيته مباشرة، استقبلتني زوجته بود وترحاب، شرح لي ما فاتني تبعا لجدول الامتحانات.

كنت أستذكر بنصف عقل، النصف الثاني مازال يفكر فيما حدث شارداً، كأنه كابوس طويل وأخيراً عُدت لحياتي الطبيعية. أذهب إلى الامتحانات مرتين في الأسبوع وياسمين مرتين أيضاً بتبادل الأيام، كانت تكلفة الفندق باهظة، فما نفقه في ثلاثة أيام هي قيمة ايجار ثلاثة أسابيع في هذه الفترة من السنة، حيث من الصعب إيجاد شقة للايجار أو مكان شاغر في بيت طالبات خاص.

ذات ليلة كنت أنا وياسمين في بهو الفندق نذاكر، فجاءنا عمر حاملاً عشاء، سلم علينا ولمحت نظرة اعجاب في عينيه تجاهي فتجاهلتها، ترك ما بيده وانصرف.

أخيراً وفي نصف فترة الامتحانات وجد لنا سمسار عقارات

«ستوديو» يقع في منطقة «حوض ١٠»، وهي منطقة راقية وهادئة، وكانت الأقرب لبيت مازن فزادت ساعات المذاكرة يوميًا، ولكنني قد أصبت برهاب السكن فاشتريت لوحة كبيرة عليها آية الكرسي وعلقتها بها قبل أن أسكن.

كان مازن يذكر لي المواد عشوائيًا، أذاكر شيء بعينه فيأتي في الامتحان بعدها، سألته إن كان يعرف الأسئلة مسبقًا؟ فأجاب لو أنه يعرفها ما كان ليساعدني، إنها الأمانة.

كانت يسرا وزوجها وهبه قد استعدوا للسفر عائدين إلى عملهم بعد أن أعطونا الوصايا العشر. لا أنسى وقوف عمر بجانبني في هذه الأثناء مثله مثل مازن، كان يسأل يوميًا ولا يتأخر عن فعل أي شيء يهون علينا، فقد لمس ما عانيناه طوال الفترة السابقة ولم يصدق هو، كانت ياسمين تعرف ما يدور بيننا، فألحت على بالتوسط لإصلاح ما فسد، لكن عمر باعها أو فقد حبه ولطفته إليها.

هند تطمئن علينا بين الحين والآخر، استقرت في بيتها بالأقصر، تحب وتذهب إلى الامتحانات يوميًا، تشكي شدة الإرهاق من المواصلات يوميًا، ليلي أيضًا كانت على اتصال بنا ليس بغرض الاطمئنان بل لمتابعة الأخبار، ألم أقل لكم إنني بدأت أنظر لهم من جديد وقد كشفت الحقائق ما خفي، إن شعار ليلى الدائم هو «مصلحتي مصلحتي»، كانت تمكث عند أقرباء زوج شقيقتها ومن الواضح أنها لم تنسجم معهم، فلما علمت بتأجيرنا هذه الشقة الصغيرة أنت لتمكث معنا مجانًا!

استضيفتها وتحملتها أنا وياسمين على مريض غير مُستتر إلى أن انتهت فترة الامتحانات في سلام وعادت كل منا إلى بيتها أخيرًا.

في تلك الأيام لم يكف مازن وعمر عن السؤال عني ومتابعتي، فمازن صديق العائلة وأهل للثقة، وعمر قد منحته عيناى جوابًا شافيًا لما يفكر فيه فالتزم الصمت ورفع راية الصداقة.

أرسلت والدة هند قفل الصندوق، تولى أخى المهمة عندما جاء في إجازته بعد أن قصت عليه أمى وجدتى ما حدث، وسُلم الصندوق بكل محتوياته.

تم التحقيق مع الحجة سعاد في واقعة قتل ايمان وانتحار ابنها، وواقعة التستر على سرقة آثار، والآن هى مريضة بمستشفى الأمراض العقلية، أما الدجال ماهر فقد وجده رجال الأمن مقتولا قبيل القبض عليه، مات الرجل مُحزق العينين، مقطوع اللسان، وقد قُطعت بعض أجزاء من جسمه ولم يُستدل على مكانها، الطب الشرعى أفاد أن عملية التقطيع تمت قبل تسليم الروح، أى أنه تعرض لجلسة تعذيب كُبرى! جارى البحث عن الجانى دون نتيجة.

بعد مرور شهر من رجوعى أسوان وإلى حياتى الطبيعية، جاءني اتصال هاتفي من سمر ذات يوم.
- الو.

- أنا مش قادرة أصدق نفسي! إنتي عارفة إنتي جيتى كام؟
جاء صوت سمر لا يوحى بفرح أو حزن، سمعت صوتها

المصدوم جيدًا، أخفق قلبي كما لم يخفق من قبل، تخيلت أبى رحمة الله وهو حزين لرسوبى، تخيلت أمى وجدتى وأخوتى عند سماع الخبر فكادت سماع الهاتف تسقط من يدي، فتمالكت نفسي وأجبت بتوجس.

- جبت إيه يا سمر؟

رقص صوتها فرحًا.

- جبتى أربعة جيد جدًا وواحدة امتياز!!!

عندها ألقى الهاتف على الأرض، وعرقت عرقاً غزيراً مفاجئاً، أحسست أنى أمسك ثلج فى يدي، لقد رأيت غفران ربي الآن أمام عيني، فما لاقيته من بداية السنة الدراسية إلى آخرها قد لقتنى دروسا كثيرة لن أنساها ما حييت، لقد نصرنى الله الآن من أجل أهلى.

ناديت أمى بأنفاس متقطعة.

- ماما.. ماما... الحقينى.

جاءت أمى مسرعة فشاهدت الهاتف ملقى على الأرض ووجهى يغطيه العرق ففزعت.

- فى إيه يا مريم؟

- أنا جبت أربعة جيد جدًا وواحدة امتياز!

لم تصدق أمى.

- بجد؟

جاءت جدتي مستندة على ربهام وعصاها من داخل الغرفة.

- سمر قالتل إنها شافتها؟

أرادت أُمى أن تتأكد وقد خالجتها مشاعر متضاربة.

- لا لا كلمى أي حد ثاني اتاكدي.

اتصلت بكثير من زملائي ليتأكدوا، واتصلت أُمى بهازن الذي أكد لها النتيجة مباركًا.

كانت الفرحة تعم البيت لأول مرة منذ وفاة والدي الذي كنت أتمنى أن يأخذني في حضنه، الآن يا أُمى أستطيع أن أهديك ما تمنيت، أتراك ترانى؟ هل أحسست بكل ما حدث؟ لا أريد إلا أن تفرح بابنتك، لا أن تتألم أو تقلق، فقد أصبحت كما أردنا سويًا.

اتصلت بياسمين وهند فأتانى صوتهم مباركا فرحا رغم أنهم رسبوا هذه السنة لكن ليلى لم تستطيع أن تخفي حقيقة شعورها كعادتها معلقة «مممم.. إزاي ده يا مريم؟ ده كلنا شايلين مواد وياسمين هتعيد السنة؟»

وفي ليلة لن أنساها ما حييت، وفي مُنتصف الليل كنت أقرأ رواية جديدة في غرفتي، في أمان تام قد اعتدته بعض الشئ، أحسست بحركة غريبة خلفي، خفت وميض النور للحظات ثم عاد كما كان، التفت فوجدت عماد يجلس على طرف الكنبه، ينظر إلى ويبتسم، سقط الكتاب من يدي وفغر فاهى عن آخره، دقات قلبى القوية المتلاحقة منعتنى من إصدار أى صوت، قام من جلسته وانجبه نحو الباب واقفًا، ابتسم في حنو وقال.

- مش هنسى جميلك يا مريم، الحقيقة كانت لازم تبان، والحق يرجع لأصحابه، الأمانة حاجة صعبة جداً، لكن الإنسان اختار هملها بكل غرور، أشوفك على خير إن شاء الله، السلام عليكم.
خرق الباب واختفي، وأنا ما زلت على نفس حالتي، تمتت وعليكم السلام ورحمة الله، بقيت هكذا مدة من الزمن لا أعرفها، ليلتها وبعد أن هدأ قلبي تروضأت، فقامت الليل لله حامدة مُستغفرة مُسبحة لعله يرحمني.

لم أنس شيخ مسجد «عبد الرحيم القنائي»، وهو الذي صدقني عندما عنفني المُستشيخ، بحثت عن رقمه وهممت بالاتصال وفعلت.

- السلام عليكم يا شيخ.. أنا مريم من أسوان.

- وعليكم السلام أهلاً يا مريم، طمئني عليكى، إن شاء الله خير؟

- خير الحمد لله يا شيخ ومفيس حاجة ونجحت كمان.

- الحمد لله على جميع الأحوال.

- أنا لسه بشوف حاجات يا شيخ، مش عارفة أقلق ولا اعمل إيه.

- أنا عارف إنك بتشوفي، أنا عارف إن ده مش حاجة سهلة، لكن روحك نقيه، أنا عارف كمان إنك شفتى عماد وإيمان ليلتها، ودخلتى وراهم، لكن كنت واثق مش هتأذى بأمر الله،
- يعنى حضرتك شفتهم زى؟

ضحك الشيخ في عفوية ثم عادت نبرته قلقة بعض الشيء.
- طمئني يا مريم، في أى أذى يا بنتي.
- لا الحمد لله مفيش وبنام عادي وبصلي وكله.
- الحمد لله رب العالمين، طيب قوليلي يا مريم.. اليوم اللي
سألتيني فيه عن الشيخ اللي في منامك، عرفتي...
قاطعته وقد ملأ قلبي اليقين.
- أنا عرفت هو مين يا شيخ.
- محدش يعلم الغيبات إلا الله وحده، اللي حصلك شيء
جميل.

- أكيد هو يا شيخ، أنا مریت بحاجات غريبة وعمري ما
حكيت عنها.

- ومتحكيش لأن محدش هيصدق، كل دى غيبات يا بنتي،
وربنا سبحانه وتعالى هو مُسير الكون وخالق الأسرار، لما سألتيني
عليه في المسجد مجاوبتش لأني أنا كمان شفته زيك، وعايزك تعرفي
إنها نفحة من عند الله للناس اللي قلوبها صافية، علشان كده
أوصيتك تخلى قلبك صافي وعامر بالايان، عموماً الكلام في
الموضوع ده ميخلصش، لو جيتي قنا زيارة معاكي رقى تعالى
زيارة للمسجد.

- أنا وعدت نفسي أزوه كل فترة وأصلى في المسجد ان شاء
الله.

- طيب يا مريم خلى بالك على نفسك، داومي الاستغفار فإنه

كُنْ لا يَفْنَى، وَقَوْلِي دَائِبًا «اللَّهُمَّ افْتَحْ لِي خَزَائِنَ فَضْلِكَ، وَأَبْوَابَ رَحْمَتِكَ، وَامْنَحْنِي مَوَاهِبَ بَرِّكَ، وَوِاسِعَ نِعْمَتِكَ، وَأَكْرَمْنِي بِمَا أَكْرَمْتَ بِهِ أَحْبَابَكَ يَا حَيُّ يَا قَيُّوْمُ».


- اللَّهُمَّ آمِينَ.

وَدَعَتِ الشَّيْخَ فِي سَلَامِ نَفْسِي لَمْ أَعْهَدَهُ مِنْ قَبْلِ، وَاسْتَقْبَلَتْ اتِّصَالَ مَازِنٍ مُبَارِكًا مُؤَكَّدًا أَنَّ اللَّهَ قَدْ اسْتَجَابَ لِمَدْعَوَاتِ أُمِّي، وَأَنَّهُ قَدْ عَلِمَ مِنْ أُمِّي بِمَا حَدَثَ، وَاعْتَذَرَ أَنَّهُ لَمْ يَصِدُقْنِي مِنَ الْبَدَايَةِ، وَلَكِنَّهُ عَلَى كُلِّ الْأَحْوَالِ دَرَسَ مِنَ اللَّهِ أَنَّ نَلْتَزِمَ طَاعَتَهُ، وَنَتَخَيَّرُ أَصْحَابَنَا.

لَمْ أَكُنْ فِي حَاجَةٍ لِسَمَاعِ نَصَائِحِ مَازِنٍ عَلَى الْإِطْلَاقِ، فَقَدْ تَعَلَّمْتُ الدَّرْسَ وَأَنْفَقْتُ فِي تَعَلُّمِهِ الْكَثِيرَ مِنْ وَقْتِي وَصِحَّتِي الْبَدْنِيَّةِ وَالْعَقْلِيَّةِ، وَجَازَفْتُ مُجَازَفَةً لَنْ تُنْحَى مِنْ ذَاكِرَتِي مَا حَيَّيْتُ، يُوجَدُ الْكَثِيرَ مِنَ الْأَشْيَاءِ فِي هَذِهِ الدُّنْيَا نَعْتَقِدُ أَنَّ أَكْبَرَ مِنْهَا وَيُصَوِّرُ لَنَا فَضُولَنَا نَحْوَ الْمَجْهُولِ وَغُرُورَنَا أحيانًا أَنَّنَا نَسْتَطِيعُ، عِنْدَمَا يَسِيطِرُ عَلَيْنَا هَذَا الْإِحْسَاسُ وَالْغَطْرَسَةُ تُنْسِينَا شَيَاطِينَنَا اللَّهُ، وَتَجْعَلُنَا نَعْتَقِدُ وَاهِمِينَ أَنَّ أَدَاءَ الْفُرُوضِ يُغْنِي عَنْ تَجْدِيدِ الْإِيْمَانِ وَالتَّمَسُّكِ بِحَبْلِ اللَّهِ، وَلَا نَنْتَبِهَ أَنَّ فِي حَقِيقَةِ الْأَمْرِ نَوْذَى الْفُرُوضِ بِأَجْسَادِنَا فَقَطْ، فَمَا أَسْهَلَ حَرَكَاتِ الْجَسَدِ، وَالتَّوَاءِ اللِّسَانِ بِكَلَامِ لَا نَعِيهِ وَلَا نَعْطِيهِ حَقَّهُ، فَالْعَقْلُ يَلْهُو بِكُلِّ شَيْءٍ فِي دُنْيَاهُ، نَهْتَمُّ لِلْمَاضِيِ وَالْمُسْتَقْبَلِ وَلَا نَعْطَى الْحَاضِرَ حَقَّهُ، وَتَذْهَبُ قُلُوبُنَا تَارَةً فِي حُبِّ زَائِفٍ، أَوْ كُرْهِ مُبَالِغٍ فِيهِ، وَيَغِيبُ الْخُشُوعُ، نَرُدُّ مَعَ كُلِّ صَلَاةٍ «اللَّهُ أَكْبَرُ» وَلَكِنْ لَا نَتَبَيَّنُ حَقِيقَةَ مَعْنَاهَا، مَعْنَاهَا الَّذِي يَعْطَى الْحَيَاةَ سَلَامَهَا

وجمالها، نصوم عن الطعام والشراب فقط ولا تصوم شهواتنا، لا نتبعد عنا آثامنا الكبيرة لأنها أصبحت عادة، نحج إلى البيت الحرام ونعود إلى سابق عهدنا تمامًا، نبتعد تدريجيًا عن السلام، ويتلاشى الخلاص، عندها يصبح الحرام مُمكنًا ثم مُباحًا، فنُطلق عليه «حرية»، في تجرّبتك قد تخسر أعز ما تملك، قد تخسر نفسك، وقد تخسر عقلك وقد تخسر قلبك، أو تخسر هويتك ومبادئك إلى غير رجعة! لأننا ننسى احتمالات الخسارة عند التجربة.

تعلمت أن أعرف حدودي وأطوقها، وتعلمت أن علاقتي مع رب الكون ليست لها حدود، لقد كان الله رحيمًا بي أشد الرحمة، عصيته فسترني، وأيقظني من غفلتي فندمت، وأعلنت التوبة فنجانني.



كُنتُ بصحبته نستمع إلى خرير الماء الآتي من نافورة بوسط
فناء البيت، جاءني صوته عذباً يختم تلاوته من القرآن الكريم
﴿وَأَعْبُدْ رَبَّكَ حَتَّىٰ يَأْتِيَكَ الْيَقِينُ﴾ صدق الله العظيم.

انتهى والتفت إلى ورايته يتسم في عذوبة، بادلته الابتسامة
وأنا أكاد أطير في الملكوت، وتمنيت أن أبقى معه، لا آبه أين أو
متى، لاحت أفكارى بعيني التي تعودت أن تبوح له بكل شيء،
وكما تعودت منه أن يفهمها دون بوح، فقال في ود وصفاء.

- نعم تستطيعين ما دام النقاء خليلاً، ونعم أستطيع ما دام
شكر الله على نعمه قائماً.

إلى أن ألقاك يا سيدي.. سلام الله عليك وعلينا ورحمته
وبركاته.

تمت

شكر خاص

ياسمين الدنون	عيد جوهر
أحمد سلامة	أحمد عبد المجيد
محمد الجيزاوى	وائل نبيل
سمر موسى	أحمد جوهر
إبراهيم أبازيد	أمينة أبازيد
شيرين إدريس	أحمد حمدى



الأعمال الكاملة

t.me/kotbhm

يحدث ليلاً في الغرفة المغلقة

تذهب "مريم" للدراسة في مدينة غريبة عليها في صعيد مصر، وهناك تستأجر شقة مع رفيقاتها، تؤكد عليهن صاحبة المنزل عدم فتح الغرفة رقم "4" في الشقة مهما حدث، أربع فتيات مكثن في شقة واسعة كئيبة وغريبة مكونة من أربع حجرات، تضطر فتاتان منهما الإقامة في غرفة واحدة، ومع الوقت والملل واعتياد الشقة يفتحن الغرفة رقم "4" وبعد ذلك تبدأ كل اللعنات في الحدوث، كل التاريخ الأسود لتلك الشقة وما حدث فيها وتلك الغرفة والصندوق المغلق الموجود بداخلها وكل تلك الأشياء التي تمشي حولهن ولا يمكنهن مشاهدتها وكل تلك التواشيح والذكر والصلاة والخوف والرعب والإنهيار.

هذه رواية أدبية بديعة، كتبت بإحساس صوفي وملامح إنسانية، لكننا لم نخلو من رعب وغرائب، هل ستتحرر مريم من أثر الغرفة المغلقة، هل سيأتي النهار على مريم مرة أخرى؟ وهل روح الإمام ستعود إلى حيث أتت في سلام؟ والسؤال الأهم كيف سينتهي كل ذلك؟!

مروى جوهر



كاتبة وروائية مصرية، عملت كمضيفة طيران، ثم تفرغت للكتابة، كتبت في جريدة الدستور ومجلة عين وتكتب بشكل دائم في عدة مواقع الكترونية، درست الإخراج السينمائي بقصر السينما بالقاهرة وشاركت في العديد من الأفلام القصيرة والوثائقية، صدر لها كتاب بعنوان "هات م الآخر" عام 2013 وكتاب بعنوان "المضيفة 13" عام 2015، وتعد رواية "يحدث ليلاً في الغرفة المغلقة" هي روايتها الأولى والتي يجري حالياً إنتاجها كعمل سينمائي.

ISBN 978-977-847-095-8



9 789778 070958 >

دون
للطباعة والنشر